

საქართველოს მეცნიერებათა აკადემია

მ. ჯავახიშვილის სახელობის ისტორიისა და ეთნოგრაფიის ინსტიტუტი

გ. გრიგოლია

ეგრის-დაჭიკის სამეფოს საისტორიო გეოგრაფიის პრობლემები



„მეცნიერება“

თბილისი

1994

ნაშრომში განხილულია გეიანრომაული და ადრებიზანტიური ხანის ეგრის-ლაზიკის სამეფოს საისტორიო გეოგრაფიის პრობლემები. უახლესი არქეოლოგიური აღმოჩენების, წერილობითი წყაროების ახლებური ინტერპრეტაციისა და შესაბამისი ტოპონიმიკურ მასალის შესწავლის საფუძველზე, მოხდა ციხე-ქალაქების — პეტრასა და სებასტოპოლისის — ახლებური ლოკალიზაცია.

სათანადო ყურადღება ეთმობა კოლხეთის სამეფოს სამხრეთ-დასავლეთ საზღვრების ცვალებადობის სურათის გაშუქებას და ძირითადი საგზაო მაგისტრალების მიმართულებათა გარკვევა-დაზუსტებას. მოცემულია ეგრის-ლაზიკის სამეფოსა და რომის იმპერიას შორის ახ. წ. II—VI სს. არსებულ სამხედრო-პოლიტიკურ ურთიერთობათა გარკვევის მცდელობა.

რედაქტორი ისტ. მეცნ. დოქტორი მ. ი ნ ა ძ ე

რეცენზენტები ისტ. მეცნ. დოქტორები: გ. ლ ო რ თ ქ ი ფ ა ნ ი ძ ე,
დ. ბ ე რ ძ ე ნ ი შ ვ ი ლ ი

ეუძღენი მამის კონსტანტინე
გრიგოლიას ნათელ ხსოვნას
ავტორი

შ ე ს ა ვ ა ლ ი

საყოველთაოდ ცნობილია, რომ საქართველო უძველესი კულტურის მქონე ქვეყანაა. მისი მთა, მისი ბარი, მისი აღმოსავლეთი თუ დასავლეთი ამის მაუწყებელი სხვადასხვა ხასიათისა და ასაკის ისტორიულ-არქეოლოგიური ძეგლებით არის შოფენილი.

როგორც მრავალფეროვანია საქართველოს ბუნება, მისი სანახები, ასევე მრავალსახოვანია მისი კულტურული ძეგლები. ქართლ-კახეთში, მესხეთ-ჯავახეთში, მთაში, ბარში თუ ისტორიული კოლხეთის ტერიტორიაზე, თითქმის ყოველ ნაბიჯზე შეიძლება შეხვდეთ ჩვენი ნათელმოსილი წინაპრების დაუღალავი შრომითა და ბრძოლით შექმნილ სხვადასხვა დროის სამოსახლოებს, საწარმოო ნაშთებს, სამეურნეო, აკულტო და სხვა ხასიათის არქეოლოგიურ ძეგლებს. სწორედ ამიტომ არის, რომ ხშირად გავიგონებთ სავსებით სამართლიან გამოთქმას: „დალოცვილია საქართველოს მიწა, სადაც არ უნდა დაარტყა ბარი, ყველგან რაღაც ახალ, საინტერესო რამეს წააწყდებიო“.

მადლიანი ქართული მიწის მრავალსაუქუნოვანი ისტორიის ეს უტყუარი საბუთები მით უფრო საინტერესოა, რომ ყველა კუთხის მსგავსი ხასიათის ძეგლები, გეოგრაფიული ზონალობისა თუ ფიზიკურ-კლიმატური პირობების გავლენით, მხოლოდ მისთვის დამახასიათებელი სპეციფიკური ნიშან-თვისებებით ხასიათდება. სამაგალითოდ შეიძლება განვიხილოთ დასავლეთ საქართველო. გარკვეული თვალსაზრისით, ეს უნიკალური გეოგრაფიული რეგიონი ჩრდილოეთიდან შემოზღუდულია კავკასიონის მაღალი მთებით, სამხრეთიდან მცირე ანუ „ანტიკავკასიონით“ (აჭარა-ლაზეთის მთიანეთი), აღმოსავლეთიდან ამ ორი მთიანეთის შემაერთებელი ლიხის ქედით და დასავლეთით მისი სამკუთხა კონფიგურაციის მქონე ვრცელი გავიქება შავი ზღვის აღმოსავლეთ სანაპიროს ებჯინება. ამ მიკრო რეგიონში, სადაც ერთიმეორის გვერდით საფეხურებად არის წარმოდგენილი: დაბლობი, გორაკ-ბორცვიანდ ჰეზლი, მთიანეთი და მაღალმთიანეთი, ადამიანი ქვის

ხანის უძველეს საფეხურზე (აშელი) დასახლებულა და აქვე გაუვლია განვითარების ყველა საფეხური.

როგორც უტყუარი ფაქტიური მონაცემებით დასტურდება, გეოლოგიური, ფიზიკურ-გეოგრაფიული და სამეურნეო პირობების გავლენით, როგორც ჩანს, ძველი ქვის ხანის ადამიანს, სამოსახლოების შერჩევისას, უპირატესობა მიუცია საშუალო სიმაღლის მთიანი ზოლის მდინარეთა ხეობებში გავრცელებული მაღალი ტერასებისა და მღვიმე-ფარდულეებისათვის (ეხები). მომდევნო ხანაში კი ფართოდ აუთვისებია გორაკ-ბორცვიანი ზოლი და ჰიფსომეტრულად ყველაზე დაბალი დონის აღმოსავლეთ შავიზღვისპირეთის გავაკება, რომელიც კოლხეთის დაბლობის სახელით არის ცნობილი.

ყველგან იქ, სადაც ამა თუ იმ ტერიტორიას თანამედროვე ცივილიზაციის მსახვრალი ხელი ჯერ კიდევ არ შეხებია, უძველესი ნამოსახლარები (რომლის ირგვლივ თავს იყრის ყველა ხასიათის ძეგლი) კარგად არის წარმდგენილი ბუნებრივი თუ ხელოვნური ბორცვების სახით. იმ განსხვავებით, რომ ბუნებრივ ბორცვებზე წარმოქმნილი, შედარებით ადრეული ასაკის გორანამოსახლარები, უპირატესად, ქვეყნის შიდა რაიონებში გვხვდება. კოლხეთის დაბლობზე კი მხოლოდ და მხოლოდ ხელოვნურად შექმნილ გორაკ-ბორცვებზე წარმოქმნილი ნამოსახლარებია მოქარბებული.

ამ ნამოსახლართა აბსოლუტური უმრავლესობა წარმოშობილია ვაკე ადგილზე, სამოსახლოს დამცავი თხრილიდან ამოღებული ნიდაგის მოზვიენვითა და დროთა განმავლობაში კულტურული ფენების დაშრეების შედეგად.

როგორც ცნობილია, კოლხეთის ბარის ფარგლებში ამ რიგის პირველი სამოსახლოები ჩნდებიან ადრე და შუაბრინჯაოს ხანაში, რაც, ფაქტიურად, დასტურდება ოჩამჩირის ბორცვების, ანაკლიას დიხაგუძებასა და ქობულეთის ისპაანის ნამოსახლართა სახით. ასევე ერთეულების სახით გვხვდება შუა და გვიანბრინჯაოს ხანის ფენების შემცველი გორანამოსახლარები (ანაკლიას დიხაგუძება II, თეკლათის ნაოხვამუ, გალის ფიჩორის ნამოსახლარი, ჭალადიდის ზურგა, საგვიჩიოს კონძა, ნოსირის ბორცვების ჯგუფი და სხვ.) კოლხეთში. ყოველ შემთხვევაში, გვიანბრინჯაოს ხანისათვის კოლხეთის ბარი ჯერ კიდევ არ იყო ფართოდ ათვისებული.

ამ მხრივ სურათი არსებითად იცვლება წინარეანტიკურ და ანტიკურ ხანაში. თუ ენგურ-რიონის შუამდინარეთში გამოვლენილი სურათის მიხედვით ვიმსჯელებთ, ამ პერიოდში გორანამოსახლარები სო-

კობევიტ არიან მოფენილნი, რაც რეგიონში მომხდარი დემოგრაფიული აფეთქების უტყუარი მაჩვენებელია.

ცალკეულ ნამოსახლართა რიცხობრივ მატებასთან ერთად, არსებითი მნიშვნელობა ენიჭება იმ ფაქტს, რომ ამ დროის კოლხეთის ბარში თვისებრივად იცვლება სამოსახლოთა მასშტაბები, დაგეგმარება, ურთიერთმიმართება. ისინი მთელი რიგი სპეციფიკური ნიშან-თვისებებით ხასიათდებიან, რაც უცხოა ერთეული გორანამოსახლარის სახით წარმოდგენილ, უფრო ადრინდელი ხანის ნამოსახლარებისათვის.

წინარეანტიკური ხანიდან მოყოლებული, კოლხეთის ნამოსახლარები ბორცვების ჭგუფებით არიან წარმოდგენილნი, ე. ი. ცალკეული სამოსახლო, იშვიათი გამონაკლისის გარდა, შედგება ორი, სამი, ოთხი და მეტი ბორცვისაგან. როგორც წესი, ასეთი ნამოსახლარი ბორცვების ჭგუფიდან ერთ-ერთი მათგანი ყოველთვის გამოირჩევა სიმაღლით (ზოგჯერ 5—6 მ აღმატება), მზლუდავი თხრილის სიდიდით თუ რაოდენობით (ზოგ ძეგლს ორი თხრილი საზღვრავს) და მას დასახლებაში ცენტრალური ადგილი უკავია. ასეთებია: სირიაჩქონის ოხოჯე, საგვიჩიოს ზურგა (სენაკის რ-ნი), ქვალონის დიხაზურგა, ნამარანუ (აბაშის რ-ნი), ხეთას ოტორონჯე (ხობის რ-ნი) და სხვ.

კოლხეთის დაბლობის ხსენებული სამოსახლოების მეორე თავისებურება იმაში მდგომარეობს, რომ სამოსახლო ბორცვების ჭგუფს გარს აკრავს ერთიდან ხუთ ჰექტრამდე ფართობის მქონე, საერთო რელიეფიდან ოდნავ შემადლებული, თხრილშემოვლებული, წაგრძელებული მოედნები, რომლებიც არხების საერთო სისტემით არიან დაკავშირებულნი სამოსახლოსთან. ასეთი მოედნები, როგორც წესი, თითქმის თავისუფალია კუოტურული ნაშთებისაგან; მიმდებარე გარემოსთან შედარებით, მათი ნიადაგი უფრო მშრალია და, როგორც ჩანს, კონკრეტული სამოსახლოს სამეურნეო ფართობებს წარმოადგენენ. რაც უფრო დიდია სამოსახლო, მის უფრო დიდია მისი სამეურნეო ფართობი და რთულია მისი საარხო სისტემა. ასეთი ნამოსახლარებია: დღეაბა, წინაგოლა, ბულიცხუ, ოტორონჯე, ოყუნე, ქვემო ქვალონი, ნამარანუ, საგვიჩიო, ნანდეუ, ნაღმიპიჯი და სხვ.

ნამოსახლარი ბორცვები, სამეურნეო მოედნები, მათთან დაკავშირებული არხები და თხრილები, ე. ი. სამოსახლოს სრული კომპლექსი, უმთავრესად, კოლხეთის დაბლობის მხოლოდ იმ მონაკვეთებშია შემორჩენილი, რომლებიც ადამიანის აქტიური საყოფაცხოვრებო თუ სამეურნეო საქმიანობის სფეროში ჯერ არ მოქცეულა. ასეთებია: ლანჩხუთის რაიონის მდ. ფიჩორის მარცხენა სანაპირო, რიონ-ფიჩორის

შუამდინარეთი, ხობის რაიონის ტყის მასივები და ზუგდიდის რაიონის ზღვისპირეთის მომიჯნავე ზოლი. ამ ნაკრძალი ფართობების გაუვალე ქაობები და ხშირი ტყის საფარი, მართალია, ერთი მხრივ, აძნელებს ხსენებული ძეგლების მეცნიერულ შესწავლას, მაგრამ, მეორე მხრივ, იგივე ფაქტორები საიმედოდ იცავენ ცივილიზაციის გამანადგურებელი ზემოქმედებისაგან ამ უნიკალურ ძეგლებს.

სენაკისა და ხობის რაიონის ტყეებში არსებული ზოგიერთი ნამოსახლარი (საგვიჩიო, ნაღმიპიჯი, ოტორონჯე), ყველა თავისი კომპონენტით, დღემდე იმდენად კარგად არის შემონახული, თითქოს სულ ცოტა ხნის წინ მიეტოვებინოს იგი ადამიანს. ერთი ასეთი ნამოსახლარის აეროფოტო, ალბათ, ფასდაუდებელი მასალა იქნებოდა ყველა რანგის მეცნიერული თუ სახელმძღვანელო ნაშრომისათვის.

კოლხეთის ბარის გორანამოსახლართა კიდევ ერთი საინტერესო თავისებურებაა გარკვეული შუალედებით გავრცელება რომელიმე პატარა მდინარის, ან მასთან დაკავშირებული არხის გასწვრივ. ცალკეულ სამოსახლოს შორის საშუალო მანძილი 1,5—2,0 კმ-ია, მაგრამ არა უმეტეს სამი კილომეტრისა.

შედარებით უკეთ შემონახული ძველი ნაარხალები შემორჩენილია სენაკისა და აბაშის რაიონებში. ესენია: სოფლების — III ნოსირის, ზანათისა და ძიგურის — ტერიტორიაზე გამავალი დიდი მარაგანის არხი, სოფ. წყემის ტერიტორიაზე დადასტურებული. პატარა ტეხურად წოდებული არხი, სოფ. სუჯუნაში გამავალი უჩალა და ნესააკოქოლობანის არხი — ნოღელა. მათ შორის პირველი სამი მდ. ტეხურიდან იღებს სათავეს და მდ. აბაშას უერთდება, ხოლო ნოღელა ცხენისწყლიდან იღებს სათავეს და უფრო ქვემოთ ერთვის რიონს.

ნოღელას არხზე დევს ქოლობანისა და ნესააკოს (ოჭინკე) დიხაგუძეები. პატარა ტეხურზე განლაგებულია სოფ. წყემის ბორცვების ჯგუფი. ხოლო დიდი მარაგანის არხის გასწვრივ განლაგებულია: სოფ. III ნოსირის დიხაგუძეები, სოფ. ძიგურის უსახელო ბორცვი, სოფ. ზანათის გორანამოსახლარი — ნამანცხვარი, ზანათის მეორე ბორცვი — დოონი და ამავე სოფლის ადრეფეოდალური ხანის ნამოსახლარი.

კიდევ უფრო კარგად არის შემონახული ძველი ნამოსახლარები და ნაარხალები კოლხეთის დაბლობის ზღვისპირეთის მომიჯნავე ზოლში, სადაც ხობის, ფოთის, სენაკისა და ლანჩხუთის რაიონების ქვედა ტყიანი ზოლი მრავალრიცხოვანი არხებით არის დასერილი. კოლხეთის დაბლობის ქვედა ზოლში საარხო სისტემების მთავარი შემკრები მდინარეული არტერიებია: მდ. ფიჩორი, მდ. ყორათის წყალი და მდ. მუნ-

ჩია. ეს პატარა და მდორე მდინარეები გეოგრაფიულად მკვეთრად არი-
ან გამოჩნულნი ერთიმეორისაგან დიდი მდინარეებით და თითოეული
მათგანი ბატონობს გარკვეულ „ქვეყანაში“. ფიჩორის „ქვეყანა“ მოქ-
ცეულია მდ. სუფსასა და რიონს შორის, ყორათის წყლის „ქვეყანა“—
რიონსა და ხობს შორის, ხოლო მუნჩია ბატონობს ხობსა და ენგურს
შორის მოქცეულ „ქვეყანაზე“.

მათი ბატონობა კონკრეტულ „ქვეყანაში“ იმაში გამოიხატება,
რომ ამ გეოგრაფიულ ერთეულში თავმოყრილი გორანამოსახლარები,
თავისი საარხო სისტემით, მათათნ არიან დაკავშირებულნი, მიუხედა-
ვად იმისა. ნამოსახლარები ფიზიკურად დიდ მდინარეებთან უფრო
ახლოს მდებარეობენ თუ არა.

კოლხეთის გორანამოსახლარების მიდრეკილება შედარებით პატა-
რა და მდორე მდინარეებისაკენ ნაკარნახევი უნდა იყოს მოსახლეო-
ბაში ამ მდინარეების პრაქტიკული მნიშვნელობით, როგორც ახლო და
შორეულ მეზობლებთან, თუ გარე სამყაროსთან დამაკავშირებელი სა-
გზაო საშუალებები. როგორც ჩანს, ძველი კოლხებისათვის შეუძლე-
ბელი უნდა ყოფილიყო ჰიპოკრატესეული. ერთ ხეში ამოღებული ნა-
ევების საშუალებით დიდ მდინარეებზე დაღმა და განსაკუთრებით, აღმა
ცურვა, მათი ჩქარი დინების გამო.

არხებს ასევე დიდი მნიშვნელობა უნდა ჰქონოდა კოლხთა სამო-
სახლო ტერიტორიის ქარბი ტენისაგან განათავისუფლების საქმეში; პე-
რიოდულად, ალბათ, მოსახლეობის რაციონის თევზის პროდუქტით
შემავსებელი საშუალებაც უნდა ყოფილიყო, მაგრამ, როგორც მი-
ღებულია, არხებისა და თხრილების უმთავრესი ფუნქცია მაინც სამო-
სახლოს დაცვა უნდა ყოფილიყო ნადირისა თუ მტრის თავ-
დასხმის შემთხვევაში.

ჰიპოკრატეს ცნობების სისწორე, კოლხეთში არსებული ბუნებ-
რივი პირობებისა და მოსახლეობის ცხოვრების წესების შესახებ, კი-
დეც ერთხელ დაადასტურა ჩვენში მრავალრიცხოვანი არხებისა და
მათზე მოწყობილი სამოსახლოების აღმოჩენამ.

კოლხეთის ბარის დიდი მდინარეებით გამოჩნული გარკვეული ტე-
რიტორიები, თავისი სამოსახლოებით და პატარა მდინარეებით (ფიჩო-
რი, ყორათის წყალი, მუნჩია და სხვ.), რთული საარხო სისტემებითა
და სამეურნეო ფართობებით, ისეთივე სოციალურ-ტერიტორიული
ერთეულები ჩანან „წინარე ისტორიულ“ ხანაში, როგორიც მთიან
ხოლში ან აღმოსავლეთ ამიერკავკასიაში გავრცელებული „ხევის ქვეყ-“

ნები“ არიან, თავისი რიგითი ნამოსახლარებითა და დიდ-პატარა ცენტრებით.

კოლხეთის ნამოსახლარებს შორის გარეგნული სხვაობა აშკარად შეინიშნება, რაც, პირველ რიგში, მდგომარეობს ბორცვების რაოდენობაში, თვით სამოსახლო ფართობის საერთო მოცულობაში და სამეურნეო სავარგულების მასშტაბებში.

ჩვენ მიერ მოხილული ტერიტორიის ფარგლებში, იმ მრავალრიცხოვან რიგით სამოსახლოებს შორის (ზემოთ აღნიშნული ნიშნების მიხედვით) სამი მსხვილი სამოსახლო ცენტრი გამოიყოფა, რომლებიც გარკვეული შუალედებით არიან განლაგებულნი მდ. ფიჩორის (ნამარანუ), მდ. რიონის (საგვიჩიოს ბორცვების ჯგუფი) და მდ. ხობის (ოტორონჯე) აუზებში.

უდავოა, რომ ხსენებულ ძეგლებს გარკვეულ რეგიონში, ეკონომიკურად, პოლიტიკურად და, ალბათ, რელიგიურადაც გაბატონებულნი მდგომარეობა ჰქონდათ მოპოვებული და წინარეანტიკური და ანტიკური ხანიდან მაინც ქალაქურ ცენტრებად გადაქცევის ტენდენცია უნდა გასჩენოდათ.

საფიქრებელია, რომ სწორედ ამ გორანამოსახლარების წიაღშია ჩამარხული ის ეკონომიკურ, სოციალურ, თუ პოლიტიკურ ურთიერთობათა საფუძვლები, რამაც რეალურად არსებულ თუ ლეგენდარულ „ოქროთი მდიდარ კოლხეთს“ შორს გაუთქვა სახელი.

სწორედ ასეთი, წინარე ანტიკური ხანის გორანამოსახლარების შემდგომი განვითარების ბაზაზე უნდა აღმოცენებულიყო კოლხეთის სამეფოს ისეთი მსხვილი პოლიტიკური, ეკონომიკური, კულტურული და რელიგიური ქალაქური ცენტრები, როგორც არის ვანის ნაქალაქარი (ო. ლორთქიფანიძე, ნ. ხოშტარია), საირხე (ჯ. ნადირაძე), მთისძირი — დაბლაგომი (ც. თოლორაძე, გ. გამყრელიძე), დაფნარი (ნ. კილურაძე), ქობულეთ-ფიჭვნარი (ა. კახიძე) და სხვ.

გვიანელინისტურ ხანაში, მას შემდეგ, რაც დიდი კოლხეთის სამეფო დაქვეითებას იწყებს და, როგორც ფიქრობენ, სკეპტუხიებად დაიშალა, ტომთა რამდენიმე გაერთიანება (ლაზები, აფსილები, აბაზგები, სანიგები) გამოდის ისტორიულ სარბიელზე. მათ შორის პირველი საუკუნეებიდან განსაკუთრებით ძლიერდებიან, ხოლო IV საუკუნის დამლევისათვის თითქმის მთელი დასავლეთ საქართველოს გამაერთიანებლის როლში გვევლინებიან ლაზები, რომელთა მიერ შექმნილ სახელმწიფოს ქართული წყაროები ეგრისს უწოდებს, ხოლო ბერძენი და ბიზანტიელი ავტორები ლაზიკის სახელით იხსენიებენ.

ხსენებულ საუკუნეებში ეგრის-ლაზიკის სამეფოს ეკონომიკური და პოლიტიკური ძლიერების უტყუარი მანიშნებელია მის სხვადასხვა რეგიონში ერთდროულად (IV ს.) მსხვილი სამშენებლო საქმიანობის წამოწყება და ხარისხობრივად ახალ სიმაღლეზე აყვანა.

როგორც უკანასკნელ წლებში ჩატარებული არქეოლოგიური კვლევის შედეგად ირკვევა, არსებითად, ამ პერიოდში უნდა წარმოქმნილიყო ისეთი მსხვილი ქალაქები, ციხე-ქალაქები, თუ სასაზღვრო ციხეები, როგორც არის ნოქალაქე-არქეოპოლისი (პ. ზაქარაია), ძველი ქუთაისი (ო. ლანჩავა), ვარდციხე (ვ. ჭაფარიძე), ციხისძირი (დ. ხახუტაიშვილი, ა. ინაიშვილი, ნ. ინაიშვილი), ბიჭვინთა (ა. აფაქიძე, გ. ლორთქიფანიძე), შორაპანი (ვ. ჭაფარიძე), ვაშნარი (გ. გობეჯიშვილი) და სხვ.

ამ ძეგლების შესახებ დაიწერა არაერთი მონოგრაფიული ნაშრომი და ცალკეული საკითხებისადმი მიძღვნილი გამოკვლევა, სადაც, ახალი არქეოლოგიური მასალის საფუძველზე, შემოწმდა, დადასტურდა ან შეიცვალა წერილობითი წყაროების ჩვენებები, მოხდა მათი კორექტირება.

ხსენებული არქეოლოგიური ძეგლების შესწავლის შედეგები, უთუოდ, თვალსაჩინოა და მომავალში ამ რიგის სამუშაოების გაგრძელებათაგან ერთობა კიდევ უფრო მეტს გვპირდება.

მიღწეული წარმატებების მიუხედავად, არ შეიძლება არ აღინიშნოს ადრეული მუხასუკუნეების ეგრის-ლაზიკის სამეფოს ისტორიულ პრობლემათა კვლევის საქმეში ჯერ კიდევ გაურკვეველი, ბუნდოვანი თუ წინააღმდეგობრივი არაერთი საკითხის არსებობის ფაქტი, სადაც აშკარად იგრძნობა, საისტორიო გეოგრაფიული კუთხით, მთელი რიგი საკითხების ახლებურად გაშუქების აუცილებლობა.

ჩვენი აზრით, საფუძვლიანად უნდა გადაისინჯოს დღეისათვის მიღებული და საყოველთაოდ გაზიარებული, ქალაქ პეტრას ციხისძირთან იდენტიფიკაციის საკითხი, რის საფუძველზეც გაკეთდა შორს მიშავალი დასკვნები ქვეყნის პოლიტიკურ-ეკონომიკური მდგომარეობის შესახებ და უარი უნდა ითქვას ზოგიერთი პირველხარისხიანი წერილობითი წყაროსადმი (პროკოპი კესარიელი, ავათია სქოლასტიკოსი) ჩვენში არსებულ ნიპილისტურ დამოკიდებულებაზე. ასევე, ვფიქრობთ, მეტი ნდობა უნდა გამოვუცხადოთ დიდი გეოგრაფოსისა და ასტრონომის კლავდიოს პტოლემეიოსის გეოგრაფიული სახელმძღვანელოს იმ ადგილს, სადაც ეგრის-ლაზიკის სამეფოს სამხრეთ-დასავლეთ სანა-

პირობე კიდევ ერთი ქალაქის, სებასტოპოლისის არსებობა იგულისხმება.

ქ. სებასტოპოლისის მართებულად ლოკალიზაციის საკითხი მით უფრო საშუროა, რომ იგი ქვეყნის სამხრეთ-დასავლეთ სასაზღვრო ხაზთან არის დაკავშირებული და ერთის დადგენა მეორის დაზუსტების საშუალებას იძლევა, საერთო შედეგში კი, გარკვეულ წარმოდგენას შეგვიქმნის ახ. წ. II საუკუნეში ეგრის-ლაზიკის სამეფოს პოლიტიკური მდგომარეობის შესახებ.

ხსენებული ძეგლების ლოკალიზაციის საკითხების ახლებურად გააზრება რამდენადმე ცვლის ეგრის-ლაზიკის სამეფოს სოციალურ-პოლიტიკურ, სავაჭრო-ეკონომიკურ, სამხედრო-სტრატეგიულ საკითხებზე შემუშავებულ ხანდაზმულ თეორიებს და აზუსტებს ეგრის-ლაზიკის მეზობელ ქვეყნებთან დამაკავშირებელი უმთავრესი საგზაო მაგისტრალების მიმართულებას.

უკანასკნელ ხანებში მოპოვებული არქეოლოგიური მასალა, სხვაეულე საძიებო სამუშაოების შედეგები და ზოგიერთი წერილობითი წყაროს ახლებური ინტერპრეტაცია ზემოხსენებული საკითხებისა და სხვა ანალოგიური მომენტების საფუძვლიანი კორექტირების საშუალებას იძლევა.

წინამდებარე ნაშრომი, სწორედ, ასეთი მცდელობის შედეგს წარმოადგენს. თუ როგორ გავართვით თავი დასახულ ამოცანას, ამის განსჯა პირუთენელი მკითხველისათვის მიეცინდია.

მბრის-ლაზიკის სამეფოს ციხე-ქალაქი პეტრა

ქალაქ პეტრას, როგორც VI საუკუნის ლაზიკის სამეფოს საქალაქო ცენტრს, თავისი არსებობის ძალზე ხანმოკლე ისტორია აქვს. მიუხედავად ამისა, მან მაინც მნიშვნელოვანი როლი შეასრულა ადრე-ბიზანტიური ხანის ლაზიკის პოლიტიკურ, ეკონომიკურ თუ რელიგიურ ცხოვრებაში და ბიზანტიისა და სასანიდური ირანის პოლიტიკური ურთიერთობის ისტორიაში. უმთავრესად, სწორედ აქ, ლაზიკაში და კონკრეტულად პეტრასთან შეეჯახა „მსოფლიო ბატონობისათვის“ მებრძოლი ეს ორი დიდი მეტოქე. ამდენად, ამ ქვეყნებისა და ლაზიკის ისტორიის გარკვეული ეტაპი მჭიდროდაა გადაჯაჭვული ერთმანეთთან და VI ს-ის მათი ისტორიის ძირითადი პრობლემები, ურთიერთგანპირობებულობის გამო, ყოველთვის ერთ მთლიანობაში განიხილება.

ყოველივე ამის გამო, გასაგებია ის ინტერესი, რომელიც დიდი ხანია არსებობს მეცნიერულ წრეებში ქალაქ პეტრას წარმოშობის ისტორიული აუცილებლობის, მისი შემდგომი ბედისა და ადგილმდებარეობის საკითხებთან დაკავშირებით. განსაკუთრებით მწვავედ დგას და კამათის საგანია პეტრას ლოკალიზაციის მცდელობის საკითხი, რომელსაც დიდი ხნის, სულ ცოტა ორი საუკუნის ისტორია მაინც აქვს. თუ მხედველობაში არ მივიღებთ კიდევ უფრო ადრინდელ მოგზაურთა ცნობებს, პეტრას ლოკალიზაციის საკითხებს რომ ეხებოდნენ.

ჩვენ მხედველობაში გვაქვს მ. სელეზნოვის მიერ გამოქვეყნებული, იერუსალიმის პატრიარქის უფალი დოსითეოსის 1659—1660, 1677 წწ. ამიერკავკასიის ქრისტიანულ ქვეყნებში მოგზაურობის ჩანაწერები, სადაც ქობულეთის აღმოსავლეთით, ერთი — ერთნახევარი საათის სავალ მანძილზე, მითითებულია ციხე ნანგრევები, რომელსაც ავტორი ბიზანტიური ხანის ციხე-ქალაქ პეტრას ნაშთად მიიჩნევს. აქვე საუბარია იმ სისხლისმღვრელ ბრძოლებზე, რომელსაც ადგილი ჰქონდა

პეტრას მიდამოებში, ბიზანტიის იმპერატორ იუსტინიანესა და სპარსეთის მეფის ჯარებს შორის¹.

როგორც ვხედავთ, ამ ჩანაწერებში არ არის პირდაპირი მითითება, თუ კონკრეტულად რომელ პუნქტთან ახდენს დოსითეოზი პეტრას იდენტიფიკაციას, მაგრამ აშკარაა, რომ აქ ციხისძირის ციხის ნაშთებზე უნდა იგულისხმებოდეს. ქობულეთიდან აღმოსავლეთით, ერთნახევარი საათის სავალ მანძილზე, სწორედ, ციხისძირი მდებარეობს, რომელიც ტოპოგრაფიულადაც უახლოვდება პრეკოპისეულ პეტრას აღწერილობას.

მეორე უცხოელი მკვლევარი, რომელმაც გარკვეული ღვაწლი დასდო ქალაქ პეტრას ლოკალიზაციის საკითხს, იყო ფრანგი არქეოლოგი და მოგზაური დიუბუა დე მონპერე. როგორც ცნობილია, ამ მეცნიერმა XIX ს-ის 30-იან წლებში, სპეციალური მიზნით, მოიარა საქართველო და ისეთ მონუმენტურ ძეგლებთან ერთად, როგორიც არის ნოქალაქევი-არქეოპოლისი და ფასისის ციხე-სიმაგრე, ნახა ვაშნარის ნანგრევებიც². დიუბუა ამ ადგილს, ვაშნარის ნაცვლად, „უჯენარს“ უწოდებს, რაც შენიშნა კიდეც ჯერ დ. ბაქრაძემ, ხოლო შემდეგ აკად. ს. ჯანაშიამ, როგორც შეცდომა³. ჩვენი აზრით, დიუბუა ამ შემთხვევაში შენიშვნას არ იმსახურებს. საქმე იმაშია, რომ ტოპონიმი ვაშნარი ქართლულენოვანი წარმომავლობის, ბოტანაკური შინაარსის მქონე სიტყვა არ უნდა იყოს, როგორც ეს დღეს არის გაგებული. იგი ლაზურ-ქანური ენობრივი სამყაროს კუთვნილება ჩანს. თავდაპირველად უნდა გვექონოდა სიტყვა „ვაშინერი“, რაც შინაარსობრივად ამკრძალავი, ტაბუს აღმნიშვნელი ტერმინია და რაიმეს სახელის ხსენებას, მიკარებას კრძალავს. დაახლოებით ასეთივე შინაარსისაა „უჯინერი“, რითაც რაიმესადმი მიკარება კი არა, შეხედვაც კი იკრძალება. როგორც ჩანს, ასეთი ეპითეტები დაიმსახურა ვაშნარის ნანგრევებმა, რომელიც დიუბუას დროს დაბურულ ტყეში მდგარა და, ალბათ, ბევრად უფრო ადრე, მოსახლეობა მასში ავი სულების ნამოქმედარსა და საბუდარს ხედავდა. აქედან გამომდინარე, გარკვეული ტერმინებით — „ვაშინერი“;

¹ М. Селезниев. Руководство к познанию Кавказа. Путешествіе патриарха Досифея съ религіозными и политическим состояніемъ Грузии до XVII вѣка. Санкт—Петербургъ, 1847, с. 37.

² Dubois de Montpegeux F. Voyage autour du Caucase. t. II. Paris, 1839, p. 85, t. III, p. 86.

³ Д. Бакрадзе. Археологическое путешествие по Гурии и Адчарь-СПб, 1878. с. 275; ს. ჯანაშია. ფეოდალური რევოლუცია საქართველოში. შრომები, I, თბ., 1949, გვ. 30.

„უჩინერი“ — იკრძალებოდა კიდევ მასთან მიახლოება, გავლა, შეხედვა და ა. შ.

თანდათანობით, ალბათ, უფრო მოგვიანებით, შესაძლოა, ეთნიკური ელემენტის ცვლასთან დაკავშირებით ძველმა ტერმინმა „ვაშინერმა“ დაკარგა თავდაპირველი შინაარსი და მივიღეთ გაქართულებული, ახალი შინაარსის მქონე ტოპონიმი „ვაშნარი“, ე. ი. ადგილი, სადაც ვაშლის ხეები ჭარბობს, ისეთივე, როგორიც არის ფიჭვნარი, მუხნარი, თელავი და სხვ.

როგორც ჩანს, ვაშნარის სწორკუთხაკოშკებიან ციხეს, აგურის-სარტყლებიან და გვერდებაკეცილი კრამიტით გადახურულ ტაძარსა და კიბიანი აბანოს ნაშთებს ისეთი დიდი შთაბეჭდილება მოუხდენია დიუბუაზე, რომ იგი, უყოყმანოდ, პეტრად მიუჩნევია. დიუბუამ ანგარიში არ გაუწია პროკოპი კესარიელის ნიშანდობლივ ცნობას, რომლის მიხედვით ციხე-ქალაქი პეტრა, რომელიც მნიშვნელოვან როლს თამაშობს ირან-ბიზანტიას შორის ომიანობის დროს, აგებული იყო უშუალოდ ზღვის სანაპიროზე, კლდოვანი რელიეფის მქონე ბორცვზე⁴, მაშინ, როცა მდ. ნატანების ორი უმნიშვნელო შენაკადის — საცივესა და სკურდების შეერთების ადგილას მდებარე ვაშნარის ციხე დაახლოებით 20 კმ-ით არის დაცილებული ზღვას და ოდნავ შემადლებულ გავაკებაზე მდებარეობს. ყოველივე ამის გამო, პეტრას ლოკალიზაციის დიუბუასეული მცდელობა იმათივე არ იქნა გაზიარებული კ. კოხის⁵, მ. ბროსეს, დ. ბაქრაძის⁶, კალფოლუს⁷, ს. ჯანაშიას⁸ და სხვათა მიერ.

იენის უნივერსიტეტის პროფესორმა, თავისი დროის ცნობილმა ზოტანიკოსმა და დენდროლოგმა კარლ ჰაინრიხ ემილ კოხმა, რომელმაც XIX ს. პირველ ნახევარში იმოგზაურა კავკასიაში, საქართველოს

⁴ გეორგია, ტომი მეორე. ბიზანტიელი მწერლების ცნობები საქართველოს შესახებ. ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა. თბ., 1965, გვ. 33, შენ. 2.

⁵ კ. კოხი და ო. სპენსერი. ცნობები საქართველოსა და კავკასიის შესახებ. გერმანულიდან თარგმნა, შესავალი და კომენტარი დაურთო ლ. შამულაშვილმა, თბ., 1981, გვ. 183—184.

⁶ Д. Бакрадзе. указ. соч., с. 277; М. Brosset. Additions et éclaircissements à l'histoire de la Georgie. St.—Pet 1851. p. 98.

⁷ И. И. Кальфоглу. Город Петра-Цихис-дзирг, Историко-Археологическая заметка.—Известия Капказского отдела Ипер. географического общества, т. XVIII. 1905—1906, №3. с. 198, 212.

⁸ ს. ჯანაშია. დასახ. ნაშრ. გვ. 30.

ბუნების, ხალხის ყოფის, ცხოვრების, ეკონომიკისა და კულტურის საინტერესო აღწერილობა დაგვიტოვა⁹.

სწორედ მან პირველმა გააკრიტიკა დიუბუა დე მონპერეს მცდარი შეხედულებანი პეტრა-ვაშნარის იგივეობის შესახებ. მასვე ეკუთვნის საინტერესო დაკვირვება პეტრას ლოკალიზაციის საკითხზე, როდესაც იგი მდ. ჩოლოქიდან ბათუმისაკენ მიემგზავრებოდა: „მალე საკმაოდ დიდი მოცულობის ციხის ნანგრევებს მივადექით, ე. წ. ციხისჯვარს (ე. კოხი ცდება, აქ უნდა იყოს ციხისძირი — გ. გ.), აქედან შესანიშნავი სანახაობა იშლება: ერთი მხრივ, ზღვა, ხოლო, მეორე მხრივ, ქვეყნის სიღრმეში მდებარე ნაყოფიერი მიდამოები. შესაძლოა, ეს ნანგრევები ბიზანტიელებსა და სპარსელებს შორის წარმოებული ომების დროინდელია, ვინაიდან ისინი განსხვავდებიან ადგილობრივი ქართული წარმოშობის ციხეებისაგან. ისტორიამ შემოგვინახა ბიზანტიელების მიერ აგებული ერთი ასეთი ციხის სახელი. შესაძლოა, დღევანდელი ციხისძირი ბერძნების პეტრა იყოს. პეტრა ზღვის მახლობლად მდებარეობს და რამდენადაც შეიძლება ამჟამად მისი ადგილმდებარეობის დადგენა, ახლანდელი ციხისძირის ნანგრევების ადგილზე უნდა ყოფილიყო აშენებული“¹⁰.

როგორც ამ ამონაწერიდან ვხედავთ, ე. კოხის ვარაუდის საფუძველს ციხისძირის ხელსაყრელი გეოგრაფიული მდებარეობა წარმოადგენს, რასაც მხარს უბამს ციხისძირსა და პროკოპისეული პეტრას ტოპოგრაფიული მსგავსებაც. ჩვენთვის გაუგებარია, ციხისძირის ნანგრევების აღწერისას რაში ხედავს იგი ციხის არაქართულ ხასიათს — მასშტაბებში, კედლების წყობაში თუ არქიტექტურულ დეტალებში.

ციხისძირის ხელსაყრელი სტრატეგიული მდებარეობის წყალობით სავსებით ანალოგიურ დასკვნამდე მივიდა XIX ს. მეორე ნახევრის მკვლევარი კავკასიოლოგი ე. ვეიდენბაუმი. მისი დაკვირვებით, „აქ თვით ბუნებას შეუკრავს ზღვისპირა გასასვლელი და მახლობელ მიდამოებში სხვა უკეთესი ადგილი არ არსებობს სანაპიროზე გამავალი გზის ჩამკეტი ციხის ასაგებად“¹¹.

⁹ ე. კოხი და ო. სპენსერი. ცნობები საქართველოსა და კავკასიის შესახებ. გვ. 10—259.

¹⁰ იქვე. გვ. 183—184.

¹¹ Е. Г. Вейденбаум. От Батума до Артуина (путевые заметки). — Кавказские этюды, исследования и заметки Е. Г. Вейденбаума. Тифлиси, 1907. с. 320.

საინტერესოა, რომ ყველა მოგზაური თუ მეცნიერი, რომელიც კი ეხება ციხისძირს და პეტრასთან აიგივებს მას, ისე მსჯელობს, თითქოს ყოველივე ეს მათი საკუთარი დაკვირვებისა და კვლევის შედეგო-
იყოს და არა წინაპართა ნააზრევი.

ასეთი დამოკიდებულების თვალსაჩინო მაგალითია ი. კალფოგლუს სპეციალური ნაშრომი, რომელიც პეტრას ლოკალიზაციის საკითხებს ეხება და ზუსტად იმეორებს ე. ვეიდენბაუმის შეხედულებას ციხის-
ძირზე. ი. კალფოგლუმ ადგილზე დაათვალიერა ციხისძირის ისტორი-
ული ნაშთები, გაითვალისწინა ციხისძირის ნაშთის ადგილმდებარეო-
ბა კლდეზე, ზღვისპირას, რაც ახლოს არის სათანადო ცნობასთან პე-
ტრას ტოპოგრაფიის შესახებ და მივიდა იმ დასკვნამდე, რომ ციხის-
ძირის ნანგრევები სხვა არაფერია, თუ არა ისტორიული პეტრას ნაშ-
თები¹².

მ. ბროსეს აზრით, პეტრა ახლანდელი ქობულეთის მახლობლად
არის საძიებელი, მაგრამ კონკრეტულად სად, ამის შესახებ არაფერი
უთქვამს¹³.

პროკოპი კესარიელის ერთ-ერთი რუსულად მთარგმნელი გ. დეს-
ტუნისი ფიქრობდა, რომ პეტრა აგებული უნდა ყოფილიყო მდ. ნატა-
ნების შესართავთან, ადგილ „შეკვეთილში“. სწორედ აქ ეგულებოდა
მას შავი ზღვის აღმოსავლეთ სანაპიროს ნახევარმთვარისებრი მოხა-
ზულობის სამხრეთ წერტილი, სადაც, პროკოპი კესარიელის თქმით,
პეტრა იქნა აგებული¹⁴.

1934 წელს პროფ. ს. ყაუხჩიშვილმა გამოაქვეყნა პროკოპი კესა-
რიელის ცნობები საქართველოს შესახებ ქართული თარგმანითურთ,
რასაც დაურთო საყურადღებო შენიშვნები და კომენტარები. ნაშრომის
ამ ნაწილში ავტორი საგანგებოდ ჩერდება პეტრას ლოკალიზაციის სა-
კითხზე, იძლევა პეტრას ეტიმოლოგიური ძიების საინტერესო ვარიანტს
და სავსებით მართებულად დაუკავშირა ლაზიკის ერთ-ერთი საეპის-
კოპოსო ცენტრი პროკოპისეულ ქ. პეტრას¹⁵.

¹² И. И. К а л ь ф о г л у. Указ. соч., с. 202.

¹³ Д. Б а к р а д з е. Археологическое путешествие..., с. 275—276.

¹⁴ С. Д е с т у н и с (Комментарии Гаур. Дестуниса). Прокопия Кесарийс-
кого История войн Римлян с Персами. Кн. II. СПб., 1880, с. 263—264. прим. 19.

¹⁵ გეორგიკა. II. ბიზანტიელი მწერლების ცნობები საქართველოს შესახებ.
პირველი ტექსტი ქართული თარგმანითურთ გამოსცა და განმარტებები დაურთო
ს. ყაუხჩიშვილმა. ტფ., 1934, გვ. 58—60.

ს. ყაუხჩიშვილი გადამწყვეტ მნიშვნელობას ანიჭებს ნავსყუდელის საკითხს. პეტრა, მისი აზრით, ისეთ პუნქტში უნდა ვეძიოთ, „რომელიც ხელსაყრელ პირობებს ქმნიდა ვაჭრობისათვის და სავაჭრო მიმოსვლისათვის და აგრეთვე სამხედრო საქმიანობისათვის, ე. ი. კარგი საზღვაო ნავსადგურის პირობებს აკმაყოფილებდა“, — ამბობს იგი და განაგრძობს: „საკითხის დამატებითმა შესწავლამ მიგვიყვანა იმ დასკვნამდე, რომ პეტრა ახლანდელი ბათუმი უნდა იყოს. ბათუმის შემდეგდროინდელი ეკონომიკური და სამხედრო მნიშვნელობა გვაფიქრებინებს, რომ მას ანალოგიური მნიშვნელობა შეიძლება ჰქონოდა, როდესაც ბიზანტია ვაჭრობის მონოპოლიის ცენტრს ირჩევდა ლაზიკში და როდესაც სპარსეთი ზღვაზე გასავალს ეძებდა. ასეთი პუნქტი შეიძლება ყოფილიყო ბათუმი“¹⁶.

გარდა ამისა, ს. ყაუხჩიშვილის აზრით, რამდენადაც „პეტრა ბერძნულად ნიშნავს ქვას, კლდეს, უნდა ვიფიქროთ, რომ სიტყვაში ბათომი არის ჩამალული ისეთი ძირძველი სიტყვა, რომელიც ქვას ნიშნავდა. შეიძლება ამისათვის გამოდგეს ის ახსნა, რომელიც ჩვენ ოდესღაც წარმოვადგინეთ, რომ „ბათ“ ფუძე ერთ-ერთ ქართველურ ენაში (სვანურში — გ. გ.) ნიშნავს ქვას“¹⁷.

ამრიგად, სანავსადგურო მონაცემებმა და ეტიმოლოგიურმა ძიებამ ს. ყაუხჩიშვილი ქ. ბათუმში მიიყვანა, რომელიც დასავლეთ საქართველოში დღესაც ერთ-ერთი ძირითადი საზღვაოსნო ცენტრია.

როგორც ზემოთ დავინახეთ, ამ საკითხით დაინტერესებულ პირთა შორის, მართალია აზრთა გარკვეული სხვადასხვაობა არსებობს, მაგრამ მკვლევართა უმრავლესობა პეტრას აჭარის სანაპიროზე იგულებს, მდ. ჩოლოქსა და ბათუმს შუა, იქ, სადაც ციხისძირის დიდებული ნანგრევებია შემორჩენილი, ზღვის ნაპირზე აღმართულ კლდოვან ბორცვზე.

არ შეიძლება ორი აზრი არსებობდეს, რომ ციხისძირი, თავისი მდებარეობით, ტოპოგრაფიული მონაცემებით, მასშტაბებით და უკანასკნელი ორი ათეული წლის არქეოლოგიური კვლევა-ძიების შედეგებით, გვიან-რომაული და ადრებიზანტიური ხანის, უთუოდ, მნიშვნელოვანი ძეგლია.

საქართველოს ისტორიაში ციხისძირის ადგილისა და როლის გარკვევის საქმეში დიდი წვლილი შეიტანა აკად. ს. ჯანაშიას ვრცელმა

¹⁶ გეორგია. II, გვ. 77.

¹⁷ გეორგია. II, გვ. 58—60; ს. ყაუხჩიშვილი. რას მოგვითხრობენ ძველი ბერძნები საქართველოს შესახებ. თბ., 1964, გვ. 60.

და საფუძვლიანმა გამოკვლევამ. მან, ბერძნულ-რომაული, ქართულ-სომხური წერილობითი წყაროების შესწავლის, არქეოლოგიური მასალის მოშველიებითა და ფოლკლორული მონაცემების გათვალისწინებით, მეცნიერულად დაასაბუთა ციხისძირის როგორც პოლიტიკური, ეკონომიკური, კულტურული და სამხედრო-სტრატეგიული ცენტრის მნიშვნელობა¹⁸.

ს. ჯანაშიას მტკიცებით, სწორედ ციხისძირი უნდა იყოს ციხე-ქალაქი პეტრა, რომელმაც „იმდროინდელ დასავლეთ საქართველოს ცხოვრებაში დიდი როლი ითამაშა, რამდენადმე მსგავსი თბილისის როლისა აღმოსავლეთ საქართველოსათვის“¹⁹.

აკად. ს. ჯანაშიას მეცნიერული კვლევის შედეგები პეტრას ლოკალიზაციის საკითხებთან დაკავშირებით დღეისათვის საყოველთაოდ გაზიარებულია და სახელმძღვანელო დებულებადაა აღიარებული. ყოველ შემთხვევაში, „...ყველა აქამდის არსებულთაგან უფრო სრული და დამაჯერებელი ჩანს“²⁰.

ს. ჯანაშიას შემდეგ არაერთი მკვლევარი დაუბრუნდა პეტრას ლოკალიზაციის საკითხს და სპეციალური ნაშრომი მიუძღვნა მას. ესენია: ნ. ხოშტარია²¹, პ. ინგოროყვა²², ნ. ლომოური²³, მ. სულეიმანოვი²⁴,

18 ს. ჯანაშია. დასახ. ნაშრ., გვ. 32—44.

19 იქვე. გვ. 30.

20 ნ. ბერძენიშვილი. „ს. ჯანაშია, საქართველო აღრინდელი ფეოდალიზაციის გზაზე“ (რეცენზია). — მიმოხილველი. III, თბ., 1953, გვ. 291.

21 ნ. ხოშტარია. ციხისძირის ისტორიისათვის არქეოლოგიური მასალების მიხედვით. — ივ. ჯავახიშვილის სახ. ისტორიის ინსტიტუტის მეოთხე სამეცნიერო სესიის თეზისები, 1953; მისივე. ციხისძირი. თბ., 1962.

22 პ. ინგოროყვა. გიორგი მერჩულე. თბ., 1954, გვ. 230, 234.

23 ნ. ლომოური. ქალაქი პეტრა და მისი მდებარეობა. — თბილისის უმაღლეს სასწავლებელთა სტუდენტთა II სამეცნიერო კონფერენციის შრომები. ნაწ. I. 1948, გვ. 24—27.

24 მ. სულეიმანოვი. პეტრა (ციხისძირი). — აჰარის სახ. მუზეუმის შრომები. ტ. II. ბათუმი, 1957, გვ. 5—41.

ვ. სიჭინავა²⁵, ი. სიხარულიძე²⁶, ნ. ბერძენიშვილი²⁷, ალ. ქათამაძე²⁸, ა. ინაიშვილი²⁹, დ. ხახუტაიშვილი³⁰, დ. მუსხელიშვილი³¹, რ. გვერდ-წითელი³², კ. მელითაური³³, ვ. ლეჭინაძე³⁴ და სხვა.

ყველა ეს ავტორი სავსებით იზიარებს პეტრა-ციხისძირის იგივე-ობის ს. ჯანაშიასეულ ვარაუდს და საკუთარი სპეციალობისდა მიხედვით ახალი მასალებით ამდიდრებს და აღრმავებს მას.

25 ვ. სიჭინავა ა. ახალი ცნობები (ციხისძირი) პეტრას ისტორიისათვის (ად-გოლის ლოკალიზაციის საკითხი). — აპარის სახ. მუზეუმის შრომები. ტ. II. ბათუმი, 1957, გვ. 51—52.

26 ი. სიხარულიძე. სამხრეთ-დასავლეთ საქართველოს ტოპონიმია. II, გვ. 97—103; მისივე. — აპარის მატერიალური კულტურის ძეგლები. ბათუმი, 1962, გვ. 25—26.

27 ნ. ბერძენიშვილი. ს. ჯანაშია, საქართველო აღმოსავლეთი ფეოდალ-ობის გზაზე (რეცენზია). — მიმოხილველი. III. თბ., 1953, გვ. 291; მისივე-ლაზიკის ისტორიული გეოგრაფიისათვის. — ქუთაისის ნ. ბერძენიშვილის სახ. ისტორიულ-ეთნოგრაფიული მუზეუმის მასალები. თბ., 1968, გვ. 21—45.

28 ალ. ქათამაძე. პეტრა ციხე-ქალაქის შესახებ. — საბჭოთა აპარა. № 178, 1963, 9 სექტემბერი.

29 ა. ინაიშვილი. ციხე-ქალაქ პეტრას ნავსადგურის საკითხისათვის. — სამხრეთ-დასავლეთ საქართველოს ძეგლები. II. თბ., 1971, გვ. 74—88; მისივე. პეტრას საუბისკომოსო კათედრის საკითხისათვის ციხისძირის გათხრების შედეგების მი-ხედვით. — სამხრეთ-დასავლეთ საქართველოს ძეგლები. II. 1971. გვ. 91—107; მისივე. პეტრა — ციხისძირის 1962—1965 წწ. ჩატარებული გათხრების შედეგები. — სამხრეთ-დასავლეთ საქართველოს ძეგლები. IV. თბ., 1974, გვ. 102—153; მისივე. სამხრეთ-დასავლეთ საქართველოს უძველესი ნაშთსახარებისა და ნაქალაქარების. არქეოლოგიური კვლევა-ძიების ძირითადი შედეგები (1959—1971). — სამხრეთ-დასავლეთ საქართველოს ძეგლები. III. თბ., 1973, გვ. 3—7.

30 დ. ხახუტაიშვილი, ა. ინაიშვილი, ქართული მატერიალური კულ-ტურის საუბრადგებო ძეგლები. — საბჭოთა აპარა, 1962/VIII, № 17; დ. ხახუ-ტაიშვილი. სამხრეთ-დასავლეთ საქართველოს არქეოლოგიური ექსპედიციის 1979 წ. მუშაობის ძირითადი შედეგები. — სამხრეთ-დასავლეთ საქართველოს ძეგ-ლები. XV. თბ., 1982, გვ. 3—17.

31 დ. მუსხელიშვილი. საქართველოს ისტორიული გეოგრაფიის ძირითა-დი საკითხები. თბ., 1977, გვ. 102, 104, 108, 228.

32 Р. Г в е р д ц и т е л и. Соображения по изучению реставрации храма Цихисдзირи. 1963—1964 гг. рукопись: Егоже. Соображения по изучению и рес-таврации бани Цихис-Дзирн за 1963—1964 гг. (рукопись).

33 К. Н. М е л и т а у р и. Крепости дофеодальной и раннефеодальной Грузии. II. Тбилиси, 1971, с. 16—20.

34 В. А. Л е к в и н а д з е. О постройках Юстиниана западной Грузии.— Виз. вр., т. 34. М., 1973. с. 169—185.

მაგალითისათვის შეიძლება დავასახელოთ პირველი ქართველი არქეოლოგი ქალის ნ. ხოშტარიას დამსახურება ციხისძირის ისტორიულ-არქეოლოგიური და ეტიმოლოგიური ძიების თვალსაზრისით. ნ. ხოშტარია შემთხვევით აღმოჩენილი არქეოლოგიური მასალის შესწავლისათვის უსტალოდ მის მიერ ჩატარებული არქეოლოგიური ძიების საფუძველზე დაასკვნის, რომ ციხისძირი უძველესი სამოსახლო პუნქტია და უკვე ჩვენი წელთაღრიცხვის დამდეგისათვის შესაძლოა ერისთავის სასაფლაო რეზიდენცია ყოფილიყო³⁵.

ნ. ხოშტარიას აზრით, ბერძნულ წყაროებში მოხსენიებული ციხე-ქალაქის სახელი პეტრა, შესაძლოა, ადგილობრივი (ლაზური) სახელწოდებას — „ქობულეთის“ — თარგმანს წარმოადგენს. როგორც ირაკლევა, ლაზურად სიტყვა ქობული და ქუაბული ნიშნავს ქვას (მრგვალ ქვას)³⁶.

მკვლევრის აზრით, პეტრა თანამედროვე ციხისძირი უნდა იყოს და მდებარეობდა იქ, სადაც შემონახულია ძველი ციხის ნაშთები³⁷.

რაც შეეხება ქალაქ პეტრას, ნ. ხოშტარიას მიაჩნია, რომ აქ საეჭვოა თანამედროვე ციხის მიდამოები იგულისხმებოდეს, რადგან რელიეფის დასერილობა, კლდოვანი ზედაპირი, ნავსადგურის უქონლობა „არასოდეს არ ქმნიდა პირობებს ქალაქის მჭიდრო სამეურნეო ცხოვრების სხვა დარგების განვითარებისათვის“³⁸.

ნ. ხოშტარიას ქ. პეტრა ციხის ჩრდილოეთით მდებარე ზღვისპირა დაბლობში (ბობოყვათი, ქობულეთი, ფიჭვნარი) ეგულება, რაც თითქოს დასტურდება კიდევ არქეოლოგიური კვლევა-ძიების შედეგად³⁹.

ადგილ ციხისძირისა და მისი შემოგარენის თანმიმდევრულ, ფართო მასშტაბის არქეოლოგიურ კვლევა-ძიებას საფუძველი ჩაეყარა 60-იანი წლების დასაწყისში, მას შემდეგ, რაც ჩამოყალიბდა საქართველოს სსრ მეცნიერებათა აკადემიის ივ. ჭავჭავიძის სახ. ისტორიის ინსტიტუტისა და ბათუმის სამეცნიერო-კვლევითი ინსტიტუტის ერთობლივი ექსპედიცია, რომელიც დღესაც წარმატებით განაგრძობს მუშაობას. თავდაპირველად ექსპედიციას საერთო ხელმძღვანელობას უწევდა აკად.

35 ნ. ხოშტარია. ციხისძირის ისტორიისათვის არქეოლოგიური მასალების მიხედვით. — ივ. ჭავჭავიძის სახ. ისტორიის ინსტიტუტის შეთანხმებით. სსრ მეცნიერებათა აკადემიის გამომცემი, 1953, გვ. 17.

36 ნ. ხოშტარია. ციხისძირი. 1962, გვ. 35.

37 ნ. ხოშტარია. დასახ. ნაშრ. გვ. 34.

38 იქვე. გვ. 34.

39 იქვე. გვ. 34—35.

ნ. ბერძენიშვილი (1962—1964 წწ.), შემდეგ ა. ინაიშვილი (1965—1978 წწ.), ხოლო დღემდე მას ხელმძღვანელობს ბათუმის სამეცნიერო-კვლევითი ინსტიტუტის დირექტორი, საქართველოს მეცნიერებათა აკადემიის წევრ-კორესპონდენტი დ. ხახუთაიშვილი. სწორედ მათი ხელმძღვანელობითა და უშუალო მონაწილეობით აჭარის სხვადასხვა ნაწილში მრავალი განსხვავებული ხასიათისა და ასაკის პირველხარისხოვანი ძეგლი იქნა გამოვლენილი და შესწავლილი, მაგრამ ამჟერად მათ შესახებ სიტყვას აღარ გავაგრძელებთ.

ხსენებული ექსპედიციის ერთ-ერთი ძირითადი საკვლევო ობიექტი იყო და არის ციხისძირის თანამედროვე ნანგრევები და მისი შემოგარენი, სადაც გამოვლინდა ძვ. წ. I ათასწლეულის საწყისი საუკუნეების, ადრეანტიკური, ელინისტური და გვიანრომაული ხანისათვის დამახასიათებელი ფენების შემცველი გორანამოსახლარი, რომლის ბაზაზეც უნდა განვითარებულიყო ქალაქი⁴⁰.

უშუალოდ ნაციხარის ტერიტორიაზე გაითხარა ორი კოშკითა და ორმაგი კედლით გამაგრებული ციტადელი, რომელსაც აღმოსავლეთ ნაწილში დატანებული აქვს 2,80 მ სიგანის კარი. სწორედ ამ კარის მარჯვენა მხარეს აღმოჩნდა კედლის ქვის წყობაში ჩასმული, კრამიტით გამოყვანილი რელიეფური ჯვარი, რომელიც რამდენადმე ბოლნურს ემსგავსება⁴¹. აღსანიშნავია, რომ არქიტექტორ რ. გვერდწითელს სტამბოლში ანალოგიური დეტალი დაუდასტურებია იუსტინიანეს დროის (527—565 წწ.) ერთ-ერთ ციხეზე⁴². ე. ი. ციხისძირის ციტადელის კარიბჭის ნაწილიც VI საუკუნით უნდა დათარიღდეს. დაახლოებით V—VI სს. თარიღდებიან აგრეთვე ციტადელის ფარგლებში გამოვლენილი: კოშკები, სამნავიანი ღიდი და მცირე ბაზილიკა, აბანო და სხვა არქიტექტურული ნაგებობანი⁴³. ძეგლის გამთხრელის ა. ინაიშვილისა

⁴⁰ ა. ინაიშვილი. მასალები ციხისძირის გორა-ნამოსახლარიდან. — საქართველოს სსრ მეცნიერებათა აკადემიის მეთორმეტე რესპუბლიკური სამეცნიერო სესიის მოხსენებათა მოკლე შინაარსი. თბ., 1973, გვ. 149.

⁴¹ ა. ინაიშვილი. პეტრა-ციხისძირის 1962—1965 წწ. ჩატარებული გათხრების შედეგები. — სამხრეთ-დასავლეთ საქართველოს ძეგლები. IV. 1974, გვ. 139—140, ტაბ. V. 1.

⁴² Р. Гвердцители. Указ. соч., с. 12; К. Мелитаури. Указ. соч., с. 16.

⁴³ ა. ინაიშვილი. დასახ. ნაშრომი. გვ. 138, 145; В. А. Леквиннадзе. Указ. соч., с. 174—179; К. Мелитаури. Указ. соч., с. 18; Р. Гвердцители, Соображения по изучению к реставрации храма. 1963—1964 гг.

და აქვე მომუშავე არქიტექტორების — კ. მელითაურის, ვ. ლექვიანის და რ. გვერდწითელის — აზრით. ციხისძირის აკროპოლისში გამოვლენილი სამნავიანი, გარედან ხუთწახნაგა აფსიდიანი ბაზილიკა უნდა ყოფილიყო პეტრას ის საეპისკოპოსო ტაძარი, რომელიც წერილობით წყაროებში (ნოტიციებში) არაერთგზის იხსენიება⁴⁴.

ციხისძირის აკროპოლისის თანადროული საყურადღებო ძეგლები აღმოჩნდა მის ჩრდილოეთიდან მომიჯნავე ზღვისპირა გავაკებაზე, ადგილ ბობოყვათში. აქ, ქ. კიევის სანერგეს ტერიტორიაზე, 1959 წ. აღმოჩნდა და 1966 წ. გაითხარა სამნავიანი ბაზილიკა და მოპოვებული იქნა V—VI სს. მდიდარი არქეოლოგიური მასალა. ესენია: წელში გამოყვანილი ამფორები, სოლენის ტიპის კრამიტი, დამლიანი (თხის ჩლიქის გამოსახულებით) აგური, მინის ქურჭლის ნატეხები, მოზაიკის ნაშთები, ქვის კაპიტელი, მარმარილოს სვეტის ნატეხი, ქვაზე ნაკვეთი „ბოლნური“ ჯვარი, აკლდამა⁴⁵ და სხვ.

ა. ინაიშვილის აზრით, ბობოყვათის სამნავიანი ბაზილიკა წარმოადგენს ნაქალაქარზე აგებულ ძეგლს, რომელიც შესაძლოა აკროპოლისის სამნავიანი ბაზილიკის თანადროული ან უშუალოდ მისი მომდევნო ხანისა (VI საუკ. II ნახევარი) იყოს⁴⁶.

არქეოლოგიური ზედაპირული ძიებისა და ბობოყვათის დაბლობზე ბაზილიკური ნაშთების აღმოჩენის ფაქტმა მკვლევარი საბოლოოდ დაარწმუნა, რომ ქალაქი პეტრა ვრცელდებოდა ბობოყვათის დაბლობზე, ციხისძირის ციხიდან მდინარეების — დეხვასა და კინტრიშის — მიმართულებით⁴⁷. როგორც ზემოთ დავინახეთ, პეტრას ლოკალიზაციის საკითხებით დაინტერესებულ მეცნიერთა ერთი ჯგუფი, ითვალისწი-

44 ა. ინაიშვილი. პეტრას საეპისკოპოსო კათედრის საკითხისათვის ციხისძირის გათხრების შედეგების მიხედვით. — სამხრეთ-დასავლეთ საქართველოს ძეგლები. II. თბ., 1971. გვ. 105—106; Р. Г в е р д ц и т е л и. Указ. соч.; В. Л е к в и и а д з е. О постройках..., с. 174—179; К. М е л и т а у р и. Крепости..., с. 16—20.

45 ა. ინაიშვილი, დ. ხახუტაიშვილი, ა. კახიძე. 1966 წელს ციხისძირისა (პეტრა) და ფიქვნარის ნაქალაქართა არქეოლოგიური შესწავლის შედეგები. — ივ. ჯავახიშვილის სახ. ისტორიის, არქეოლოგიისა და ეთნოგრაფიის ინსტიტუტის XVI სამეცნიერო სესია, მიძღვნილი 1960 წლის საველე-არქეოლოგიური კვლევა-ძიების შედეგებისადმი, მოკლე ანგარიშები. თბ., 1967, გვ. 66—68.

46 იქვე; ა. ინაიშვილი. პეტრას საეპისკოპოსო კათედრის საკითხისათვის, ციხისძირის გათხრების შედეგების მიხედვით. გვ. 91—97.

47 ა. ინაიშვილი. ციხე-ქალაქი პეტრას ნავსადგურის საკითხისათვის. — სამხრეთ-დასავლეთ საქართველოს ძეგლები. II. თბ., 1971, გვ. 82.

ნებს რა ციხისძირის ციხის ტერიტორიულ შეზღუდულობას (1.5 ჰექტარი), ნავსაყუდელის უქონლობას და რელიეფის დანაწევრებას, თანამედროვე ნანგრევებს აკროპოლისის ნაშთად მიიჩნევს⁴⁸, ხოლო ქალაქის ტერიტორიას ბობოყვათის დაბლობში და მის ჩრდილოეთით ვარაუდობს⁴⁹. ამ ვარაუდის სისწორეს თითქოს ადასტურებს კიდეც ბობოყვათის ხსენებული აღმოჩენები და მიმდინარე წლის არქეოლოგიური გათხრების შედეგები. რამდენადაც ჩვენთვის ცნობილია, სამხრეთ-დასავლეთ საქართველოს არქეოლოგიური ექსპედიციის ციხისძირის რაზმმა 1983 წ. ბობოყვათის ტერიტორიაზე აღმოაჩინა და გათხარა მოზაიკურიატაკიანი აბანო და გვიანანტიკური ხანის სამაროვანი⁵⁰.

ამრიგად, უკანასკნელ წლებში მიღწეული შედეგების მიხედვით, ციხისძირის ტერიტორიაზე, ფაქტობრივად, დადასტურდა დიდი, ქალაქური დასახლების არსებობა, რომელსაც გააჩნია ორმაგი კედლებითა და კოშკებით გამაგრებული აკროპოლისი, თავისი სამნავიანი ბაზილიკით, აბანოთი და რაღაც სამეურნეო ნაგებობებით და აქვე, დაბლობში, საკუთრივ ზღვისპირას გაშლილი ქალაქი ტაძრით, აბანოთი, აკლდამით, სამაროვნით და სხვ.

ერთი სიტყვით, ციხისძირის ციხის ეფექტური ნაშთების შესწავლისა და უკანასკნელ წლებში ფართოდ გაშლილი არქეოლოგიური კვლევა-ძიების საფუძველზე, უდავოდ დასტურდება, რომ ამ პუნქტში, გვიანრომაულ და ადრებიზანტიურ ხანაში, არსებობდა რომელიღაც ქალაქი თუ ქალაქური ტიპის მსხვილი დასახლება.

ციხისძირი რომ დიდმნიშვნელოვანი ძეგლია, ეს კარგად დასტურდება როგორც მიწისზედა არქიტექტურული, ისე არქეოლოგიური მასალის საფუძველზე და აქ საკამათოც არაფერია, რასაც ვერ ვიტყვით პეტრა-ციხისძირის იდენტიფიკაციის საკითხზე. პეტრა-ციხისძირის იგივეობის საკითხი, რომელსაც თითქმის ორსაუკუნოვანი ტრადიცია გააჩნია, წინააღმდეგობათა ქსელით არის გარემოცული და ნაკლებად დამაჯერებელია.

48 ს. ჯ ა ნ ა შ ი ა. შრომები. I. გვ. 42—43.

49 ნ. ხოშტარია. დასახ. ნაშრ., გვ. 34; მ. სულეიშანოვი. პეტრა ციხე. — აქარის ასსრ სახელმწიფო მუზეუმის შრომები. II. ბათუმი, 1957, გვ. 25—26; ა. ი ნ ა ი შ ვ ი ლ ი. პეტრა-ციხისძირი. 1962—1965 წწ. ჩატარებული გათხრების შედეგები. გვ. 121.

50 ნ. ი ნ ა ი შ ვ ი ლ ი. ციხისძირის გვიანანტიკური ხანის აბანოები. — სამხრეთ-დასავლეთ საქართველოს ძეგლები. ტ. 17. გვ. 1988, გვ. 76—85.

ციხისძირთან პეტრას იდენტიფიკაციის გავრცელებულ მოსაზრებას არ იზიარებს გამოჩენილი გერმანელი ბიზანტიოლოგი ბერტჰოლდ რუბინი, რომელსაც იუსტინიანეს ეპოქისადმი მიძღვნილ ერთ-ერთ კაპიტალურ ნაშრომში გამოქვეყნებულ რუკაზე, ციხისძირის გვერდით, პეტრა აქვს აღნიშნული, მაგრამ იქვე უზის დიდი კითხვის ნიშანი⁵¹. ტექსტში იგი სინანულით აღნიშნავს, რომ პეტრას ლოკალიზაციის საკითხი დღემდე გადაუჭრელია, რაც ართულებს ისტორიული გეოგრაფიის თუ პოლიტიკური საკითხების გაშუქებას⁵². არსებულ ეტაპზე პეტრას ლოკალიზაციის საკითხთან დაკავშირებული ხსენებული ავტორის მოსაზრება სავსებით მისაღებად გვეჩვენება.

პეტრა-ციხისძირის იდენტიფიკაციის, უკვე საყოველთაოდ მიღებული და გაზიარებული, სახელმძღვანელო დებულებისადმი ჩვენი სკეპტიკური დამოკიდებულების საფუძველს რაიმე განსაკუთრებული ორიგინალობისავენ სწრაფვის ტენდენცია არ გააჩნია. ეს არის სავსებით რეალურად არსებული საკვლევი საკითხის ირგვლივ წინააღმდეგობრივი ფაქტების ანალიზის საფუძველზე მიღებული შეხედულება.

ჩვენი აზრით, პეტრას ლოკალიზაციის ხსენებულ ვარიანტს გააჩნია თავისი მყარი და სუსტი მხარეები. პირველი მდგომარეობს იმაში, რომ ადგილზე არსებობს შესანიშნავი არქეოლოგიური ძეგლი, რომლის ფიზიკურ-გეოგრაფიული პირობები თითქოს პასუხობს ქალაქ პეტრას წყაროსეულ ჩვენებებს, რაც წარმოადგენს მეცნიერთა ყურადღების გამახვილების საფუძველს ციხისძირისაკენ.

ლოკალიზაციის სისუსტე კი, პირველ ყოვლისა, იმით არის განპირობებული, რომ წერილობითი წყაროების ჩვენებათა გამოყენება ხდება ფრაგმენტულად, მხოლოდ სასურველი ადგილების გამოყენებით და საწინააღმდეგო ცნობების გვერდის ავლით. ცალკეული გამოჩენილის გარდა, წინასწარ არ ხდება იმ პუნქტების, ტომების განსახლების, გზებისა და მდინარეების ადგილმდებარეობის გარკვევა, რომელიც, წერილობითი წყაროების ჩვენებით, საძიებო ქალაქის ლოკალიზაციის საფუძველს წარმოადგენს.

საუბარა რომ ძალზე ზოგადი არ გამოგვივიდეს, საჭიროდ მიგვაჩნია გარკვეული თანმიმდევრობით განვიხილოთ ყველა ფაქტი და წე-

⁵¹ Berthold Rybica. Das zeitalter Jystinians, Erster Band. Berlin, 1960, Karte 8.

⁵² იქვე. გვ. 115.

რილობითი წყარო, სადაც ქალაქ პეტრაზეა საუბარი: თუ სად, როდის და რატომ შენდება ეს ქალაქი, როგორი იყო იმ დროისათვის ლაზების განსახლების ეთნიკური საზღვრები, სად გადიოდა ძირითადი, სახელმწიფოებრივი მნიშვნელობის გზები, რომელი იყო ქვეყნის მთავარი მდინარეები, სად მდებარეობდა ლაზების ძირითადი ციხე-ქალაქები და სხვ. ერთი სიტყვით, პირველი რიგის ამოცანად მიგვაჩნია საკითხის კომპლექსური შესწავლა, წერილობითი წყაროების გამოწვლილვითი ანალიზისა და ყველა სხვა რიგის (არქეოლოგიური თუ საისტორიო გეოგრაფიის) ფაქტიური მასალის გათვალისწინების საფუძველზე.

როგორც ცნობილია, ქ. პეტრას პირველ მოხსენიებას ვხვდებით იუსტინიანე კეისრის 535 წლით დათარიღებულ ნოველაში, სადაც საუბარია პოლემონის პონტოს ქალაქებზე: ნეოკესარიაზე, კომანაზე, ტრაპეზუნტზე, კერასუნტზე, პოლემონიონზე, პითუნტზე და სებასტოპოლისზე. ნოველის ავტორის თქმით, „მათ შემდეგ მდებარეობს ჩვენი ლაზიკე, სადაც არის ქალაქი პეტრა, რომელსაც ჩვენგნით ხვდა წილად ქალაქი გამხდარიყო და დარქმეოდა და რომელსაც მიენიჭა ჩვენი უზენაესის სახელიც და ეწოდება იუსტინიანე“⁵³.

ცნობაში არაფერია ნათქვამი პეტრას ლოკალიზაციის საკითხის სასარგებლოდ, მაგრამ იგი მაინც მნიშვნელოვანია ჩვენთვის, რადგან ამ წყაროდან პირველად ვგებულობთ, რომ პეტრა ლაზიკის ქალაქია. იგი აშენებული უნდა იყოს VI საუკუნის 30-იან წლებში, ალბათ, სპარსეთის მეფის, კავადის იმ ექსპანსიური პოლიტიკის საწინააღმდეგოდ, რომელსაც მოჰყვა ჯერ მეფობის გაუქმება ქართლში (523 წ.), ხოლო შემდეგ ლაზიკის ფარგლებში სპარსელების შემოჭრა და სანაპირო ციხეების — სკანდესა და შორაპანის — დაჭერა.

იმ ბერძენ მწერალთა შორის, რომლებმაც მდიდარი და მრავალფეროვანი მასალა დაგვიტოვეს ლაზიკის ისტორიის შესახებ და რომელთა თხზულებებმაც მოაღწიეს ჩვენამდე, „პროკოპი კესარიელი უნდა ჩაითვალოს ყველაზე უფრო ნაყოფიერ და სანდო ისტორიკოსად“⁵⁴.

ლექსიკოგრაფ სვიდას ცნობით, „პროკოპი ბრწყინვალე პალესტინის კესარიიდან, რიტორი და სოფისტი; აღწერა რომაული ისტორია, ესე იგი, პატრიკიოს ველიზარის ომები, რომლებიც რომსა და

⁵³ გეორგიკა. II. ბიზანტიელი მწერლების ცნობები საქართველოს შესახებ. ტექსტი ქართული თარგმანიურთ გამოსცა და განმარტებები დაურთო ს. ყაუხჩი-შვილმა. თბ., 1965, გვ. 33—35.

⁵⁴ გეორგიკა. II. გვ. 38.

ლიბიაში მოხდა. ცხოვრობდა იუსტინიანე მეფის დროს, ველიზარის მდივნის (მრჩეველის) თანამდებობას ასრულებდა და მას ახლდა ყველა-
ომში და მისი საქმიანობაც აღწერა⁵⁵.

როგორც ქართველი მკვლევრები ფიქრობენ, მიუხედავად იმისა, რომ თვითონ პროკოპის არ მიუღია მონაწილეობა ბიზანტია-სპარსეთის ომებში და არ ყოფილა ლაზიკაში, თავისი სამსახურებრივი მდგომარეობის წყალობით, ჰქონდა საშუალება გასცნობოდა ომის მსვლელობის ნამდვილ სურათს, რადგან მისთვის ხელმისაწვდომი იყო სახელმწიფო კანცელარიის ოპერატიული მოხსენებები, სახელმწიფო არქივებისა და სამხედრო შტაბების საიდუმლო მასალები.

არ უნდა დაგვაფიწყდეს, რომ პროკოპი კესარიელი ცხოვრობდა VI საუკუნის I ნახევარში, როდესაც ბიზანტია-სპარსეთის ომები ძალზე გამწვავებულია, ლაზიკაში მისი ერთ-ერთი ციხე-ქალაქის, პეტრას ხელში ჩაგდების მიზნით, რომელიც სპარსეთისათვის რომის იმპერიაში შეღწევის გასაღებს წარმოადგენდა, ხოლო რომისათვის — პირიქით, რომის იმპერიის ჩრდილო კარის ჩამკეტ ბურჯსა და ლაზიკაში მისი პოლიტიკური და ეკონომიკური ბატონობის ცენტრს წარმოადგენდა. პროკოპის თხზულება იუსტინიანეს დროინდელი ომების შესახებ სამართლიანად არის მიჩნეული საუკეთესო წყაროდ ბიზანტიისა და საქართველოს VI საუკუნის პირველი ნახევრის ისტორიისათვის. აგათია სქოლასტიკოსის მიხედვით, „ვინაიდან რიტორ პროკოპი კესარიელს ზედმიწევნით აქვს აღწერილი უმეტეს წილი იუსტინიანეს დროის მომხდარი ამბებისა, აღარ არის საჭირო მეც შევეხო მათ, რადგან მათზე საკმარისად არის ნათქვამი“⁵⁶.

ამასთანავე, პროკოპის ომების „ისტორია“, როგორც ს. ყაუხჩიშვილი აღნიშნავს, არ არის მართო ფაქტების გადმოცემის წყარო. ამბის უკეთესად გასაშუქებლად იგი იძლევა დაწვრილებით გეოგრაფიულ და ეთნოგრაფიულ აღწერებს იმ ადგილებისას, სადაც საომარი ოპერაციები მიმდინარეობდა⁵⁷.

აქვე, თუ კიდევ ერთხელ გავიხსენებთ მენანდრეს⁵⁸ და ლექსიკო-

⁵⁵ იქვე.

⁵⁶ გეორგიკა. III. ბიზანტიელი მწერლების ცნობები საქართველოს შესახებ. ბერძნული ტექსტი თარგმანიურთ გამოცემა და განმარტებები დურთო ს. ყაუხჩიშვილმა. თბ., 1936, გვ. 25.

⁵⁷ გეორგიკა. II. 1935, გვ. 13.

⁵⁸ ს. ყაუხჩიშვილი. ბიზანტიელი მწერლების ცნობები საქართველოს შესახებ. ტ. 3, 1936, გვ. 202.

გრაფ სვიდას⁵⁹ შეფასებას პროკოპისადმი, დავრწმუნდებით, რომ პროკოპი, როგორც ისტორიკოსი, სრული ნდობით სარგებლობდა ჯერ კიდევ მისივე თანამედროვე მწერალთა და მეცნიერთა შორის.

ასევეა დღესაც. „პროკოპი კესარიელი, როგორც ცნობილია, სავრთოდ და კერძოდ, ლაზიკის იმდროინდელი ვითარების გასარკვევად ფრიად კომპეტენტური ისტორიკოსია“⁶⁰. ს. ყაუხჩიშვილის აზრით, საქართველოს ისტორიის საკითხებზე მსჯელობისას „პროკოპი კესარიელი უნდა ჩაითვალოს ყველაზე უფრო ნაყოფიერ და სანდო ისტორიკოსად“⁶¹.

პროკოპი კესარიელის, როგორც ისტორიკოსის, მიმართ ამგვარი პოზიტიური დამოკიდებულების მიუხედავად, ჩვენს იტორიკოსთა შრომებში ხშირად ვხვდებით პროკოპის ცნობებისადმი კრიტიკულ, მე ვიტყვოდი, გადაჭარბებულ კრიტიკულ დამოკიდებულებას. ერთნი უსაყვედურებენ ავტორს ლიტერატურული და რეალურად არსებული ფაქტების აღრევას⁶², მეორენი — თითქოს, მის ცნობებში არსებულ ურთიერთსაწინააღმდეგო ფაქტებს⁶³ და ა. შ. აღსანიშნავია, რომ პროკოპი კესარიელის „შეცდომების“ დიდი ნაწილი თავმოყრილია მისი ისტორიის იმ ნაწილში, სადაც საუბარია ირან-ბიზანტიას შორის გაჩაღებული საომარი მოქმედების პირველ ეტაპზე, პეტრას ხელში ჩასაგდებად რომ მიმდინარეობს (541—551 წწ.). შემდგომში კი, როცა ბრძოლის ასპარეზი რიონ-ფასისის ხეობაში (არქეოპოლისის მიდამოებში) გადაინაცვლებს, ანალოგიურ ფაქტებს თითქმის აღარ ვხვდებით. ეს ფაქტი, უთუოდ, დამაფიქრებელია. თითქოს გეოგრაფიული გარემო იგივეა, ომები კვლავ ფასისის აუზში მიმდინარეობს, წყაროს ავტორი კვლავ პროკოპი კესარიელია, მისი ინფორმატორებიც, ალბათ, უცვლელნი რჩებიან, შრომის ხარისხი კი მკვეთრად იცვლება; ყოველ შემთხვევაში, ფაქტები აღარ ეწინააღმდეგებიან ერთმანეთს, სწორად ასახავენ ისტორიულად არსებულ რეალურ ვითარებას და, ბუნებრივია, ჩვენც უყოყმანოდ ვლებულობთ მათ.

⁵⁹ გეორგიკა. II. გვ. 38.

⁶⁰ დ. მუსხელიშვილი. საქართველოს ისტორიული გეოგრაფიის ძირითადი საკითხები. I. თბ., 1977, გვ. 102.

⁶¹ გეორგიკა. II. 1965, გვ. 106—109 (შენიშვნა); ნ. ბერძენიშვილი. საქართველოს ისტორიის საკითხები. 1975, გვ. 476.

⁶² ნ. ბერძენიშვილი. ლაზიკის ისტორიული გეოგრაფიისათვის. — მასალები. თბ., 1968, გვ. 22—23.

⁶³ დ. მუსხელიშვილი. დასახ. ნაშრომი. გვ. 102.

რაშია საქმე, რამ გამოიწვია წყაროს ცალკეული ნაწილი. ასეთი წარისხობრივი ტრანსფორმაცია, ან იქნებ არ გვესმის პროკოპი სწორად და ასეთი გადახრები შესაძლოა მისი ჩვენებების არასწორი ინტერპრეტაციის შედეგი იყოს, როგორც ამას ვარაუდობს პროფ. დ. მუსხელიშვილი⁶⁴.

ასეა თუ ისე, ამას პროკოპი კესარიელის წყაროსა და მისი სათუო ადგილების კიდევ ერთი გადასინჯვა დაგვანახებებს, ამჟამად უკვე ახალი, თეოთკრიტიკული კუთხიდან ჩატარებული. ეს შეეხება პროკოპი კესარიელის პირდაპირ და განსაკუთრებით, არაპირდაპირ ჩვენებებს.

პროკოპი კესარიელი ქ. პეტრას პირველად თავისი შრომის იმ ნაწილში მოიხსენიებს, სადაც საუბარია ბიზანტიის მიერ გატარებულ ეკონომიკურ პოლიტიკაზე ლაზეთში⁶⁵. პროკოპის თქმით, იუსტინიანე კესარს ვერცხლისმოყვარეობის, უდიერი ქცევისათვის თუ სხვა ცოდვებისათვის ლაზეთიდან გამოუწვევია სტრატეგოსი პეტრე არზანიელი და მის ნაცვლად, სხვა მთავრებთან ერთად, აგზავნის ვინმე იოანეს, ციხედ წოდებულს, არაწარჩინებულთა და არასახელოვანთა შთამომავალს, რომელსაც, როგორც ვხედავთ, დიდი წარმატებისათვის მიუღწევია თავისი პოლიტიკური და ეკონომიკური ნიჭის წყალობით. „მანვე დააჯერა მეფე იუსტინიანე ლაზების ქვეყანაში ზღვისპირა ქალაქი აეშენებინა, სახელად პეტრა. იქ იჯდა ის, ვითარცა აკროპოლისში და სძარცვავდა ლაზთა ქონებას. ვაჭრებს ხომ უკვე ნება აღარ ჰქონდათ კოლხიდაში შეეტანათ მარილი და სხვა საქონელი, რაც ლაზებისათვის აუცილებლად საჭიროა, არც აქედან შეეძლოთ რაიმე ეყიდინებინათ, არამედ მან (ე. ი. იოანემ) შემოიღო ეგრეთ წოდებული მონობოლია“⁶⁶ — მოგვითხრობს პროკოპი.

ამ ცნობებიდან ბევრი რამ არის საყურადღებო როგორც პოლიტიკური, ისე ეკონომიკური თვალსაზრისით, რაზეც ქვემოთ გვექნება საუბარი. ამჯერად კი იმით ვკმაყოფილდებით, რომ მივიღეთ პირველი ინფორმაცია პეტრას ზღვისპირა მდებარეობის შესახებ, რასაც არაერთგზის იმეორებს პროკოპი შემდგომშიც.

„პეტრა ზღვისპირა ქალაქია კოლხეთში, ეგრეთწოდებულ ევქსინის პონტოსთან; ის უმნიშვნელო იყო წინათ. ხოლო იუსტინიანე მეფემ,

64 დ. მუსხელიშვილი. დასახ. ნაშრომი. გვ. 104.

65 გეორგიკა. 11. გვ. 21—22.

66 იქვე. გვ. 74.

გარე ზღუდისა და სხვა მინაშენების საშუალებით, გაამაგრა და ყოველმხრივ გაამშვენიერა კიდეც“⁶⁷.

პროკოპი კესარიელის მიერ მოწოდებული ამ მეორე ცნობიდან ვგებულობთ, თუ რას წარმოადგენდა თავდაპირველად პეტრა და რა სამშენებლო სამუშაოები ჩაატარა აქ იუსტინიანემ. როგორც ჩანს, პეტრას ადგილზე თავდაპირველად მცირე, სოფლური ტიპის დასახლება უნდა არსებულიყო, რომელიც იუსტინიანეს გარეზღუდით, მინაშენებითა და სხვა სიკეთით ყოველმხრივ გაუმშვენიერა კიდეც. ამ ბოლო ფრაზაში, ალბათ, იგულისხმება ტაძრის, სასახლის, აბანოს, მოკირწყლული ქუჩებისა და მოედნების მშენებლობა, რაც დამახასიათებელია ბერძნულ-რომაული ტიპის ქალაქებისათვის.

კიდეც უფრო საინტერესო ცნობებია დაცული პროკოპის შრომის მომდევნო ნაწილში პეტრას შესახებ. ამ შემთხვევაში საქმე ეხება ქალაქის ტოპოგრაფიას, რაც ნიშანდობლივია მისი ლოკალიზაციისათვის. „ქალაქი პეტრა მიუვალაია ჯერ ერთი ზღვის მხრიდან. მერე ციცაბო კლდეებით, რომელიც იქ ყოველმხრივ არის აღმართული: აქედან არის, რომ მას ეს სახელწოდება ხვდა წილად. მხოლოდ ერთი შესავალი აქვს მას დაბლობში. ისიც არცთუ ისე ფართო: ვინაიდან მის ორივე მხარეს არაჩვეულებრივი კლდეებია დაკიდებული. რადგან იმათ, რომელთაც ქალაქი პირველად ააშენეს, წინასწარ განჰვერიტეს, რათა ზღუდის ის ნაწილი არ ყოფილიყო ადვილი იერიშებისათვის, და გრძელი კედლები გააკეთეს აქ დიდ მანძილზე, მისავალის თითოეული კლდის გასწვრივ და ამ კედლების ორივე მხარეს ორი კოშკი ააგეს ჩვეულებრივი წესით კი არა, არამედ სხვანაირად“⁶⁸.

როგორც ვხედავთ, აქ დეტალურად არის აღწერილი ქალაქის ტოპოგრაფია, მისი ყოველმხრივ ქარაფოვან-კლდოვანი რელიეფი, რომელსაც მხოლოდ ერთი შესავალი გააჩნია დაბლობში, ისიც კლდეებითა და კოშკებით გაამაგრებული. თუკი პროკოპისეულ ნიშანდობლივ: აღწერას დაუვჯერებთ, ქალაქი ქარაფოვანი, ნიადაგს მოკლებული შიშველი კლდეების გარემოცვაში ყოფილა აგებული და არა უბრალო ბორცოვან ზოლში, როგორსაც ვხვდებით ციხისძირის მიდამოებში. ციხისძირის მხოლოდ დასავლეთ ნაწილში, ზღვისაკენ მიმართულ კიდეზე გააჩნია მალალი ქარაფი, სხვა მხრივ კი, მისი, ზომიერად დახრილი ფერდები სუბტროპიკული ზონისათვის დამახასიათებელი, ხშირი მცე-

67 გეორგიკა. II. გვ. 83.

68 გეორგიკა. II. გვ. 85—86.

წარეული საფარით არის შემოსილი. ასეთია ციხისძირ-ბათუმს შორის მოქცეული მთელი სანაპირო ზოლი და, არა გვეგონია, არსებითად შეეცვალა ციხისძირის რელიეფი, იქ XIX ს. 90-იან წლებში (1889—1895 წწ.), ბათუმის ნავსადგურის სამშენებლო მასალით მომარაგების მიზნით არსებულ ქვის კარიერებს⁶⁹. გარდა ამისა მოყვანილ ცნობაში პირდაპირ არის ნათქვამი, რომ ქალაქი პეტრა მთლიანად, და არა მარტო მისი აკროპოლისი, კლდეზეა გაშენებული, მაშინ, როცა პეტრა-ციხისძირის იდენტიფიკაციის მომხრე მკვლევრები ციხისძირის ციხის ტერიტორიაზე გულისხმობენ პეტრას აკროპოლისს, ხოლო თვით ქალაქი ზღვისპირა დაბლობში, ბობოყვათ-ქობულეთ-ფიჭვნარის მიმართულებით ეგულებათ⁷⁰, რაც არ შეეფერება პროკოპისეულ ჩვენებას, როცა ქალაქის მიუვალობაზე საუბრობს.

ინფორმაცია, პეტრას ლოკალიზაციას რომ უწყობს ხელს, სულ უფრო ვრცელი და მრავალფეროვანი ხდება პროკოპის ომების ისტორიის იმ ნაწილში, სადაც საუბარია სპარსელების მეორე შემოჭრაზე კოლხეთში და მათ წინააღმდეგ ამჯერად უკვე ლაზებისა და რომაელების ერთობლივ მოქმედებაზე, როგორც უშუალოდ პეტრასთან, ისე ლაზიკისა და იბერიის საზღვრებთან. საჭიროა ამთავითვე ითქვას, რომ პროკოპი კესარიელს წერის თავისებური მანერა გააჩნია. იგი, როდესაც რაიმე საკითხზე საუბრობს, ხშირად წყვეტს მსჯელობას და, რათა უფრო იოლი და უკეთ გასაგები გახდეს ძირითადი საკითხი, აკეთებს ისტორიულ, ეთნოგრაფიულ, თუ ისტორიულ-გეოგრაფიულ ექსკურსს იმ მხარისა და მისი შემოგარენის შესახებ, სადაც ვითარდება მოქმედება. ამჯერადაც არ ღალატობს იგი ჩვეულ ტრადიციას და დეტალურ აღწერას იძლევა ქ. პეტრასთან დაბანაკებულ და ლაზიკის ვიწროებში ჩასაფრებულ ლაზებისა და რომაელების წინააღმდეგ იბერიიდან მომავალი სპარსეთის ჯარის მარშრუტისას: რა გზით მიემართებიან ირანელები პეტრასკენ. ან რა გზით შემოვიდნენ ისინი ლაზიკაში, როცა მათ რომაელებისაგან გამდგარი ლაზები მიუძღოდნენ. რათა უფრო იოლი გასაგები გახდეს ამ გზის მიმართულების გარკვევა, პროკოპი დეტალურად აღწერს გზაზე შემხვედრ მდინარეებს, მოგვითხრობს მათ ფიზიკურ თვისებებზე, მიმართულებაზე, საიდან იღებენ ისინი სათავეებს, სად არის მათი შესართავი, რომელი ქვეყნებისა თუ ტო-

69 ვ. სიკინავა. დასახ. ნაშრ. გვ. 42—43.

70 ს. ჯანაშია. შრომები I. გვ. 42; ნ. ხოშტარია. ციხისძირი. 1962, გვ. 35; ვ. სიკინავა. დასახ. ნაშრ. გვ. 25—26.

მების დასახლებათა მახლობლად მიედინებიან და სხვა. ყოველივე ეს ფასდაუდებელ ინფორმაციას იძლევა ლაზიკის სამეფოსა და ქალაქ პეტრას ლოკალიზაციისათვის რომ არის საჭირო.

სამაგალითოდ მოვიყვანთ ამ რიგის ვრცელ ამონაწერს პროკოპის შრომიდან: „მდინარე ბოასი გამოდის სადაც ჭანეთის საზღვრების მახლობლად არმენიელთა ადგილებში, რომლებიც ფარანგიონის მახლობლად ცხოვრობენ. თავში ის კარგა მანძილზე მარჯვნივ მიმდინარეობს. თხელია და არავითარ სიძნელეს არ წარმოადგენს არავისათვის ფონში გასასვლელად, ვიდრე იმ ადგილამდე, სადაც მარჯვნივ იბერთა. საზღვრები არის, ხოლო პირისპირ კავკასიის მთა თავდება. აქ ბევრი სხვადასხვა ტომი ცხოვრობს. მათ შორის ალანებიც და აბაზგებიც. რომლებიც ქრისტიანები არიან და ძველითგანვე რომაელთა მეგობრები, აგრეთვე ზიქნიც და მათ შემდეგ ჰუნებიც, რომელთაც საბირები ეწოდება. მის შემდეგ, რაც ეს მდინარე მიადრეკს იმ ადგილს, სადაც კავკასიისა და იბერიის საზღვრებია. აქ, რადგან მას ბევრი სხვა წყალიც ემატება, ის იზრდება ძალიან და, ნაცვლად ბოასისა ამიერიდან ფაზისად წოდებული, განაგრძობს მდინარეობას, ნაოსნობისათვის გამოსადეგია, ვიდრე ევქსინად წოდებულ ზღვამდე, სადაც მისი შესართავია და მის ორივე მხრით ლაზიკე არის. მაგრამ მარჯვნივ მთელი ის ქვეყანა დიდ მანძილზე, ვიდრე იბერიის საზღვრებამდე, დასახლებულია ადგილობრივი მოსახლეობით. ლაზთა სოფლები ხომ ყველა აქ მდებარეობს მდინარის აქეთა ნაპირას და ქალაქებიც მათ ძველთაგანვე აქ აუშენებიათ, მათ შორის არის არქეოპოლისი, ძალიან გამაგრებული, სებასტოპოლიც არის აქ და პიტეუნტის სიმაგრეც, ხოლო სკანდა და სარაპანი — იბერიის საზღვრებისაკენ. ყველაზე შესანიშნავი ქალაქები კი მაინც არის აქ როდოპოლისი და მოხირისი. მდინარის მარცხნივ, ისეთ მანძილზე, რომელსაც ერთ დღეში გაივლის მსუბუქად დატვირთული კაცი, ლაზიკის საზღვრებია, ხოლო ეს მხარე მოსახლეობას მოკლებული ჩანს. ამ მხარის მეზობლად რომაელები ცხოვრობენ, რომელთაც პონტოელები ეწოდებათ. ლაზიკის მიწა-წყალზე, იმ ადგილას, სადაც ადამიანს არასოდეს არ უცხოვრია, იუსტინიანე მეფემ ჩემს დროს ქალაქი პეტრა გააშენა. აქ იოანე, ეგრეთ წოდებული ციბე, მონოპოლიონის დამაწესებელი — როგორც ეს ჩემ მიერ ზემოთ იყო მოხსენიებული — ლაზთა განდგომის მიზეზი შეიქმნა. ქალაქ პეტრადან პირდაპირ რომ მიდიხარ სამხრეთისაკენ, გვხვდება რომაელთა საზღვრები, აქ კი ადგილები მჭიდროდ არის დასახლებული: რინედ წოდებული და ათინა და ზოგი სხვა ვიდრე ტრაპეზუნამდე.

როდესაც ლაზები წინ მიუძღოდნენ ხოსროს, მათ გადავლეს მდინარე ბოასი და ისე მივიდნენ პეტრაში, რომ ფაზისი მარჯვნივ ჰქონდათ, თითქოს იმიტომ, რომ მათ წინასწარ განჰქვრიტეს, რომ მდინარე ფაზისის გადასასვლელად არც დრო და არც შრომა დასჭირდებოდათ მეტრ, ხოლო ნამდვილად იმიტომ, რომ არ სურდათ სპარსელებისათვის ეჩვენებინათ თავიანთი საბინადროები, თუმცა ლაზიკე ყველგან, მდინარე ფაზისის როგორც აქეთა. ისე იქითა მხარეზე, გაუვალია. ქვეყნის ორსავე მხარეს უზარმაზარი კლდეებია, რომლებიც იქ დიდ მანძილზე ვიწროებს ქმნიან, ასეთ გზებს რომაელები „კლისურებს“ უწოდებენ ელინური გამოთქმით. მაგრამ რადგან მაშინ ლაზიკე დაუცველი აღმოჩნდა, სპარსელები მათ წინამძღოლ ლაზებთან ერთად სწრაფად გაჩნდნენ პეტრაში⁷¹.

როგორც ვხედავთ, მოყვანილი ამონაწერი მრავალმხრივი ძვირფასი ინფორმაციის შემცველია პეტრას ლოკალიზაციის თვალსაზრისით. აქ ვხვდებით პირდაპირ მითითებას საძიებო ქალაქის ადგილმდებარეობის შესახებ, მოცემულია დასავლეთ კავკასიონის ზოგადი და ლაზიკის კონკრეტული ნაწილის აღწერილობა, საუბარია იბერიისა და რომაული სამფლობელოების საზღვრებზე და სხვა; მაგრამ ეს ცნობა განსაკუთრებით იმ მხრივ არის საყურადღებო, რომ პროკოპის აღწერილი აქვს ერთ-ერთი მდინარე, ე. წ. ბოას-ფასისი, რომლის თანამედროვე მდინარესთან სწორი იდენტიფიკაციის შემთხვევაში, მყარი საყრდენი ორიენტირი გვექნებოდა ხელთ არა მარტო პეტრას, არამედ ქვეყნის საზღვრების, მისი ქალაქებისა და ციხეების განლაგების, გზების მიმართულებისა, და სხვათა საჩვენებლად.

როგორც ცნობილია, დროთა განმავლობაში დიდი ცვლილებები ხდება ხალხთა პოლიტიკურ და ეკონომიკურ ცხოვრებაში. მაშინ, როდესაც ისობა და ჩნდება ახალი სახელმწიფოები, ირღვევა ისტორიულად დადგენილი საზღვრები, ხდება ხალხთა გადასახლება, ინგრევა და ჩნდება ახალი ქალაქები და სხვა, სრულიად უცვლელი რჩება გეოგრაფიული ერთეულები: მთები, ზღვები, მდინარეები და სხვა, რომელთა ლოკალიზაცია უტყუარი ამოსავალია უკვე მისამართდაკარგული პუნქტების ადგილმდებარეობის დასადგენად.

სწორედ ასეთი არსებითი მნიშვნელობა აქვს მოყვანილ ცნობაში მოხსენიებულ მდ. ბოასს. როგორც დავინახეთ, პროკოპი ამ მდინარის აღწერას იწყებს სათავედან: „მდ. ბოასი გამოდის სადღაც ჭანე-

⁷¹ გეორგია. II. გვ. 100—102.

თის საზღვრების მახლობლად არმენიელთა ადგილებში, რომლებიც ფარანგიონის მახლობლად ცხოვრობენ⁷². ვფიქრობთ, ძალზე ნიშანდობრივი აღწერაა მდინარის სათავესა. აქ დასახელებულია ჭანების საცხოვრისის საზღვრები, არმენიელთა ადგილები და ბოლოს ადგილი ფარანგიონი⁷³.

ფარანგიონს იხსენიებს პროკოპი რამდენჯერმე და ყოველთვის „ბოლონის“ სიმაგრესთან დაკავშირებით. ფარანგიონი ცნობილია ოქროს მადნებით და, როგორც ს. ყაუხჩიშვილი ფიქრობს, სწორედ მის დასაცავდაა აგებული ციხე ბოლონი⁷⁴. ნ. აღონცის აზრით, ფარანგიონი იგივეა, რაც სომხური „სპერ“, კლასიკური „სისპირისი“⁷⁵.

ასეთი ნიშანდობლივი მითითების შემდეგ ძნელია არ გავიზიაროთ ზემოდასახელებული მკვლევარების აზრი, რომ მდ. ბოასი ახლანდელ ჭოროხს უდრის⁷⁶. აღსანიშნავია, რომ დიდი გეოგრაფოსი ვახუშტი ბატონიშვილიც მდ. ჭოროხის ერთ-ერთ სათავედ ისპირის მდინარეს თვლის⁷⁷.

მდ. ბოასის სათავეზე საუბრის შემდეგ პროკოპი დეტალურად აღწერს მდინარის მომდევნო ნაწილს, რომელიც კარგა მანძილზე მარჯვნივ მიმდინარეობს და ყველგან ადგილი გადასალახია, ვიდრე არ მიაღწევს იმ ადგილს, სადაც მარჯვნივ იბერთა საზღვრებია. აქ, რადგან მას ბევრი წყალიც ემატება, ის იზრდება ძალიან და ნაცვლად ბოასისა, ამიერიდან ფაზისად წოდებული, განაგრძობს დინებას, ნაოსნობისათვის გამოსადეგია, ვიდრე ექვსინად წოდებულ ზღვამდე⁷⁸.

ჭოროხის პროკოპისეული აღწერილობა საეცებით წააგავს XIX ს-ის მოგზაურების — ოსმან ბეისა⁷⁹ და დ. ბაქრაძის⁸⁰ — ცნობებს ამ მდინარის შესახებ.

⁷² იქვე. გვ. 100.

⁷³ იქვე.

⁷⁴ გეორგიკა. II. გვ. 6. შენ. 1.

⁷⁵ Н. А д о н ц. Армения в. эпоху Юстиниана. С.-П., 1808, с. 25. 52

⁷⁶ გეორგიკა. II. გვ. 107, შენ. I, ბ; ს. ჭ ა ნ ა შ ი ა. შრომები. VI. შავიზღვისპირეთის საისტორიო გეოგრაფია. თბ., 1988, გვ. 261—270.

⁷⁷ ვ ა ხ უ შ ტ ი. აღწერა სამეფოსა საქართველოსა. თბ., 1941, გვ. 139.

⁷⁸ გეორგიკა. II. გვ. 101.

⁷⁹ Д. Чл. Осман-бей. Лазистан.—Известія Имп. Русского геогр. общ., т. X. С.-П., 1874, с. 356—364.

⁸⁰ Д. Б а к р а д з е. Археологическое путешествие по Гурни и Адчаре, с. 78.

მდ. ჭოროხის კალაპოტი ბაიბურთამდე ფართოა და დინებაც შედარებით მდორეა დიდ მანძილზე, ართვინთან კი იგი ექცევა ვიწროებში. მთებთან — აჭირახსა და მეზლასთან — იცვლის მიმართულებას ჩრდილო-აღმოსავლეთიდან ჩრდილო-დასავლეთისაკენ და დიდი სისწრაფით მიექანება ზღვისაკენ.

ჭოროხის მთავარი შენაკადებია: თორთომის წყალი, ოლთისის წყალი. აჭარის წყალი, იმერხევის წყალი, მაჭახლის წყალი და სხვა. ართვინიდან ქვემოთ, მდინარეზე მთელი წლის მანძილზე მიმოდინად დიდი ზომის ნავეები ანუ კიუკები, გარდა ზაფხულის დამდეგისა, როდესაც იწყება წყალდიდობა.

როგორც ჩანს, სწორედ ართვინთან გულისხმობს პროკოპი იბერიის საზღვრებს და სწორედ აქედან მოკიდებული ლეზულობს ფასიის სახელს წყალუხვი ბოას-ჭოროხი.

სხვა შემთხვევაში, ჭანების ტომის ადგილსაცხოვრისის აღწერისას, პროკოპი კესარიელი ფასიის სახელით მოიხსენიებს ჭოროხის სათავესაც და მთლიანად მდინარესაც, რომელიც გამოდის ჭანეთის მთებიდან: „არმენიის ადგილებიდან პერსარმენიაში რომ მიდიხარ, მარჯვნივ არის ტავრი, მიმავალი იბერიაში და იქ მოსახლე ხალხებამდე. როგორც ეს მე ცოტა ზემოთ ვთქვი; ხოლო მარცხნივ მეტად დაქანებული, დიდ მანძილზე გაჭიმული გზა არის, და აღმართულია მეტად ციცაბო და მუდამ ნისლითა და თოვლით დაფარული მთები, საიდანაც გამოდის მდინარე ფაზისი და მიდის კოლხეთის ქვეყნისაკენ. აქ მოსახლეობენ ჭანების ტომი, თავიდანვე ბარბაროსები, რომელნიც არაუღს ქვეშევრდომები არ არიან, წინა ხანებში სანებად წოდებულნი“⁸¹.

„მეცნიერებაში დამკვიდრებულია აზრი, რომ ფაზისი ძველ ბერძნებში ეწოდებოდა ოთხ მდინარეს: ყუბანს, რომელიც, უმეტეს შემთხვევაში, ჰიპანისის სახელით იყო ცნობილი, არაზანს ანუ არაქსს, ჭოროხსა და რიონს, და თვითეული მათგანის ასეთი სახელდებისათვის მონახულია სათანადო ინდიციები ბერძენ მწერალთა ნაშრომებში“⁸².

ხშირად ფაზისის სახელით მდ. ჭოროხი იხსენიება, რაც, უმეტესწილად. ცხადი ხდება ხოლმე იმის წყალობით, რომ ამ ფაზისის სათა-

⁸¹ გეორგიკა. II. გვ. 52—53.

⁸² მ. ბერძნივილი. ქალაქ ფაზისის ისტორიისათვის. თბ., 1969, გვ. 89: თ. მიქელაძე. ფასიანების საღურობისა და ადგილსამყოფელის გარკვევის საკითხისათვის. — მასალები საქართველოსა და კავკასიის ისტორიისათვის. ნაკვ. 32. თბ., 1955, გვ. 31—32; ს. ჯანაშია. დასახ. ნაშრომი, გვ. 261—270.

ვედ სდებენ არმენიის ან მოსხიკის მთებს. თუ ქსენოფონტეს არ ჩავთვლით, ამ სახელით იგი გვხვდება ძვ. წ. III საუკუნიდან ვიდრე ახალი წელთაღრიცხვის VI საუკუნემდე, დაწყებული ერატოსთენიდან და გათავებული პროკოპი კესარიელით⁸³.

ამრიგად, პროკოპი კესარიელი არც პირველია და არც უკანასკნელი (ესტათე თესალონიკელი), რომელიც მდ. ჭოროხს ფასისის სახელით მოიხსენიებს. როგორც ჩანს, ტრადიცია, რომელიც ჭოროხს ფასისის სახელით მოიხსენიებდა, დიდი ხნის წინ ჩამოყალიბდა და სავსებით სწორად ასახავდა რეალურად არსებულ ვითარებას. ჭოროხის ხეობა ხომ სწორედ ის ტერიტორიაა, რომელიც წყაროებში ფასიანთა ტომის საცხოვრებლად არის მიჩნეული⁸⁴.

ისიც უდავოა, რომ არსებობდა მეორე ფასისიც, რიონ-ფასისი და, შესაძლოა, უფრო პოპულარულიც, მის შესართავთან მოსახლე სავაჭრო ქალაქის არსებობის გამო. ამ ორ ფასისის სათავეს ზოგჯერ ურევენ კიდეც ერთიმეორეში ძველი ავტორები⁸⁵, განსაკუთრებით ისინი, ვინც მხოლოდ ლიტერატურული წყაროებით სარგებლობენ, მაგრამ ესეც იმის დასტურია, რომ არსებობდა რამდენიმე მოსახლე მდინარე, თორემ ერთის არსებობის შემთხვევაში აღრევა აზრობრივადაც სავსებით გამორიცხულია.

მკვლევართა დაკვირვებით, ფასი, რომლის შვილი იყო კოლხების ეთნარქოსი კოლხი, ღმერთი ყოფილა⁸⁶, რაც საფუძველს არ არის მოკლებული. თ. მიქელაძის აზრით, ფასი წყლის ღმერთი უნდა ყოფილიყო⁸⁷, ჩვენ კი იგი ადამიანის დამცველ, ბოროტ ძალებთან მებრძოლ, ხმელეთის მოურავ, ადამიანსა და ღმერთებს შორის კავშირის დამამყარებელ არწივისებურ მითოლოგიურ ფრინველად გვესახება. საფიქრებელია, რომ სწორედ ეს ღვთაებაა წარმოდგენილი წინარე ანტიკური და ანტიკური ხანის ბრილის, სოხუმის, საირხის, ვანის, დაფნარისა და სხვა არქეოლოგიურ მასალებში თავმოპოვებული, ფრთავალილი არწივის სახით.

უთუოდ საგულისხმოა ის ფაქტი, რომ კოლხეთის ლეგენდარული

⁸³ ნ. ბერძენიშვილი. დასახ. ნაშრ. გვ. 93—94.

⁸⁴ თ. მიქელაძე. დასახ. ნაშრ. გვ. 23—37.

⁸⁵ ფლავიუს არიანე. მოგზაურობა შავი ზღვის გარშემო. თარგმანი, გამოკვლევა, კომენტარები და რუკა ნათელა კეჭაყმაძისა, თბ., 1961; გვ. 86; თ. ყაუხჩიშვილი. სტრატონის გეოგრაფია. თბ., 1957, გვ. 123.

⁸⁶ თ. მიქელაძე. დასახ. ნაშრ. გვ. 34.

⁸⁷ იქვე.

მეფე აიეტი, რომელიც მზის შვილია, არწივის სახელს ატარებს. ინტერესს მოკლებული არ არის ის ფაქტიც, რომ ჰესიოდე ალექსანდრიელი პონტოს ხალხებზე საუბრისას ახსენებს რაღაც ფრინველს, ფასის სახელწოდებით⁸⁸, და ისიც, რომ ქართულმა ფოლკლორმა ფართოდ შემოგვინახა ღვთაებრივი თვისებების მქონე მითოლოგიური ფრინველი ფასკუნჯის სახით, მაგრამ ყოველივე ამის შესახებ დაწვრილებით სხვა დროს.

სხვა საქმეა, ფასი ფრინველია თუ წყლის ღვთაება, მაგრამ ერთი კი ცხადია, რომ იგი კოლხური წარმართული პანთეონის ერთ-ერთი ბინადარი ჩანს და, შესაძლოა, არა მარტო კოლხეთისა, არამედ მთელი კავკასიური სამყაროსი. მას, როგორც ღვთაებას, ამ გარემოში ეკუთვნის ყველაფერი ის, რაც კი საგანგებო ნიშნით არის გამორჩეული: სიმაღლით, სილამაზით, გემოვნებით, დინების სისწრაფით, წყალუხვობით და სხვა. ასეთია მთები: რაჭაში ფასის მთა და იმავე სახელწოდების მთა აბასთუმანთან, სოფლები: ფასკაუ ყაბარდოში, ფასრალი კვაი-სასთან (ჯეჯორას ხეობა), ფასანაური ხევში და მდინარეები: ფასის-ყუბანი, ფასის-არაქსი, ფასის-რიონი და ფასის-ჭოროხი ანუ ბოას-ფასისი.

სწორედ ეს უკანასკნელი, ბოას-ფასისია ის მდინარე, რომელიც, პროკოპი კესარიელის ნიშანდობლივი აღწერილობის მიხედვით, ზუსტად თავსდება ჭოროხის გეოგრაფიულ ჩარჩოებში და ყველა ის ფიზიკური და საგზაო-სატრანზიტო თვისება გააჩნია, რაც ნიშანდობლივია თანამედროვე ჭოროხისათვის.

ასეთი დაშვების საწინააღმდეგოდ ხშირად მიუთითებენ პროკოპის შრომის კიდევ ერთ ადგილზე, სადაც ბოასის გაგრძელებად აკამფსისი ჩანს. ამ ცნობაში მოცემულია პონტოს სანაპიროს აღწერილობა, საუბარია ტრაპიზონის საზღვრებზე და მის ქალაქებზე — ტრაპეზუნტზე, სუსარმენეზე, რიზეზე და სხვა: „ამ ადგილების მარჯვნივ აღმართულია ჭანების მთები, რომელთა გადაღმა რომელთა ქვეშევრდომი არმენიელები ცხოვრობენ. ამ ჭანეთის მთებიდან ჩამოდის მდინარე, სახელად ბოასი, რომელიც მის შემდეგ, რაც გამოივლის მრავალ ჭალას და შემოუვლის მთაგორიან ადგილებს, ლაზიკის სოფლების მახლობლად გასწევს და ერთვის ეგრეთწოდებულ ეექსინოს პონტოს, მაგრამ უკვე აღარ ეწოდება ბოასი. ვინაიდან, როდესაც ის ზღვის მახლობლად მიდის, იცვლის ამ სახელს და იქიდან სახელწოდებას მიიჩქმევს: სა-

⁸⁸ В. Л а т ы ш е в. Известия древних писателей греческих и латинских о Скифии и Кавказе. Т. I, вып. 3-й, с. 355.

ჯელს ის თავის მიმღევართაგან იძენს. მას, სხვათა შორის, ადგილობრივი მცხოვრებლები აკამფსის უწოდებენ იმის გამო, რომ მისი დამორჩილება ზღვასთან შეერთების ადგილას შეუძლებელი ხდება, ვინაიდან ისეთი სისწრაფთა და სიმწვავეთ უერთდება და ისეთი დიდ ხმაურობით მიიწევს წინ, რომ ზღვის კარგა მოშორებით მიმდინარეც შეუძლებელს ჰქმნის ზღვაში შეცურვას; ასე რომ, პონტოს იმ ადგილას მცურავნი ვერც შიგ ლაზიკეში ახერხებენ შენაგებას, ვერც იქიდან გაჰოსვლას და ვერც ახლოს გაცურვას. ვინაიდან არსად არ შეუძლიათ ღაიმორჩილნი წყლის მდინარება, არამედ შორს უნდა ავიდნენ ზღვაში. სადმე შუა პონტოში მივიდნენ და ასე აიცილნონ მდინარის შესართავი. აი, ის, რაც მინდოდა მეთქვა მდინარე ბოასის შესახებ⁸⁹.

როგორც მოყვანილი ცნობიდანაც ჩანს, ამ მდინარის სათავე და ზემო წელი იგივე ბოასია, რომელზეც ადრეც ჰქონდა საუბარი პროკოპის. ეს არავისათვის არ არის საკამათო. რაც შეეხება მდინარის ქვემო წელს, იგი ამჟერად, ფასისის ნაცვლად, აკამფსისის სახელით იხსენიება: უფრო სწორად, მთლიანად ქვემო წელი კი არა, არამედ უშუალოდ შესართავი მონაკვეთი. აბა, დაეკვირდეთ თხრობის ამ ნაწილს: „...რომელიც მას შემდეგ, რაც გამოივლის მრავალ ჭალას და შემოუვლის მთაგორიან ადგილებს, ლაზიკის სოფლების მახლობლად გასწევს და ერთვის ეგრეთწოდებულ ევქსინოს პონტოს, მაგრამ უკვე აღარ ეწოდება ბოასი. ვინაიდან, როდესაც ის ზღვის მახლობლად მიდის, იცვლის ამ სახელს და იქიდან სხვა სახელწოდებას მიიჩქმევს: სახელს ის თავის მიმღევართაგან იძენს. მას, სხვათა შორის, ადგილობრივი მცხოვრებლები აკამფსისის უწოდებენ“⁹⁰. როგორც ჩანს, აკამფსისი ბოასის სულ ბოლო მონაკვეთს ეწოდება, შესაძლოა, იმ წერტილიდან მოყოლებული, როცა იგი ორ ტოტად იყოფა. საგულისხმოა, რომ, კ. მიულერის დაკვირვებით, აკამფსისი ეწოდებოდა ქოროხის აღმოსავლეთ ტოტს, დასავლეთი ტოტი კი მდ. აფსაროსია⁹¹. იქნებ სწორედ ეს ტოტი იგულისხმება პროკოპის გამოთქმაში — „სახელს ის თავის მიმღევართაგან იძენს“-ო⁹².

⁸⁹ გეორგია. II. 1965, გვ. 122—123.

⁹⁰ გეორგია. II. გვ. 123.

⁹¹ ENG, t. V, 174. (ფლავიუს არიანე. მოგზაურობა შავი ზღვის გარშემო. გვ. 64. მიხედვით).

⁹² გეორგია. II. გვ. 122.

ლექსიკოგრაფ სვიდას მიხედვით, აკამფსისი ქალაქის სახელია⁹³. ასევე საყურადღებოა, რომ აკამფსისი ქართულ მკვლევართა ერთი ნაწილის მიერ გაგებულა, როგორც „ფას“-ფუძიანი ტოპონიმი. პავლე ინგოროყვას მიხედვით, ჭოროხის ისტორიული სახელწოდების — აკამ-ფსისის — პირველადი ვარიანტი უნდა იყოს აკამ-ფასისი⁹⁴. ანალოგიურ დასკვნამდე მიდის პროფ. თ. მიქელაძე „ფას“-ფუძიანი სახელების გავრცელების საზღვრების დადგენისას. მისი აზრით, აკამფსისი ანუ აკამ-ფასისი იგივე მდ. ჭოროხია⁹⁵.

ჩვენი დაკვირვებით, ასევე „ფას“ ფუძე უნდა ედოს საფუძვლად მდ. ჭოროხის მარცხენა ტოტის აფსაროსის სახელწოდებას — ა-ფსაროსი ან ო-ფსარუ-სი, სადაც, თუ თავსართი ა//ო ქართული საპრეფიქსის შესატყვისია, იგი უნდა ნიშნავდეს ფასის კუთვნილ ან ფასიანელების კუთვნილ მდინარეს. თუ ეს ასეა, მაშინ პროკოპი კესარიელის შრომის ეს ადგილიც ისე უნდა გავიგოთ, რომ ამ შემთხვევაშიც მდ. ბოასის გაგრძელება, კვლავ სახენაცვალი ფორმებით წარმოდგენილა, მდინარე ფასისია. ინტერესს არ არის მოკლებული აგრეთვე პროკოპის ცნობის კიდევ ერთი ადგილი, სადაც განმარტებულია, თუ რატომ უწოდებენ მდინარე აკამფსისს ასე: „მას, სხვათა შორის, ადგილობრივი მცხოვრებლები აკამფსისს უწოდებენ იმის გამო, რომ მისი დამორჩილება, ზღვასთან შეერთების ადგილას, შეუძლებელი ხდება...“⁹⁶. აქედან გამომდინარე, აკამფსისი მდინარის საკუთარი სახელი კი არ არის, არამედ ზედსართავი სახელია, რაც ბოასის გარკვეული მონაკვეთის ფიზიკურ თვისებას ასახავს.

საგულისხმოა აგრეთვე წყაროში ხმარებული გამოთქმა — „სხვათა შორის, ადგილობრივი მცხოვრებლები აკამფსისს უწოდებენ“. კონტექსტის მიხედვით, ეს ისე უნდა გავიგოთ, თითქოს პროკოპი დარწმუნებულია, რომ მისმა მკითხველმა იცის ამ მდინარის ნამდვილი, ოფიციალური სახელი (ალბათ, ფასისი) და აქვე, სხვათა შორის, დამატებით გვაცნობს მდინარის ადგილობრივ, კუთხურ, შინაურ სახელსაც. ანდა მეორე, პროკოპის ამით სურს მკითხველს შეახსენოს ხსენებული მდინარის ადრინდელი, ლიტერატურული სახელი, რითაც

⁹³ გეორგიკა. IV. ნაკვ. 2. ბიზანტიელი მწერლების ცნობები საქართველოს შესახებ. ბერძნული ტექსტი ქართული თარგმანითურთ გამოსცა და განმარტებები დაურთო სიმონ ყაუხჩიშვილმა. თბ., 1952, გვ. 315.

⁹⁴ პ. ინგოროყვა. გიორგი მერჩულე. თბ., 1954, გვ. 184.

⁹⁵ თ. მიქელაძე. დასახ. ნაშრ. გვ. 31—32.

⁹⁶ გეორგიკა. II. გვ. 129.

კიდევ ერთხელ ამახვილებს მის ყურადღებას, რომ მან იცოდეს: მის მიერ აღწერილი ბოას-ფასისი თუ ბოას-აკამფსისი ეს ის მდინარეა, რომელსაც მისი წინამორბედი მწერლები (ფლავიუს არიანე, პლინიუსი, კლავდიოს პტოლემიოსი) ძველად აკამფსისს უწოდებდნენ.

ამასთანავე, ისიც არის გასათვალისწინებელი, რომ მდ. ჭოროხის ხეობა, ანტიკური ხანიდან მოკიდებული მაინც, დასახლებული იყო არაერთი ეთნიკური ჯგუფით, როგორც არიან ფასიანელები, არმენიელები, ჭანები, ლაზები, იბერ-მესხები, ბიძერ-ზიდრტები და სხვ. ამდენად, გამორიცხული არ არის, ცალკეულმა ასეთმა ეთნიკურმა ჯგუფმა თავისი შეხედულებისამებრ შეარქვა მდინარის ცალკეულ ნაწილებს განსხვავებული საკუთარი სახელი, ისე როგორც ენგურს სხვადასხვა სახელს უწოდებენ სვანები და მეგრელები, თერგს — მოხევეები და ჩერქეზები⁹⁷, ბზიფს — სვანები და აფხაზები⁹⁸ და ა. შ. ანალოგიური ტრადიცია კიდევ უფრო ფართოდ ყოფილა გავრცელებული XIX ს. ბოლო მეოთხედშიც კი მდ. ჭოროხის ზემო წელის შენაკადთა ხეობებში. გ. ყაზბეგი, რომელმაც იმოგზაურა შანშეთში და ლაზეთში, ხაზგასმით აღნიშნავს, რომ აქაურ მდინარეებს არ გააჩნიათ ერთი საერთო სახელი, მათ ყოველი სოფელი, გარკვეული საგნისა თუ ნიშნის მიხედვით, აძლევს საკუთარ სახელს⁹⁹.

არ არის გამორიცხული, ასეთივე ვითარებასთან გვექონდეს საქმე პროკოპის დროსაც. მაგრამ, ასეა თუ ისე, ერთი ცხადია, რომ მისი ფასისი. ბოას-ფასისი და ბოას-აკამფსისი ერთი და იგივე მდინარეა და უფრო თანამედროვე მდ. ჭოროხს შეესატყვისება, ვიდრე რიონ-ფასისს, როგორც ამას ფიქრობს ზოგიერთი ჩვენი წინამორბედი მკვლევარი.

აკად. ს. ყაუხჩიშვილი, ეკამათება რა ჰიუფშმანს, ასეთი დაშვების უარსაყოფად ყურადღებას ამახვილებს პროკოპის ცნობის ერთ ადგილზე, სადაც ნათქვამია: „მას შემდეგ, რაც ეს მდინარე მიალწევს იმ ადგილს, სადაც კავკასიისა და იბერიის საზღვრებია, აქ..., ნაცვლად ბოასისა, ამიერიდან ფაზისად წოდებული, განაგრძობს მდინარებას“ და დასძენს, რომ ასეთი საზღვრები „ჭოროხის ხეობაში საძიებელი

⁹⁷ ვახუშტი ბატონიშვილი. დასახ. ნაშრ. გვ. 66; ნ. ბერძენიშვილი. საქართველოს ისტორიის საკითხები. ტ. VIII. 1975, გვ. 72,

⁹⁸ დ. მუსხელიშვილი. საქართველოს ისტორიული გეოგრაფიის ძირითადი საკითხები. II. გვ. 55—57; ვახუშტი. დასახ. ნაშრ. გვ. 172—173.

⁹⁹ Г. К а з б е к. Три месяца в Турецкой грузии. Из дневника путешественника. Тифлис, 1875, с. 27.

არ არის...“, რაშიც ვერ დავეთანხმებით პატივცემულ მკვლევარს. ჩანს მას, უმთავრესად, მხედველობაში აქვს და უადგილოდ ეჩვენება აქ კავკასიის საზღვრების მოხსენიება, თორემ მან კარგად იცის, რომ, სწორედ ჭოროხისა და მისი შენაკადების შუა და რამდენადმე ქვემო წელზე უნდა გასულიყო იბერია-ლაზიკის საზღვარი, სადაც ადრე შუა-საუკუნეებში ჩამოყალიბდა ტაოსა და კლარჯეთ-შავშეთის სამეფო-სამთავროები¹⁰⁰. რაც შეეხება კავკასიის საზღვრების ხსენებას, აქ შეიძლება ასეთი ახსნა მოეძებნოს. ჯერ ერთი, იქნებ პროკოპის თავდაპირველად ეწერა — „იქ, სადაც კავკასიის იბერიის საზღვრებია“, და გვიანი ხანის გადამწერებმა კავკასია-იბერიის შუა შეცდომით ჩასვეს „და“ კავშირი, ანდა, შესაძლოა ამ შეშფოთებვაშიც, ისევე როგორც ხშირად, პროკოპი იშველიებს ლიტერატურულ ცნობებს. ჩვენ მხედველობაში გვაქვს ძვ. წ. V—IV სს. ლოგოგრაფოსი ჰეროდორე, რომლის მიხედვით, „კავკასია არმენიელთა ქვეყნიდან კოლხთა მხარემდეა გადაკომიული...“¹⁰¹ ვფიქრობთ, ასეთი შესაძლებლობა არ არის გამორიცხული, ყოველ შემთხვევაში, კიდევ უფრო გაუგებარია „კავკასიის“ საზღვრების ძიება ყვირილა-რიონის შესართავის მიდამოებში, რომელსაც არაფერი აქვს საერთო არც არმენიელთა და არც ჭანების სამოსახლოებთან, საიდანაც, პროკოპისა და არაერთი სხვა ავტორის ცნობით, ბოას-ფასისი იღებს სათავეს. მიუღებლად გვეჩვენება აგრეთვე ყვირილა-ფასისის და ბოას-ფასისის გაიგივება იმ საფუძველზე, რომ Bdnas ბერძნულად ყვირილს ნიშნავს და ამდენად, შეიძლება ბოასი ყვირილას თარგმანი იყოს¹⁰².

სავსებით შესაძლებელია ბოასი, მართლაც, თარგმანი იყოს, მაგრამ ამ შემთხვევაში ზემო იმერეთის მდინარე ყვირილას სახელწოდების თარგმანთან კი არ უნდა გვქონდეს საქმე, არამედ ჭანეთის ყვირილასთან ანუ ჭოროხის სათავეებთან. როგორც ჩანს, ძველად ასევე უნდა რქმეოდა ჭოროხის ზემო წელს, რაზეც მიგვანიშნებს იმერხევისა და ამდენად, მდ. ჭოროხის ერთ-ერთი მარჯვენა შენაკადის მდ. ყვირილას სახელწოდება და აქვე ამავე სახელწოდების (ყვირას) უღელტეხილისა და სოფლის არსებობა.

100 დ. მუსხელიშვილი. საქართველოს ისტორიული გეოგრაფიის ძირითადი საკითხები. II. 1980, გვ. 155—205, რუკ. IV, V.

101 ნ. ლომოური. ბერძენი ლოგოგრაფოსების ცნობები ქართველი ტომების შესახებ. — მასალები საქართველოსა და კავკასიის ისტორიისათვის. ნაკ. 35. 1963, გვ. 32.

102 გეორგიკა. II. 1965, გვ. 108, შენ. 1.

გ. ყაზბეგის აღწერილობით, მდ. ყვირილა სათავეს იღებს არსიანის ქედიდან, რომელიც დასავლეთითაა მიმართული, ეკუთვნის იმერხევს და ართვინს, ზემოთ მიერთვის მდ. ჭოროხს. მისი ხეობა მდიდარია თბილი, გოგირდოვანი და მჟავე წყლებით და მინერალური რესურსებით¹⁰³.

ერთი სიტყვით, ჭოროხის ხეობაშიც, მართალია, სათავეებთან კი არა, შუაწელზე, მაგრამ მაინც დამოწმებულია ჰიდრონიმი ყვირილა და ტოპონიმები: სოფ. ყვირილა და უღელტეხილი ყვირა¹⁰⁴, რაც, გარკვეულად, უკავშირდება ბოასის სახელწოდებას. ჩვენი აზრით, ხსენებული ტოპონიმები ეთნიკური წარმომავლობისაა და დაკავშირებული უნდა იყოს ოკენიტის ჭანების სახელწოდებასთან. პროკოპი კესარიელი, არმენიელთა მეზობელი ჭანების აღწერისას, საუბრობს რა მათი ცხოვრების მძიმე პირობებზე და მათი მთების შეუვალობაზე, დასძენს: „აქ ქვეყანა სამ ჯვარედინ გზად არის დასერილი. აქედან იწყებენ ხომ გაყრას რომაელთა, პერსარმენიელთა და თვით ჭანთა საზღვრები. აქ იუსტინიანემ ძალიან მტკიცე ციხე ააგო, რომლებიც წინათ არ ყოფილა, სახელად ჭორონონი, და ამით საფუძველი ჩაუყარა ზავის საქმეს. პირველად ხომ აქედან გახდა შესაძლებელი ჭანეთში შესვლა. აქვე ჩააყენა ჯარის მთავარი, რომელსაც დუკს ეძახიან. ერთ სოფელში, რომელიც ჭორონონისაგან ორი დღის სავალი გზით არის დაშორებული და სადაც საზღვრებია ეგრეთწოდებული ოკენიტის ჭანებისა (ჭანები ხომ მრავალ ტომად განიყოფებიან)..., გაღმა მთის ძირას ბოსლებია, სადაც ეგრეთწოდებული ოკენიტის ჭანების საქონელია მოთავსებული.

საქონელს ისინი ინახავენ იმისათვის, რომ წველონ ხოლმე და მისი ხორციტ გამოიკვებონ თავი. შემდეგ მთის ძირისა, სადაც დავაკებულ ადგილას სოფელი კენა არის, დასავლეთის მიმართულებით რომ იარო, არის ერთი ციხე, სახელი მისი სისილისსონი“¹⁰⁵.

ამრიგად, პროკოპი კესარიელი ჭოროხის აუზში, მის სათავეებთან მოიხსენიებს ოკენიტის ჭანებს, რომლებსაც ეკავათ ღართის ველი და ხალდო-ძორი ანუ ხალდის ხეობა¹⁰⁶. ტერმინში „ოკენი“ ო თავსართს

¹⁰³ Г. Казбек. Указ. соч., с. 50—59.

¹⁰⁴ იხ. საქართველოს სსრ რესპუბლიკის რუკა, 1931 წ.

¹⁰⁵ გეორგია. II. 1934. გვ. 187—188.

¹⁰⁶ Н. А д о н и ц. Армения в эпоху Юстиниана. СПб., 1980, с. 62—63.

ქართული საპრეფიქსის შესატყვისად მიიჩნევენ, შესაბამისად, ოკენი-ნიშნავს საკენოს, ე. ი. კენებით თუ კიანებით დასახლებულ მხარეს¹⁰⁷.

Kyanos-ის სახელწოდებით ბერძენი, რომაელი და ბიზანტიელი მწერლები (პტოლემეაიოსი, პლინიუსი, სტეფანე ბიზანტიელი) აღნიშნავენ კოლხეთის ერთ-ერთ მდინარეს, რომელსაც, უპირატესად, მდ. ჰიპოსთან და ფასისტან კავშირში ახსენებენ¹⁰⁸. ეს მდინარე, ჩვენი აზრით, უნდა იყოს მდ. ყვირილა.

საკითხისათვის განსაკუთრებული მნიშვნელობა აქვს არქანჯელო ლამბერტის ერთ ცნობას, სადაც ნათქვამია: „ხოფის შემდეგ რომ მდინარეა, მკვიდრნი უწოდებენ მას ჭანისწყლად და რუკებზე კი იწერება Cianis. ეს მდინარე შეერთვის ხოფს და ამასთან ერთად, შეერთვის ზღვას. ჩვენი აზრით, ეს სახელი იმიტომ ეწოდება ამ მდინარეს, რომ მასთან მოდის სავაჭროდ თავისი პატარა ნავეებით და ჩერდება ერთი მეზობელი ხალხი, რომელსაც ჰქვია ჭანი“¹⁰⁹. როგორც სწორად შენიშნავს თ. მიქელაძე, აქ მთავარი არაა ავტორისეული ეტიმოლოგია, არამედ ფაქტიური ხასიათის ცნობა, რომ Cianis ჭანისწყალს აღნიშნავს და, მაშასადამე, კიანოს ჭან ეთნიკური სახელის შესაბამის ფორმადაა მისაჩნევი¹¹⁰.

როგორც ჩანს, კან/კენ//კიანის//კიანოს ჭანთა ეთნიკური სახელის უძველესი ფორმაა და მათ სამოსახლოს, შესაბამისად, შეერქვა ასეთი სახელი — კენ//კიანოს. ე. ი. ეთნონიმი იქცა გეოგრაფიული ერთეულების — მდინარის, სოფლის, უღელტეხილისა და ა. შ. სახელად. უნდა ვიფიქროთ, რომ დროთა განმავლობაში დავიწყებული იქნა ამ ტოპონიმების ეთნიკური წარმომავლობა და რამდენადაც მეგრულ ანუ ლაზურ-ჭანური კიანი კვილსა და ყვირილსაც ნიშნავს¹¹¹, ქართულენოვანი ჯგუფების მიერ იგი გაგებული იქნა, როგორც ყვირილი//ყვირილა, ხოლო ბერძნებმა თარგმნეს ბოასის შინაარსით.

ამრიგად, რამდენადაც სწორედ ჭოროხი იღებს სათავეს ჭანების

107 თ. მიქელაძე. სამხრეთ-აღმოსავლეთ შავიზღვისპირეთის უძველესი გეოლოგიური ტომების ზოგიერთი საკითხი. — მაცნე. I. 1967. გვ. 91.

108 Plin., NH, VI, 13; ნ. ლომოური. კლავდიოს პტოლემეაიოსის „გეოგრაფიული სახელმძღვანელო“, ცნობები საქართველოს შესახებ. გვ. 45; გეორგიკა. III. გვ. 274; თ. მიქელაძე. დასახ. ნაშრ. გვ. 106—107.

109 არქანჯელო ლამბერტი. სამეგრელოს აღწერა. თბ., 1938, გვ. 175.

110 თ. მიქელაძე. დასახ. ნაშრ. გვ. 101.

111 არნ. ჩიქობავა. ჭანურ-მეგრულ-ქართული შედარებითი ლექსიკონი. თბ., 1938, გვ. 298.

ანუ კენ//კიანების ტერიტორიიდან, ბუნებრივია, იმთავითვე სწორედ 'მას შერქმეოდა კიანოსის ანუ იგივე ბოასის სახელი'¹¹².

ბოას-ფასისი რომ ნამდვილად მდ. ჭოროხია და არა ყვირილ-ჩოიონი, როგორც ეს ადრე იყო გაგებული, ამას კიდევ ერთხელ მოწმობს პროკოპი კესარიელის შრომის არაერთი ადგილი. ეს ეხება ლაზებისა თუ მისი მეზობელი ტომების განსახლებას, ლაზების ქალაქებისა და ციხეების დახასიათებას თუ სპარსეთის ჯარის სალაშქრო მარშრუტების აღწერილობას პეტრასთან დაკავშირებით.

ყოველივე თქმულის ნათელსაყოფად მივყვეთ და თანმიმდევრულად განვიხილოთ ეს ადგილები, როგორც მდ. ჭოროხთან, ისე რიონ-ყვირილასთან მიმართებაში.

პროკოპი კესარიელი შრომის იმ ნაწილში, სადაც საუბარია ხოსროს მიერ ქ. პეტრასა და შემდეგ რომაელთა (დაგისთეს ხელმძღვანელობით) და სპარსთა (მერმეროეს სარდლობით) ჯარების ახალი კონცენტრაციის შესახებ, იძლევა ცნობებს მდინარე ბოასის, ლაზთა დასახლებული ადგილების (მათი ქალაქებისა და ციხე-ქალაქების) შესახებ: „...ბოასი, ამიერიდან ფაზისად წოდებული, განაგრძობს მდინარეზას ნაოსნობისათვის გამოსადეგი ვიდრე ევქსინად წოდებულ ზღვამდე, სადაც მისი შესართავია, და მის ორივე მხრით ლაზიკე არის. მაგრამ მარჯვნივ მთელი ის ქვეყანა დიდ მანძილზე, ვიდრე იბერიის საზღვრებამდე, დასახლებულია ადგილობრივი მცხოვრებლებით, ლაზთა სოფლები ხომ აქ ყველა მდებარეობს მდინარის აქეთა ნაპირას და ქალაქებიც მათ ძველთაგანვე აქ აუშენებიათ, მათ შორის არის არქეოპოლისი ძალიან გამაგრებული, სევასტოპოლიც არის აქ და პიტეუნტის სიმაგრეც, ხოლო სკანდა და სარაპანი — იბერიის საზღვრებისაკენ. ყველაზე შესანიშნავი ქალაქები კი მაინც არის აქ როდოპოლისი და მოხირისი. მდინარის მარცხნივ, ისეთ მანძილზე, რომელსაც ერთ

¹¹² არ არის გამორიცხული, რომ ასევე კანების განსახლების ფარგლებში უნდა ყოფილიყო მოქცეული რაქა-ერწოს მთიანეთი, სადაც სათავეს იღებს ყვირილა, და აფხაზეთის მაღალმთიანი ზოლიც, სადაც ე. წ. „აწანგვარები“ გავრცელებული, რომლებიც წარმოადგენენ ყორულად ნაგებ ქვის ოთხკუთხა და მრგვალ, დაბალ ნაგებობებს. აკად. ს. ჯანაშია „წანიგუარას“ თარგმნის როგორც „წანის სადგომს“; ხოლო წანს (ქანურ ტომად მიიჩნევენ (იხ. მისი თუბალ-თაბალი, ტიბარენი, იბერი, გვ. 195, 196). ნიშანდობლივია, რომ ეს „წანაიგურები“ განსაკუთრებით თავმოყრილია მდ. საკენის ხეობაში (იხ. თ. მიქელაძე. სამხრეთ-აღმოსავლეთ შავიზღვისპირეთის უძველესი მელითონე ტომების ისტორიის ზოგიერთი საკითხი გვ. 92—93, შენ. 34).

დღეში გაივლის მსუბუქად დატვირთული კაცი, ლაზიკის საზღვრებია, ხოლო ეს მხარე მოსახლეობას მოკლებული ჩანს. ამ მხარის მეზობლად რომაელები ცხოვრობენ, რომელთაც პონტოელები ეწოდებათ. ლაზიკის მიწა-წყალზე, იმ ადგილას, სადაც ადამიანება არასოდეს არ უცხოვრიათ, იუსტინიანე მეფემ ჩემს დროს ქალაქი პეტრა გააშენა“¹¹³.

მღ. ფასისის ნაპირებზე ლაზების დისპროპორციული განსახლების ასეთივე სურათს იძლევა პროკოპის შრომის სხვა ადგილიც, სადაც საუბარია ევქსინის პონტოსპირა ხალხებსა და მათ მეზობლებზე.

„...ზოგიერთები ამბობენ (გულისხმობენ ესქილეს, პეროდოტეს), რომ აქ ფაზისი ორად ჰყოფს ხმელეთს. ჩამომდინარე წყლის მარცხნივ არის აზია, ხოლო მარჯვნივ ევროპად იწოდება. ევროპის ნაწილშია ლაზთა ყველა საბინადრო ადგილი, ხოლო მეორე ნაწილში არც რაიმე ქალაქი აქვთ ლაზებს, არც სიმაგრე და არც დაბა მოხსენიების ღირსი, გარდა იმისა, რომ რომაელებმა იქ პეტრა ააშენეს წინათ“¹¹⁴.

როგორც ვხედავთ, პროკოპის შრომის აქ მოყვანილი ორივე ადგილი შინაარსობრივად ერთგვაროვანია და ძალზე საინტერესო, მრავალფეროვან ინფორმაციას იძლევა ლაზიკის ისტორიისა და განსაკუთრებით, ისტორიული გეოგრაფიისათვის. აქ საუბარია ლაზიკის სამხრეთ საზღვარზე, ციხე-ქალაქთა რაგვარობაზე, მათ განლაგებაზე, მოსახლეობის განსახლებაზე და სხვ. მაგრამ, სამწუხაროდ, როგორც ფიქრობენ, სწორედ შრომის ეს ნაწილია ე. წ. „შეცდომებითა“ და ურთიერთსაწინააღმდეგო დებულებებით სავსე, რაც პროკოპისადმი და საერთოდ, ბერძენ მწერალთა ცნობებისადმი სკეპტიკურად განაწყობს მკვლევართა დიდ ნაწილს. აკად. ს. ყაუხჩიშვილის აზრით, „ეს ცნობები ბევრგან არეულია, ერთიმეორეს არ ეთანხმება, ან ჩვენს თანამედროვე საისტორიო მწერლობაში შემოწმებული არაა“¹¹⁵. აკად. ნ. ბერძენიშვილი მისთვის დამახასიათებელი მთელი სიღრმე-სიგანით იხილავს ადრებიზანტიური ხანის ლაზიკის ისტორიის საკითხებს და საერთოდ, ნდობას უცხადებს პროკოპის ცნობებს საქართველოს რომ ეხება, მაგრამ საკამათო ადგილების შესახებ შენიშნავს, რომ, როგორც „ჩანს, (პროკოპი) შტაბში წარმოდგენილ მოხსენების საფუძველზე ადგენს თავის მოთხრობას და ერთიმეორეში ურევს ცნობებს...“¹¹⁶ და იქვე

¹¹³ გეორგიკა. II. გვ. 100—101.

¹¹⁴ გეორგიკა. II. გვ. 127.

¹¹⁵ იქვე. გვ. 97.

¹¹⁶ ნ. ბერძენიშვილი. საქართველოს ისტორიის საკითხები. 1975, გვ.

მიგვითითებს, რომ მეტი სიფრთხილით მოვეკიდოთ ბერძენ მწერალთა ცნობებს¹¹⁷.

ჩვენთვის განსაკუთრებული მნიშვნელობა აქვს დ. მუსხელიშვილის, როგორც ისტორიული გეოგრაფიის წამყვანი სპეციალისტის, შეხედულებას პროკოპი კესარიელის ცნობების რაობა-ღირებულების შესახებ, მით უფრო, რომ იგი სავანგებოდ ჩერდება მოყვანილი ცნობების საჩოთირო ადგილებზე და მას შემდეგ, რაც ნდობას უცხადებს პროკოპი კესარიელს, როგორც კომპეტენტურ ისტორიკოსს, იქვე დასძენს, რომ „რიონის მარცხენა ნაპირის სრული დაუსახლებლობის შესახებ მისი აზრი შეცდომა უნდა იყოს“-ო, რასაც ფაქტიური მასალით ადასტურებს¹¹⁸. თუმცა იქვე დასძენს, რომ „პროკოპი კესარიელის ზემოხსენებულ ჩვენებებზე დამყარებული წარმოდგენა მარცხენა რიონისპირეთის დაუსახლებლობის შესახებ ადრებიზანტიურ ხანაში, ფაქტიურად, შესაძლებელია ამ ჩვენებათა არასწორი ინტერპრეტაციის შედეგი იყოს“-ო¹¹⁹, რაშიც შეუძლებელია არ დავეთანხმოთ პატივცემულ ავტორს.

როგორც უკვე ითქვა, ჩვენი აზრით, მთავარი შეცდომა ის არის, რომ პროკოპისეული ბოას-ფასისი არასწორადაა გაიგივებული რიონ-ყვირილასთან.

პროკოპის ცნობით, ფაზისის მარჯვენა ნაპირზე „მთელი ის ქვეყანა დიდ მანძილზე ვიდრე იბერიის საზღვრებამდე დასახლებულია ადგილობრივი მცხოვრებლებით“¹²⁰. თუკი ფასისი რიონია, როგორც ეს ამჟამად არის მიღებული, სრულიად გაუგებარია, რა უნდა რიონის მარჯვნივ იბერიის საზღვრებს; როგორც ანტიკური, ისე ბიზანტიური და მომდევნო ხანებისათვის ასეთი საზღვრების ძიება რიონის მარჯვენა ნაპირზე უაზრობაა. რა მიმართულებითაც არ უნდა წავიდეთ, რამდენიც არ უნდა ვიაროთ, რიონის მარჯვენა სანაპიროზე, ვერც ერთ წერტილში იბერიის საზღვრებს ვერ მივადგებით. მით უფრო, ვიცით, რომ პროკოპისავე არაერთგზისი ჩვენებით ასეთი სასაზღვრო ხაზი, ხსენებული დროისათვის, სკანდა-შორაპანთან გადის¹²¹. ეს პირდაპირ არის მითითებული პროკოპის ცნობის იმ ნაწილში, სადაც საუბარია

¹¹⁷ იქვე. გვ. 446.

¹¹⁸ დ. მუსხელიშვილი. საქართველოს ისტორიული გეოგრაფიის ძირითადი საკითხები. I. თბ., 1977, გვ. 102.

¹¹⁹ იქვე. გვ. 103—104.

¹²⁰, გეორგიკა. II. გვ. 100.

¹²¹ გეორგიკა. II. გვ. 35—36; დ. მუსხელიშვილი. დასახ. ნაშრ. გვ. 105.

ფასის მარჯვენა ნაპირზე გაშენებულ ქალაქებზე და ციხეებზე: „მათ შორის არის არქეოპოლისი, ძალიან გამაგრებული, სევესტოპოლიც არის აქ და პიტიუნტის სიმაგრეც, ხოლო სკანდა და და სარაპა-ნი — იბერიის საზღვრებისაკენ. ყველაზე შესანიშნავი ქალაქები კი მაინც აქ როდოპოლისი და მოხირისია“¹²². როგორც ცნობილია, როდოპოლისი თანამედროვე ვარციხეა რიონისა და ყვირილახანისწყლის შესართავთან, მოხირისი კი დაბლაგომთან ვარაუდობენ¹²³. ე. ი. ორივე ეს ქალაქი რიონის მარცხენა სანაპიროზე მდებარეობს, რომ არაფერი ვთქვათ სკანდასა და შორაპანზე. პროკოპის ცნობის მიხედვით კი, ისინი მდ. ფასისის მარჯვენა სანაპიროზეა მითითებული. აქაც აშკარა შეუსაბამობაა ფასის-რიონის მიმართ. ჯერ კიდევ იუსტინიანეს ნოველების ავტორმაც იცის, რომ „არქეოპოლისი და როდოპოლისი, უდიდესი და ძველი სიმაგრეებია“¹²⁴, ხოლო შემდეგ პროკოპი კესარიელი პირდაპირ მიუთითებს და ხაზს უსვამს, რომ ყველაზე შესანიშნავი ქალაქები კი მაინც არის აქ როდოპოლისი და მოხირისი“¹²⁵. ყოველივე ეს იცის პროკოპიმ, უფრო სწორად, მისმა ინფორმატორმა. მაგრამ, თუ ეს ფასისი რიონია, მაშინ შეცდომას უშვებს, როცა მათ მდინარის მარჯვენა ნაპირის ქალაქებად მიიჩნევს, რაც ნაკლებად სარწმუნოა. აქაც ისეთივე დასკვნა უნდა გაკეთდეს, როგორც ლაზიკა-იბერიის საზღვრებთან დაკავშირებით მივიღეთ: კერძოდ, ამ ეტაპზე პროკოფის ფაზისი რიონი არ არის.

საკითხით დაინტერესებულ მკვლევარებს განსაკუთრებით აღელვებთ პროკოფის ცნობის ის ადგილი, სადაც საუბარია მდ. ფასისის მარცხენა სანაპიროზე, რომელიც „მოსახლეობას მოკლებული ჩანს და ამ ნაწილში არც რაიმე ქალაქი აქვთ ლაზებს, არც სიმაგრე და არც დაბა მოხსენიების ღირსი“¹²⁶.

თუ პროკოპისეული ფასისი თანამედროვე რიონია, საქმე ეხება იმერეთის დიდ ნაწილს, მთელ გურიასა და აჭარას, ე. ი. ისტორიული კოლხეთის საუკეთესო ნაწილს, სადაც, როგორც უკანასკნელი დროის არქეოლოგიური ძიების შედეგები მოწმობენ, აღმოცენდნენ ადრეანტიკური და ელინისტური ხანის ქალაქური ცენტრები: ვანი, დაბლა-

122 იქვე. გვ. 101.

123 იქვე. გვ. 208, შენ. 1.

124 იქვე. გვ. 35—36.

125 იქვე. გვ. 101.

126 იქვე. გვ. 127.

გომი, ფასისი, ფიქვნარი და აფსაროსი, რომ არაფერი ვთქვათ ამ ტერიტორიებზე გამოვლენილ უფრო აღრეულ ძეგლებზე, ქვის ხანიდან მოკიდებული ბრინჯაო-რკინის ხანის ჩათვლით. ყველა ეპოქაში ეს მხარე საკმაოდ დაწინაურებული ჩანს როგორც ეკონომიკურად, ისე კულტურულად და პოლიტიკურად. აკად. ნ. ბერძენიშვილი, ლაზიკის ისტორიულ-გეოგრაფიულ საკითხებზე მსჯელობისას, არაერთხელ ეხება ამ მხარეს და ხაზს უსვამს მის ძველ მორქმულობას¹²⁷. მისი აზრით, ეს ის მხარეა, რომელიც თავდაპირველად ჰეგემონობდა და მათი „ქვეყნები“ ქალაქური ცენტრებით საზოგადოებრივ-სამეურნეო, სოციალურ-ეკონომიკური განვითარების ლოგიკური გამოხატულებაა¹²⁸. ნ. ბერძენიშვილის აზრით, მიუხედავად იმისა, რომ უფრო გვიან, ე. ი. პროკოპის დროს, ჰეგემონობა ჩრდილოეთის, ე. ი. რიონის მარჯვენა სანაპიროს ხელში უნდა იყოს გადასული, მარცხენა სანაპიროზე მაინც „შემორჩენილა“ და ისევ ყვავის ვარდციხე მისი „ქვეყნით“¹²⁹. აქვე ასახელებს იგი ტელეფისის ციხეს, ვაშნარს, ათასგზის წონის და ზომავს, პროკოპის ხსენებული ცნობის წინააღმდეგობის მრავალგვარ ახსნას იძლევა, მაგრამ აშკარად იგონობა, რომ თვითვე არ არის კმაყოფილი მიღებული დასკვნებით¹³⁰.

როგორც ზემოთ არაერთგზის აღვნიშნეთ, პროკოპის ცნობა ფასისის მარცხენა სანაპიროს რომ შეეხება, საგანგებოდ განიხილა პროფ. დ. მუსხელიშვილმა და წერილობითი და მატერიალური მასალის მოშველიებით დაასაბუთა, რომ აქ შეცდომაა დაშვებული და რიონის მარცხენა სანაპირო პროკოპის დროსვე საკმაოდ დასახლებული და ათვისებული ჩანს¹³¹. ამ მიზნით მან, პირველ რიგში, გამოიყენა ისევ პროკოპის თანამედროვე და უშუალო გამგრძელებლის აგათია სქოლასტიკოსის ცნობები, რომლის მიხედვით რიონის მარცხენა სანაპიროზე არსებობდა ტელეფისის ციხე (აიგივებდნენ სოფ. ტოლებთან)¹³², ქოთნების სავაჭრო ადგილი, ე. ი. ქიტროპოლია, მთელი რიგი პატარა ქალაქები¹³³, ციხე-ქალაქი ფასისი (დღ. ფოთი) თავისი სოფლებით¹³⁴

¹²⁷ ნ. ბერძენიშვილი. დასახ. ნაშრ. გვ. 446.

¹²⁸ იქვე. გვ. 447.

¹²⁹ იქვე. გვ. 446; ვ. ჭავჭავაძე. ვარდციხის ნაქალაქარი. თბ., 1989..

¹³⁰ იქვე. გვ. 472—479.

¹³¹ აგათია სქოლასტიკოსი. გეორგია III. გვ. 311—316..

¹³² იქვე. გვ. 30—34.

¹³³ იქვე. გვ. 106—107.

¹³⁴ იქვე. გვ. 112—113.

და „ქრისტიანეთა შორის ძალიან განთქმული ტაძარი, რომელიც ქალაქს ბევრად არ იყო დაშორებული“¹³⁵. ბუნებრივია, ასეთი „სახელ-განთქმული ტაძარი“ უდაბურ ადგილზე არ იქნებოდა აგებული¹³⁶.

არქეოლოგიური ძეგლებიდან იგი უთითებს ასევე აღრებიზანტიური ხანით დათარიღებული ტოლების ციხეზე და გურიის სოფ. შუხუთში აღმოჩენილ, IV—V სს. წარჩინებულ ლაზის აგარაკზე¹³⁷.

ყოველივე ზემოთქმულიდან გამომდინარე, დ. მუსხელიშვილი საესებით სწორად დაასკვნის, რომ ლაზეთის რიონის მარცხენა სანაპიროსაკმაოდ მჭიდროდ ჩანს დასახლებული ამ ხანაშიც¹³⁸, რაშიც შეუძლებელია არ დაეთანხმო ავტორს. აქვე უნდა გავიხსენოთ ბათუმის მახლობლად, ყოროლის წყლის შესართავთან მდებარე ბორცვზე, ე. წ. „თამარის ციხეზე“ გათხრილი, ოთხკუთხაკოშკებიანი რომაული კასტელის ტიპის სიმაგრე, რომელიც ახ. წ. VI ს-ით თარიღდება და პროფ. ვ. ლეჭვიანიძის აზრით, უნდა იყოს პროკოპის ნაშრომში „მშენებლობათა შესახებ“ მოხსენიებული ლოსორიონი¹³⁹. სხვა საქმეა, რამდენად სწორია ლოსორიონის იდენტიფიკაცია თამარის ციხესთან, მაგრამ რიონის მარცხენა სანაპიროზე ასეთი მნიშვნელოვანი ძეგლის არსებობა თავისთავად საყურადღებოა. აქ, მდ. სკურდუმის და ნატანების შესართავთან, მდებარეობს ახ. წ. V—VI სს. დათარიღებული კიდევ ერთი და ალბათ, არაუქანასკნელი ძეგლი — ვაშნარის ნაქალაქარი, რომელსაც თავისი სწორკუთხაკოშკიანი ციხე-გალავნით, კრამიტით გადახურული, ხუთწახნაგა აფსიდიანი ტაძრითა და კიბიანი აბანოს ნაშთებით, ისეთი დიდი შთაბეჭდილება მოუხდენია ფრანგ მოგზაურსა და არქეოლოგ დიუბუა დე მონპერეზე, რომ მან იგი ნაქალაქარ პეტრად მიიჩნია, რაზეც ზემოთ გვქონდა საუბარი.

განა შეეძლო პროკოპის, უფრო სწორად, მის ინფორმატორებს, რომლებიც ლაზიკიდან აწვდიდნენ ცნობებს, რიონის მარცხენა სანაპიროზე, იქ, სადაც ძირითადი საომარი ოპერაციები მიმდინარეობდა 10 წლის განმავლობაში და სადაც მდებარეობს ქ. ფასისი, ქალაქი

¹³⁵ დ. მუსხელიშვილი. დასახ. ნაშრ. გვ. 104.

¹³⁶ გეორგიკა. III. გვ. 311—316.

¹³⁷ П. П. Закарая, В. А. Леквинадзе. Археологические раскопки в селе шухуте.—მაცნე. 1966, №1, გვ. 133—135.

¹³⁸ დ. მუსხელიშვილი. დასახ. ნაშრომი. გვ. 104.

¹³⁹ В. А. Леквинадзе. О постройках Юстиниана в зачатдий Грузии.—Виз. врем. 34. М., 1973, с. 172—173.

ვაშნარი, ქრისტიანებს შორის ძალზე სახელგანთქმული ტაძარი, ტელეფონისა და თამარის ციხე, ეთქვა, რომ ლაზიკის ეს ნაწილი თხლად არის დასახლებული და არაფერია იქ მოხსენიების ღირსიო. ვფიქრობთ. რომ არ შეეძლო. სხვა რომ არაფერი გვექონდეს, მარტო ფასისი, მონუმენტური ვაშნარი, ვარდციხის ნაქალაქარი¹⁴⁰ და თამარის ციხე აცლის საფუძველს პროკოპის ხსენებული ცნობის რიონის მარცხენა სანაპიროსადმი მიყენების მცდელობას და პროკოპისეული ფასისისა, და რიონის იდენტიფიკაციის საწინააღმდეგო კიდევ ერთი არსებითი ხასიათის ფაქტია. აშკარაა, რომ ბიზანტია-სპარსეთის პირველი ომების დროს მოხსენიებული ფასისი არ არის რიონი. როგორც უკვე ითქვა, პროკოპის ბოას-ფასისი ყველა მონაცემით თანამედროვე ქოროხია, როგორც მისი ნიშანდობლივი სათავეებით, ისე ქვემო წელის სპეციფიკური ფიზიკური ნიშნებით. პროკოპისეული ბოას-ფასისი რომ მდ. ქოროხია და არა ყვირილა-რიონი, ამას კარგად მოწმობს მისი შრომის კიდევ ერთი ადგილი, სადაც საუბარია ფასისის გაუვალ კლდოვან ნაპირებზე. ჩვენ ხაზგასმით გვინდა აღვნიშნოთ, რომ აქ საუბარია ბოასის გაგრძელება ფასისზე, რომელიც, აკად. ს. ყაუხჩიშვილის აზრით, ყვირილას შესართავს ქვემოთ რიონს უნდა შეესატყვისებოდეს. პროკოპის ცნობა შეეხება სპარსეთის მეფის ხოსროს პირველ შემოსვლას ლაზიკაში ლაზების მეგზურობით და მის მიერ განვილილ მარშრუტს იბერიიდან პეტრასაკენ: „როდესაც ლაზები წინ მიუძღვებოდნენ ხოსროს, მათ გადავლეს მდინარე ბოასი და ისე მივიდნენ პეტრასაში, რომ ფაზისი მარჯვნივ ჰქონდათ, თითქოს იმიტომ, რომ მათ (იგულისხმება ლაზები — გ. გ.) წინასწარ განჭვრიტეს, რათა მდინარე ფაზისის გადასასვლელად არც დრო და არც შრომა დასჭირდებოდათ მეტი, ხოლო ნამდვილად იმიტომ, რომ არ სურდათ სპარსელებისათვის ეჩვენებინათ თავიანთი საბინადროები, თუმცა ლაზიკე ყველგან, მდინარე ფაზისის როგორც აქეთა, ისე იქითა მხარე, გაუვალა. ქვეყნის ორსავე მხარეს უზარმაზარი კლდეებია, რომლებიც აქ დიდ მანძილზე ვიწროებს ქმნიან, ასეთ გზებს რომაელები „კლისურებს“ უწოდებენ — ელინური გამოთქმით“¹⁴¹.

როგორც ცნობილია, კლისურები ანუ ვიწროები, რთული კლდოვანი რელიეფით, რიონის ქვემო წელისათვის არ არის დამახასიათებელი. ქუთაისის ქვემოთ იგი გამოდის კოლხეთის დაბლობზე და დაახლო-

¹⁴⁰ ვ. ჯ ა ფ ა რ ი ძ ე. ვარდციხის ნაქალაქარი. თბ., 1989.

¹⁴¹ გეორგიკა, II. გვ. 102.

ებით 80—90 კმ მანძილზე ზღვის შესართავამდე, მეანდრებად დახვეული, თავისუფლად დანავარდობს გაშლილ ვაკეზე, მარჯვნივ თუ მარცხნივ, რისი მოწმობაცაა აბაშა-ფოთის რაიონში არაერთგან შემორჩენილი მისი მკვდარი კალაპოტები, ე. წ. „ნარიონალები“. ამდენად, აშკარაა, რომ პროკოპის ცნობა რიონს არ გულისხმობს. იგი ზედმიწევნით ასახავს ჭოროხის გეოგრაფიულ თავისებურებას, თუნდაც მდინარის ქვემო წელზე. მდ. ჭოროხი, სათავიდან თითქმის შესართავამდე, სწორედ, ასეთ კლდოვან ვიწროებში მიედინება და შესართავიდან სულ რაღაც ხუთიოდე კილომეტრის მოშორებით, გაივაკებს და ორ ტოტად გაყოფილი შეერთვის ზღვას.

ართვინიდან ქვემოთ, ვიწროების მიუხედავად, ჭოროხი სანაოსნო ხდება და აქედან თუ არა, ფორჩხადან მოკიდებული მაინც (რომლის მარჯვნივ იბერთა საზღვრები იგულისხმება) ჭოროხს ფასისის სახელი უნდა ეტარებინა. სწორედ ეს მდინარე იღებს სათავეს ჭანების (სანების) სამოსახლოების მახლობლად, არმენიის მთებში, სწორედ იგი მიედინება დიდ მანძილზე მარჯვნივ და აქ, სადაც პირდაპირ კავკასიონია, უხვევს დასავლეთისაკენ; სწორედ აქვე იგულისხმება იბერიის საზღვრები, რომლის „გასწვრივ ცხოვრობენ ძველითგანვე იბერთა ქვეშევრდომი მესხები“¹⁴². სწორედ მისი კალაპოტია დინების მთელ სიგრძეზე გაუფალი და კლდოვანი და სწორედ მის მარჯვენა ნაპირზე, „ყველგან სიმაგრეებიც გაუკეთებიათ ლაზებს, რათა ნავეებით მომავალი მტრისათვის ხმელეთზე გადასვლა არ ყოფილიყო შესაძლებელი“¹⁴³.

აღსანიშნავია, რომ ჭოროხის ქვემო წელის მარჯვენა ნაპირზე, სამ ადგილას არის დადასტურებული ციხის ნაშთების არსებობა. ესენია: ერგე ანუ ნიკატაური, ჯოჯოს წყლისა და ჭოროხის შესართავთან¹⁴⁴, გვარა, მაჭახელის წყლისა და ჭოროხის შესაყართან¹⁴⁵ და ბაშქო მათ შუა ტერიტორიაზე. ძნელი სათქმელია, თუ რა დროისაა ერგე და ნი-

¹⁴² იქვე. გვ. 127.

¹⁴³ იქვე. გვ. 113.

¹⁴⁴ ი. ს. იხარულიძე. სამხრეთ-დასავლეთ საქართველოს ტოპონომიკა. II. 1959, გვ. 37; მისივე. საიდან წარმოიშვა სოფლის სახელი ნიკატაური. — „ოქტომბრის გზით“ (ხელვაჩაური). 1977, 2 აგვისტო, № 31.

¹⁴⁵ ი. ს. იხარულიძე. სამხრეთ-დასავლეთ საქართველოს ტოპონომიკა. წიგნი I. ბათუმი, 1958, გვ. 183; მისივე. აჭარის მატერიალური კულტურის ძეგლები. ბათუმი, 1962, გვ. 22; Кавказские этюды. I. Исследования и заметки Е. Г. Верабаума. I. 1901, с. 127.

კატაური, მაგრამ გვარა, როგორც წყობით, ისე კონსტრუქციით აშკარად აღრეული შუა საუკუნეების ძეგლია და გამორიცხული არ არის, რომ პროკოპი კესარიელს ეს ციხე და მსგავსი ძეგლები ჰქონდა მხედველობაში, როცა ჭოროხის მარჯვენა სანაპიროს დამკველ ციხეებზე აქვს საუბარი.

ფასისისა და ჭოროხის იგივეობის სასარგებლოდ მეტყველებს აგრეთვე პროკოპის მიერ ფასისის ქვემო წელზე არსებული ფონის ორგზის მოხსენიება. პირველად მაშინ, როცა ფასისის მარჯვენა ნაპირზე დაბანაკებული გუბაზი ფონით მოულოდნელად გადაიყვანს ჯარს მდინარის მარცხენა ნაპირზე და რომაელებთან ერთად გაანადგურებს მერმეროეს მიერ ლაზიკის სოფლების სარბევად დატოვებულ 5000 კაცისაგან შემდგარ რაზმს¹⁴⁶. ხოლო მეორედ, თვით მერმეროე სარგებლობს ამ ფონით: ფეხით გადალახავს ფასისს, გადალახავს მეორე მდინარე რეონს და ჯარი მიჰყავს ერთი ქალაქის — არქეოპოლისის — წინააღმდეგ¹⁴⁷. საყურადღებოა, რომ ასეთი ფონი დღესაც არსებობს ჭოროხის ქვემო წელზე, სოფ. ზემო მარადიდის მახლობლად, შუახევის წყალთან, რომლითაც უსარგებლიათ დ. ბაქრაძეს¹⁴⁸ და ე. ვეიდენბაუმს, ბათუმიდან ართვინამდე მოგზაურობის დროს. ე. ვეიდენბაუმის ცნობით, ჭოროხი იმ ადგილზე ფართოა, მდორედ მიედინება, თხელია და წარმოქმნის ფონს. აქ გადაუყვანიათ მათ ცხენები ერთი ნაპირიდან მეორეზე¹⁴⁹.

არც ერთი ამ ჩვენებათაგანი, პროკოპისეულ ფასისთან კავშირში რომ აღინიშნება, არ არის ნიშანდობლივი ყვირილა-რიონისათვის, რაც იმის უდავო დასტურია, რომ პროკოპი თავისი ისტორიის პირველ ნაწილში, იქ, სადაც აღწერილია ბიზანტია-სპარსეთის ომები ქ. პეტრას ხელში ჩაგდებას მიზნით, ყვირილა-რიონს არ შეხებია და მისი ბოას-ფასისი მხოლოდ და მხოლოდ ჭოროხია. ასეთი დაშვების შემთხვევაში პროკოპის შრომის ზემოთ განხილული ყველა ცნობა იკავებს კუთვნილ ადგილს და ერთი შეხედვით, საპირისპირო და გაუგებარი ადგილები მარტივად გასაგები ხდება. მაგალითად, არავინ იკამათებს იმაზე, რომ ჭოროხის მარჯვნივ არის და აღრეც ასე უნდა ყოფილიყო ლაზთა ძირითადი სამოსახლოები, რომ ეს მხარე მჭიდროდ უნდა ყოფილიყო

¹⁴⁶ ჯეორგია. II. გვ. 113.

¹⁴⁷ იქვე. გვ. 162.

¹⁴⁸ Д. М. Б а к р а д з е. Указ. соч., с. 34.

¹⁴⁹ Кавказские этюды. I. 1901, с. 122—131.

დასახლებული და, ბუნებრივია, აქვე უნდა აეშენებინათ ლაზებს თავისი ქალაქები და ციხეები: არქეოპოლისი, სევასტოპოლისი, პიტიუნტი, ფასისი, მოხირისი, როდოპოლისი. სკანდ და სარაპანი იბერიის საზღვრებისაკენ. თითქოს არც იმან უნდა დაგვაეკუთვნოს, რომ ჭოროხის ანუ ძველი ფასისის მარცხენა სანაპირო, მართლაც, თხლად ჩანს დასახლებული. ლაზიკის ეს მხარე ტერიტორიულადაც მცირეა. პროკოპის თქმით, მას ერთ დღეში გაივლის მსუბუქად დატვირთული კაცი¹⁵⁰. ე. ი. ლაზიკის სამხრეთი საზღვარი ჭოროხიდან სამხრეთით 30—35 კმ უნდა ყოფილიყო მოცილებული.

მართალია, ამჟამად ლაზიკის ამ მხარის შესწავლაზე ხელი არ მიგვიწვდება, მაგრამ მაინც უნდა ვენდოთ პროკოპის ცნობას, რომ აქ არც რაიმე ქალაქი ჰქონიათ ლაზებს, არც სიმაგრე და არც დაბა მოხსენიების ღირსი¹⁵¹. ყოველ შემთხვევაში, რაიმე მნიშვნელოვანი მიწისზედა ძეგლი ან საყურადღებო შემთხვევითი არქეოლოგიური აღმოჩენა ამ მხარიდან ჩვენთვის უცნობია და არც ბერძნული წყაროები მიუთითებენ აქ რაიმე მნიშვნელოვანი ცენტრებს არსებობაზე. გამონაკლისს წარმოადგენს ციხე-სიმაგრე აფსარუნტი, რომელშიც, ფლავიუს არიანეს ცნობით, ზომიერად ხუთი კოპორტი მდგარა¹⁵². აფსაროსი რომის იმპერიის საზღვრების დამცველ სიმაგრეთა სისტემაში ერთ-ერთი მნიშვნელოვანი პუნქტი იყო. მას არაერთგზის იხსენიებენ ბერძენი ავტორები (პლინიუსი, სტეფანე ბიზანტიელი და სხვ.), იგი აღნიშნულია „პეგეტინვერის ტაბულის“ სახელით ცნობილ რუკაზეც¹⁵³. მასზე საგანგებოდ ჩერდება პროკოპი კესარიელიც და ახსიათებს მას, როგორც ძველ ხალხმრავალ ქალაქს: „ეს ქალაქი ძველად მრავალმცხოვრებიანი ყოფილა. მას გარშემო უვლიდა მრავალი კედელი და შემკული იყო თეატრითა და იპოდრომით და მას სხვა მრავალი რამეც ჰქონდა, რაც, ჩვეულებრივ, ქალაქის სიდიდის მომასწავებელია. ამჟამად აქედან სხვა არაფერია დარჩენილი, გარდა ნაშენობათა საძირკვლები-სა“¹⁵⁴.

აფსარუნტი-აფსაროსი ყველა მონაცემის მიხედვით ემთხვევა თანამედროვე გონიოს ციხეს, რომელიც 1,5 კმ-ითაა ჭოროხის შესარ-

¹⁵⁰ გეორგიკა. II. გვ. 101.

¹⁵¹ იქვე. გვ. 127.

¹⁵² ფლავიუს არიანე დასახ. ნაშრ. გვ. 35.

¹⁵³ ნ. ლომოური. ძველი საქართველოს სავაჭრო გზების საკითხისათვის. — ისტ. ინსტიტუტის შრომები. ტ. IV, ნაკვ. I. 1958, გვ. 99—118.

¹⁵⁴ გეორგიკა. II. გვ. 123—124.

თავს დაშორებული სამხრეთისაკენ¹⁵⁵, ე. ი. მდინარის მარცხენა ნაპირზე და აქ რომ სხვა მნიშვნელოვანი რამ ყოფილიყო, ვფიქრობთ, ასევე არ გამოჩნებოდა პროკოპის აღწერილობაში.

ჭოროხის მარცხენა სანაპირო სუსტი ეკონომიკური საფუძვლის მქონე მცირე „ქვეყანა“ ჩანს, რომელმაც ვერ შეძლო მსხვილი პოლიტიკური, კულტურული და სტრატეგიული ცენტრების შექმნა.

XIX ს. გამოჩენილი ქართველი მეცნიერისა და მოგზაურის გიორგი ყაზბეგის ცნობით, ლაზიკის ამ ნაწილში (საუბარია მდ. ჭოროხის მარცხენა ნაპირზე, ხოფასა და მის შემოგარენზე) იმდენად მცირეა მიწათმოქმედებისათვის საჭირო სამეურნეო ფართობები, რომ მას არ შეუძლია გამოკვებოს მოსახლეობის ერთი მეოთხედიც კი, რაც აიძულებს ლაზების დიდ ნაწილს ეპრობითა და ზღვაოსნობით ირჩინონ თავი¹⁵⁶.

როგორც ჩანს, სწორედ ეს ვითარებაა ასახული პროკოპის ცნობის იმ ნაწილში, სადაც ფასისის მარცხენა სანაპიროს თხლად დასახლებაზეა საუბარი და არა მთლიანად გაუდაბურება-გაუქაცარიელებაზე.

ერთი სიტყვით, პროკოპის ყოველი ცნობა, რაც გაუგებარი და ურთიერთსაწინააღმდეგოა რიონ-ფასისთან კავშირში, სავსებით ნათელი და ლოგიკურია ფასის-ჭოროხთან მიმართებაში. ჩვენ მხედველობაში გვაქვს პროკოპის შრომის ის ნაწილი, რომელშიც აღწერილია ლაზიკაში ბიზანტია-ირანს შორის ომების პირველი ეტაპი, პეტრას დაპატრონებისათვის რომ წარმოებს ათი (541—551) წლის განმავლობაში, რაც ბოლოს და ბოლოს რომაელთა გამარჯვებითა და პეტრას განადგურებით დამთავრდა. დროის ამ მონაკვეთის ყველა ეპიზოდში ხსენებული ფასისი, ბოას-ფასისი იქნება ეს თუ ბოას-აკამფსისი, ყოველთვის ჭოროხს გულისხმობს.

მეორე ეტაპზე კი, როდესაც ბრძოლები წარმოებს არქეაპოლისთან, ფასისის ციხესთან, მოხირისთან თუ სხვა პუნქტებთან, ნახსენებია მდინარე ფასისი, უდავოდ, რიონს შეესატყვისება და აქ სადავო და გაუგებარიც არაფერია.

ერთი სიტყვით, პროკოპის დროსაც, ისევე როგორც უფრო ადრეც, ერთდროულად ფასისის სახელით იხსენიება კოლხეთის ორი მდინარე: ჭოროხი და რიონი, რაც აშკარად ჩანს კიდევ მისი შრომის ერთ

¹⁵⁵ ს. ჯ ა ნ ა შ ი ა. ფეოდალური რევოლუცია საქართველოში. — შრომები. I. თბ., 1949, გვ. 32; ნ. ლ. მ. ო. უ. რ. ი. დასახ. ნაშრ. გვ. 105.

¹⁵⁶ Г. К а з б е к. Три месяца в Турецкой Грузии, 1875, с. 101—102.

ადგილიდან. ცნობა ეხება სპარსეთის ჯარების მსკლელობის მარშრუტს, მერმეროეს ხელმძღვანელობით პეტრას დასახმარებლად რომ მიემართება. ისინი შემოდიან ლაზიკაში (იგულისხმება ძველი გზით იბერიიდან), მაგრამ გზაში იგებენ, რომ პეტრა უკვე აიღეს რომაელებმა (ბესას მთავარსარდლობით) და ციხის კედლები მიწასთან გაასწორეს, „რომ მტერს კვლავ არ გაეჭირვებინა საქმე რომაელებისათვის“¹⁵⁷.

„მან (იგულისხმება მერმეროე — გ. გ.) გაიგო ყველაფერი, რაც მოხდა და სრულიად შეცვალა ეს გზა, რადგან იცოდა, რომ მდინარე ფაზისის იქითა მხარეს ლაზებს, პეტრას გარდა, სხვა არც ერთი დასახლებული ადგილი არ მოეპოვებოდათ“¹⁵⁸, ის გაბრუნდა და დაიჭირა იბერიიდან კოლხიდის ქვეყანაში გადასასვლელი ადგილები, სადაც ფაზისის გადასვლა შეიძლება ფონით, გადალახა ეს მდინარე ფეხით, გადალახა აგრეთვე მეორე მდინარეც, სახელად რეონი — არც ეს არის იქ სანაოსნო — და ფაზისის მარჯვენა მხარეს რომ აღმოჩნდა, წაიყვანა ჯარი ერთი ქალაქის, არქეოპოლისის, წინააღმდეგ, რომელიც არის მთავარი და უდიდესი ქალაქი ლაზების ქვეყანაში“¹⁵⁹.

შრომის ეს ადგილი დიდი ხანია მეცნიერთა შორის აზრთა სხვადასხვაობას იწვევს. პროკოპის გამომცემელი ჰაური ფიქრობს, რომ პროკოპიმ შეცდომით, ორი წყარო აურია ერთმანეთში და მერმეროე ორ მდინარეზე გაატარაო. აკად. ს. ყაუხჩიშვილი არ იზიარებს ჰაურის შეხედულებას და ამ ცნობის საკუთარ ინტერპრეტაციას გვთავაზობს. მისი აზრით, იბერიიდან გადმოსულმა სპარსელებმა ჯერ მდ. ყვირილა გადალახეს, რომელიც მას ფაზისად მიაჩნია, და შემდეგ მდ. რიონი¹⁶⁰. როგორც ვხედავთ, პატ. მკვლევარი ეწინააღმდეგება ადრე გამოთქმულ თავისსავე მოსაზრებას ბოას-ფასისთან დაკავშირებით, რომლის მიხედვით ყვირილა ბოასია და არა ფასისი¹⁶¹.

ჩვენი აზრით, უნიკალურ ჩვენებასთან გვაქვს საქმე, რაც კოლხეთში ორი ფასისის არსებობას დოკუმენტურად ასაბუთებს. პირველი ფასისის აშკარად ჭოროხია, მეორე კი რიონ-ფასისი უნდა იყოს. მართალია, პროკოპი მეორე ფასისის რეონს უწოდებს, მაგრამ იმთავითვე მასში ფასისის გულისხმობს, რაც კარგად ჩანს მოყვანილი ცნობის ერთი

¹⁵⁷ გეორგიკა. II. გვ. 180.

¹⁵⁸ უნდა გავიგოთ „ლაზებს პეტრას გარდა სხვა არც ერთი გამაგრებული ადგილი არ მოეპოვებოდათ“.

¹⁵⁹ გეორგიკა. II. გვ. 181—182.

¹⁶⁰ იქვე. გვ. 230, შენ. 1.

¹⁶¹ იქვე. გვ. 106—109, შენ. 1.

ადგილიდან, სადაც ნათქვამია: „...გადალახა აგრეთვე მეორე მდინარეც სახელად რეონი — არც ეს არის იქ სანაოსნო — და ფაზისის მარჯვენა ნაპირზე რომ აღმოჩნდა...“ ე. ი. პირდაპირ არის ნათქვამი, რომ ეს მდინარეც ფასისია, ორი ფასისის ერთდროულად მოხსენიებით მოსალოდნელი გაუგებრობის თავიდან ასაცილებლად, ერთ-ერთს გამოუნახა ასევე ადგილობრივი მეორე სახელი და დროებით იგი უწოდა. სხვა ყველა შემთხვევაში კი პროკოპი რიონს ფასისის სახელით იხსენიებს.

პირველ ეტაპზე, პეტრასთან წარმოებული ომების დროს, პროკოპი ფასისის აუზში, მდინარის მარცხენა ნაპირზე, არც ერთ სხვა პუნქტს არ იხსენიებს. სპარსელები აქ იმდენ სურსათსაც კი ვერ შოულობენ, რომ 30000-იანი ჯარი გამოკვებონ და იძულებულნი ხდებიან 25000 წაიყვანონ დვინში (სომხეთი) და მხოლოდ 5000 დატოვონ ლაზიკაში, რომელიც შემდეგ რომაელებისა და ლაზების გაერთიანებულმა ძალებმა გაანადგურა¹⁶².

მეორე ეტაპზე, ფასისის აუზში, მდინარის მარცხენა ნაპირზე, იქ, სადაც იხსენიება ციხე კუტაიონი, ფასისის ციხე, მოხირისი, სკანდე, შორაპანი, უქიმერიონი და სხვა¹⁶³, სპარსელები არათუ აღარ გარბიან ლაზიკიდან სურსათის ნაკლებობის გამო, არამედ მთელი ჯარით იზამთრებენ კუტაიონის ციხეში¹⁶⁴, სადაც მოხირისი ჯარისათვის მატერიალურ, სასურსათო მძლავრ ბაზას წარმოადგენს¹⁶⁵. პეტრასთან ბრძოლების დროს სპარსელთა ჯარში საბრძოლო სპილოები არ ჩანს, მეორე ეტაპზე კი სპარსელებს ლაზიკაში 8 სპილო შემოჰყავთ¹⁶⁶ და მასზე ამხედრებულები იბრძვიან არქეოპოლისთან თუ ფასისთან.

ყველა მონაცემით აშკარაა, რომ პირველი ეტაპის ლაზიკა სულ სხვა ქვეყანაა, სხვა გზებითა და სხვა ეკონომიკური ბაზისის მქონე, უფრო მწირია და სუსტადაა დასახლებული. მეორე ეტაპის ლაზიკა კი სხვაა — მჭიდროდაა დასახლებული, გააჩნია მძლავრი ეკონომიკური ქვეყანა მრავალი ციხე-ქალაქითა და იბერიასთან დამაკავშირებელი უკეთესი გზებით. ჩვენი ღრმა რწმენით, პირველი მდ. ჭოროხ-ფასისის ქვემო წელის რეგიონია, მეორე კი — მოიცავს რიონ-ფასისის აუზს ქუთაისიდან მოკიდებული შესართავამდე.

¹⁶² გეორგია. II. გვ. 116—117.

¹⁶³ იქვე. გვ. 188—210.

¹⁶⁴ იქვე. გვ. 194—195.

¹⁶⁵ იქვე. გვ. 208—210.

¹⁶⁶ იქვე. გვ. 182.

მართალია, სიტყვა გაგვიგრძელდა მდ. ფასისის ლოკალიზაციის საკითხებზე, მაგრამ, რამდენადაც პროკოპი კესარიელის, ისევე როგორც აგათია სქოლასტიკოსისა და საერთოდ, ყველა ბერძენი მწერლის ისტორიულ-გეოგრაფიული ხასიათის ჩვენებათა ამოსავალ, ძირითად ორიენტირს ეს მდინარეები წარმოადგენენ, პირველ რიგში, მათი ადგილმდებარეობის დაზუსტების გარეშე, ყოველგვარი ლოკალიზაციის საკითხის დასმა ძირშივე მცდარი იქნებოდა. მით უფრო ეს ითქმის ქალაქ პეტრაზე, რომელსაც პროკოპი კესარიელი ყოველთვის მდ. ფასისთან კავშირში იხსენიებს და მისი ნიშანდობლივი ლოკალიზაცია მხოლოდ და მხოლოდ ფასისთან მიმართებით არის შესაძლებელი. სწორედ ასეთი განზომილების საფუძველზეა მიღებული დღეისათვის საყოველთაოდ გაზიარებული დებულება პეტრა-ციხისძირის იდენტიფიკაციის შესახებ, რაც ჩვენ დამაჯერებლად არ გვეჩვენება, მთელი რიგი მიზეზის გამო. ამ მიზეზთა შორის უმთავრესი მაინც ის არის, რომ ქ. პეტრა შეცდომით დაკავშირებულია მდ. რიონ-ფასისთან, რომელიც ლაზიკაში ირან-ბიზანტიის ომების I ეტაპზე არ ფიგურირებს. როგორც ზემოთ დავინახეთ, ამ ეტაპის ძირითად მდინარედ ქოროხ-ფასისი ჩანს და პეტრას ლოკალიზაციის საკითხების კვლევისას სწორედ ეს ორიენტირი უნდა იქნეს გამოყენებული.

პროკოპის შრომის განხილული ნაწილიდან უკვე ვიცით, რომ პეტრა ზღვისპირა ქალაქია, რომელიც აუგია იუსტინიანეს სტრატეგოსი ციხეს შეგონებით და იგი სტრატეგიულ და ეკონომიკურ ცენტრად უქცევია¹⁶⁷. თავდაპირველად ამ ადგილზე უმნიშვნელო, პატარა, სოფლისებური ტიპის დასახლებაც უნდა ყოფილიყო, ხოლო იუსტინიანე კეისარს გარეზღუდითა და მინაშენებით გაუმაგრებია და გაუმშვენიერებია¹⁶⁸. სტრატეგიული თვალსაზრისით, პეტრა ყოველმხრივ მიუვალი ციხე-ქალაქი ჩანს, ზღვის მხრიდან შვეული ქარაფებით დაცული, ხოლო დანარჩენი სამი მხრიდან — ციკაბოდ აღმართული კლდეებით. ეს ტოპოგრაფიული თავისებურება იმდენად ნიშანდობლივი ჩანს, რომ, პროკოპის ცნობით, სწორედ ამ ნიშნის მიხედვით შერჩმევია მას პეტრას სახელი, რაც ბერძნულად კლდეს ნიშნავს¹⁶⁹. ჩვენი აზრით, პეტრა ანუ კლდეკარი თუ კლდეეთი თავდაპირველად ადგილის სახელი ჩანს, რაც ქალაქის აშენების შემდეგ უნდა ქცეულიყო ქალაქის

¹⁶⁷ გეორგია. II. გვ. 74.

¹⁶⁸ იქვე. გვ. 83.

¹⁶⁹ იქვე, გვ. 85—86.

საკუთარ სახელად. როგორც 535 წ. დათარიღებული ერთ-ერთი ნოველიდან ვგებულობთ, ოფიციალურად ამ ქალაქს, იუსტინიანეს პატივსაცემად, იუსტინიანე რქმევია¹⁷⁰. ქალაქ პეტრას ტერიტორია რომ კლდოვანია და მოკლებულია ნიადაგის საფარს, ეს პეტრასთან მომხდარი ირან-ბიზანტიის ბრძოლის ერთ-ერთი ეპიზოდისადაც ჩანს, რომელიც ეხება მერმეროეს მთავარსარდლობით სპარსელების ახალი ძალების მოსვლას პეტრაში ალყაშემორტყმული ნაწილების დასახმარებლად. როდესაც მერმეროე ციხეში შევიდა, მხოლოდ 150 კაცი დახვდა უვნებლად გადარჩენილი, „დანარჩენი ყველანი დახოცილიყვნენ. ამათი გვამები გადარჩენილებს კლდის იქით კი არ გადაეყარათ, არამედ, თუმცა მათ აღრჩობდა მყრალი სუნი, მაგრამ იტანდნენ ამას ყოველგვარი მოლოდინის გარეშე, რადგან მეტი წილი სპარსელებისა დაღუპული იყო, მტერს ამის დანახვაზე არ შემატებოდა გარემოცვის სიმხნევე“¹⁷¹.

როგორც ვხედავთ, პეტრაში მყოფი სპარსელები მიცვალებულთა დამარხვასაც ვერ ახერხებენ და იძულებულნი არიან ლეშის ლპობით მოწამლული ჰაერი ისუნთქონ, რაც ქალაქში ნიადაგმოკლებული, კლდოვანი საფუძვლის არსებობაზე მეტყველებს. ადგილის ასეთი ფიზიკური ნიშან-თვისება საგულისხმო და გასათვალისწინებელია ლოკალიზებული ქალაქის ადგილმდებარეობის დაკონკრეტებისათვის. პროკოპი კესარიელის შრომაში, ამა თუ იმ გეოგრაფიული პუნქტის ადგილმდებარეობის ჩვენებისას, ხშირად ვხვდებით მითითებას — მდინარიდან მარჯვნივ, მდინარიდან მარცხნივ, მდინარიდან სამხრეთით, მდინარიდან ჩრდილოეთით, მდინარიდან ერთი ან რამდენიმე დღის სავალზე და ა. შ. ამდენად, თუკი დანამდვილებით ვიცით ამოსავალი მდინარის მდებარეობა ნაჩვენები მიმართულებისა და მანძილების გათვალისწინებით, საჭირო პუნქტის მიკვლევა დიდ სიძნელეს აღარ წარმოადგენს. არაერთი ასეთი ჩვენება მოიპოვება ნაშრომში პეტრასთან დაკავშირებით, რომლის ძირითად ამოსავალს ანუ მთავარ ორიენტირს მდ. ფასისი წარმოადგენს.

რამდენადაც ქ. პეტრა პროკოპის ისტორიაში, უმთავრესად, ბიზანტია-ირანის ბრძოლების პირველი ეტაპის ამბებთან დაკავშირებით იხსენიება, მისი ამოსავალი მდ. ფასისი, როგორც ზემოთ დავინახეთ, ყოველთვის თანამედროვე ჭოროხს უდრის. „მდინარიდან მარცხნივ

170 გეორგიკა. II. გვ. 34—35.

171 იქვე. გვ. 111.

(საუბარია ბოას-ფასისზე — გ. გ.) ისეთ მანძილზე, რომელსაც ერთ დღეში გაივლის მსუბუქად დატვირთული კაცი, ლაზიკის საზღვრებია, ზოლო ეს მხარე მოსახლეობას მოკლებული ჩანს. ამ მხარის მეზობლად რომაელები ცხოვრობენ, რომელთაც პონტოელები ეწოდებათ. ლაზიკის მიწა-წყალზე, იმ ადგილას, სადაც ადამიანებს არასოდეს არ უცხოვრიათ, იუსტინიანე მეფემ ჩემს დროს ქალაქი პეტრა ააშენა¹⁷².

აი ასეთია პროკოპის შრომის კიდევ ერთი საინტერესო ადგილი, საიდანაც პირველად ვგებულობთ, რომ პეტრა სასაზღვრო ქალაქია და აუშენებიათ ისეთ ადგილზე, სადაც ადამიანს წინათ არასოდეს უცხოვრია. ეს უკანასკნელი წინადადება ისე კი არ უნდა გავიგოთ, თითქოს პეტრა სრულიად უკაცრიელ, უდაბურ რეგიონში აუშენებინოთ, როგორც ეს ზოგ შემთხვევაში ესმით ხოლმე, არამედ მასში უნდა დავინახოთ ქალაქის მშენებლობის კონკრეტული ტერიტორიის მითითება. შესაძლოა, ასეთი ადგილი დასახლებული ტერიტორიის მახლობლად ან შუაგულშიც კი მდებარეობდეს, მაგრამ კონკრეტულად ის ადგილი აუთვისებელი იყოს. ასეთად გვეჩვენება ტყე, ბორცვი, მთის თხემი, კლდოვანი ფერდი და ა. შ., რომელიც, სამეურნეო თვალსაზრისით უვარგისობის გამო, ადრე შეიძლება არ ყოფილიყო გამოყენებული. ნუ დაგვაიწვევება, რომ პეტრა მკაცრ, კლდოვან რელიეფზე დაფუძნებული ქალაქია და მისი აგება სტრატეგიული მიზნებით არის განპირობებული: მიუვალა, გზის ჩამკეტია, საზღვრის მოდარაჯეა და ა. შ. მართალია, ცნობაში ლაზიკის სასაზღვრო ხაზი ზუსტად არ არის მითითებული, მაგრამ ცნობილია, რომ მდ. ფასისის მარცხნივ ერთი დღის სავალ მანძილზე მდებარეობს.

პროკოპი კესარიელს არაერთხელ აქვს ნაჩვენები და სხვა ბერძენი ავტორების მითითებებიდანაც ვიცით, რომ ერთი დღის სავალი მანძილი დაახლოებით 30 კმ უდრის. ე. ი. ლაზიკის სასაზღვრო ხაზი და ამდენად, ქალაქი პეტრაც, მდ. ფასისიდან ანუ ქოროხიდან სამხრეთით 30 კმ-ზეა საძიებელი, დაახლოებით იმ ადგილას, სადაც ამჟამად ისტორიულად ცნობილი დაბა და ნავსადგური ხოფა-ხუფათი მდებარეობს. ამ ადგილის მახლობლად რომაელები მოსახლეობენ, რომლებსაც პონტოელები ეწოდებათ, აზუსტებს პროკოპი. თუ ვინ არიან ეს რომაელები, პონტოელებად რომ იწოდებიან, ან სად მოსახლეობენ, ამას ვგებულობთ პროკოპის ცნობის მომდევნო ნაწილიდან.

„ქალაქ პეტრადან პირდაპირ რომ მიდიხარ სამხრეთისაკენ, გვხვდება რომაელთა საზღვრები, აქ კი ადგილები მჭიდროდ არის დასახლებული: რიზედ წოდებული და ათინა და ზოგი სხვა, ვიდრე ტრაპეზუნამდე“¹⁷³.

ე. ი. ირკვევა, რომ პროკოპის მიერ ცოტა ზემოთ ნახსენები რომაელები ანუ პონტოელები ეს ის ხალხია, რომლებიც ტრაპეზუნტის, რიზესა და ათენას სანახებში მოსახლეობენ, პეტრადან სამხრეთით დაახლოებით დღე, დღენახევრის სავალზე ანუ 40—45 კმ დაშორებით.

ხოფის სექტორში, იქ, სადაც პეტრას არსებობა ივარაუდება, რომაელების მეზობლობა სავსებით ლოგიკურად გამოიყურება, რაც, პეტრა-ციხისძირის იდენტიფიკაციის შემთხვევაში, რამდენადმე უჩვეულო ჩანს, მათ შორის მანძილი სულ ცოტა 100—120 კმ-ით მაინც განიზომება.

თავისი შრომის სხვა ადგილას პროკოპი კიდევ უფრო ვრცლად ჩერდება პონტოელთა გავრცელების არეალზე, რაც რამდენადმე გვიადვილებს ლაზიკის სასაზღვრო ხაზის დაზუსტებას სამხრეთით და ამდენად, პეტრას ლოკალიზაციის საკითხის დადგენაში გვეხმარება.

„ამათ შემდეგ ცხოვრობენ ეგრეთწოდებული პონტოელები ვიდრე ტრაპეზუნტის ქალაქამდე და მის საზღვრებამდე.. ტრაპეზუნტელთა საზღვრები ვრცელდება დაბა სუსარმენემდე და ეგრეთწოდებულ რიზემდე, რომელიც ლაზიკაში ზღვით მიმავლისათვის ორი დღის სავალი გზით არის დაშორებული ტრაპეზუნტს... რიზეს მოსდევს მიწა-წყალი ერთი ხალხისა, რომლებიც რომაელებსა და ლაზებს შორის მოსახლეობენ. იქ მდებარეობს ერთი სოფელი, სახელად ათინა... ათინას შემდეგ მდებარეობს არქაბე და აფსარუც, რომელიც კაი სამი დღის სავალი გზით არის რიზეს მოშორებული. ის ძველად აფსურტად იწოდებოდა“¹⁷⁴. შემდეგ პროკოპი, ლიტერატურული ცნობების მიხედვით, იძლევა აფსარუნტის ეტიმოლოგიას, აღწერს მას როგორც დიდსა და ხალხმრავალ ქალაქს, რომლისგანაც მის დროს მხოლოდ ნაშენობათა საძირკვლები ყოფილა დარჩენილი, რაზეც ზემოთ უკვე გვქონდა საუბარი.

ამ ცნობაში მთავარი ის არის, რომ პროკოპიმ ახსენა ერთი ხალხი, რომელიც თურმე რომაელებსა და ლაზებს შორის მოსახლეობს და აქვთ სოფელი ათინა. თუ ვინ არიან ისინი, პროკოპი ამის შესახებ არა-

¹⁷³ გეორგია. II. გვ. 102.

¹⁷⁴ გეორგია. II. გვ. 121—123.

შერს ამბობს. როგორც ჩანს, ეს ხალხი იმდენად მცირერიცხოვანი ანდა ისეთი ნარევია, რომ პროკოპის მათი რომელიმე ეთნიკური ნიშნით გამოყოფა და ასე სახელდება საჭიროდ არ მიაჩნია. რამდენადაც ცნობილია, ამ ადგილებში სხვადასხვა დროს მოსახლეობენ სანები — სანიგები¹⁷⁵, მაკრონებო ანუ იგივე ქანები¹⁷⁶, ძილრიტები¹⁷⁷, ანუ ბიძერები¹⁷⁸, ლაზები, რომაელები და სხვ. შესაძლოა, მოცემულ მომენტში სწორედ ამ ხალხების სიმბიოზთან გვექონდეს საქმე.

პროკოპისავე ცნობით, პოლიტიკურად ეს ხალხი თვითთავადნი არიან. „იქაური მცხოვრებლები არც რომაელთა და არც ლაზთა მეფის ქვეშევრდომები არიან, გარდა იმისა, რომ, რადგან ისინი ქრისტიანები არიან, ლაზთა ეპისკოპოსები უწესებენ მათ მღვდელმსახურებას. ისინი ისწრაფვიან ორივესთან მშვიდობიან და მეგობრულ ურთიერთობაში იყვნენ და ყოველთვის თანხმდებიან ხოლმე მიაცილონ ერთი მხრიდან მეორესთან მიმავალი მოციქულები. ასე იქცევიან ისინი ჩვენს დრომდე: ისინი თავისი მსუბუქი ხომალდებით მიაცილებენ ხოლმე ერთი მეფის გზორებს, რომელნიც მეორე მეფესთან მიდიან. დღემდე ისინი არავითარ გადასახადს არ იხდიან. ამ ადგილების მარჯვნივ აღმართულია მეტად ციკაბო მთები და გადაჭიმულია უმეტესად უდაბური ადგილები. ამის გადაღმა ცხოვრობენ ეგრეთწოდებული პერსარმენიელები და არმენიელები, რომლებიც რომაელების ქვეშევრდომები არიან და რომელთა მიწა-წყალი იბერიის საზღვრამდე ვრცელდება“¹⁷⁹.

ამრიგად, პროკოპი ზუსტ ცნობებს გვაწვდის ტრაპეზუნტელთა საზღვრებზე, რიზე-სუსარმენემდე რომ აღწევდა, რომლის იქით რომაელებსა და ლაზებს შორის აღნიშნავს პოლიტიკურად დამოუკიდებელ „ერთ ხალხს“, რომლებსაც, როგორც ქრისტიანებს, მღვდელმსახურებას უნიშნავენ ლაზთა ეპისკოპოსები. აკად. ნ. ბერძენიშვილის აზრით, ეს უკანასკნელი მომენტი იმაზე უნდა მიგვითითებდეს, რომ ე. წ. „ერთი

¹⁷⁵ ევსევი კესარიელი (260—340 წწ.). — გეორგია. I. ტექსტი ქართული თარგმანით გამოცემის და განმარტება დაურთეს ალ. გამყრელიძემ და სიმონ ყაუხჩიშვილმა. თბ., 1961, გვ. 32.

¹⁷⁶ სტრაბონი. XII. 3, 18; დ. მუსხელიშვილი. საქართველოს ისტორიული გეოგრაფიის საკითხები. I. 1977, გვ. 92.

¹⁷⁷ ფლავიუს არიანე. მოგზაურობა შავი ზღვის გარშემო. 1961, გვ. 42, 90.

¹⁷⁸ იქვე. გვ. 85.

¹⁷⁹ გეორგია. II. გვ. 125.

ხალხი“ ლაზებთან უფრო ახლო უნდა იდგნენ (ალბათ, ეთნიკურად), ვიდრე რომაელებთან¹⁸⁰.

ამ ხალხის ტერიტორიაზე პროკოპი ასახელებს სოფ. ათინას, რომლის შემდეგ მდებარეობს არქაბე და ქალაქ აფსარუს ნაშთები. ათინასთან ერთად არქაბესა და აფსარუს მოხსენიების ფაქტი ადრე გარკვეულ საცდურს ჰქმნიდა, რის საფუძველზეც ეს ორი პუნქტი ამ ხალხის კუთვნილებად იყო გამოცხადებული და, შესაბამისად, მათი ჩრდილოეთი საზღვარი მდ. აფსაროსამდე, კიდევ მეტი, პეტრა-ცინისძირამდე იყო მიტანილი¹⁸¹. ჩვენი აზრით, მოყვანილი ცნობის განხილული ადგილი ასეთი დაშვების შესაძლებლობას არ იძლევა. აქ, უბრალოდ, პროკოპიმ, ახსენა რა ათინა, იქვე შეეხო მეზობლად მდებარე არქაბესა და აფსარუნტს და ერთი ხელის მოსმით მოითავა ზღვისპირეთში არსებული, მეტ-ნაკლებად მნიშვნელოვანი პუნქტების ჩამოთვლა, რის შემდეგ უკვე გადადის თვით ლაზიკის, მისი შიდა ქვეყნების — სკვიმასა და სვანის, მისი მეზობლების — მესხებისა და ლაზების ქვეშევრდომი აფსილების ქვეყნების აღწერასა და მათი ხალხების პოლიტიკურ-სოციალური მდგომარეობის, სამეურნეო საქმიანობისა და რელიგიური კუთვნილების დახასიათებაზე. ამასთანავე, აფსაროსს, როგორც ლიტერატურაში ფართოდ ცნობილ პუნქტს, კიდევ ერთხელ იყენებს ლაზიკის სამხრეთი სასაზღვრო ზღვის დასაზუსტებლად¹⁸².

„ქალაქ აფსარუნტიდან ქალაქ პეტრამდე და ლაზთა საზღვრებამდე, სადაც ეგქსინოს პონტო თავდება, ერთი დღის სავალი გზა არის. პონტო რომ თავდება, ქმნის ნახევარმთვარის მსგავს ნაპირს“¹⁸³.

იმასთან დაკავშირებით, რომ მოყვანილ ცნობაში აფსარუნტიდან ლაზიკის საზღვრებისა და პეტრას მიმართება არ არის ნაჩვენები და პროკოპი კესარიელსაც პონტოსა და ლაზიკის აღწერისას ორიენტაცია სამხრეთიდან ჩრდილოეთისაკენ აქვს აღებული, ჩვენი წინამორბედი მკვლევრების ყურადღება აფსაროსის ჩრდილოეთ მხარეზე გამახვილდა. ამას დაემატა კოლხეთის ორი ფასისისადმი არადიფერენცირებული

¹⁸⁰ ნ. ბერძენიშვილი. საქართველოს ისტორიის საკითხები. 1975, გვ. 484;

¹⁸¹ ნ. ბერძენიშვილი. დასახ. ნაშრომი. გვ. 484; Г. А. М е л и к ш в и л и. К истории древней Грузии, 1959, с. 65; საქართველოს ისტორიის ნარკვევები. ტომი II. 1973, გვ. 252; დ. მუსხელიშვილი. საქართველოს ისტორიული გეოგრაფიის ძირითადი საკითხები. I. 1977, გვ. 107.

¹⁸² გეორგიკა. II. გვ. 126—127.

¹⁸³ იქვე. გვ. 126.

მიდგომა და ყოველივე ამან, ბოლოს და ბოლოს, პეტრას ციხისძირთან იდენტიფიკაციამდე მიგვიყვანა. როგორც ზემოთ დავინახეთ და ქვევითაც არაერთგზის შევეხებით, პეტრას ამგვარ ლოკალიზაციას მრავალი წინააღმდეგობა გააჩნია თავისთავად, და მან პროკოპის შრომის ბევრი საინტერესო ადგილი გაუგებარი გახადა.

არ უნდა დაგვავიწყდეს, რომ პროკოპის ისტორია პერიპლუსის სტილის ნაშრომი არ არის. მართალია, ავტორი ძირითადად იცავს თანმიმდევრული აღწერის პრინციპს, მაგრამ მასში ხშირად ვხვდებით აქედან გადახვევების შემთხვევებსაც.

სამაგალითოდ შეიძლება დავასახელოთ უკვე განხილული ცნობა, პონტოსა და ლაზიკის აღწერას რომ ისახავს მიზნად. პროკოპი იწყებს პონტოდან, ახსენებს „ერთ ხალხს“, შემდეგ აღწერს ზღვისპირა ლაზიკას, გადადის სკვიმიანზე და სვანიაზე, აქედან კვლავ ბრუნდება ზღვისპირა ლაზიკაში, იბერიის გასწვრივ მცხოვრები მესხების აღწერის მიზნით, შემდეგ ეხება იბერიას, აქედან კვლავ პეტრასა და ზღვისპირა ლაზიკას ახსენებს, რომლის პირისპირ ლაზების ქვეშევრდომი აფსილები ეგულება. ასეთი წიაღსვლები, გადახვევები, თუ უკუსვლები ხშირია პროკოპის ნაშრომში და ყველა კონკრეტულ შემთხვევაში უნდა იქნეს გათვალისწინებული.

ჩვენი აზრით, ცნობაში, სადაც პეტრა და ლაზიკის საზღვრები აფსარუნტიდან ერთი დღის სავალ მანძილზეა ნაჩვენები, უფრო ზემოთ მოყვანილი ცნობის განმეორება უნდა დავინახოთ, ოღონდ პირველ შემთხვევაში თუ მდ. ფასისი იყო ამოსავალი, საყრდენი ორიენტირა, მეორე შემთხვევაში, ამ მიზნით უკვე მკითხველი საზოგადოებისათვის ისტორიიდან კარგად ცნობილი ქალაქი აფსარუნტია გამოყენებული. ქ. აფსარუნტიდან ანუ თანამედროვე გონიოდან სამხრეთით ისევ და ისევ ხოფას სანახები მდებარეობს და ამდენად, ქალაქი პეტრაც და ლაზიკა — „ერთი ხალხის“ საზღვარიც — ამ სექტორშია საძიებელი, ალბათ, ხოფა-არქაბეს შუა“¹⁸⁴.

პეტრა და ლაზიკის საზღვრები რომ ხოფას ფარგლებშია საძიებელი და არა აფსარის ჩრდილოეთით, ამას კარგად მოწმობს მოყვანილი ცნობის კიდევ ერთი ადგილი, სადაც ნათქვამია, რომ აფსარუნტიდან ლაზთა საზღვრები სწორედ იმ ადგილზეა, სადაც ევქსინის პონტო თავდება და ნახევარმთვარის მსგავს ნაპირს ქმნის. თუ სად მთავრდება პონტო და ნახევარმთვარისებურ სანაპიროს რა ნაწილში მდებარეობს პეტრა,

ამას კიდევ უფრო აზუსტებს პროკოპის შრომის სხვა ადგილი. „მაშასადამე, ფაზისი იქ მომდინარე, როგორც ეს ჩემს მიერ მოთხრობილია, ერთვის ევქსინის პონტოს, იქ, სადაც ეს უკანასკნელი თავდება. ნახევარმთვარის იმ ერთ დასაწყისში, რომელიც აზიისა არის, მდებარეობს ქალაქი პეტრა, ხოლო მის პირსპირ, მეორე ნაპირას, ევროპის ნაწილში აფსილების ქვეყანაა“¹⁸⁵.

ამ ცნობის ღირებულება მრავალმხრივია. პირველ რიგში, ვგებულობთ, თუ სად გულისხმობს პროკოპი ევქსინის პონტოს დასასრულს, ან ნახევარმთვარის დასაწყის წერტილს, სადაც ერთვის ფასისი და სადაც მდებარეობს პეტრა. ამ შემთხვევაში ორიენტირად პროკოპი იყენებს აფსილების ქვეყანას, რომელიც ნახევარმთვარისებური სანაპიროს მეორე ბოლოში მდებარეობს.

ბატერიალური კულტურის ძეგლებისა და წერილობითი წყაროების გამოწვევით შესწავლის საფუძველზე პროფ. დ. მუსხელიშვილის მიერ საკვებით ნათლად არის გარკვეული, რომ VI--VII სს. აფშილეთის ეთნოგრაფიული ტერიტორია მდებარეობს მდ. ღალიძგასა და გუმისტას აუზს შუა¹⁸⁶, რომელიც მოიცავს თანამედროვე გულრიფშისა და სოხუმის რაიონებს. თუ ზუსტად გავავლებთ ხაზს, თვალნათლივ დაეინახავთ, რომ აფშილების სამოსახლოს პირისპირ, ე. წ. ნახევარმთვარის მეორე ბოლოში მდებარეობს ხოფა-აფსარის რაიონი. ყოველ შემთხვევაში, რამდენიც არ უნდა ვეცადოთ, აფშილეთის პირისპირ ვერავითარ შემთხვევაში ვერ მოვათავსებთ ციხისძირს, რომელიც ნახევარმთვარის სიღრმეში მდებარეობს, აქ არც სხვა რაიმე თვალსაჩინო გეოგრაფიული ნიშანია, რომლის მიხედვით პონტოსათვის მიჯნის დადება შეიძლებოდა.

პონტოს დასასრულში რომ ნამდვილად ქოროხის აუზი იგულისხმება, ამას პირდაპირ ადასტურებს აგრეთვე ფლავიუს არიანეს პერიპლუსის ერთი ადგილი, რომელიც, სწორედ, ამ რეგიონს შეეხება. „აფსაროსამდე ჩვენ მივცურავდით აღმოსავლეთისაკენ, ევქსინის მარჯვნივ, ხოლო აფსაროსი მე მეჩვენა პონტოს სიგრძის უკიდურეს საზღვრად. აქედან უკვე ჩრდილოეთისაკენ მივცურავდით მდინარე ქობოსამდე“¹⁸⁷. ზუსტად იგივეს იმეორებს V ს. მისივე ანონიმიც: „აფსა-

¹⁸⁵ გეორგია. II. გვ. 128.

¹⁸⁶ დ. მუსხელიშვილი. საქართველოს ისტორიული გეოგრაფიის ძირითადი საკითხები. თბ., 1977, გვ. 117—118.

¹⁸⁷ ფლავიუს არიანე. მოგზაურობა შავი ზღვის გარშემო. გვ. 43.

როსამდე აღმოსავლეთით მიეცურავდით ევქსინის მარჯვენა მხარეს. აფსაროსი მე მეჩვენა პონტოს სიგრძის საზღვრად, რადგან უკვე აქედან ჩვენი მოგზაურობა ჩრდილოეთით წარიმართა¹⁸⁶. როგორც ჩანს, შეხედულება ჭოროხის რეგიონზე, როგორც პონტოს საზღვარზე, პროკოპიზე დიდი ხნით ადრე ჩამოყალიბდა. ეს კარგად იცოდა კესარიელმა და მდ. ფასისის, ლაზიკის საზღვრისა და პეტრას ადგილმდებარეობის მისათითებლად გამოიყენა. ძალზე საგულისხმოა, რომ პროკოპი ზუსტად ჭოროხის ანუ აფსაროსის აუზში უთითებს ფასისის შესართავს, რაც პირველი ეტაპის ფასისისა და ჭოროხის იდენტიფიკაციის ჩვენი თეორიის სასარგებლოდ მეტყველებს. ამავე ცნობის მიხედვით, აქვეა ლაზიკის საზღვარი და ქალაქი პეტრაც, მაგრამ უშუალოდ მდინარესთან კი არა, არამედ ქ. აფსარუნტის ნანგრევებიდან და მდინარე ფასისიდან სამხრეთით ერთი დღის სავალზე, დაახლოებით 30 კმ მანძილზე, იქ, სადაც ამჟამად პატარა ქალაქი ხოფა მდებარეობს.

როგორც არიანესა და ანონიმის მიხედვით ირკვევა, პონტოს დასასრულის აფსართან მინიშნების ტრადიციას საფუძვლად უნდა დასდებოდა ზღვის სანაპირო ხაზის მიმართულების ცვლილება ამ ნაწილში, აღმოსავლეთიდან ჩრდილოეთისაკენ. ამის გარდა, ალბათ, იაიკ იყო გათვალისწინებული, რომ, სწორედ, ეს რეგიონი, ჭოროხის მარცხენა ნაპირიდან მოკიდებული არქაბე-ათინამდე მაინც, იმდენად მჭიდროდ არის დასერილი ლაზისტანის ქედიდან ზღვისაკენ პერპენდიკულარულად დაშვებული ტოტებით, რომ დაახლოებით 10—20 კმ სიგანის ზღვისპირა ზოლი თითქმის გაუვალი ხდება. განსაკუთრებით ეს ითქმის ხოფა-არქაბეს შუა სივრცეზე, სადაც მაღალი ქედები შიშველი კლდეების სახით პირდაპირ ზღვაში ეშვებიან და 10—15 კმ სიგრძეზე ზღვისპირეთი ფეხით მოსიარულეთათვისაც კი გაუვალია. ერთი სიტყვით, პონტოს ამ ნაწილში ლაზიკის მთათა სისტემით წარმოქმნილია რელიეფურად გამოხატული ვრცელი ბუნებრივი საზღვარი, რომელიც ერთ გეოგრაფიულ რეგიონს გამოყოფს მეორისაგან. შესაძლოა, ეს ფიზიკური ნიშან-თვისებაც ჰქონდათ მხედველობაში ბერძენ ავტორებს (ესქილეს, პეროდოტეს, არისტოტელეს, ესქილეს ძველ სქოლიასტს, იუნიანეს, იუსტინეს, აგათიმეროსს, არიანეს, პერიპლუსის ანონიმს, პროკოპი კესარიელს და სხვ.), როდესაც ისინი აზიისა და ევროპის გამყოფად მდ. ფასისს ასახელებენ. ყოველ შემთხვევაში, მათ მიერ

პონტოს აქ დამთავრება, თუნდაც ამ ნიშნის მიხედვით, ლოგიკური ჩანს.

ამ ბუნებრივი ზღუდის ერთ თავში ათინა და რიზე მდებარეობს, მეორე ნაწილის ჩამკეტი კი თანამედროვე პატარა სავაჭრო ქალაქი და ნავსადგური ხოფაა, რომელიც ერთპიროვნულად ბატონობს ჩრდილოეთიდან სამხრეთისაკენ მიმავალ როგორც სახმელეთო, ისე საზღვაო გზაზე. გარდა ამისა, ხოფა უმოკლესი გზით უკავშირდება ჭოროხის ხეობას სოფ. ფორჩხასთან. ჭოროხის ზემო წელისაკენ მიმავალი გზა ართვინთან იყოფა ორად, ერთი ჭოროხის გაყოლებით მიემართება ყარსი, არდაგანი და სომხეთისაკენ, ხოლო მეორე იმერხევით, ყვირილას. ხეობით და არსიანის უღელტეხილით გადადის ფოცხოვის ხეობაში, საიდანაც ახალციხე, ახალქალაქი, წალკა-მანგლისის გზით ჩადის თბილისში.

საფიქრებელია, რომ, სწორედ, ამ გზით წაიყვანეს ლაზებმა მეფე ხოსრო-ანუშირვანი პეტრას წინააღმდეგ.

როგორც პროკოპის ცნობიდან ვგებულობთ, სპარსელებმა გადალახეს ბოასი (ჩვენი გაგებით, ჭოროხის ზემო წელი) „...და ისე მივიდნენ პეტრაში, რომ ფასისი მარჯვნივ ჰქონდათ. თითქოს იმიტომ, რომ მათ (ლაზებმა — გ. გ.) წინასწარ განჰკრიტეს, რათა მდინარე ფაზისის გადასასვლელად არც დრო და არც შრომა დასჭირდებოდათ მეტი, ხოლო ნამდვილად იმიტომ, რომ არ სურდათ სპარსელებისათვის ეჩვენებინათ თავიანთი საბინადროები“¹⁸⁹.

როგორც ჩანს, იბერიიდან ლაზიკის ამ ნაწილში სხვა გზაც შემოდიოდა (ალბათ, ქვაბლიანის ხევით გოდერძის უღელტეხილზე და აქედან აჭარისწყლის ხეობაში), მაგრამ ლაზებს შეგნებულად აუვლიათ მისთვის გვერდი და ირანელები მდინარე ფასისის ზემო წელისკენ ანუ ბოასისაკენ წაუყვანიათ. როგორც უკვე ითქვა, ჭოროხს ასე უნდა რქმეოდა ართვინიდან სათავეებამდე. ჩვენი ვარაუდით, სპარსელებს ჭოროხი უნდა გადაეღახათ ართვინის ზემოთ, 10—15 კმ მოშორებით, იქ, სადაც იმერხევისა და ჭოროხის შესართავია. შემდეგ ფასისის მარცხენა ნაპირით ქვემოთ ეშვებიან ფორჩხამდე და აქედან, უმოკლესი გზით (40—45 კმ.), ჩათის უღელტეხილის გადავლითა და მ. ხოფას ხეობით, მიდიან პეტრაში.

ჩანს, რომ იგივე გზა გაიარეს ლაზიკაში მეორედ შემოსულმა სპარსელებმა, ამჟამად უკვე მერმეროეს მთავარსარდლობით რომ მი-

¹⁸⁹ გეორგია. II. გვ. 102.

ემართებოდნენ რომაელების მიერ ალყაშემორტყმული პეტრას დასახმარებლად. პროკოპის ცნობით, „იმან (მერმეროემ — გ. გ.) არ მოინდომა ლაზიკის სოფლებზე გაეარა სადმე, რათა მას რაიმე დაბრკოლება არ შეხვედროდა“¹⁹⁰, და ისე იარა პეტრამდე, რომ „ფასისი მარჯვნივ ჰქონდა“.

ამრიგად, ყოველივე ზემოთქმულიდან გამომდინარე, ჭოროხის სახით გავვაჩნია ის მყარი, საიმედო ნიშანსვეტი, რომელიც საძიებო ქალაქ პეტრას არსებობას ზოფას სანახებში მიგვიითიებს.

ხოფადან ჭოროხისაკენ და აქედან აღმოსავლეთით იბერიისაკენ, სამხრეთით და სამხრეთ-აღმოსავლეთით არმენიისა და პერსარმენიისაკენ მიმავალი გზა რომ არ არის ახალი და ძველთაგანვე არსებობდა, ამის შესახებ არაერთ ცნობას ვხვდებით ქართლის ცხოვრებაში. მაგრამ განსაკუთრებით საყურადღებოა ერთი მათგანი, სადაც მოთხრობილია 1116 წ. დავით აღმაშენებლის მიერ ბასიანში თურქთა დიდი ჯარის განადგურების შესახებ: „ტაოს ჩამოდგეს დიდნი თურქნი ხარგებითა, რამეთუ ზამთრისა სიფიცხესა და მათათა სიმაგრესა მიენდვნეს. ხოლო მეფემან მოიხელოვნა ესრეთ, რამეთუ სპათა ქართლისათა მზაობა უბრძანა, და თუით ქუთათისს წამოვიდა, რომლითა უეჭუელ ყუნა იგინი. და თუესა თებერვალსა აცნობა ქართველთა და მესხთა, რათა კლარჯეთს დახუდენ პაემანსა, და თუით შუიდიტა სპითა ხუფთითა ჭოროხის პირი წავლო. და შეკრბეს ერთად და უგრძნულად დაესხა მათ ზედა, უშიშად გულ-დებითა მსხდომარეთა ბასიანამდე და მთად კარმიფორისად“¹⁹¹.

უდავოდ ნიშანდობლივი მითითებაა ხუფათის გზაზე, რომლითაც მეფე დავით აღმაშენებელი გადადის ჭოროხის ხეობაში და კლარჯეთში ხვდება ქართლიდან და მესხეთიდან მოსულ ლაშქარს. როგორც ჩანს, გზა ხუფათიდან და იბერიიდან ჭოროხისაკენ იმდენად ყოფილა გაკვალული, რომ ზამთრის პერიოდშიც კი არ ფერხდებოდა მასზე ხალხთა დიდი მასების მოძრაობა. ასეთია იგი განვითარებულ შუა საუკუნეებში და ასეთივე უნდა ყოფილიყო უფრო ადრეც, პროკოპის დროსაც. ამ გზის ერთ ბოლოში მდებარეობს ზოფა, სადაც ჩვენ პეტრას არსებობას ვვარაუდობთ (იხ. რუკა).

¹⁹⁰ გეორგიკა. II. გვ. 106—107.

¹⁹¹ ქართლის ცხოვრება. ანა დედოფლისეული ნუსხა. ს. ყაუხჩიშვილის რედაქციით, თბ., 1942, გვ. 211—212; 215.

ხოფა თავისი ხელსაყრელი მდებარეობის გამო საკვანძო პუნქტია, სადაც თავს იყრიან ჩრდილოეთიდან (ეგრისი), აღმოსავლეთიდან (იბერია), სამხრეთ-დასავლეთიდან (არმენია, პერსარმენია) და სამხრეთიდან (რომის პროვინციები) მომავალი სახმელეთო გზები. გარდა ამისა, ხოფას, როგორც სანაპირო ქალაქს, გააჩნია კარგი ნავსადგური და დღესაც თანამედროვე თურქეთის უკიდურესი ჩრდილო ზოლის საზღვაო ჭიშკარია. ასეთი ხელსაყრელი სტრატეგიული მდებარეობით უნდა იყოს შეპირობებული ის ფაქტი, რომ ქართული წერილობითი წყაროების მიხედვით ხოფა აქტიურად მონაწილეობს შუასაუკუნეების საქართველოს პოლიტიკურ თუ ეკონომიკურ ცხოვრებაში, როგორც მნიშვნელოვანი საზღვრისპირა ქალაქური დასახლება¹⁹². ვახუშტი ბატონიშვილი აქ ქალაქს გულისხმობს და მას ხოფას უწოდებს: „გონიის დასავლეთით მიერთვის ზღვას მდინარე... ამ მდინარის იქით არის ხოფა, ქალაქი მცირე, ზღვის კიდესა ზედა. აქ მოერთვის მდინარე ხობჯისა“¹⁹³. ერთი სიტყვით, ხოფა სახმელეთო და საზღვაო გზათა შესაყართან მდებარეობს და მას გააჩნია როგორც სავაჭრო-სატრანზიტო, ისე სამხედრო-სტრატეგიული ღირსებები, ე. ი. ყოველივე ის უმთავრესი, რაც აპრიორულად უნდა ყოფილიყო გათვალისწინებული პეტრას მაშენებელი ციბე-იუსტინიანეს მიერ.

როგორც ცნობილია, მკვლევართა უმრავლესობა, პეტრას ლოკალიზაციის საკითხებზე მსჯელობისას, ერთხმად აყენებს მასთან ნავსადგურის არსებობის აუცილებლობას. მათი აზრით, პეტრა „...ისეთი პუნქტი უნდა ყოფილიყო, რომელიც ხელსაყრელ პირობებს ქმნიდა ვაჭრობისათვის და სავაჭრო მიმოსვლისათვის და აგრეთვე, სამხედრო საქმიანობისათვის, ე. ი. კარგი საზღვაო ნავსადგურის პირობებს აკმაყოფილებს“¹⁹⁴.

სანავსადგურო მონაცემების არარსებობის გამო აკად. ს. ყაუხჩიშვილმა ზურგი შეაქცია საყოველთაოდ მიღებულ და გაზიარებულ ტრადიციას პეტრა-ციხისძირის იგივეობის შესახებ და ამ ფაქტორის ძიებამ იგი ბათუმში მიიყვანა, მიუხედავად იმისა, რომ ბათუმში სხვა მხრივ ვერ აკმაყოფილებს ქ. პეტრასადმი წაყენებულ მოთხოვნებს.

¹⁹² ს. ჯანაშია. შრომები. VI. შავიზღვისპირეთის საისტორიო გეოგრაფია. თბ., 1988, გვ. 251—252.

¹⁹³ ქართლის ცხოვრება. ტ. IV. — ბატონიშვილი ვახუშტი. აღწერა სამეფოსა-საქართველოსა, ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ. თბ., 1973, გვ. 689.

¹⁹⁴ გეორგიკა. II. გვ. 34.

პეტრასთან ნავსადგურის აუცილებლობაზე მიუთითებს პროფ. ნ. ლომოურიც, რომელიც ასეთად ჩაქვის დაბლობს მიიჩნევს¹⁹⁵.

პროფ. ი. სიხარულიძე თავდაპირველად იზიარებდა ნ. ლომოურის ვარაუდს, მაგრამ შემდეგ რამდენადმე განსხვავებული მოსაზრება წამოაყენა. მისი აზრით, ქ. პეტრას ეჭირა ბობოყვათის მიდამოები, რომლის ნავსადგური უნდა ყოფილიყო მდინარეების — დაგვასა და კინტრიშის — შესართავები¹⁹⁶.

ციხისძირის ნავსადგურის ძიებას, ისევე როგორც საერთოდ ციხისძირ-პეტრას იდენტიფიკაციის საკითხების კვლევას და არქეოლოგიურ შესწავლას, დიდი ღვაწლი დასდო ბათუმის სამეცნიერო-კვლევითი ინსტიტუტის ყოფილმა დირექტორმა აწ განსვენებულმა ა. ინაიშვილმა. მან სპეციალური წერილიც გამოაქვეყნა „ციხე-ქალაქ პეტრას ნავსადგურის საკითხისადმი“ მიძღვნილი, რომელშიც, საკმაოდ ვრცელი მსჯელობის შემდეგ, იზიარებს ი. სიხარულიძის ვარაუდს¹⁹⁷ და დასძენს: პეტრასთან ნავსადგური კი არ უნდა ყოფილიყო, არამედ უბრალოდ ნავმისადგომები, რისთვისაც შეეძლოთ გამოეყენებინათ დეხვაკინტრიშ-აჭყვას შესართავები¹⁹⁸. ობიექტური თუ ვიქნებით, უნდა ვალიაროთ, რომ ციხისძირში და მის შემოგარენში ნავსადგურისათვის საჭირო ფიზიკური პირობები არ არსებობს და ზემოთ ხსენებული ავტორების ვარაუდი ასეთის არსებობის სურვილის ფარგლებში რჩება

სულ სხვა მდგომარეობაა ხოფასთან. როგორც ცნობილია, აქ არსებობს საკმაოდ ღრმა და მოხერხებული ბათუმის მსგავსი უბე, რომელიც სავსებით აკმაყოფილებს თანამედროვე კარგი ნავსადგურისადმი წაყენებულ მოთხოვნებს და არაფერი დაუდგებოდა წინ ასეთივე მნიშვნელობით მის გამოყენებას ადრეც, როდესაც ნაოსნობა შედარებით მცირე ზომის ხომალდებით ხორციელდებოდა და საკაბოტაჟო ხასიათი ჰქონდა.

ხოფასთან ხელსაყრელი ნავთსაყუდელის არსებობის შესახებ საყურადღებო ცნობები ქართულმა წერილობითმა წყაროებმაც შემოგვინახა, რაც სათანადოდ არის შეფასებული აკად. ს. ჯანაშიას ნაშ-

195 ნ. ლომოური. ქალაქი პეტრა და მისი ადგილმდებარეობა. გვ. 34.

196 ი. სიხარულიძე. სამხრეთ-დასავლეთ საქართველოს ტოპონიმია. წიგნი 11. ბათუმი, 1959, გვ. 99.

197 ა. ინაიშვილი. ციხე-ქალაქ პეტრას ნავსადგურის საკითხისათვის. — სამხრეთ-დასავლეთ საქართველოს ძეგლები. II. 1971, გვ. 74—90.

198 იქვე. გვ. 87.

რომში — შავიზღვისპირეთის საისტორიო გეოგრაფიას რომ ეხება¹⁹⁹. როგორც სამართლიანად შენიშნავს ავტორი, ხოფა, ხოფათ//ხუფთას სახელით, საკმაოდ ხშირად ფიგურირებს ფეოდალური საქართველოს პოლიტიკურ მოვლენებში, რაც „დაკავშირებული უნდა იყოს მის ნაღსადგურის, მნიშვნელობასთან“²⁰⁰. მას მხედველობაში აქვს „მატიანე ქართლისაის“ ის ადგილი, სადაც საუბარია თბილისის ჩასაბარებლად მიმავალი ბაგრატ IV-ის (1020—1072 წ.) მიერ ხუფათში გამართულ ბრძოლაზე: „გურიელნი აზნაურნი და ლომსიანნი მოაყენნა (ვარ.: მოიყუანნა) ხუფათის (ხუფათს?) და დაუდგეს ფილაკავანი და ბრძოდეს“²⁰¹. მისივე კომენტარით, კონსტანტინოპოლიდან დაბრუნებული იგივე ბაგრატი, ეტყობა, აქ ჩამომხტარა ნავიდან²⁰². „გამოგზავნა ბერძენთა ძეფემან დიდითა დიდებითა, ნიჭითა და განძითა მიუწოდომელითა, მიეგება ყოველი ლაშქარი აფხაზეთისა ზღვის პირსა ხუფათისა (ხუფათს? ვარ.: ხუფთას)“²⁰³. ერთი სიტყვით, ხოფასთან ნავსადგურის არსებობა ყოველმხრივ ეჭვგარეშე ფაქტია, რაც დოკუმენტურადაც დასტურდება.

პროკოპი კესარიელის არაერთგზის ჩვენების მიხედვით, პეტრა სასაზღვრო ქალაქია ლაზების ქვეყანაში, რომაელთა მეზობლად, რომლის აშენების აუცილებლობაში სტრატეგოს ციბეს დაურწმუნებია იმპერატორი იუსტინიანე. „მანვე დააჯერა მეფე იუსტინიანე ლაზების ქვეყანაში ზღვისპირა ქალაქი აეშენებინა, სახელად პეტრა. იქ დაჯდა ის, ვითარცა აკროპოლისში და სძარცვავდა ლაზთა ქონებას. ვაჭრებს ხომ უკვე ნება აღარ ჰქონდათ კოლხიდაში შეეტანათ მარილი და სხვა საქონელი, რაც ლაზებისათვის აუცილებლად საჭიროა, არც აქედან შეეძლოთ რაიმე ეყიდინებინათ...“ საინტერესოა, რით დაარწმუნა ამ „გაქნილმა“ მოხელემ იმპერატორი, რომელმაც დააკმაყოფილა მისი სურვილი, ანუ რა იყო ის მთავარი მომენტი, რამაც განაპირობა ქ. პეტრას აშენება. მკვლევართა ერთობლივი აღიარებით, პეტრა შენდება კონკრეტულ ისტორიულ პერიოდში, რომელიც, უმთავრესად, ბიზან-

199 ს. ჯანაშია. შრომები. VI. შავიზღვისპირეთის საისტორიო გეოგრაფია. თბ., 1988, გვ. 257—258.

200 იქვე.

201 იქვე.

202 იქვე.

203 იქვე.

ტიის თავდაცვით და სავაჭრო მომენტს გულისხმობს²⁰⁴, სასანიდური ირანის აგრესიული პოლიტიკის წინააღმდეგ, რომელმაც დაიპყრო სომხეთის დიდი ნაწილი, მეფობა მოსპო ქართლში (523 წ.) და ეგრისში გაბატონებით სურს ზურგდანი მიაყენოს გადამწყვეტი დარტყმა მის ძირითად მოწინააღმდეგეს რომის იმპერიას.

ბუნებრივია, იუსტინიანე, შესაბამისად, ახორციელებს რადიკალურ კონტროლისძიებებს უკვე კარზე მომდგარი საშიშროების წინააღმდეგ, რის გამოც თავდაპირველად ცდილობს ლაზიკის სასაზღვრო ციხეების — სკანდესა და შორაპანის — გამაგრებას, უკვე რომაული გარნიზონების საშუალებით. მაგრამ, როგორც ჩანს, მალე დარწმუნდა იუსტინიანე, რომ ეს ღონისძიება არ იყო ეფექტური არმენიაში და იბერიაში გაბატონებული საშიში მტრის შესაჩერებლად, რომელსაც ლაზიკის ცენტრალური რაიონების გვერდის ავლით იბერიიდანაც (ახალციხის გადასასვლლებით) და სომხეთიდანაც (ჭოროხგზა) შეეძლო გაქრილიყო ზღვის სანაპირო ზოლში, უშუალოდ რომის პროვინციების საზღვართან. სწორედ ამიტომ და არა სურსათის ნაკლებობის გამო, როგორც ეს პროკოპის ჰგონია, იუსტინიანეს გამოჰყავს ჭარები სკანდედან და შორაპნიდან²⁰⁵ და სასწრაფოდ აშენებს ახალ ზღუდეს ქალაქ პეტრას სახით, რომელიც საიმედოდ ჩაეკეტავდა რომის ჩრდილოეთ პროვინციებში შემავალ ყველა გზას, ლაზების განდგომის შემთხვევაშიც კი (მით უფრო, რომ ლაზებს ასეთი ტენდენცია არაერთხელ გამოუმჟღავნებიათ)²⁰⁶. არც სკანდეს, არც შორაპანს, არც ფასისს, არც ციხისძირს და არც ლაზიკის სხვა რომელიმე ციხეს არ შეიძლებოდა ჰქონოდა ასეთი მნიშვნელობა რომის პროვინციებიდან თუნდაც მათი გარკვეული მანძილით დაშორების გამო. როგორც ჩანს, ამიტომ გახდა საჭირო ახალი ქალაქის აშენება უფრო ხელსაყრელ სტრატეგიულ ადგილზე, ზღვის სანაპირო ზოლში. ვფიქრობთ, სწორედ, ასეთი ადგილის შერჩევაში მდგომარეობს სტრატეგოსი ციხეს დამსახურება, რომელიც, ალბათ, კარგად იცნობდა რომისა და ლაზიკის შავი ზღვის სანაპირო ზოლის რელიეფს, სადაც, ყველა სტრატეგიული ნიშნით (ზღვის სიახლოვე ქედებთან, კლდოვანი რელიეფი, სახმელეთო და საზღვაო გზების შეხვედრის წერტილი, რომის პროვინციის კლდეკარი,

204 ნ. ბერძენიშვილი. საქართველოს ისტორიის საკითხები. VIII. გვ. 471; გეორგიკა. ტ. II. გვ. 74.

205 გეორგიკა. II. გვ. 52.

206 ს. ჭანაშია. შრომები. I. გვ. 35; ნ. ბერძენიშვილი. დასახ. ნაშრ. გვ. 471; გეორგიკა. II. გვ. 35, შენ. 1.

ხელსაყრელი კლიმატი და სხვა), შეუდარებელია ხოფას რაიონი, ანუ მდ. აფსაროსის (ჭოროხი) აუზი. აქ არის ქედებით გამოყოფილი გეოგრაფიული საზღვრები, რომელსაც ემთხვევა ბიზანტია-ლაზიკის პოლიტიკური სასაზღვრო ზოლიც, უძველესი დროიდან (პეროდოტე, ფსევდო სკლიაქს კარიანდელი, არიანე და სხვა) V—VI სს. ჩათვლით. ამის შესახებ ბერძენ ავტორთა წერილობითი ცნობებიც გავაჩნია. ჩვენ მხედველობაში გვაქვს IV საუკუნის მეორე ნახევრის სახელგანთქმული რომაელი ისტორიკოსი ამიანე მარცელინი, რომელიც მოგვითხრობს ირანის შაჰი შაპურისაგან 368 წელს ლტოლვილი სომხეთის მეფე პაპისა და სხვა სომეხი წარჩინებულების შესახებ, რომლებმაც „სცადეს შეეფარებინათ თავი მაღალ მთებში, რომლებიც ჩვენებს (ე. ი. რომაელთა მიწებს — გ. გ.) ...ლაზიკისაგან ჰყოფენ. იქ ხუთ თვეს იფარავდნენ თავს უღრან ტყეებსა და დაკლაკნილ სერებში და თავს აღწევდნენ მეფის მრავალ ცდას მათი დაჭერისათვის“²⁰⁷. როგორც მკვლევრები ფიქრობენ, ის მაღალი მთები, რომლებიც გამოყოფდნენ რომაელთა სამფლობელოს ეგრისის სამეფოსაგან, უნდა მდებარეობდეს ჭოროხის შესართავის სამხრეთ-აღმოსავლეთით, ზღვის მახლობლად²⁰⁸. ეს უნდა იყოს ლაზიკის, ანუ ე. წ. პონტოს ქედი და მისი განშტოებები, რომლის ბოლოში, საზღვაო და სახმელეთო გზების გასაყართან, ხოფა მდებარეობს, ალრე კი აქ ქალაქი პეტრა უნდა აეგოთ, როგორც რომის პროვინციებისაკენ მიმავალი გზებისა და კლდეკარის ჩამკეტი (იხ. რუკა).

ხოფასთან ლაზიკის სასაზღვრო ზოლის არსებობის შესახებ კიდევ უფრო ზუსტ მითითებას ვხვდებით V საუკუნის ავტორის დანიელ მესვეტის ცხოვრებაში, სადაც ნათქვამია: „მათ დღეთა შინა მოვიდა, ღობაზიანოს მეფე აფხაზთა ხილვად ნეტარისა ლეონ (იგულისხმება ლეონ I, 457—474 წწ; — გ. გ.). ხოლო აქუნდა ორთავნ ამათ მეფეთა საურავი რაიმე ქვეყანათა დაწყნარებისათვის და ზღვათა განყოფისა: სადამდის არს საბერძნეთისა ანუ მეგრელთა აფხაზეთის სამეფოსა: და უთხრეს წმიდასა და მონასა ღმრთისასა დანიელს და იგი იქმნა შუამდგომელ მათდა. და დადევს საზღვრად ციხე ხუფათი: და აღუთქვეს ურთიერთას მშვიდობა და სიყვარული ამისითა სიტყვთა: და შთამო-

207 ამიანე მარცელინი. გეორგიკა. I. ტბ., 1961, გვ. 128.

208 Г. А. Мелникишвили. დასახ. ნაშრომი. გვ. 91, 381; ნ. ლომოური. ეგრისის სამეფოს ისტორია. 1968, გვ. 70; დ. მუსხელიშვილი. დასახ. ნაშრომი. გვ. 91.

ვდა მეფე ქალაქად და განუტევა ლობაზიონ მამულსა თქსსა“²⁰⁹. ბიზანტიელი მწერლის პრისკე პანიონელის მიხედვით, გუბაზის ჩასვლა კონსტანტინოპოლში მომხდარა დიდი ხანძრის შემდეგ (465 წ.)²¹⁰. ე. ი. გუბაზისა და ლეონის დაზავება და ხუფათზე საზღვრის დადება უნდა მომხდარიყო 465—474 წწ. შუა პერიოდში. არც ბიზანტიური და არც ქართული წყაროების მიხედვით არ ჩანს ამის შემდეგ, პროკოპის დრომდე, ე. ი. ნახევარი საუკუნის განმავლობაში, რალაც ისეთი მნიშვნელოვანი პოლიტიკური ცვლილება მომხდარიყოს, რომ საზღვარი ლაზიკასა და ბიზანტიას შორის ციხისძირთან გადაეტანათ, რაც თავისთავად გამოდის პეტრას ციხისძირთან ლოკალიზაციის შემთხვევაში. და თუ ასეთი რამ მოხდა, მას, უთუოდ, ახსენებდა პროკოპი, როგორც არაერთგზის საუბრობს იგი ჭანების დამორჩილების შესახებ ბიზანტიელების მიერ²¹¹.

განა საგულისხმო არ არის ის ფაქტი, რომ იუსტინიანეს პოლიტიკით აღშფოთებული, სპარსეთში, ზოსროსთან საჩივლელად მისული ლაზების მოხსენებაში არაფერია ნათქვამი რომაელთა მიერ ლაზიკის ტერიტორიის ხელყოფის შესახებ, მაშინ, როცა მათ მიერ ჩადენილი ბოროტებიდან თითქმის არაფერი გამორჩენიათ: „რა არ ჩაიდინა მან (იგულისხმება იუსტინიანე — გ. გ.) ისეთი, რაც წინათ აკრძალული იყო? ან რამდენი კარგი მოწყობილი საქმე არ დაანგრია მან? განა იმან არ დაგვადგა ჩვენ სახარკო გამოსაღები, რასაც წინათ ადგილი არ ჰქონია, და ჩვენი მოსაზღვრე, წინათ თვითთავადი ჭანები არ დაიმორჩილა, ხოლო საცოდავ ლაზთა მეფეს რომაელი სარდალი არ ჩაუყენა?... ჩვენ მეფეს ხომ მეფობის გარეგნული ნიშნები დაუტოვეს, ხოლო ძალაუფლება საქმეებში თვითონ მიითვისეს: მეფეც მოსამსახურის როლში იმყოფება და განმკარგულელებელი სტრატეგოსის ეშინია. უამრავი ჭარიც ჩაგვიყენეს, მაგრამ არა იმიტომ, რომ დაიცივნ ეს ჩვენი ქვეყანა შემწუხებლისაგან..., არამედ რათა დავემწყვდიეთ ჩვენ როგორც სადილეგოში და ჩვენს ქონებას დაპატრონებოდნენ“²¹². როგორც ვხედავთ, აქ სახელმწიფო ტერიტორიის მიტაცებაზე ნათქვამი

209 კ. კეკელიძე. ვტიულები ძველი ქართული ლიტერატურის ისტორიიდან. VII. თბ., 1961, გვ. 5—6.

210 გეორგიკა. ბიზანტიელი მწერლების ცნობები საქართველოს შესახებ. ტომი პირველი. ტექსტი ქართული თარგმანითურთ გამოსცეს და განმარტებები დაურთეს ალ. გამყრელიძემ და სიმონ ყაუხჩიშვილმა. თბ., 1961, გვ. 259.

211 გეორგიკა. II. გვ. 31, 69.

212 იქვე, გვ. 68—69, 75—78.

არაფერია და ამ დროისათვის არც არსებობდა პოლიტიკური პირობები ასეთი ქმედებისათვის.

უდავოა, რომ V საუკუნის მეორე ნახევრიდან მაინც ლაზიკის სახელმწიფო პოლიტიკური საზღვარი, სამხრეთ-დასავლეთ ნაწილში, ხოფას სექტორზე გადის. VI საუკუნეშიც არაფერი მიგვანიშნებს მის ცვალებადობაზე და როგორც ქართული წერილობითი წყაროებიც მოწმობენ, ასევე რჩება განვითარებულ შუა საუკუნეებშიც²¹³.

რამდენადაც პროკოპის არაერთგზის ჩვენებით პეტრა ზღვისპირა, სასაზღვრო ქალაქია, საზღვარი კი, როგორც: დავინახეთ, ხოფას სექტორში გადის, სავსებით ბუნებრივია ჩვენი მცდელობა ციხე-ქალაქი პეტრას ლოკალიზაციაც ხოფასთან მოვახდინოთ.

როგორც უკვე ითქვა, პეტრა მკაცრი კლდოვანი რელიეფის გარემოცვაში აგებული ციხე-ქალაქია. „ქალაქი პეტრა მიუვალაია. ჯერ ერთი, ზღვის მხრიდან, მერე: ციცაბო კლდეებით, რომელიც იქ ყოველმხრივ არის აღმართული: აქედან არის; რომ მას ეს სახელწოდება ხვდა წილად...“²¹⁴. ე. ი. კლდოვანი რელიეფი იმდენად ნიშანდობლივი ყოფილა ქალაქის შემოგარენისათვის, რომ იგი ადგილის საკუთარ სახელად (პეტრა) ქცეულა, ისევე როგორც სამხრეთ იორდანიაში: მდ. სიქის ხეობაში არსებულ რომაული ხანის კლდეში ნაკვეთ ქალაქს შეერქვა პეტრა.

კიდევ ერთხელ უნდა გავუსვათ ხაზი, რომ პროკოპისეულ პეტრას ტოპოგრაფიულ დახასიათებას ძალზე უახლოვდება ხოფას სანაპიროზე არსებული ფიზიკურ-გეოგრაფიული სურათი. ტრაპიზონიდან მოყოლებული ქ. სოქის ჩათვლით, ზღვის სანაპირო ზოლში ძნელია მოიძებნოს მეორე ისეთი მკაცრი, კლდოვანი რელიეფის მქონე ფართობი, როგორც ხოფა-არხავეს შორის მოქცეული, 10—12 კმ სიგანის მონაკვეთია; დღეს აქ, ზღვის სანაპიროზე სამანქანო ტრასაა გაჭრილი, მაგრამ XIX საუკუნეში საცალფეხო ბილიკიც კი არ არსებულა, რის შესახებაც არაერთი მოგზაურის ცნობა შეიძლება დავიმოწმოთ.

სამაგალითოდ შეიძლება დავასახელოთ იენის უნივერსიტეტის პროფესორის, ბოტანიკოსისა და დენდროლოგის კარლ ჰაინრიხ კოხის დღიურები, რომელმაც 1843—1844 წწ. იმოგზაურა შავიზღვისპირეთ-

²¹³ ქართლის ცხოვრება. ანა დედოფლისეული ნუსხა. ს. ყაუხჩიშვილის რედაქციით. თბ., 1942, გვ. 186, 211—212.

²¹⁴ გეორგია. II, გვ. 85.

ში. ჩვენთვის ამჟამად საინტერესოა კოხის ვიზუალური დაკვირვების შთაბეჭდილებები კოროზიდან ხოფამდე და აქედან ათენამდე: „მეორე დღეს ხოფასაკენ განვაგრძეთ გზა: იგი ამ ადგილიდან ექვსი საათით არის დაშორებული. თანდათანობით ქრება დაბლობი და პონტოს მთები სულ უფრო უახლოვდება პონტოს სანაპიროს. ხოფის დასავლეთით მდებარე მთა სულ უფრო და უფრო უახლოვდება, და ისეთ შთაბეჭდილებას ქმნის, თითქოს ზღვიდან ამოდისო; ამის გამო გზა ზღვის ნაპირის გაყოლებით სულ უფრო და უფრო ძნელი სავალი ხდება. აქ ცხენითაც ვერ გაივლი კაცი. კლდეზე ფეხით სიარულიც კი კირს“²¹⁵. რადგან ხოფადან ათენისაკენ ხმელეთის გზა ძალზე რთული სავალი ყოფილა, კოხი იალქნიანი ნავით გამგზავრებულა და შიშნარევი აღფრთოვანებით აღწერს კლდოვანი სანაპირო ხაზის სიმკაცრესა და სილამაზეს: „თუმცა განთქმული ყირიმის სანაპიროები და ზღვიდან ამოსული ჩერქეზეთი, თავისი მაღალი მთებით, უკვე ნანახი გვექონდა, ასეთი სილამაზე და მრავალფეროვნება ჯერ მაინც არსად გვინახავს... ზღვიდან უზარმაზარი კლდეები აღმართულიყო... ვაი ჩვენი ბრალი, ამ საშიშ ადგილებში უეცრად ქარიშხალი რომ ამოვარდნილიყო. ასეთი კლდეების სიახლოვისას ყველა ცდა გადარჩენისათვის უშედეგო იქნებოდა; ნავი კლდეს დაეჯახებოდა და დაიშლებოდა იმავე ნაფოტებად, რომლებისგანაც ის ღურგალს წვალებით შეეკრა. ჩვენმა თანამგზავრებმა გვითხრეს, რომ იმ ადგილებში ყოველწლიურად ბევრი გემი და ნავი იღუპება. მათი მონაცოლი ახლაც შიშის ზარს გვცემს“²¹⁶. როგორი რომანტიული და ნიშანდობლივი აღწერაა ხოფას კლდოვანი სანაპიროსი, რომელიც ასე უახლოვდება პროკოპისეული პეტრას ძირითად ტოპოგრაფიულ ნიშნებს.

ასეთ, კლდოვან-ქარაფოვანი რელიეფის მქონე ტერიტორიას, რომელიც მკვეთრად გამოირჩევა და ალბათ, ასევე გამოირჩეოდა ადრეც შვიზღვისპირეთის სხვა სანაპიროს რბილი სუბტროპიკული მცენარეულსამოსიანი გარემოსაგან, ბუნებრივია, შერქმეოდა კლდოვანისა თუ კლდეეთის სახელი, რაც ბერძნულად პეტრად გამოითქმის.

საყოველთაოდ ცნობილია, თუ რა დიდმნიშვნელოვანია ლოკალიზაციისა და საერთოდ, საისტორიო გეოგრაფიის საკითხების კვლე-

²¹⁵ კოხისა და სპენსერის ცნობები საქართველოსა და კავკასიის შესახებ. გერმანულიდან თარგმნა, შესავალი და კომენტარები დაურთო ლონდა მამაცაშვილმა. თბ., 1981, გვ. 196, 199.

²¹⁶ კოხისა და სპენსერის ცნობები..., გვ. 199—200.

ვისას ტოპონიმიკური და არქეოლოგიური მასალა, რომელიც საკვლევი ობიექტის ადგილზეა მოპოვებული.

სამწუხაროდ, ობიექტური მიზეზების გამო, ჯერჯერობით არ მოგვეცა საშუალება ზოფას მიდამოებში საძიებო სამუშაოების ჩატარებისა, მაგრამ XIX—XX საუკუნეების ცნობილ მეცნიერ-მოგზაურთა (დ. ბაქრაძე, ი. ყიფშიძე, გ. ყაზბეგი, დ. კლდიაშვილი, ნ. მარი და სხვ.) ჩანაწერებში და სხვა ისტორიულ ნაშრომებში ამ ხასიათის საყურადღებო მასალა საკმაოდ მოიპოვება.

წერილობით წყაროებში აღწერილი პუნქტებიდან პეტრას ლოკალიზაციის საკითხებთან დაკავშირებით განსაკუთრებით საყურადღებოდ გვეჩვენება ზოფას შემოგარენში, სოფ. პირონისა და სოფ. კისეს შორის, ზღვისპირას აღმართული კლდოვანი ბორცვი, რომელზეც, გ. ყაზბეგის ცნობით, მთელ ქანეთში საუკეთესო ეკლესია მდგარა²¹⁷.

დ. ბაქრაძის მოწმობით, რომელიც მეჭლისის წევრის, ორთახოფელი წარმოშობის ხასან-ალა მურად-ოღლის (მისი ქართული გვარი ყოფილა მოურაიეშვილი) მონაყოლს ემყარება, ამ ადგილს ჭიხა რქმევია²¹⁸, რაც აქ ოდესღაც ციხის არსებობაზე მიგვანიშნებს. ამასვე მოწმობს, აგრეთვე, აქვე ახლოს მდებარე სოფლის სახელწოდება ყალა-დიბი თუ კულე-დიბი, რაც თურქულად ციხისძირს ნიშნავს²¹⁹.

საგულისხმოა, რომ განვითარებულ და გვიან შუასაუკუნეებში ქართული თუ უცხოური წყაროები, პოლიტიკურ მოვლენებთან თუ სამხედრო ოპერაციებთან დაკავშირებით ზოფას არაერთგზის მოხსენიების მიუხედავად, აქ ციხის არსებობას არ მიუთითებენ. რაც იმას გვაფიქრებინებს, რომ ტოპონიმ ჭიხას და ციხისძირის გაჩენა დაკავშირებული უნდა იყოს რომაელების მიერ აქ პეტრას ციხის აკროპოლისის აშენებასთან, რომელსაც თვითვე ანგრევენ 551 წ. მას შემდეგ, რაც რომაელთა მთავარსარდალმა ბესამ სპარსელები დაამარცხა და აიღო ციხე, „...პეტრას ზღუდე კი მიწასთან გაასწორა, რომ მტერს კვლავ არ გაეჭირვებინა საქმე რომაელებისათვის“²²⁰.

²¹⁷ Г. К а з б е к. Три месяца в турецкой Грузии, с 103; ი. ს ი ხ ა რ უ ლ ი ძ ე, ქანეთი (ლაზეთი) — საისტორიო გეოგრაფიის მასალები. I. ბათუმი, 1977, გვ. 68—69.

²¹⁸ დ. ბ ა ქ რ ა ძ ე. დასახ. ნაშრ. გვ. 27.

²¹⁹ მ. ს ე ა ნ ი ძ ე. საქართველო-ოსმალეთის ურთიერთობის ისტორიიდან XVI—XVII სს. თბ., 1971, გვ. 84, შენ. 148.

²²⁰ გეორგიკა. II. გვ. 180.

აღბათ, რომაელთა ასეთი ქმედების შედეგი უნდა იყოს ისიც, რომ ნაციზმის მატერიალური ნაშთები მოგზაურთა და მკვლევართათვის დღემდე შეუძენვეელი რჩება, მაშინ, როდესაც ტოპონიმთა აქ ოდესაც ასეთი ობიექტის არსებობას უცილობლად ადასტურებს.

პეტრა-ხოფას იდენტიფიკაციის საკითხთან დაკავშირებით განსაკუთრებით საინტერესო და მრავალმხრივ ანგარიშგასაწვეია პროფ. ი. სინარულიძის მიერ ჭანეთის საისტორიო გეოგრაფიის მასალების შესწავლისას მოძიებული და ჩაწერილი, შეიძლება ითქვას, ჩვენთვის უნიკალური ცნობა, რომლის მიხედვით, ხოფას შემოგარენში, ჯიხასა თუ ნოჯიხევის (ასეა აღნიშნული ივ. ჯავახიშვილის 1923 წ. გამოცემულ ისტორიულ რუკაზე) მახლობლად არსებობს პატარა მდინარე, რომელსაც ადგილობრივი მოსახლეობა დღესაც პეტროლას უწოდებს, რაც პეტრას, ანუ კლდის წყალს ნიშნავს²²¹.

ამ საინტერესო უბანში ჰიდრონიმი პეტრო//პეტრას დადასტურება, სხვა მონაცემებთან ერთად, ვფიქრობთ, კიდევ ერთი საიმედო საფუძველია ხოფას შემოგარენში, ადგილ ნოჯიხეთან პეტრას იდენტიფიკაციის სამტკიცებლად.

პეტრას ნაქალაქარის კონკრეტულ, მიკრო ტერიტორიაზე ლოკალიზაციასთან დაკავშირებით, ვფიქრობთ, ინტერესმოკლებული არ უნდა იყოს გ. ყაზბეგის ხსენებული ცნობა ხოფასთან (ნოჯიხევის ბორცვზე) მთელ ჭანეთში საუკეთესო ეკლესიის არსებობის შესახებ²²².

როგორც ბიზანტიური წერილობითი წყაროების მიხედვით ირკვევა, პეტრა ერთდროულად წარმოადგენდა სავაჭრო-ეკონომიკურ, პოლიტიკურ, სამხედრო-სტრატეგიულ და საეკლესიო ცენტრს, სადაც არსებობდა ლაზიკის ეპარქიის — ფასისის სამიტროპოლიტოს ოთხი საეპისკოპოსოდან (როტოპოლისი, აბისენი, ზიგანევი, პეტრა) ერთ-ერთი, პეტრას საეპისკოპოსო²²³.

პეტრას საეპისკოპოსოს შესახებ საისტორიო წყაროს კონსტანტინოპოლის საპატრიარქოს ცნობილი საეკლესიო ნუსხები — „ეკთეზიხები“ — წარმოადგენენ. ლაზთა ეპისკოპოსი იოანე პეტრელი, ლაზთა მეორე ეპისკოპოს თეოდორე ფასისელთან ერთად, უკვე VII საუკუნე-

²²¹ ი. სინარულიძე. ჭანეთი (ლაზეთი) — საისტორიო გეოგრაფიის მასალები. I. ბათუმი, 1977, გვ. 64—65.

²²² Г. К а з б е к. Указ. соч., с. 103.

²²³ გეორგიკა. II. თბ., 1965, გვ. 34.

ნეში იხსენიება. კერძოდ, 692 წ. ისინი დასწრებიან საეკლესიო კრებას და კრების დადგენილებისათვის მოუწერიათ ხელი²²⁴.

პ. ინგოროყვას აზრით, პეტრას საეპისკოპოსო კათედრას ემორჩილებოდა ვრცელი ტერიტორია: „...თანამედროვე ციხისძირი, ბათუმის ზონაში; ამ საეპისკოპოსოს ფარგლებში შედიოდა გარდა ბათუმის მხარისა, გურია-აჭარისა, აგრეთვე ჭანეთ-ლაზია, რიზეს მხარე, რომელზეც ვრცელდებოდა იურისდიქცია ლაზიკის მიტროპოლიტისა“²²⁵. ლაზიკის ეპარქიაში შემავალი საეპისკოპოსოების სამწყსოების ტერიტორიალური განვრცობის შესწავლა უადრესად მნიშვნელოვან მასალას იძლევა ლაზიკის სამეფოს საზღვრების დასაზუსტებლად.

პეტრას ლოკალიზაციის ჩვენეული ვარიანტის მიხედვით, პეტრას საეპისკოპოსო ლაზიკის ეპარქიის განაბირა. საეკლესიო ცენტრი ჩანს, რომელიც კათედრალური ტაძრის არსებობასაც გულისხმობს. გამოირიხებული არ არის, რომ გ. ყაზბეგის მიერ ხოფას ჭიხაზე დამოწმებული „მთელ ჭანეთში საუკეთესო ეკლესია“ პეტრას ეპისკოპოსის საჯდომი ყოფილიყო. თუ ეს ასეა, მაშინ სავსებით გასაგები ხდება პროკოპის ცნობის ის ადგილი, რომლის მიხედვით რიზესა და ლაზიკას შორის მოსახლე ერთ თვითთავად ხალხს, „რადგან ისინი ქრისტიანები არიან, ლაზთა ეპისკოპოსები უწესებენ მათ მღვდელმსახურებას“²²⁶.

რიზე-ათენას ეს ტერიტორიები ხომ უშუალოდ ეკვრის ხოფას შემოგარენს და აქ არსებულ პეტრას საეპისკოპოსოს შესვეურებს, თუნდაც მარტო ფიზიკური (ალბათ, ეთნიკურიც) სიახლოვის გამო, ალბათ, სხვა საეპისკოპოსოებზე (როდოპოლისი, აბისენი, ზილანევი, ტრაპეზუნტი) მეტად მიუწვდებოდა ხელი თავისი გავლენის გასავრცელებლად.

სამწუხაროდ, ობიექტური მიზეზების გამო, ჯერჯერობით არ მოგვეცა საშუალება ხოფას მიდამოებში სავსელ სამუშაოების ჩატარებისა, ან აქ არსებული ტაძრის ვიზუალური შესწავლისა, მაგრამ იმდენ ვიტოვებთ, რომ ასეთი შესაძლებლობის გაჩენის პირველივე შემთხვევაში ჩვენი ვარიანტის დამადასტურებელი მასალები არ დააყოვნებს.

დასასრულს, ხსენებულ საკითხზე ჩვენს მიერ ჩატარებულ კვლევის შედეგად მიღებული დასკვნები შემდეგი სახით შეიძლება

²²⁴ Ю. Кулаковскій. История Византии. III. Киев, 1899, с. 277—278.

²²⁵ პ. ინგოროყვა. გიორგი მერჩულე. თბ., 1954, გვ. 230.

²²⁶ გეორგიკა. II. გვ. 125.

წარმოვიდგინოთ: ბიზანტია-სპარსეთს შორის წარმოებული ოცწლიანი ომის პირველ ეტაპზე, პეტრას გარშემო რომ მიმდინარეობდა, ხსენებული მდ. ბოას-ფასისი კოროხია და არა რიონი. მისგან სამხრეთით, 25—30 კმ მანძილზე, ანუ ერთი დღის სავალზე, ლაზიკა-პონტოს ქედიდან ჩამოსული განშტოებები განივად კეტავს ზღვის სანაპირო ზოლს და მკვეთრად გამოკვეთილი კლდოვანი რელიეფით გამოირჩევა. ამ ადგილზე მდებარეობს თანამედროვე პატარა ქალაქი ხოფა, რომლის ტოპოგრაფია ზედმიწევნით შეეფერება პროკოპის მიერ ქ. პეტრას ადგილმდებარეობის აღწერილობას და სავსებით ამართლებს პეტრას ანუ კლდეეთის სახელწოდებას.

ლაზიკის ქედის განშტოებებით ხოფასთან განივად გადაკეტილი ზღვის სანაპირო ზოლი წარმოადგენს ისტორიული საქართველოს ფიზიკურ-გეოგრაფიულ საზღვარს, რომელსაც პოლიტიკური სასაზღვრო ხაზიც უნდა დამთხვეოდა. ასე იყო შუა საუკუნეებში და აქვე გადიოდა რომისა და ლაზიკის სამეფოების გამყოფი ხაზი V—VI საუკუნეებშიც.

ხოფა მნიშვნელოვან საზღვაო და სახმელეთო გზათა შესაყართან მდებარეობს, სადაც თავს იყრის მნიშვნელოვანი საგზაო მაგისტრალები: ჩრდილოეთიდან (ლაზიკა), სამხრეთიდან (რომის იმპერია), აღმოსავლეთიდან (იბერიიდან) და სამხრეთ-აღმოსავლეთიდან (არმენია და პერსარმენია). მას აქვს კარგი ნავსადგური და კონტროლს უწევს საზღვაო მაგისტრალსაც. ყველა ამ ნიშან-თვისების გამო ხოფა წარმოადგენს მნიშვნელოვან ეკონომიკურ, პოლიტიკურ და სტრატეგიულ საკვანძო პუნქტს, რამაც, როგორც ჩანს, ადრევე მიიქცია რომაელთა ყურადღება და აქვე, ერთ-ერთ კლდოვან, ზღვისპირა მაღალ ბორცვზე, ააგო ციხე-ქალაქი პეტრა, ამ ბორცვზე. არსებობს მნიშვნელოვანი საეკლესიო ნაგებობა, რომელიც შეიძლება ლაზიკის ეპარქიაში შემავალ პეტრას საეპისკოპოსო რეზიდენციის ნაშთიც იყო.

ხოფას ზღვისპირა მიკრორაიონში დამოწმებულია ტოპონიმი: ჯიხა (ციხე), ყალა-დიბი (ციხისძირი) და, რაც მთავარია, პიდრონიმი-პეტროლალი (პეტრას წყალი) ანუ კლდის წყალი, რაც, სხვა მონაცემებთან ერთად, საიმედო საფუძველია ხოფასთან. ქ. პეტრას იდენტიფიკაციის სამტკიცებლად (იხ. რუკა).

საკითხის ასე დასმის შემთხვევაში იხსნება ყველა წინააღმდეგობა და გაუგებრობა, რომელიც, თითქოს, არსებობდა პროკოპი კესარიელის შრომის პირველ ნაწილში, როდესაც პეტრას ადგილმდებარეობის ადგილის მცდელობა, ლაზიკის სამეფოს სასაზღვრო ხაზის დაზუსტე-

ბა, პეტრას საეპისკოპოსო ცენტრის სამწყსოს არიალისა და სხვა სა-კითხების კვლევა ფასის-რიონის მიმართებაში განიხილებოდა.

პროკოპის წყაროს ბოას-ფასისის მდ. ჰოროხთან იდენტიფიკაციისა და ქ. პეტრას ხოფასთან ლოკალიზაციის შემდეგ სავსებით ლოგიკური ჩანს მდ. ფასისის სათავეების ჰანეთ-არმენიის მთებში ძიება, მდინარის სანაპიროების არათანაბარი დასახლების, ლაზიკის მთავარი ქალაქები-სა და იბერიის საზღვრების მიმართულების პროკოპისეული ჩვენება და სხვ.

ამ ვარიანტში პროკოპი კესარიელის შრომის ყველა საექვო-სადა-ვო ადგილი გამჟვირვალე ხდება და კიდევ მეტი ნდობა უნდა გამოე-ცხადოს მას, როგორც ადრებიზანტიური ხანის ეგრის-ლაზიკის სამე-ფოს ისტორიის საიმედო პირველწყაროს.

პეტრას ახლებური ლოკალიზაციიდან გამომდინარე, ბუნებრივად დაისშის ლოგიკური კითხვა: მაშ, რას წარმოადგენს ადრე პეტრად მი-ჩნეული ციხისძირის დიდებული ძეგლი, რომლის არქეოლოგიური შე-სწავლის საფუძველზე, განსაკუთრებით უკანასკნელ წლებში, გვიან-რომაული და ადრებიზანტიური ხანის ბრწყინვალე მასალები გამოე-ლინდა.

სწორედ, ამ პრობლემის გარკვევის მცდელობას ეძღვნება ჩვენი შრომის მომდევნო ნაწილი, ქ. სებასტოპოლისის ლოკალიზაციის სა-კითხებთან რომაა დაკავშირებული.

ციხისძირ-სებასტოპოლისი

სახელგანთქმული ალექსანდრიის სამეცნიერო სკოლის წარმომად-გენელთა შორის საპატიო ადგილი ეკუთვნის ახ. წ. II საუკუნის შუა ხანების (120—160 წწ.) მოღვაწეს, მეცნიერ გეოგრაფოსს და ასტრო-ნომს კლავდიოს პტოლემაიოსს.

როგორც მეცნიერები ფიქრობენ, ვიდრე კოპერნიკამდე, პტო-ლემაიოსი ითვლებოდა გეოგრაფიული და ასტრონომიული ცოდნის ურყევე ავტორიტეტად. მისი მოღვაწეობის ხანა ემთხვევა სწორედ იმ პერიოდს, როდესაც დასრულდა იმპერიის ხანგრძლივი ომები მით-რიდატე ევპატორთან და რომის შემდგომი ექსპანსია აღმოსავლეთში.

პტოლემაიოსი ერთ-ერთი იმათგანია, რომელმაც აღწერა, შეაჯამა და ქალაქებზე გადაიტანა რომის იმპერიის ახალი მონაპოვარი²²⁷.

²²⁷ ნ. ლ. მ. ო. უ. რ. ი. კლავდიოს პტოლემაიოსი, „გეოგრაფიული სახელმძღვ-

პტოლემეაიოსმა, როგორც შორეული, ისე უშუალო წინამორბედი მკვლევრების (პეროდოტე, ლოგოგრაფოსები, ფსევდო-სკილაქს კარიანდელი, სტრაბონი, პლინიუსი) და მისივე თანამედროვე მოღვაწის (საქართველოს შავი ზღვისპირეთის თვითმხილველის), კაბადოკიის მმართველის ფლავიუს არიანეს (131—137 წწ.) ცნობებზე დაყრდნობით, შექმნა თავისი დროის ფუნდამენტური ნაშრომი, ე. წ. „გეოგრაფიული სახელმძღვანელო“, რომელიც თავისი ხასიათით მათემატიკური ნაწარმოებია. მასში თვითეული გეოგრაფიული პუნქტი აღნიშნულია მათემატიკურად გამოთვლილი კოორდინატების მიხედვით²²⁸.

რამდენადაც „გეოგრაფიული სახელმძღვანელო“ მდიდარია მრავალფეროვანი ნომენკლატურით და ამასთანავე, შეიცავს ძვირფას ცნობებს საქართველოსა და მისი მეზობელი მხარეების შესახებ, იგი მნიშვნელოვან წყაროს წარმოადგენს ჩვენი ქვეყნის ძველი ისტორიისა და განსაკუთრებით, ისტორიული გეოგრაფიის არაერთი საკითხის ახლებურად გასაშუქებლად.

ამჯერად ჩვენ მხედველობაში გვაქვს „სახელმძღვანელოს“ ის ნაწილი, რომელიც შეეხება აღმოსავლეთ შავი ზღვისპირეთში განლაგებულ ქალაქებსა და მეტ-ნაკლებად მნიშვნელოვან პუნქტებს.

როგორც ცნობილია, ფსევდო-სკილაქს კარიანდელის „პერიპლუსისა“²²⁹, დიდი გეოგრაფოსის სტრაბონისა და სხვათა მიხედვით²³⁰, შავი ზღვის აღმოსავლეთ სანაპიროზე არსებობდნენ ქალაქური ცენტრები: დიოსკურია, თანამედროვე სოხუმის მიდამოებში, გიენოსი ქ. ოჩამჩირესთან, ფასისი მდ. რიონის ძველ შესართავთან (თანამედროვე შესართავიდან აღმოსავლეთით, 10—12 კმ მანძილზე) და პიტიუნტი (თანამედროვე ბიჭვინთა).

ანტიკური ხანით დაინტერესებულ მკვლევართა ერთობლივი აღიარებით, ძვ. წ. II—I საუკუნეებში შეინიშნება ხსენებული ქალაქების

ნელო“, ცნობები საქართველოს შესახებ. — მასალები საქართველოსა და კავკასიის ისტორიისათვის. ნაკვ. 32, თბ., 1955, გვ. 39.

²²⁸ როგორც პტოლემეაიოსის „გეოგრაფიული სახელმძღვანელოს“ ქართული მასალების მონოგრაფიულად შემსწავლელი და მთარგმნელი პროფ. ნ. ლომოური ფიქრობს, ავტორის გეოცენტრისტული სისტემის მცდარობის და მის საფუძველზე გამოთვლილი გრადუსების უზუსტობის გამო, მისი კოორდინატები სრულიად გამოუყენებელი რჩება.

²²⁹ თ. ყ ა უ ხ ჩ ი შ ვ ი ლ ი. ბერძენი მწერლების ცნობები საქართველოს შესახებ. I. თბ., 1967, გვ. 48.

²³⁰ თ. ყ ა უ ხ ჩ ი შ ვ ი ლ ი. სტრაბონის გეოგრაფია. ცნობები საქართველოს შესახებ. თბ., 1957, გვ. 107—198.

დაქვეითება და ზოგიერთ შემთხვევაში, საქალაქო ცხოვრების მოსპობაც კი, რაც ყარგად ჩანს ქობულეთ-ფიჭვნარის ნაქალაქარისა²³¹ და გიენოსის მაგალითზე²³². ანალოგიური სურათი დასტურდება აღრეელი-ნისტური ხანის აყვავებულ სავაჭრო ცენტრ დიოსკურიაში, სადაც ძვ. წ. II—I სს. თითქმის ქრება ნამოსახლარის ნიშნები²³³. როგორც ფიქრობენ, ყოველივე ეს გამოწვეული იყო რომსა და პონტოს შორის წარმოებული ხანგრძლივი ომებით, ჩრდილოეთიდან ბარბაროსების ზშირი შემოსევებით და შიდა პროცესების შედეგად ერთიანი ცენტრალიზებული კოლხეთის სამეფოს დაცემით, რომლის დაშლის შემდეგ ჩნდებიან ლაზების, სანიგების, აფსილების, აბაზგების და სხვ. დამოუკიდებელი პოლიტიკური გაერთიანებები.

სურათი არსებითად იცვლება ახ. წ. I—II საუკუნეებში. კოლხეთის ზღვისპირეთში საქალაქო ცხოვრების გამოცოცხლება და აღმავლობა შეინიშნება ახალი წელთაღრიცხვის პირველ საუკუნეებში, სადაც, როგორც არქეოლოგიური მასალებით, ისე წერილობითი წყაროების მითითებით, ძველი ქალაქების ადგილას ახალი ციხე-ქალაქები ჩნდებიან: სებასტოპოლისი, ფასისი, აფსარი, მძღავრი დამცველი კედლით გამაგრებული პიტიუნტი და სხვ.²³⁴

რომის პოლიტიკური და სავაჭრო ინტერესებიდან გამომდინარე, საქალაქო ცხოვრების აღმავლობა და ახალი ქალაქთშენებლობა საერთოდ და კერძოდ კოლხეთში სამართლიანად არის დაკავშირებული რომის იმპერატორის ოქტავიანე ავგუსტუსის (ძვ. წ. 63 — ახ. წ. 14) და

²³¹ ა. კახიძე. მასალები აღმოსავლეთ შავიზღვისპირეთის ქალაქების ისტორიისათვის ანტიკურ ხანაში (ქობულეთ-ფიჭვნარი). თბ., 1965, ავტორეფერატი, გვ. 90—91; მისივე. საქართველოს ზღვისპირეთის ანტიკური ხანის ქალაქები. თბ., 1971, გვ. 150.

²³² ნ. მათიაშვილი. ოჩამჩირის ანტიკური სამოსახლოს კერამიკა. — ასპირანტთა და ახალგაზრდა მეცნიერ მუშაკთა სამეცნიერო კონფერენციის თეზისები. თბ., 1968, გვ. 28; С. Шамба, Гюэнос—I, Тбилиси., 1988.

²³³ М. Т р а п ш. Краткий отчёт о результатах археологических исследований в Сухуми в 1952 году.—Тр. Абхаз. Инст. яз., литер. и истории, т. XXVI, с. 227; М. П. И н а д з е. Причерноморские города древней Колхиды, Тбилиси, 1968, с. 134—139; ა. კალნაძე, სოხუმის მთის არქეოლოგიური ძეგლები. სოხუმი. 1953.

²³⁴ М. П. И н а д з е. указ. соч., с. 239; გ. ლორთქიფანიძე. ბიკინის ნაქალაქარი. თბ., 1991; ნ. ლომოური. კოლხეთის სანაპიროს ბერძნული კოლონიზაცია. თბ., 1962; მისივე. პონტოს სამეფოს ისტორიისათვის. თბ., 1979; ო. ლორთქიფანიძე, თ. მიქელაძე, დ. ხახუტაიშვილი. გონოს განძი. თბ., 1980.

მისი მემკვიდრეების (პოლემონი, პითადორა, პოლემონ II და სხვ.) სახელთან.

როგორც მკვლევრები ფიქრობენ, სწორედ ამით უნდა აიხსნას ის ფაქტი, რომ როგორც აღმოსავლეთ შავიზღვისპირეთში, ისე მცირე აზიაში არაერთ ქალაქს ეწოდება მისი სახელი და იხსენიება სებასტოპოლისის, სებასტეას, თუ სებასტეს (ფრიგია) ფორმით²³⁵.

ადრებიზანტიური და რომაული წერილობითი წყაროების მიხედვით, კოლხეთის შავიზღვისპირეთში, ჩვენი აზრით, ორი სებასტოპოლისის არსებობა დასტურდება: ერთი საყოველთაოდ ცნობილი დიოსკურია-სებასტოპოლისია თანამედროვე აფხაზეთის ტერიტორიაზე, მეორე კი რამდენადმე უფრო სამხრეთითაა საძიებელი²³⁶. სწორედ ეს უკანასკნელია ჩვენი დღევანდელი კვლევის საგანი.

აფხაზეთის სებასტოპოლისის ლოკალიზაცია თვით ძველი წერილობითი წყაროების ჩვენებით არის გაიოლებული და იგი, მეტ-ნაკლები სიზუსტით, ძველი დიოსკურიის, ანუ თანამედროვე სოხუმის ფარგლებში თავსდება. ამ ტერიტორიაზე ციხესიმაგრისა თუ ციხე-ქალაქი სებასტოპოლისის არსებობის შესახებ პირველ ცნობას გვაწვდის ახ. წ. I საუკუნის ავტორი პლინიუს სეკუნდა (ახ. წ. 24—79 წწ.), რომლის მიხედვით, ფასისიდან 100000 ნაბიჯზე მდებარეობს ციხესიმაგრე სებასტოპოლისი²³⁷. სხვა ადგილზე პლინიუსი კიდევ ერთხელ ახსენებს სებასტოპოლისის დიოსკურიასთან კავშირში და ამით, თითქოს, მიგვანიშნებს მათ იგივეობას. მისი თქმით, „დიოსკურიიდან შემდეგი ქალაქია ჰერაკლია. სებასტოპოლიდან დაშორებულია 70000 ნაბიჯით“²³⁸. პლინიუსისაგან განსხვავებით, არიანე პირდაპირ ამბობს, რომ მისი თანამედროვე სებასტოპოლისი, სადაც მას თვითონ მოუხდა ყოფნა, იგივე ძველი დიოსკურიაა. მისი თქმით, „სებასტოპოლისი ძველად დიოსკურიად იწოდებოდა. მილეტის ახალშენია“²³⁹. პერიპლუსის

²³⁵ A. H. Jones. The cities of the eastern Roman provinces. Oxford, 1937, c. 72—73, 77, 173—197. 398; М. И н а д з е. Причерноморские города древней Колхиды. Тбилиси, 1968, с 241—242.

²³⁶ ნ. ლომოური. კლავდიოს პტოლემეისი, „გეოგრაფიული სახელმძღვანელო“, ცნობები საქართველოს შესახებ, გვ. 42.

²³⁷ В. В. Л а т ы ш е в. Известия древних писателей о Скифии и Кавказа. ВДИ, 1949, с. 290.

²³⁸ ე. ლატიშევი. დასახ. ნაშრ. გვ. 291.

²³⁹ ფლავიუს არიანე. მოგზაურობა შავი ზღვის გარშემო. თარგმანი, გამოკლევა, კომენტარები და რუკა ნათელა კეკელიძისა. თბ., 1961, გვ. 41—42.

სხვა ადგილას იგი კიდევ ერთხელ იმეორებს, რომ ძველი დიოსკურია მისი თანამედროვე სებასტოპოლისია— „სულ ტრაპეზუნდიდან დიოსკურიაამდე, ახლანდელ სებასტოპოლისამდე. არის ორიათას ორას სამოცო სტადიონი“²¹⁰. აღნიშნულ საკითხზე ანალოგიური შეხედულებისაა დიდი გეოგრაფოსი პტოლემეოსი, რომელსაც თავისი ცნობილი „გეოგრაფიული სახელმძღვანელოს“ მეცხრე თავში, იქ, სადაც საუბარია კოლხეთის საზღვრებზე, ქალაქებსა და მდინარეებზე, პირდაპირ აქვს ნათქვამი — „დიოსკურია ანუ სებასტოპოლისი“-ო²⁴¹.

ერთი სიტყვით, დიოსკურია-სებასტოპოლისის იგივეობის საკითხი ერთხმად არის გაზიარებული რომაული ხანის მწერალთა მიერ, რაც, თითქოს, არქეოლოგიური გათხრების შედეგად მოპოვებული მასალითაც დასტურდება და იგი კამათის საგანს არ წარმოადგენს²⁴².

დიოსკურია-სებასტოპოლისიდან სამხრეთ-დასავლეთით, ზღვის სანაპირო ზოლში, ასეული კილომეტრის დაშორებით, მეორე სებასტოპოლისის არსებობის შესახებ ძალზე საყურადღებო ცნობა მოეპოვება პტოლემეოსის თავისი „გეოგრაფიული სახელმძღვანელოს“ მეხუთე წიგნის მეექვსე თავში. იქ, სადაც საუბარია კაბადოკიის პონტოს ჩრდილოეთ საზღვრებზე, მის ზღვისპირა მდინარეებსა და ქალაქებზე²⁴³. ამ ნაწილის სანაპიროს, ტრაპეზუნტს აქეთ, შემდეგი აღწერა: „ლობა აქვს: მდ. კისიუსის გასწვრივ — ოფიუსი, ნავსადგ. რიძუსი, ათენის ციხე, კორდილე, მორთულა, მდ. არხაბიოსის შესართავი, ქსილინე, მდ. კისას შესართავი, აფსაროსი, მდ. აფსაროსის შესართავი, მისი შენაკადი მდინარეები გლაუკოსი და ლიკოსი, მდ. აფსაროსის სათავე, მდ. ლიკოსის სათავე და სებასტოპოლისი“²⁴⁴; რომლის ჩრდილოეთით უკვე კოლხეთის საზღვარი იგულისხმება და მითითებულია

²⁴⁰ იქვე. გვ. 51.

²⁴¹ ბ. ლომოური. კლავდიოს პტოლემეოსი, „გეოგრაფიული სახელმძღვანელო“, ცნობები საქართველოს შესახებ. — მასალები საქართველოსა და კავკასიის ისტორიისათვის. ნაკვ. 32. თბ., 1955, გვ. 45.

²⁴² А. М. Апакидзе, О. Д. Лорткипаидзе. Новые материалы к археологии Диоскурии-Севастополиса.-Тр. Абхаз. ил. инст. яз., лит. и истории, XXXIII—XXXIV, Сухуми, 1963, с. 121—122; М. Трапш. Раскопки древнего Севастополиса в районе в Сухумской крепости в 1959 г., с. 241, 243; А. А. Шервашидзе, Л. Н. Соловьев. Исследования древнего Севастополиса, С. А. 1960, №3, с. 171; В. А. Леквинадзе. Оборонительные сооружения Севастополиса. С. А. 1966, №1, с. 203. 205.

²⁴³ ბ. ლომოური. დასახ. ნაშრ. გვ. 41, 42.

²⁴⁴ იქვე. გვ. 42.

ქალაქი და მდინარე ფასისი²⁴⁵. ფასისის ზემოთ, ე. ი. ჩრდილოეთით, კოლხეთის ზღვისპირა ზოლში პტოლემეაოსის ასახელებს მდ. ხარიუსტოსის შესართავს, ქალაქ აიას, ნეაპოლისს, სიგანეონს, მდ. კიანეოსის შესართავს, მდ. პიპოსის შესართავს და კოლხეთის ჩრდილოეთ საზღვარზე „დიოსკურია ანუ სებასტოპოლისია“²⁴⁶.

როგორც ვხედავთ, პტოლემეაოსის გეოგრაფიული სახელმძღვანელოს მიხედვით აღმოსავლეთ შაქიზღვისპირეთში არსებობდა ორი მოსახელე ქალაქი — ორი სებასტოპოლისი; ერთი, როგორც უკვე ითქვა, ისტორიული დიოსკურიის ტერიტორიაზე, მეორე კი უფრო სამხრეთით, სწლდაც მდ. აფსაროსსა და მდ. ფასისს შორის არის საგულებელი.

მეორე სებასტოპოლისის ლოკალიზაციის პირველი ცდა მოახდინა „გეოგრაფიული სახელმძღვანელოს“ ქართულად მთარგმნელმა და გამომცემელმა პროფ. ნ. ლომოურმა, რომელმაც პტოლემეაოსის კოორდინატების საფუძველზე შედგენილ ამერიკაეკასიის რუკაზე მეორე სებასტოპოლისი დაიტანა აფსაროსის ჩრდილოეთით, დაახლოებით დღევანდელი ბათუმის მიდამოებში²⁴⁷. სამწუხაროდ, მან იგივე არ გაიმეორა იმავე ნაშრომზე დართულ, პტოლემეაოსის ცნობების მიხედვით შედგენილ საქართველოს რუკაზე²⁴⁸, რაც „სახელმძღვანელოს“ ამ ადგილისადმი ავტორის ნიპილისტურ დამოკიდებულებაზე მიგვანიშნებს. პტოლემეაოსის ამ ცნობისადმი ნ. ლომოურის უნდობლობა კიდევ უფრო ნათლად ჩანს მისი ნაშრომის მეექვსე თავის მეჩვიდმეტე განმარტებაში, სადაც არქანჯელო ლამბერტთან და კიპერტთან კამათის შემდეგ დასძენს: „რას უნდა მივაწეროთ სებასტოპოლისის ამ ადგილას მოთავსება, გაურკვეველია“²⁴⁹.

უფრო მოგვიანებით კი, იგი ფასისის მახლობლად სებასტოპოლისის მოთავსებას პტოლემეაოსის შეცდომად თვლის და დასძენს: „მით უფრო, რომ სახელოვანი გეოგრაფოსის ნაშრომი შეცდომებისაგან დაზღვეული არ არისო“²⁵⁰.

245 ნ. ლომოური, დასახ. ნაშრ., გვ. 45,

246 იქვე.

247 იქვე, გვ. 62.

248 იქვე, გვ. 63.

249 იქვე, გვ. 52.

250 ნ. ლომოური. ძველი საქართველოს საუკრო გზების საკითხისათვის, ფ. ჩავახიშვილის სახელობის ისტორიის ინსტიტუტის შრომები, IV, ნაკვ. I, ტბ., 1958, გვ. 109.

დღეისათვის დაახლოებით ასეთია საყოველთაო დამოკიდებულება პტოლემეაიოსის ხსენებული ადგილის მიმართ, რის გამოც კოლხეთის ქალაქებით, გზებითა თუ სხვა ისტორიულ-გეოგრაფიული საკითხებით დაინტერესებული ყველა მკვლევარი დუმილით უვლის გვერდს მას. ბუნებრივია, ამიტომ ვერ ვხვდებით მსჯელობას მის შესახებ ისეთ მონოგრაფიულ ნაშრომშიც კი, როგორც არის ნ. ლომოურის „ეგრისის სამეფოს ისტორია“²⁵¹ და მ. ინაძის ფუნდამენტური გამოკვლევა „ძველი კოლხეთის შავიზღვისპირა ქალაქები“, რომლის ბოლო, საკმაოდ მოზრდილი ნაწილი, სწორედ, რომაული ხანის ქალაქების შესწავლისადმი მიძღვნილი²⁵². ანალოგიური განწყობილება ეტყობა პროფ. ვ. ლეჟინაძის ნაშრომებსაც, რომლის დიდი ნაწილი აღმოსავლეთ შავიზღვისპირეთის რომაული ქალაქებისა და „კასტელების“ შესწავლისადმი მიძღვნილი²⁵³. იგივე ითქმის ყველა სხვა მკვლევრის (ა. აფაქიძე, გ. მელიქიშვილი, ო. ლორთქიფანიძე, გ. ლორთქიფანიძე, დ. ხახუტიანიშვილი, ა. კახიძე და სხვ.) მიმართ²⁵⁴. ასეთ დამოკიდებულებას თავისი ობიექტური მიზეზები აქვს; ამ მიზეზთა შორის უპირველესი და მთავარი მაინც ის არის, რომ, როგორც ნ. ლომოური შენიშნავს, „აღმოსავლეთ შავიზღვისპირეთში, ჭოროხსა და რიონს შორის მოქცეულ ტერიტორიაზე, მეორე სებასტოპოლისის არსებობის მანიშნებელი პტოლემეაიოსისეული ცნობა „მარტოდ მდგომია“²⁵⁵ და იგი არ დასტურდება „გეოგრაფიული სახელმძღვანელოს“ შექმნის ხანასთან ახლო მდგომი პლინიუსის ცნობებით და არც მისი თანამედროვე არიანეს „პერიპლუსშია“ რაიმე მის შესახებ ნათქვამი

მეორე, არანაკლებ საგულისხმო წინაღობა ის არის, რომ აღმოსავლეთ შავიზღვისპირეთის იმ მონაკვეთში, სადაც პტოლემეაიოსის აღწერილობითი რიგისა და კოორდინატების მიხედვით სებასტოპოლისია მითითებული, არ მოიძებნება რაიმე ისეთი უსახელო და უმისამართო, რამდენადმე მნიშვნელოვანი, თანადროული ძეგლი, რომლის მისადა-

251 ნ. ლომოური. ეგრისის სამეფოს ისტორია (წარმოქმნიდან ახ. წ. V საუკუნის ბოლომდე). თბ., 1968.

252 М. П. И н а д з е. Указ. соч., с. 227—263.

253 В. А. Л е к в и н а д з е. По поводу римских крепостей в Восточной Причерноморье—САНГ. 1965, т X, с. 247; Он же. Поитийский лimes.—ВДН, 1969, №2, с. 75.

254 გ. ლორთქიფანიძე. ბიჭვინთის ნაქალაქარი. თბ., 1991.

255 ნ. ლომოური. ძველი საქართველოს სავაჭრო გზების საკითხისათვის. გვ. 109.

გება შეიძლებოდეს „გეოგრაფიული სახელმძღვანელოს“, ე. წ. მეორე სებასტოპოლისისადმი.

ჩვენი აზრით, ხსენებული ორივე წინააღმდეგობა არც ისე სერიოზული ხასიათისაა, რომ არ მოეველებოდეს და თუ უკანასკნელი ხანების ამ რიგის საკითხების კვლევა-ძიების მიღწევებს გავითვალისწინებთ და არსებული წერილობითი წყაროების ხელახალ რევიზიას ჩავატარებთ, ახალი სებასტოპოლისის კოლხეთის სამხრეთ სანაპიროზე დამკვიდრების იმედი არ უნდა გადავიწუროთ.

ბათუმსა და ფოთს შორის მოქცეული ზღვისპირა ზოლი კოლხეთის ვრცელი ქვეყანაა, სადაც, უკანასკნელი წლების განმავლობაში, მრავალი სხვადასხვა პერიოდისა და ხასიათის არქეოლოგიური ძეგლია მიკვლეული. მათ შორის, ჩვენთვის საინტერესო საკითხთან დაკავშირებით, განსაკუთრებით საყურადღებოა ციხისძირის ნაქალაქარი, რომელიც მთელ სანაპიროზე უნიკალური პუნქტია თავისი რელიეფითა და სტრატეგიული მონაცემებით (იხ. რუკა).

ქობულეთ-ციხისძირის მიკრორაიონი კოლხეთის ქვეყნის საყურადღებო უბანია. აქ, კონკრეტულ წერტილში, თავს იყრის გეოგრაფიული სამყაროს სამი მნიშვნელოვანი ტოპოგრაფიული ერთეული: ზღვა, დაბლობი და ბორცვოვანი ზოლი. აქ, მდინარეთა ხეობებით დასერილი, სამეურნეო თვალსაზრისით ნაყოფიერი, დაბალი ბორცვების ჯაჭვი, რომელიც აღმოსავლეთიდან საზღვრავს დაბლობის ვიწრო ზოლს, ციხისძირთან უშუალოდ ადგება ზღვის სანაპიროს და ბობოყვათის უბანზე არსებული ვიწრო საგზაო გასასვლელის (*defile*) საიმედოდ ჩამკეტ ბურჯად იქცევა.

ციხისძირის ისტორიული მნიშვნელობის კვლევის საქმეში დიდი წვლილი შეიტანა აკად. ს. ჯანაშიამ, როცა იგი პეტრას ლოკალიზაციის საკითხით იყო დაინტერესებული²⁵⁶. მან ბერძნულ-რომაული, ქართულ-სომხური წერილობითი წყაროების შესწავლის საფუძველზე, არქეოლოგიური მასალის მოშველიებით და ფოლკლორული მასალის გათვალისწინებით მეცნიერულად დაასაბუთა ციხისძირის, როგორც პოლიტიკური, ეკონომიკური, კულტურული და სამხედრო-სტრატეგიული ცენტრის მნიშვნელობა²⁵⁷.

256 ს. ჯანაშია. ფოთალური რევოლუცია საქართველოში. — შრომები. I. თბ., 1949, გვ. 24—49.

257 იქვე.

ციხისძირის მრავალმხრივი მნიშვნელობა საუცხოოდ არის დახასიათებული იმერეთის სამეფოს სარდალ-სახლთუხუცესის ზურაბ წერეთლის წერილში, რომელიც მას (1784 წ.) გადაუცია პოტიომკინისათვის. იგი ურჩევს კინტრიშ-ციხისძირის ტერიტორიაზე ციხე-სიმაგრის აგებას:

„აქ აშენებული ციხე-სიმაგრის სარგებლობა შეუდარებელი იქნება, რადგანაც იმერეთისა, აფხაზეთისა, სამეგრელოსა და გურიისათვის საესებით შეასრულებს გაუვალი ზღუდის როლს და ყველა ამ ქვეყანას მტკიცედ დაუმორჩილებს რუსეთს. ეს ადგილი ადვილად და მალე დასახლდება ანატოლიელი ბერძნებით, რადგან მას უხვად აქვს სასმელი წყალი და მრავალრიცხოვანი ლითონები, აბრეშუმი, ბამბა, ცვილი, გემთსაშენი ხე-ტყე და სხვ. აქ უკვე იყო ოდესღაც ქალაქი და არც ისე დიდი ხანია, რომ აქვე არსებობდა სოფელი და ვაჭრობა წარმოებდა. ამ ადგილის მდგომარეობა იმდენად ხელსაყრელია, რომ სამს თუ ოთხ წელიწადში ხარკებს გაასწორებს, მთელ იმერეთში ამაზე უფრო სახეირო ადგილი არ არის. ყირიმიდან, თუ კარგი ამინდია, ხომალდები აქ ორ დღეში მოდიან. ამ ადგილს იმერლები წინათაც აქევედნენ ყურადღებას, და მამაჩემს, სარდალ ქაიხოსრო წერეთელს, ჯერ კიდევ სოლომონ მეფის სიცოცხლეში უნდოდა ამ განზრახვის განხორციელება. თუ ეს სიმაგრე აგებული იქნა, საქართველო მაშინ თავს დააღწევს ახალციხის თავდასხმებს, რადგანაც ციხისძირი ახალციხის ზურგში იმყოფება. თუ ციხისძირში ციხე-ქალაქი დაარსდება, თურქები იძულებული შეიქმნებიან უომრად დასტოვონ ფოთის ციხე, აგრეთვე, ბათომი და ჩაქვი“²⁵⁸.

უკეთესი დასაბუთება ციხისძირის ადგილის ღირსებებისა ძნელი წარმოსადგენია. ეკონომიკურ; პოლიტიკურ და სტრატეგიულ მონაცემებს თუ იმასაც დაუმატებთ, რომ იგი ყველაზე ნაკლებ მალარიანი პუნქტია სანაპიროზე, ე. ი. ჰავის ღირსებებსაც გავითვალისწინებთ, გასაგები გახდება ადამიანის ინტერესი ამ ქვეყნისადმი, რომლის საცხოვრისად შერჩევის საწყისები- ადრეზრინჯაოს ხანიდან არის დადასტურებული (ისპანის, ჩაქვის ნამრსახლარები).²⁵⁹

²⁵⁸ Г. Бутков. Материялы для новой истории Кавказа. II. 1939; ს. 40-41.

²⁵⁹ ა. ი. შიკოლი. მასალები ისპანის ძველი სამოსახლოდან, — საეკლერეოლოგიური კვლევა-ძიება. 1972 წელს. თბ., 1973, გვ. 112-114; მისივე. სამხრეთ-დასავლეთ საქართველოს არქეოლოგიური ექსპედიციის 1972 წლის მუშაობის შედეგები. — სამხრეთ-დასავლეთ საქართველოს ძეგლები. IV. თბ., 1974, გვ.

თვის ციხისძირში, მის ბორცვებზე და უშუალოდ მომიჯნავე დაბლობებზე ინტენსიური ცხოვრება გვიანბრინჯაო-ადრეკინის ხანიდან რძებს სათავეს და უწყვეტლივ ვითარდება პროგრესული ხაზით. გვიანში შუა საუკუნეების ჩათვლით²⁶⁰.

არქეოლოგიური მასალის მიხედვით, ციხისძირი განსაკუთრებით დაწინაურებული ჩანს რომაულ და ადრებიზანტიურ ხანაში, როცა იგი პოლიტიკური, ეკონომიკური და სტრატეგიული ცენტრის ნიშნებს ატარებდა²⁶¹.

ციხისძირის ხელსაყრელი სტრატეგიული მდებარეობა და აქვე ადრებიზანტიური ხანის მონუმენტური ციხის არსებობა, რომელიც სიმდვირედ დარაჯობს როგორც სახმელეთო, ისე საზღვაო მაგისტრალს, გახდა იმის საფუძველი, რომ იგი გაიგივებული იქნა იუსტინიანე კეის-

154—170; დ. ხ ა ხ უ ტ ა ი შ ე ი ლ ი. მასალები რკინის წარმოების ადრეული საფეხურის ისტორიისათვის ჩრდილო კოლხეთში. — სამხრეთ-დასავლეთ საქართველოს ძეგლები. IX. თბ., 1980, გვ. 28—29,

260 ა. ი ნ ა ი შ ე ი ლ ი. მასალები ციხისძირის გორა-ნამოსახლარიდან. — საქ. სსრ მეცნ. აკად. XII სამეცნიერო სესია. თბ., 1973; მისივე. პეტრა-ციხისძირის 1962—1965 წლების არქეოლოგიური გათხრების შედეგები. — სამხრეთ-დასავლეთ საქართველოს არქეოლოგიური ექსპედიციის 1972 წლის მუშაობის შედეგები (შოკლე ანგარიში) — სამხრეთ-დასავლეთ საქართველოს ძეგლები. IV. თბ., 1974, გვ. 154—170; დ. ხ ა ხ უ ტ ა ი შ ე ი ლ ი. რკინის წარმოების ძველკოლხური ცენტრის არქეოლოგიური გათხრები ჩოლოქ-ჩიხომურის ხეობაში 1970 წელს. — სამხრეთ-დასავლეთ საქართველოს ძეგლები. V. თბ., 1975, გვ. 79—92; ა. კ ა ხ ი ძ ე. საქართველოს შავიზღვისპირა ქალაქები ანტიკურ ხანაში (ქობულეთი-ფიქენარი). თბ., 1971; ა. კ ა ხ ი ძ ე, ნ. ვ ა შ ა კ ი ძ ე. ფიქენარის ელენისტურა ხანის სამაროვანზე 1974 წელს წარმოებული არქეოლოგიური გათხრების ძირითადი შედეგები. — სამხრეთ-დასავლეთ საქართველოს ძეგლები. VI. თბ., 1977, გვ. 25—51; თ. შ ი ქ ე ლ ა ძ ე. ძიებანი კოლხეთისა და სამხრეთ-აღმოსავლეთ შავიზღვისპირეთის უძველესი მოსახლობის ისტორიიდან. თბ., 1974; Т. Микеладзе. Д. Хахутианшвили. Древнеколхидское поселение Намчедурн. Тбилиси, 1985.

261 ნ. ხო შ ტ ა რ ი ა. ციხისძირი. 1962; ნ. ი ნ ა ი შ ე ი ლ ი. სამხრეთ-დასავლეთ საქართველოს ძველი ქალაქები (ციხისძირი). თბ., 1990 (ხელნაწერი); მისივე. Петра-Цихидзирн? Тбилиси, ს. ჭ ა ნ ა შ ი ა. ფეოდალური რევოლუცია საქართველოში. — შრომები, I. თბ., 1949, გვ. 24—49; ნ. ბ ე რ ძ ე ნ ი შ ე ი ლ ი. ს. ჭ ა ნ ა შ ი ა. საქართველო ადრინდელი ფეოდალიზაციის გზაზე“ (რეცენზია). — მიმოხილველი, III. თბ., 1953, გვ. 291; ა. ი ნ ა ი შ ე ი ლ ი. ციხე-ქალაქი პეტრას ნავსადგურის საკიბისათვის. — სამხრეთ-დასავლეთ საქართველოს ძეგლები. II. თბ., 1971, გვ. 74—88; მისივე. პეტრას საეპისკოპოსო კათედრის საკითხისათვის ციხისძირის გათხრების შედეგების მიხედვით. — სამხ.-დასავ. საქართველოს ძეგლები. II. 1971, გვ. 91—107,

რის მიერ ლაზიკისა და ბიზანტიის საზღვარზე აგებულ პეტრას ციხე-ქალაქთან, რომელმაც მნიშვნელოვანი როლი შეასრულა ბიზანტიასა და სასანიდური ირანის (VI საუკ.) სამხედრო-პოლიტიკურ ურთიერთობაში და ლაზიკის კულტურულ-ეკონომიკურ და რელიგიურ ცხოვრებაში²⁶².

როგორც ზემოთ დავინახეთ, მასალის გადასინჯვამ და ახლებურად გააზრებამ მიგვიყვანა იმ დასკვნამდე, რომ პეტრა ციხისძირში კი არ არის საძიებელი, არამედ ხოფაში, რომელიც ამჟამად თურქეთის ტერიტორიაზე მდებარეობს და მისი უკიდურესი ჩრდილოეთი ნავსადგურია:

ხოფა-ხოფათი კიდეც უფრო შეეფერება პროკოპი კესარიელისეულ პეტრაციხის აღწერილობას და თავისი მკაცრი, მკვეთრად გამოკვეთილი კლდოვანი რელიეფით ამართლებს თვით სახელწოდება „პეტრას“, რაც ბერძნულად კლდეს ნიშნავს. იგი გეოგრაფიულადაც და პოლიტიკურადაც ისტორიული საზღვარია საქართველოსა და ბიზანტიას შორის. აქ არის ყველაზე უფრო მნიშვნელოვანი გზათა შესაყარი და იქვეა დამოწმებული ტოპონიმი „პეტრო ღალი“²⁶³ ანუ „კლდის ღელე“. რამდენადაც პეტრას მდებარეობა ყოველთვის ფასისთან მიმართებაში განიხილება, ისიც ირკვევა, რომ პროკოპი კესარიელის მიერ აღწერილი ბიზანტია-ირანს შორის წარმოებული ომების პირველ ეტაპზე ნახსენები მდ. ფასისი რიონ-ფასისი კი არ უნდა იყოს, არამედ ფასის-ქოროხია²⁶⁴. ასეთი კორექტივის შემდეგ, სავსებით გასაგები გახდა პროკოპი კესარიელის მიერ ლაზიკის აღწერისას მოცემული საზღვრების, მისი ქალაქების, დასახლებათა ინტენსივობისა თუ მეზობელ ქვეყნებთან დაკავშირებულ საკითხებში, მთელი რიგი წინააღმდეგობრივი მომენტების გაჩენის გზები, რომელიც ყოველთვის პროკოპი კესარიელის ან მისი ინფორმატორის შეცდომად იყო მიჩნეული²⁶⁵. პეტრას ახლე-

262 ს. ქანაშია. დასახ. ნაშრ. გვ. 1—127.

263 ი. სიხარულიძე. ქანეთი (ლაზეთი). — საისტორიო გეოგრაფიის მასალები. I. ბათუმი, 1977, გვ. 60.

264 გ. გრიგოლია. ძველი კოლხეთის საქალაქო ცენტრების (პეტრა) ლოკალიზაციისათვის. — საქართველოს ისტორიული გეოგრაფიის კრებული. VII. თბ., 1989, გვ. 37—80.

265 გეორგიკა. II. ბიზანტიელი მწერლების ცნობები საქართველოს შესახებ. ტექსტი ქართული თარგმანითურთ გამოსცა და განმარტებები დაურთო ს. ყაუხჩიშვილმა. თბ., 1965, გვ. 97; ნ. ბერძენიშვილი. საქართველოს ისტორიის საკითხები. VIII. 1975, გვ. 446; მისივე. ლაზიკის ისტორიული გეოგრაფიისათვის.

ბური ლოკალიზაციის საფუძველზე ნათელი გახდა, რომ პროკოპი და მისი წყარო კი არ ცდებოდა, არამედ, უმეტეს შემთხვევაში, წყაროსადმი ჩვენი არასწორი მიდგომით იყო ყოველივე ეს განპირობებული.

ჩვენ მიერ ჩატარებული კვლევის საფუძველზე, რაზეც ნაშრომის წინა თავშია საუბარი, პეტრას ლოკალიზაცია მოხდა ხოფასთან, რის გამოც ისტორიული მისამართი შეიცვალა ციხისძირმა. უფრო სწორად, განთავისუფლდა არასწორი დატვირთვისაგან და, ვფიქრობთ, აპრიორულად სავსებით შეიძლება მისი მისადაგება პტოლემეოსის მეორე (აფსაროს-ფასის შუა) სებასტოპოლისისადმი. თუ შეიძლება ასე ითქვას, ციხისძირი არის პირველხარისხოვანი არქეოლოგიური ძეგლი, სადაც თითქმის ყველა პერიოდი წარმოდგენილი, ბრინჯაოს ხანიდან გვიანი შუასაუკუნეების ჩათვლით.

ციხისძირის მრავალფეროვანი არქეოლოგიური ძეგლებიდან სებასტოპოლისის ლოკალიზაციის საკითხთან დაკავშირებით განსაკუთრებით საყურადღებო ჩანს ციხისძირში 1903 თუ 1901 წ. შემთხვევით აღმოჩენილი განძი, რომელიც 1907—1908 წწ. ერმიტაჟში მოხვედრილა და ამჟამად იქ არის დაცული²⁶⁶.

განძში ამჟამად 21 დასახელების ნივთია დაცული, მაგრამ, როგორც ჩანს, უფრო აღრე, თუნდაც ერმიტაჟში მოხვედრის დროიდან მაინც, მისი შემადგენლობა რაოდენობრივად უფრო მრავალრიცხოვანი უნდა ყოფილიყო. ამას მოწმობს თუნდაც ის ფაქტი, რომ, სამუზეუმო ჩანაწერების მიხედვით, თავდაპირველად განძის კუთვნილება ყოფილა, აგრეთვე, 35 ც. ვერცხლისა და სპილენძის მონეტა, 12 მძივი და სხვ., რომელიც დღეისათვის სადაც არის გაბნეული და მათი მოძიება ვერ ხერხდება²⁶⁷.

ამჟამად განძის კოლექციაში შედის: ოქროს შესაბნევი „აგრაფი“, მასში ჩასმული ბროლით, რომელზედაც ამოკვეთილია მამაკაცის გამოსახულება მეგრადამდე, ოქროს ძეწკვი, ვერცხლის ლანგარი, ცენტრში გამოსახული ღმერთქალის ფიგურით, რომელსაც მარცხენა ხელში ზევით აწეული სიუხვის ყანწი უპყრია, მარჯვენაში კი საქვე, ორი ოქ-

მასალები: თბ., 1968, გვ. 22—23; დ. მუსხელიშვილი. საქართველოს ისტორიული გეოგრაფიის ძირითადი საკითხები. I. თბ., 1977, გვ. 102.

²⁶⁶ Б. Б. Фармаковский. Случайные находки и приобретения. Кутаисская губерния., ОАК. 1907, с. 117.

²⁶⁷ Б. ხოშტარია. ციხისძირი. თბ., 1962, გვ. 7—8; ნ. ინაიშვილი. ციხისძირის განძი. — სამხრეთ-დასავლეთ საქართველოს ძეგლები. XVII. თბ., 1987, გვ. 144.

როს ბეჭედი გამოსახულებიანი ქვებით, ოქროს ფირფიტა, სამი ოქროს: საყურე, ონიქსი ოქროს ჩარჩოში, ოქროს გულსაკიდი, მსხვილი მძივის მსგავსი ოქროს საგანი, მასში ჩასმული წითელი ქვებით, ოქროს ფირფიტა, ადამიანის თავის გამოსახულებით, ვერცხლის დიდი ლანგრის ნატეხი, რელიეფური ორნამენტით შემკული და სხვ.

განძის პირველი პუბლიკაციები ეკუთვნის ბ. ფარმაკოვსკის, რომელმაც იგი ახ. წ. II საუკ. დაათარილა, თუმცა მაშინ ძეგლი „ბათუმის განძის“ სახელით იყო ცნობილი²⁶⁸.

ამ პუბლიკაციის შემდეგ განძში შემავალ ცალკეულ ნივთებსა თუ ნივთების ჯგუფს სპეციალური ნაშრომები მიეძღვნა როგორც რუსი²⁶⁹, ისე უცხოელი²⁷⁰ და ქართველი სპეციალისტების მიერ და მათი წარმომავლობის, დანიშნულებისა თუ კუთვნილების შესახებ არაერთი საყურადღებო მოსაზრება გამოითქვა²⁷¹.

უფრო მოგვიანებით, აღმოჩენიდან დაახლოებით 50 წლის შემდეგ, განძი მონოგრაფიულად შეისწავლა პირველმა ქართველმა არქეოლოგმა ქალმა ნინო ხოშტარიაშვილმა, რომელმაც დაადგინა განძის წარმომავლობა ციხისძირიდან და გამოთქვა მოსაზრება, რომ „...განძი ციხისძირიდან, სავსებით შესაძლებელია, იყოს არა განძი, არამედ სამარხის ინვენტარი, რომელიც შეიცავს უფლების ნიშანსაც (აგრაფი). და აგრეთვე ბეჭედ-საბეჭდავს პორტრეტული გემით, დაკრძალულის: პირად სამკაულს, მეორე გემიან ბეჭედს, ოქროს სატყეულსა და სხვა სამკაულს; იარაღს, აქ წარმოდგენილი ხმლის ბუნეის სახით და ვერცხლის შოკროვილ ქურქელს — ლანგრებს და სასმისებს“²⁷².

²⁶⁸ Б. Фармаковский. Случайные находки и приобретения. Кутаисская губерния.—ОАК. за 1907 г. СПб., 1910, с. 11—118.

²⁶⁹ М. И. Максимова. Античные резные камни эрмитажа.—Путеводитель по выставке. Госуд. эрмитаж. Лening., 1926, с. 100.

²⁷⁰ Ph. Askergran. Sasanian Jewelry. A Survey of Persian Art. v. I, London-New-York, 1938, p. 773.

²⁷¹ ე. სიქონაძე. ახალი ცნობები ციხისძირი-პეტრას ისტორიისათვის (ადგილის ლოკალიზაციის საკითხი). — აჭარის ასსრ კულტურის სამინისტრო, აჭარის ასსრ სახელმწიფო მუზეუმის შრომები, ტ. II, გვ. 50—52; მარგ. ლორთქიფანიძე. ძველი საქართველოს გლიტიკური ძეგლების კორპუსი, I, ტბ., 1969, გვ. 123—125, 133—138; В. Лекивицадзе. Богатая погребенная конца V в. из Уреки.—СА, 1975, №4, с. 197.

²⁷² ნ. ხოშტარია. დასახ. ნაშრ. გვ. 26.

თითქმის ყველა მკვლევარი, ვინც კი ციხისძირის განძის შესწავ-
ლას მოჰქიდა ხელი, უმთავრესად, ოქროს აგრაფით დანტერესდა და
ძვეგლის თარიღის გარკვევისას, სწორედ, ამ ნივთის ანალიზის შედეგე-
ბი გამოიყენა.

პირველ რიგში უნდა დავასახელოთ ბ. ფარმაკოვსკი, რომელმაც,
ერმიტაჟში კოლექციის შემოსვლისთანავე, აგრაფში ჩასმულ ქვაზე
გამოსახული მამაკაცის პორტრეტში რომის იმპერატორი ლუციუს ვე-
რუსი (ახ. წ. 161—169) ამოიცნო და მასალაც შესაბამისად დაათარი-
ლა²⁷³.

ხსენებული მოსაზრება სავსებით გაიზიარა გლიბტიკის ისეთმა
ცნობილმა სპეციალისტმა, როგორც იყო მ. მაქსიმოვა. მისი აზრით,
„მძის ბროლი, ლუციუს ვერუსის გულმკერდი პირდაპირ. გამოსა-
ხლება ამოჭრილია ქვის უკანა მხარეზე სიღრმეში და შემდეგ მო-
თქროვილია. მოთქრულობა შემონახულია მხოლოდ ცალკე ადგილებ-
ში. ქვა შემდეგ ჩასმულია ოქროს გულსაკიდში (ანტიკური); ძალზე
იშვიათი ტექნიკაა ძველი დროისა...“²⁷⁴.

ხსენებულ ნივთზე ასეთივე შეხედულებისაა ა. ამირანაშვილი²⁷⁵,
თ. ნევეროვი²⁷⁶, ნ. ინაიშვილი²⁷⁷ და ყველა სხვა მკვლევარი, ვინც კი
აგრაფს შეჰხებია. რამდენადმე განსხვავებული აზრი გააჩნია ქართველ
გლიბტიკოს მარგო ლორთქიფანიძეს, რომელიც ინტალიოზე ამო-
კვეთილი პორტრეტის ლუციუს ვერუსად განსაზღვრას საეჭვოდ მი-
იჩნევს²⁷⁸.

მკვლევართა მიერ აგრაფისადმი სავანგებო ყურადღების გამახვი-
ლება სავსებით გასაგებია, რადგან მას, როგორც ძვირფასად ნაკეთებ
ხელოვნების ნიმუშს, განძის დამაფარიდებელი მნიშვნელობაც ენიჭე-
ბა, რაც ემყარება გემაზე ამოკვეთილ ლუციუს ვერუსის პორტრეტის
თარიღს.

273 ბ. ფარმაკოვსკი. დასახ. ნაშრ. გვ. 117.

274 მ. მაქსიმოვა. დასახ. ნაშრ. გვ. 91.

275 ნ. ინაიშვილი. დასახ. ნაშრ. გვ. 91.

276 О. Я. Неверов. Античные инталии в собрании Эрмитажа. Л., 1977; №137, с. 231.

277 ნ. ინაიშვილი. ციხისძირის განძი. — სამხრეთ-დასავლეთ საქართველოს
ძეგლები. XVI. თბ., 1987, გვ. 123—128.

278 მ. მარგო ლორთქიფანიძე. ძველი საქართველოს გლიბტიკური ძეგლე-
ბის კორპუსი I. თბ. 1969, გვ. 123—125.

უკანასკნელ ხანებში განძში შემავალი ყველა ნივთი, როგორც ცალკე, ისე მთლიანობაში, მონოგრაფიულად შეისწავლა ნ. ინაიშვილმა და მიუხედავად იმისა, რომ მთელი კომპლექსი ახ. წ. III საუკუნით დაათარიდა, თვით აგრადი მაინც II საუკუნის ნაკეთობად მიიჩნია²⁷⁹.

ოქროს აგრადთან ერთად, ნ. ხოშტარიამ განსაკუთრებული ყურადღება დაუთმო განძში შემავალ ოქროს ბეჭედ-საბეჭდავს, რომლის იასპის ქვაზე უწვერულევაშო ახალგაზრდის თავია გამოსახული (ინტალიო) პროფილში, ახალგაზრდას წამოსხმული აქვს მოსასხამი, რომლის მარჯვენა მხარეზე დამაგრებულია შესაბნევი — აგრადი²⁸⁰.

ნ. ხოშტარიას აზრით, შესაძლოა ბეჭედ-საბეჭდავზე გამოსახული ახალგაზრდა იყოს ამ მხარის „მეფე“ ან მმართველი და სწორედ მის სამარხეულ ინვენტარს შეადგენდა განძში შემავალი ნივთები. „აგრადი ლუციუს ვერუსის პორტრეტით, სწორედ, მისი მეფობის დროს უნდა ეკუთვნოდეს და თანაც მისი აღმოსავლეთში ყოფნის დროს (162—168 წწ.), ვინაიდან საეპკოა, რომ უფრო გვიან გაჩენილიყო ლუციუს ვერუსის პორტრეტი, ამასთან, მშვენიერ ჩარჩოში მოთავსებული. თვით ამ აგრადის სიმდიდრე, მისი შესრულების მაღალი ოსტატობა, არ შეიძლება არ მიგვითითებდეს იმ პირის მაღალ მდგომარეობაზე, რომელიც აგრადს ატარებდა“²⁸¹.

მართალია, ნ. ხოშტარიას ეს ვარაუდი ძალზე ჰიპოთეტურია, მაგრამ გარკვეული საფუძველი მაინც გააჩნია. თუნდაც მარტო ამ მონაპოვრითაც ჩანს, რომ ციხისძირი, უთუოდ, ამ რეგიონის ცენტრია, სადაც სავსებით შესაძლებელია ძვ. წ. პირველ საუკუნეებში ერისთავის მსგავსი მხარის მმართველიც მჯდარიყო.

ციხისძირიდან ჩრდილოეთით (25 კმ), ოზურგეთის რაიონის ადგილ ურეკში, ზღვისპირა ქეიშიან ზოლში 1942, 1948 წლებში აღმოჩენილი იქნა ახ. წ. პირველი საუკუნეების მდიდრული და რიგითი სამარხები და ნამოსახლარის ნაშთები, რომელთა ერთი ნაწილი შეისწავლა და გამოაქვეყნა აკად. ა. აფაქიძემ²⁸².

ურეკის მონაპოვარში შედის: ოქროს მასიური თვალბუდიანი ბეჭედი, ორი ბეჭედი, ორი სამაჯური (თვლებით შემკული), ოქროს საავგაროზე, ოქროს დაფანჯრულკედლებიანი საკიდები — 4. ც., ოქროს

279 ნ. ინაიშვილი. ციხისძირის განძი. გვ. 123—128.

280 ნ. ხოშტარია. დასახ. ნაშრ. გვ. 12, 26, ტაბ. VI, 1, 2, 3.

281 ნ. ხოშტარია. დასახ. ნაშრ. გვ. 28.

282 ა. აფაქიძე. გვიანანტიკური ხანის არქეოლოგიური ძეგლები ურეკიდან.— საქართველოს სახ. მეზუემის მოამბე. ტ. XIV. 1947, გვ. 89—125. ტაბ. XI, XII.

მუელსაბამი, ოქროს წყვილი საყურე, ოქროს თვალბუდიანი და 16 მძივ-საკიდიანი აგრაფი, ოქროს ბალთები — 50 ც., ორი ოქროს მონეტა (ერთი კლავდიუს ტაციტუსისა (268—270 წ.), ვერცხლის ბეჭედი, ვერცხლის ფიბულისა და ილარის ნატეხები, ვერცხლის სარტყელი, ვერცხლის ხუთი მონეტა (ოთხი ადრიანე კეისრის (117—138 წწ.) სახელზეა მოჭრილი), ქარვის, გიშრის, პასტის ინკრუსტირებული მძივები და სხვ.

მასალის ანალიზისა და განსაკუთრებით, მონეტების გათვალისწინებით, ავტორი ძეგლს (სამარხს) ახ. წ. III ს. ბოლოსა და VI ს. დასაწყისი ხანით ათარიღებს²⁸³.

ურეკის, ქობულეთ-ფიქვნარისა და ციხისძირის მდიდრული ძეგლები აშკარა მოწმობაა იმისა, რომ ახალი წელთაღრიცხვის პირველ საუკუნეებში შავი ზღვის სანაპიროს აღნიშნული მონაკვეთი წარმოადგენდა მნიშვნელოვან ეკონომიკურ თუ პოლიტიკურ რეგიონს მაღალგანვითარებული ცხოვრებითა თუ კულტურით²⁸⁴.

განხილულის გარდა, ციხისძირის ისტორიულ მნიშვნელობაზე აშკარად მეტყველებს მოსახლეობის მიერ აქ ოქროს, ვერცხლის, სპილენძის ცალკეული ნივთებისა და მონეტების აღმოჩენების ზმირი შემთხვევები. ერთ-ერთი ასეთი სპილენძის მონეტა, ანტონინე პიუსის (ახ. წ. II ს.) სახელით მოჭრილი, ინახება ბათუმის სახ. მუზეუმში²⁸⁵.

საინტერესო შემთხვევითი აღმოჩენების ჩვენს განეკუთვნება ქობულეთში ნაპოვნი, ახ. წ. პირველი საუკუნეების ოქროს მასიური თვალედი ბეჭედი, რომელიც ფორმით ძალიან უახლოვდება ციხისძირის განძში შემავალ ოქროს ბეჭედებს²⁸⁶.

შემთხვევითი აღმოჩენებიდან ციხისძირის რაობის გარკვევისათვის განსაკუთრებული მნიშვნელობა გააჩნია აკროპოლისის ბორცვის ჩრდილო-აღმოსავლეთ კალთაზე 1924 წ. ნაპოვნი, მუქი წითელი ფერის აგურს, რომლის მარცხენა ზედა კუთხეში შტამპით დატანილია ლათინური წარწერა. პირველი ცნობა აღნიშნული აგურის შესახებ გამოაქვეყნა ს. ჯანაშიამ, რომელმაც აგურის დამლაზე ამოტიფრული წარწერა წაიკითხა როგორც VEXEA და იგი საქარხნო მარკად მიიჩნია²⁸⁷.

283 ა. აფაქიძე. დასახ. ნაშრ. გვ. 110—111.

284 ნ. ხოშტარია. დასახ. ნაშრ. გვ. 32.

285 ნ. ხოშტარია. დასახ. ნაშრ. გვ. 28.

286 ნ. ხოშტარია. დასახ. ნაშრ. გვ. 32, ტაბ. XII, 2.

287 ს. ჯანაშია. დასახ. ნაშრ. გვ. 43; ნ. ხოშტარია. დასახ. ნაშრ. გვ. 29.

ნ. ხოშტარიამ გაიზიარა ს. ჯანაშიას მოსაზრება, რომ „წარწერაში ლაპარაკია ვექსილატიანზე და მისი პირველი სამი ასო წარმოადგენს ამ სიტყვის შემოკლებას, როგორც ეს არც ისე იშვიათად ხდება. რას უნდა ნიშნავდეს წარწერაში უქანასკნელი ორი ასო (EA), ჯერჯერობით მნელია თქმა, შესაძლებელია, ისინი ორი სიტყვის პირველ ასოებს ან ერთი სიტყვის დასაწყისს წარმოადგენენ“²⁸⁸.

ამ აღმოჩენის საფუძველზე ნ. ხოშტარიამ გამოთქვა მოსაზრება, რომ ახ. წ. პირველ საუკუნეებში ციხისძირის გვიანდელი (ახ. წ. VI ს.) ციხის ტერიტორიაზე არსებობდა ციხე, „სადაც იდგა რომაული გარნიზონი, აგური შეიძლება ეკუთვნოდა ციხის ნაწილს, რომელიც გამაგრებული იყო აღნიშნული გარნიზონის მიერ ამ მიზნისათვის დამზადებული შტამპიანი აგურით“²⁸⁹, და იქვე დასძენს, რომ „სავსებით შესაძლებელია აგრეთვე, რომ იქ ყოფილიყო მმართველის რეზიდენცია“²⁹⁰.

► რომაული გარნიზონების აღმოსავლეთ შავიზღვისპირეთში ყოფნისა და მათ მიერ ჩატარებულ სასიმაგრო მშენებლობებთან კავშირში, ციხისძირის დამლიანი აგური საგანგებოდ შეისწავლა ვ. ლექვიანიძემ, რომელმაც, ს. ჯანაშიასა და ნ. ხოშტარიასაგან განსხვავებით, წარწერა შეასწორა და წაიკითხა როგორც VEXFA. ვ. ლექვიანიძის აზრით, შავიზღვისპირეთის რომაელთა სამხედრო რაზმები წარმოადგენდნენ კაბადოკიის პროვინციაში განლაგებული ორი ლეგიონის ნაწილს, რომელთაგან ერთი იყო XII ფულმინატიდან, რომელიც იდგა მელრტენაში, ხოლო მეორე XV აპოლინარისიდან, რომლის მუდმივი სადგომი ბანაკი იყო სატალაში. ამიტომ ციხისძირის აგურის წარწერის ბოლო ორი ასო — FA — უნდა აღნიშნავდეს ამ ლეგიონების სახელების პირველ ასოებს და ასე უნდა იკითხებოდეს: (legionum XII) F(ulminatae et XV) A (pollinaris)²⁹¹.

წარწერის ამგვარი წაიკითხვა შემდგომში გაზიარებული იქნა ყველა მკვლევარის მიერ, თუ მხედველობაში არ მივიღებთ ჰაეაის უნივერსიტეტის პროფ. მ. შპაიდელს, რომლის მიხედვით ციხისძირის აგური

²⁸⁸ ნ. ხოშტარია. ციხისძირი. გვ. 30.

²⁸⁹ იქვე.

²⁹⁰ იქვე, გვ. 31.

²⁹¹ В. А. Леквианидзе. Римский восток со штампом из Цихидзири. — Собр. АН Груз. ССР. XLV, 3, 1967, с. 797—800; Эгоже. Понтийский лимес. — ВДИ, №2, 1969, с. 87.

დაშნადებული უნდა ყოფილიყო ფასისში მდგომი სამხედრო ნაწილის სახელოსნოში, ახ. წ. II საუკუნეში²⁹². როგორც მკვლევრები ფიქრობენ, ამ ჰიპოთეზას სათანადო საფუძველი არ გააჩნია (გ. ლორთქიფანიძე ნ. ინაიშვილი).

XV ლეგიონის შტამპიანი სამი აგურის ფრაგმენტი აღმოჩენილია ბიჭვინთაში და დიდი რაოდენობითაა მიკვლეული კაბადოკიის სატალაში, სადაც ლეგიონის მუდმივი სადგომი არსებობდა²⁹³.

მიუხედავად იმისა, თუ რომელი ლეგიონის სახელოსნოებშია დაშნადებული ხსენებული აგური, მკვლევართა ერთობლივი აღიარებით, ახ. წ. II—III სს. ციხისძირი შედიოდა ე. წ. „პონტოს ლიმესში“, სადაც იდგა რომაული გარნიზონი, რომლის მოვალეობა უნდა ყოფილიყო აფსაროსის, ფასისის, დიოსკურია-სებასტოპოლისისა და ბიჭვინთა-პიტიუნტის გარნიზონებთან ერთად, დაეცვა რომის იმპერიის შორეული მისადგომები, აელაგმა „ბარბაროსების“ მეკობრეობა და უზრუნველყო მშვიდობიანი ვაჭრობა და ზღვაოსნობა შავი ზღვის სანაპიროს გასწვრივ²⁹⁴ (იხ. რუკა).

ამრიგად, როგორც მრავალრიცხოვანი და მრავალფეროვანი არქეოლოგიური აღმოჩენები მოწმობენ, უძველესი დროიდან დასახლებული ციხისძირის შემოგარენი ახ. წ. II საუკუნიდან მნიშვნელოვან სამოსახლოდ ქცეულა, სადაც, სავსებით შესაძლებელია, ამ „ქვეყნის“ მმართველის რეზიდენციაც ყოფილიყო. ციხისძირის ასეთ ხასიათზე მეტყველებს ის ფაქტიც, რომ ახ. წ. II ს. მეორე ნახევარში რომაელები აქ ციხე-სიმაგრეს აშენებენ, რაც, ალბათ, კიდევ ერთი რგოლი უნდა ყოფილიყო იმპერიის ჩრდილოეთი საზღვრის დამცველ სიმაგრეთა ჯაჭვში.

ახ. წ. II—III საუკუნეებში ციხისძირის ტერიტორიაზე ქალაქი-სა თუ მსხვილი სამოსახლოს არსებობა, სადაც რომაული ციხე-სიმა-

²⁹² მ. შპაიდელი. კავკასიის საზღვარი. II საუკუნის გარნიზონები აფსაროსში, პეტრასა და ფასისში. — მაცნე (ისტორიის, არქეოლოგიის, ეთნოგრაფიისა და ხელოვნების ისტორიის სერია). I. 1985, გვ. 138.

²⁹³ Н. Ш. Кнгурадзе, Г. А. Лордкипанидзе. Т. Т. Тодуа. Клейма XV легиона из Пицуидского городища.—ВДИ. 1987, №2. с. 88—92.

²⁹⁴ ნ. ინაიშვილი. სამხრეთ-დასავლეთ საქართველოს ძველი ქალაქები (ციხისძირი). თბ., 1990. გვ. 38—169 (ხელნაწერი); В. Леквицадзе. Указ. соч., с. 86—92; Н. Ш. Кнгурадзе, Г. А. Лордкипанидзе, Т. Т. Тодуа. Указ. соч., с. 88—92.

ჯრეც უნდა ყოფილიყო, არქეოლოგიური მასალებით (სამარხები, მონეტები, დამლიანი აგური) დოკუმენტურად დადასტურებულია და სავსებით შესაძლოა, რომ, სწორედ ეს იყოს პტოლემეაიოსის მიერ აფსაროსსა და ფასისს შორის ნაჩვენები მეორე სებასტოპოლისი.

ციხისძირ-სებასტოპოლისის გაიგივებას სერიოზულ დაბრკოლებას ვერ უქმნის პტოლემეაიოსის უშუალო წინაპარი მწერლების (პლინიუსი) ცნობებში და თითქმის თანამედროვე, ფლავიუს არიანეს (134 წ.) „პერიპლუსში“ მისი მოუხსენებლობა. როგორც ჩანს, ძველისა და ახალი წელთაღრიცხვის მიჯნაზე, დაარსების პირველ ეტაპზე, ციხისძირი ჯერ კიდევ არ წარმოადგენდა ისეთ მნიშვნელოვან პუნქტს, რომ ფართოდ ყოფილიყო ცნობილი და სათანადოდ ასახულიყო წერილობით წყაროებში²⁹⁵. ანდა, შესაძლოა, ეს პუნქტი სხვა, ადგილობრივი სახელით იხსენიებოდა, რომელიც, ალბათ, უფრო გავრცელებული უნდა ყოფილიყო I—II სს., ვიდრე სებასტოპოლისი.

რაც შეეხება არიანეს, უნდა ვიფიქროთ, რომ მისი საინსპექციო მოგზაურობის დროს ციხისძირში ჯერ კიდევ არ არსებობდა საფორტიფიკაციო ნაგებობა და აქ არ იყო ჩაყენებული რომაული გარნიზონი, რომელთა სამყოფ სასიმაგრო პუნქტების ბრძოლისუნარიანობის შემოწმება იყო მისი მოგზაურობის ძირითადი მიზანი. ამ ადგილების შესახებ, სადაც არიანე ჩერდება, ალბათ, პოლიტიკური და სამხედრო, ან სხვა მიზეზების გამო, ყოველთვის მართავს მსჯელობას ციხე-სიმაგრისა და ჯარის ნაწილების საბრძოლო მდგომარეობის შესახებ, კლიმატურ პირობებზე, ადგილის სახელის ეტიმოლოგიაზე და სხვ. მაშინ, როდესაც სრული დუმილით უვლის გვერდს იმ ადგილებს, სადაც იგი არ შეჩერებულა, ან იშვიათი გამოწკლისის სახით, მათი მხოლოდ სახელწოდება და მათ შორის არსებული მანძილები აქვს მოცემული²⁹⁶.

მაგალითად, ტრაპეზუნტიდან აფსაროსისაკენ წამოსული არიანე, რომელიც ჩერდება პისოსში და ათენში და საკმაოდ დაწვრილებით აგვიწერს მათ, არაფერს ამბობს ისეთ მნიშვნელოვან ქალაქურ დასახლებათა შესახებ, როგორიც არის ე. წ. ახალი ბანაკი, რიზე და

²⁹⁵ В. В. Л а т ы ш е в. Известия древних писателей о Скифии и Кавказе.—ВДИ. 1949, с. 271—356.

²⁹⁶ ფლავიუს არიანე. მოგზაურობა შავი ზღვის გარშემო. თარგმანი, გამოკვლევა, კომენტარები და რუკა ნათელა კეკელიძისა. თბ., 1961, გვ. 6.

კორდილა²⁹⁷. ასევე იქცევა იგი აფსაროსიდან ფასისამდე და აქედან დიოსკურია-სებასტოპოლისამდე მოგზაურობისას.

აფსაროსიდან წამოსული არიანე ბათუმის მიდამოებში მხოლოდ მდ. ბათისს ასახელებს²⁹⁸, მაშინ, როცა კასტორიუსის რუკის ე. წ. TP-ს მონაცემების მიხედვით, ბათუმის შემოგარენში Portus altus, ანუ ძველი ქალაქის არსებობა იგულისხმება²⁹⁹. ბათისის შემდეგ ნახსენებია მდინარეები: აკინასე, ისისი, მოგროსი და ფასისი; ამ უკანასკნელში ჩერდება კიდევ არიანე³⁰⁰.

ქ. ფასისსა და დიოსკურიას შორის არიანე ასახელებს მდინარეებს — ქარიენტის, ქობოსს, სინგამეს, ტარსურას, ჰიპოსს და ასტელეფს, როგორც წესი, იძლევა მათ შორის მანძილებს სტადიონებით და სწვა³⁰¹. მაგრამ აქაც, ისევე როგორც სხვა შემთხვევაში, არაფერს ამბობს სოფ. გუდავაში, მდ. მდ. ოქუმისა და ერისწყლის შესართავთან მდებარე მნიშვნელოვან პუნქტზე ზივანეთსზე, სადაც რომაული კასტელის არსებობა არქეოლოგიური მონაპოვრებით დოკუმენტურად დადასტურებულია³⁰². ამდენად, არიანეს მიერ ციხისძირ-სებასტოპოლისის მოუხსენებლობა მისი აქ არსებობის უარსაყოფად არ გამოდგება.

ასევე, დასმული საკითხის საწინააღმდეგოდ არ გამოდგება ის ფაქტი, რომ შედარებით მოგვიანო ხანის რუკებზეც, ერთი შეხედვით, თითქოს, არა ჩანს მეორე სებასტოპოლისი აღმოსავლეთ შავიზღვისპირეთში. ამ შემთხვევაში ჩვენ მხედველობაში ვვაქვს ერთი საგზაო რუკის X—XI სეგმენტი, რომელიც სამეცნიერო ლიტერატურაში Tabula Peutingeriana-ს სახელით არის ცნობილი³⁰³. ეს რუკა ეკუთვნის იმ სპეციალურ ნაშრომთა რიცხვს, რომლებიც ახ. წ. IV ს. ჩნდება რომში, აღმოსავლეთთან ვაჭრობის ახალ აღმავლობასთან და-

²⁹⁷ ფლავიუს არიანე. დასახ. ნაშრ. გვ. 31—34.

²⁹⁸ იქვე. გვ. 34.

²⁹⁹ ნ. ლომოური. ძველი საქართველოს სავაჭრო გზების საკითხისათვის. — ივ. ჭავჭავაძის სახ. ისტორიის ინსტიტუტის შრომები. ტ. IV. ნაკ. I. თბ., 1958, გვ. 105.

³⁰⁰ ფლავიუს არიანე. დასახ. ნაშრ. გვ. 37.

³⁰¹ იქვე. გვ. 40—41.

³⁰² В. А. Леквинадзе. Юпитерский лимес с. 84—85. рис. I; Н. Ш. Кигурадзе, Г. А. Лордкипанидзе, Т. Т. Тодуа. Климю XV легйона из Пицундского городища, рис. I.

³⁰³ ნ. ლომოური. საქართველოს სავაჭრო გზების საკითხისათვის. — ივ. ჭავჭავაძის სახ. ისტორიის ინსტიტუტის შრომები. IV. ნაკ. I. 1958, გვ. 99—118.

კავშირებით³⁰⁴. დღეს სამეცნიერო ლიტერატურაში საყოველთაოდ გაზიარებულია, რომ ეს რუკა შედგენილია ახ. წ. IV ს. რომაელი გეოგრაფოსის კასტორიუსის მიერ³⁰⁵.

კასტორიუსის რუკაზე დატანილია საქართველოს ტერიტორიაზე გამავალი რამდენიმე გზაც. ერთ-ერთი მათგანი იწყება ბოსფორთან, შავი ზღვის გასწვრივ და სინოპის, ამისოს, ტრაპეზუნტის, აფსაროსის, Portu altu-ს (ძველი ქალაქი), Apasidam-ის, Nigro-ს, ფასისის, ქარიეტას, ხობოსის, ზიგანეოსის, კიანესის, ტარსურას და Stempco-სის გავლით, სებასტოპოლისში ჩადის³⁰⁶.

აკად. ს. ჯანაშია ნაშრომში — „ფეოდალური რევოლუცია საქართველოში“ ეხება ამ გზას და ქ. პეტრას სტრატეგიულ მნიშვნელობასთან დაკავშირებით აღნიშნავს: „მეორე მისი უდიდესი მნიშვნელობა იმაში მდგომარეობდა, რომ იგი ჰკეტავდა უმნიშვნელოვანეს გზას, რომლითაც სამხრეთიდან (ე. ი. რომის აღმოსავლეთ პროვინციებიდან, არმენიიდან, ირანის ჩრდილო-დასავლეთ პროვინციებიდან) შემოდოდა დასავლეთ საქართველოში“³⁰⁷. როგორც ჩანს, კასტორიუსის რუკაზე, სწორედ, ეს გზაა აღნიშნული შავი ზღვის სანაპიროს გასწვრივ³⁰⁸.

ამ გზას განსაკუთრებით დიდი მნიშვნელობა მას შემდეგ უნდა მისცემოდა, როცა დასავლეთ საქართველო რომისა და შემდგომ ბიზანტიის ხელქვეით ან მათი პროტექტორატის ქვეშ იმყოფებოდა დაახლოებით I—VIII საუკუნეებში³⁰⁹.

კასტორიუსის ხსენებულ რუკაზე აფსაროსის შემდეგ აღნიშნული პუნქტი Portus altus — „ძველი ქალაქი“, ან „ღრმა ნავსადგური“, რომელიც, კ. მილერისა და ნ. ლომოუტრის აზრით, თანამედროვე ქ. ბათუმის ტერიტორიაზე მოდის³¹⁰. აქედან, რუკის მიხედვით, XII რომაულ მილზე ანუ 17,814 კმ-ზე მდებარეობს პუნქტი Apasidam, რაც ემთხვევა ციხისძირის ტერიტორიას³¹¹.

³⁰⁴ იქვე.

³⁰⁵ Н. В. Пигулевская. Византия на путях в Индию. М.-Л: 1951, с. 100; ნ. ლომოუტი. დასახ. ნაშრ. გვ. 100.

³⁰⁶ ნ. ლომოუტი. დასახ. ნაშრ. გვ. 103.

³⁰⁷ ს. ჯანაშია. შრომები. ტ. I. თბ., 1949, გვ. 36—37.

³⁰⁸ იქვე, გვ. 37; ნ. ლომოუტი. დასახ. ნაშრ. 104,

³⁰⁹ ნ. ლომოუტი. დასახ. ნაშრ. გვ. 104.

³¹⁰ ნ. ლომოუტი. დასახ. ნაშრ. გვ. 105.

³¹¹ ნ. ლომოუტი. დასახ. ნაშრ. რუკ. № 2.

გამორიცხული არ არის, კასტორიუსის Apasidam ციხისძირის ადგილობრივი ძველი სახელწოდება იყოს. როგორც უკვე ითქვა, ციხისძირი უძველესი სამოსახლოა. სადაც, ვეინბრინჯაო-ადრეკინის ხანიდან მოყოლებული, უწყვეტი ცხოვრების კვალია დადასტურებული (წინარე ანტიკური, ანტიკური და ელინისტური) ნამოსახლარებისა თუ სამაროვნების სახით. ციხისძირით დაინტერესებულ მკვლევართა ვარაუდით ანტიკურ ხანაში შესაძლოა მას რქმეოდა პითა-ფითია³¹² ან მოხორა³¹³. შუასაუკუნეებში კი სოტერიოპოლისი³¹⁴.

ასეთივე წარმატებით შეიძლება დავუშვათ, რომ წინარეანტიკური თუ ადრეანტიკური ხანის ციხისძირის სახელი შეიძლება ყოფილიყო პანტურა ან პანტურანი. ასეთი ტოპონიმი დადასტურებულია მდ. კინტრიშის შესართავის სამხრეთით, ციხისძირის ზონაში. ს. ჯანაშია, ქ. პეტრას ლოკალიზაციაზე მსჯელობისას, შესაძლებლად მიიჩნევს „... „პეტრა“//„პანტურანის“ დაკავშირებას: ან პირველი იქნება მეორის გააზრიანება უცხოელთა მიერ, ან უკანასკნელი — ბერძნული ფორმის ადგილობრივი განვითარება“³¹⁵.

ჩვენი აზრით, „პანტურა“ პან-ძირიანი ტოპონიმია, რომლის ანალოგები ფართოდ არის გავრცელებული საქართველოს როგორც დასავლეთ, ისე აღმოსავლეთ ნაწილში. ასეთებია: „შორაპანი“, „აოპანი“, „ისპანი“, „პანური“, „პალური“, „პანჩური“, „პანეხი“, „პანკოლი“. „პანკისი“ და სხვა მრავალი.

ჩვენი დაკვირვებით, „პან“-ძირიანი ტოპონიმები, უპირველეს ყოვლისა, გზებთან დაკავშირებული სახელწოდებებია და ძველი გზების მიმართულების დასადგენად საუკეთესო საორიენტურო საშუალებებია.

ასეთი ვარაუდის საფუძველს გვაძლევს ხსენებული ტოპონიმების კანონზომიერი განლაგება ქვეყნის შიდა და გარე სატრანზიტო გზების გასწვრივ და მეტ-ნაკლებად მნიშვნელოვან ეკონომიკურ და პოლიტიკურ ცენტრებთან თავმოყრა.

ამის ტიპური მაგალითია შორაპანი (ზესტაფონის რ-ნი), რომელიც ინდოეთიდან მომავალ და ქ. ფასისთან დამთავრებულ საერთაშორისო

312 ნ. ხოშტარია. დასახ. ნაშრ. გვ. 35—36.

313 Н. И н а и ш в и л и. Петра-Цихидзირი? Тбилиси, 1991, с. 12.

314 ნ. ხოშტარია. დასახ. ნაშრ. გვ. 35.

315 ს. ჯანაშია. ფეოდალური რევოლუცია საქართველოში. — შრომები. I. თბ., 1949, გვ. 42.

მნიშვნელობის საგზაო მაგისტრალზე მდებარეობს და თავისთავადაც მნიშვნელოვანი ისტორიული პუნქტია.

შორაპანის შესახებ, როგორც მნიშვნელოვან სატრანზიტო, სავაჭრო გზაზე მდებარე პუნქტზე, ყველაზე უფრო აღრინდელი ცნობა მოეპოვება დიდ გეოგრაფოს სტრაბონს, რომლის მიხედვით ფასისზე აღმა ცურვა შეიძლება შესართავიდან შორაპანამდე, აქ მთავრდება სანაოსნო გზა და აქედან უკვე სახმელეთო გზით გადააქვთ საქონელი მდ. მტკვრამდე³¹⁶.

ეკვვარეშეა, რომ ეს, მართლაც, დიდმნიშვნელოვანი გზა უხსოვარი დროიდან უნდა გაკვალულიყო, მაგრამ განსაკუთრებული ეკონომიკური მნიშვნელობა, მაინცდამაინც, ძვ. წ. VI—IV სს. უნდა მოეპოვებინა³¹⁷. „ელინისტური ხანიდან, როდესაც ვაჭრობა იღებს „მსოფლიო“ ხასიათს და სავაჭრო ურთიერთობის პროცესში ექცევა არა მხოლოდ მცირე აზია, მესოპოტამია და ეგვიპტე, არამედ შუა აზია, ინდოეთისა და ჩინეთის შორეული რაიონებიც, იქმნება ერთიანი დიდი სავაჭრო სატრანზიტო გზა ინდოეთიდან ფასისისაკენ“³¹⁸.

როგორც მკვლევრები ფიქრობენ, ეს გზა ძვ. წ. I საუკუნის მეორე ნახევრიდან ექცევა რომის სავაჭრო ინტერესების სფეროში და ახ. წ. I—III საუკუნეებში იმდენად წინაურდება ეკონომიკურად, რომ იგი ქართლის სამეფოს განაპირა საერისთავოს პოლიტიკური ცენტრი ხდება, სადაც ზის პიტიახში (ბუზმირი), რომლის უფლებამოვალეობაში, სხვა ვალდებულებებთან (ქვეყნის საზღვრების უშიშროების უზრუნველყოფა, გადასახადების შეგროვება და სხვ.) ერთად, გზაზე სიმშვიდის და მგზავრებისათვის უსაფრთხოების უზრუნველყოფაც უნდა შესულიყო³¹⁹.

ახ. წ. IV საუკუნიდან შორაპანი, როგორც ქალაქი და საერისთავოს ცენტრი, დაქვეითებას იწყებს, რაც უნდა გამოეწვია ახალი ფეოდალური ურთიერთობის ჩასახვა-განვითარების ნიადაგზე წარმოქმნილ წინააღმდეგობებს, რასაც, თავის მხრივ, მოჰყვა მონათმფლობელური

316 თ. ყ ა უ ხ ჩ ი შ ვ ი ლ ი. სტრაბონის გეოგრაფია. თბ., 1957, გვ. 128.

317 თ. ლ ო რ თ ქ ი ფ ა ნ ი ძ ე. ინდოეთიდან შავი ზღვისაკენ მიმავალი სატრანზიტო-სავაჭრო გზის შესახებ. — საქართველოს მეცნ. აკად. მოამბე, ტ. XIX. № 3. 1957, გვ. 382.

318 იქვე. გვ. 383.

319 გ. ც ქ ი ტ ი შ ვ ი ლ ი. ანტიკური ხანის შორაპანის საერისთავოს საკითხისათვის. — საქართველოს ისტორიული გეოგრაფიის კრებული. II. თბ., 1964, გვ. 383.

რომის დამსობა და შესაბამისად შორაპნის საერთაშორისო გზის ეკონომიკური მნიშვნელობის დაეცემა³²⁰.

შორაპანზე გამავალი გზის მნიშვნელობაზე, მისი როგორც ქალაქისა და სტრატეგიული ცენტრის აღმავლობა-დაქვეითებაზე, საგანგებოდ იმიტომ გავამახვილეთ ყურადღება, რომ, როგორც ქვემოთ დავინახავთ, თვით ტოპონიმის სემანტიკის გახსნისათვის ამ მხარეებს არსებითი მნიშვნელობა გააჩნია.

როგორც ზემოთ ითქვა, შორაპანი „პან“-ძირიან ტოპონიმთა ჩვეუს განეკუთვნება და რიონ-ყვირილა-ძირულა-ჩხერიმელას ხეობიდან აღმოსავლეთ საქართველოში მიმავალი სატრანზიტო გზის მნიშვნელობის ზრდის პროცესში უნდა გაჩენილიყო. რადგან უშუალოდ მივადექით საკითხს, უნდა პირდაპირ დავსვათ კითხვა, რას ნიშნავს შორაპანი? ანუ როგორ გვესმის ამ ტოპონიმის სემანტიკა.

ჩვენი აზრით, „შორაპანი“³²¹ არის კომპოზიტი, რომელიც შედგება ორი ნაწილისაგან და ასე უნდა დაიყოს — „შორა“ და „პანი“. ტოპონიმის პირველი ნაწილის რაობა გასაგებია; იგი ზედსართავი სახელია და აღნიშნავს რაღაც ერთი ობიექტის დიდი მანძილით დაშორებას მეორისაგან: შორა — შორი, ახლო — მახლობლად მდებარეს საწინააღმდეგოდ, ე. ი. კომპოზიტის პირველი ნაწილი „შორა“ ტოპონიმ „შორაპანში“ მსაზღვრელის როლს ასრულებს და მიგვითითებს, რომ, ერთი შეხედვით, გაუგებარი „პანი“ სადღაც, რაღაცისაგან შორს მდებარეობს.

ტოპონიმის შედგენილობის მიხედვით, „პანი“ არსებითი სახელი ჩანს. იგი დამოუკიდებელი სახით თანამედროვე ქართულ მეტყველებაში არ გვხვდება. არც ძველ ლექსიკონებშია განმარტებული, მაგრამ კომპოზიტის სახით არაერთგზის გვხვდება სხვადასხვა სიტყვაში შერწყმულ-დაკავშირებული. ამიტომ მისი რაობის გარკვევა ამ სიტყვათა სწორად დაშლასა და გამოყოფილი ყველა ნაწილის ახსნა-გააზრებას მოითხოვს.

სამაგალითოდ ავიღოთ თუნდაც თანამედროვე ქართულ მეტყველებაში ხმარებული ტერმინი „კარაპანი“. ასე ეწოდება ჯარგვალის

320 გ. ც ქ ი ტ ი შ ვ ი ლ ი. დასახ. ნაშრ. გვ. 102—103.

321 უკვე არსებული მოსაზრების მიხედვით, შორაპანი სპარსული სახელია — „შაპრან“, რაც „ქვეყნის დამცველს“ ნიშნავს. იხ. ვ. გოლიაძე. შორაპნის ეტიმოლოგია. — ისტორია, საზოგადოებათმცოდნეობა, გეოგრაფია სკოლაში. 4. 1980, გვ. 38—41.

ან ფაცხის წინა, აივნისებურ ნაწილს, რომლის გადახურვა სვეტებს ეყრდნობა და სამი მხრიდან ღია ანუ უქედლოა.

საბას ლექსიკონით „კარაპანი“ სომხურია, ქართულად არდგმული ჰქვია კალოს სახლს³²². როგორც ჩანს, ყველა შემთხვევაში, კარაპანი მსუბუქ ნაგებობას გულისხმობს, რომელსაც სიციხეში ან უამინდობაში შეიძლება თავი შეაფაროს როგორც ადამიანმა, ისე საქონელმა. აშკარაა, კარაპანი ღროებითი თავშესაფარია, მიუხედავად იმისა, განცალკევებით მდგარი ნაგებობაა იგი, თუ რაიმე ძირითადი შენობის დანაშატი. ამ შემთხვევაში მხოლოდ ის ირკვევა, რომ „პანი“ ნაგებობასთან დაკავშირებული ტერმინია და მის ხასიათს, კატეგორიას, თუ დანიშნულებას უსვამს ხაზს.

ჩვენი აზრით, კარაპანი სომხური კი არ არის, როგორც ეს დიდ ლექსიკოგრაფს სულხან-საბა ორბელიანს ჰგონია, არამედ სპარსული წარმომავლობის სიტყვა უნდა იყოს, რაც დამცველს (pāna) ნიშნავს³²³ და მიღებულია ძირიდან pā — დაცვა, რომელსაც ემატება სუფიქსი—ana³²⁴. ამგვარად ნაწარმოები სპარსული სიტყვებია: Asapāna — ცხენის დამცველი, Kaupāna — საქონლის დამცველი, Karapāna — ხალხის — ჯარის დამცველი (kara — ჯარი, ხალხი)³²⁵ და სხვ.

როგორც ვხედავთ, ქართული კარაპანი, როგორც გარეგნულად, ისე შინაარსობრივად, სავსებით იდენტურია სპარსული სიტყვისა (karapana), რაც მისი წარმომავლობისა და მნიშვნელობის ჩვენებურ ახსნას უჭერს მხარს. როგორც უკვე ითქვა, ასეთი პან-ძირიანი ტომონიმები ფართოდ არიან გავრცელებულნი როგორც დასავლეთ, ისე აღმოსავლეთ საქართველოში და უმეტესწილად, მთავარი საგზაო მაგისტრალების გასწვრივ არიან განლაგებულნი, რაც ამ ადგილებში ოდესღაც მგზავრთა სასვენნი, თავშესაფარი, ფუნდუქის ტიპის ნაგებობების არსებობაზე მიგვანიშნებენ.

ჩვენი დაკვირვებით, მნიშვნელოვანი გზების გასწვრივ განლაგებული ასეთი პანები, ჩვეულებრივ, ერთი დღის სავალი მანძილით (25—30 კმ) უნდა ყოფილიყვნენ დაცილებულნი ერთიმეორისაგან.

³²² საბა-ს-ულ-ხან-ორბელიანი. ქართული ლექსიკონი. თბ., 1928, გვ. 16, 162.

³²³ თეოჩხეიძე. ნარკვევები ირანული ონომასტიკიდან. თბ., 1984, გვ. 39.

³²⁴ იქვე. გვ. 11, 39, 78.

³²⁵ იქვე, გვ. 33, 35.

გამონაკლის შემთხვევაში, რთული ფიზიკურ-გეოგრაფიული (მთე-
ბი, ეიწრო ხეობები, ჭაობები, დიდი მდინარეები) ფაქტორების გავ-
ლენით. პანებს შორის გასავლელი დღიური მანძილი შეიძლება გა-
ზრდილიყო. ალბათ, ასეთ გამონაკლის შემთხვევაში ემატება, ჩვეუ-
ლებრივ „პანს“ მსაზღვრელი „შორა“, რაც მგზავრისათვის წინასწარ
აუცილებელი ინფორმაციის მიწოდების საჭიროებითაა ნაკარანხვეი,
თადარიგის დაჭერის მიზნით (ადრე გასვლა, ტვირთის შემსუბუქება,
ჩქარი სვლა და სხვ.), მეორე პანამდე არსებული მანძილის დროუ-
ლად დასაფარავად. ასე უნდა გაჩენილიყო ტოპონიმი შორაპანი.

აქეთივე, ოღონდ უკვე სამისამართო ინფორმაციის შემცველი,
ჩანს სხვა შემთხვევებში არსებული კომპოზიტები: ჯა-პანი (ხის პანი),
ის-პანი (ისლის პანი), პან-ეხი (კლდოვანი ფარდული) და სხვ. ამ შემ-
თხვევაში, მგზავრი წინასწარ აცნობიერებდა, თუ რა გეოგრაფიულ
გარემოში (ტყეში, ჭაობში, კლდე-ღრეში) გაივლიდა მისი მარშრუტი
და როგორი ფიზიკური ნიშნების მქონე იქნებოდა მისი ღამის სათევი
ნაგებობა.

ასეთი პან-ძირიანი ტოპონიმების განლაგების თვალსაჩინო მა-
გალითს იძლევა შორაპანიდან მომავალი საგზაო მაგისტრალი, რომე-
ლიც აჭარა-გურიის ქედის ძირობის გაყოლებით მიემართება შავი
ზღვის სანაპიროსაკენ და აქედან სამხრეთით, ტრაპეზუნტისაკენ. ამ
გზაზე მდებარეობს: შორაპანი, ჯაპანი (ლანჩხუთის რ-ნი), ისპანი
(ჯობტლეთთან), პანტურა (ციხისძირთან), პანტურა (სარფთან), პან-
ტურა (ხოფასთან) და პანური (რიზესთან).

ეს უქანასკნელი, როგორც ჩანს, ურ სუფიქსით გაფორმებული,
პან-ძირიანი ტოპონიმი და ვფიქრობთ, ასეთივე უნდა ყოფილიყო
ხოფის, სარფისა და ციხისძირის პანტურა, სადაც -ტ ან გვიანდელი
განვითარების შედეგია, ანდა, ტოპონიმი პანურის გარეგნული მსგავ-
სების გამო, ხალხის მიერ იგი მცენარე პანტის სახელთან არის დაკავ-
შირებული.

ყოველივე ზემოთქმულიდან გამომდინარე, ტოპონიმ პანტურას
არაფერი აქვს საერთო პეტრას სახელწოდებასთან. მაგრამ არ არის
გამორიცხვული TP-ის სახელით ცნობილი რუკის ზღვისპირა პუნქ-
ტება შორის, ბათუმის (პორტუს ალტუს) შემდეგ, დაახლოებით ცი-
ხისძირს ადგილზე დასმული პუნქტის Apasidam-ის სახელწოდება
პანტურა ან ო-პან-დორის შერყენილი, უფრო კი, მისი ელინიზირე-
ბული ფორმა იყოს. ალბათ, დაახლოებით, ასე უნდა რქმეოდა ციხის-
ძირს, ვიდრე მას სებასტოპოლისი შეერქმეოდა.

ჩვენი წინასწარული ვარაუდით ციხისძირი მრავალსახელიანი ქალაქი უნდა ყოფილიყო, ისევე როგორც ამას ვხედავთ დიოსკურია-სებასტოპოლისი-ცხუმში-სოხუმის, პეტრა-იუსტინიანე-ხოფას³²⁶, აფსაროს-ვალენტია-გონიოს³²⁷, რეონ-ფასისის³²⁸, ზიგანეოს-გუდაყვასა³²⁹ და სხვათა მაგალითზე.

რამდენადაც ჩვენთვის ცნობილია, ძველი ავტორები ასეთ შემთხვევაში, ჩვეულებრივ, უპირატესობას აძლევენ იმ სახელს, რომელიც უფრო პოპულარულია ფართო საზოგადოებაში. მაგრამ, როდესაც ერთსა და იმავე რეგიონში ორი მსგავსი სახელის მატარებელი პუნქტის დასახელება უხდებათ, გაუგებრობისა და დამატებითი განმარტებების თავიდან ასაცილებლად ცდილობენ ერთ-ერთი მათგანი განსხვავებული, ადგილობრივი სახელით მოიხსენიონ.

ამის შესანიშნავი მაგალითი მოიპოვება პროკოპი კესარიელთან, როდესაც იგი მერმეროეს ხელმძღვანელობით პეტრადან არქეოპოლისისაკენ მიმავალი სპარსეთის ჯარის მარშრუტს აგვიწერს:

„ის (მერმეროე — გ. გ.) გაბრუნდა და დაიჭირა იბერიიდან კოლხიდის ქვეყანაში გადასასვლელი ადგილები, სადაც ფაზისის გადასვლა შეიძლება ფონში, გადალახა ეს მდინარე ფეხით, გადალახა აგრეთვე მეორე მდინარეც, სახელად რეონი — არც ეს არის იქ სანაოსნო და ფასისის მარჯვენა მხარეს რომ აღმოჩნდა, წაიყვანა ჯარი ერთი ქალაქის, არქეოპოლისის, წინააღმდეგ, რომელიც არის მთავარი და უდიდესი ქალაქი ლაზების ქვეყანაში“³³⁰. ე. ი. პროკოპის რადგან ერთდროულად უხდება ორი ფასისის მოხსენიება (ჭოროხ-ფასისისა და რიონ-ფასისის), პირველს ფასისს უწოდებს, ხოლო მეორეს ადგილობრივი სახელით, რეონით გვაცნობს.

ჩვენი ვარაუდით, ასევე იქცევა კასტორიუსი, როდესაც აღმოსავლეთ შავიზღვისპირეთის რუკაზე ორი სებასტოპოლისი აქვს დასატანი. ციხისძირ-სებასტოპოლისს ძველ სახელს Apasidam-ს უწოდებს, ხოლო მეორეს — დიოსკურია-სებასტოპოლისის აღსანიშნავად, სებასტო-

³²⁶ გ. გ რ ი გ ო ლ ი ა. ძველი კოლხეთის საქალაქო ცენტრების (პეტრა) ლოკალიზაციის საკითხები. — საქართველოს ისტორიული გეოგრაფიის კრებული. VII. თბ., 1989, გვ. 37—81; გეორგიკა. ტომი მეორე. ბიზანტიელი მწერლების ცნობები საქართველოს შესახებ. თბ., 1934, გვ. 198.

³²⁷ В. А. Леквинадзе. Понтийский лимес, с. 82.

³²⁸ გეორგიკა. 2. გვ. 151.

³²⁹ ს. ჭ ა ნ ა შ ი ა. შრომები. VI. თბ., 1988, გვ. 176—178.

³³⁰ გეორგიკა. ტომი მეორე, 1934. გვ. 151—152.

პოლისს არჩევს. თუმცა არც ის არის გამორიცხული, რომ, ამ შემთხვევაში, კასტორიუსის რუკებზე უფრო ძველი ავტორების მონაცემებიც იყოს ასახული.

ჩვენ ვგრძნობთ, რომ ეს მოსაზრება ჰიპოტეტურია, მაგრამ გარკვეულ საფუძველს მოკლებული არ უნდა იყოს.

ციხისძირში სებასტოპოლისის ძიების თვალსაზრისით კიდევ უფრო საყურადღებოა კასტორიუსის რუკის მეორე ნაწილი, სეგმენტი XI—XII, სადაც სომხეთის ძველი დედაქალაქიდან — არტაშატიდან — ქ. სებასტოპოლისისაკენ მიმავალი საგზაო მარშრუტია დატანილი³³¹. ი. მანანდიანისა და ს. ერემიანის მიხედვით, ეს გზა ქალაქ არტაშატიდან ჩრდილოეთისაკენ, ქ. ერევნის ჩრდილო-დასავლეთით მდებარე პატარა ქალაქ არტარაკზე გავლით აღწევდა მდ. აბარანის ხეობას, დაახლოებით სოფ. კაშაბარანთან უხვევდა დასავლეთით, გაივლიდა სოფ. კონდაქსესზე (Condeso), შემდეგ, სოფ. კულიჯანზე (Misium) და აქედან ჩრდილოეთისკენ მიემართებოდა, ვიდრე ფარვანის ტბამდე, რომელსაც აღწევდა მის სამხრეთ კიდეზე მდებარე სოფ. პოგასთან (Pagas). აქედან, აბულის მთასთან (Apulum) გავლით, ჩადიოდა ახალქალაქის მახლობლად მდებარე სოფ. ხოსპიაში (Caspia). ეს უკანასკნელი რუკაზე აღნიშნულია ქალაქის მაჩვენებელი ნიშნით (ორი კოშკი). ხოსპიას ასეთი აღნიშვნა, ს. ერემიანის აზრით, გამოწვეული იყო იმით, რომ მის გვერდით მდებარეობდა ძველი ქართული ქალაქი წუნდა, რომელიც, ლეონტი მროველის ცნობით, უძველეს დროშია დაარსებული³³² და პტოლემეოსისა და აქვს მოხსენიებული ოდნავ შერყვნილი ფორმით³³³.

ამ ქალაქის შემდეგ, რუკაზე აღნიშნულია სადგური Ad mercurium. ამ სახელს აკად. ი. მანანდიანი ასწორებს Ad metcuri-ად, რაც მდ. მტკვართან მდებარეს ნიშნავს და პუნქტს ათავსებს ქ. ახალციხესთან. ნ. ლომოურის აზრით, ეს კონიექტურა ცოტა საეჭვო ჩანს, ძველ ბერძნულ-რომაულ წყაროებში მდ. მტკვარი ყოველთვის კირო-

³³¹ Я. А. Манандян. О торговле и городах Армении. Ереван. 1954, с. 153—159; С. Еремян. Торговые пути Армении в эпоху сасанидов. — ВДИ. I, 1939, с. 90—97; ნ. ლომოური. საქართველოს სავაჭრო გზების საკითხისათვის. გვ. 107—111.

³³² ქართლის ცხოვრება. ანა დედოფლისეული ნუსხა. დასაბუქლად მოამზადა ფილოლოგიის განყოფილებამ სიმონ ყაუხჩიშვილის რედაქციით, თბ., 1942, გვ. 6; ნ. ლომოური, დასახ. ნაშრ. გვ. 107.

³³³ С. Еремян. Указ. соч., с. 92.

სის ფორმით არის მოხსენიებული³³⁴. თვით კასტორიუსის რუკაზედაც ეს ფორმაა შემონახული. ნ. ლომოურის მიხედვით, ეს სადგური ზეკარის ანუ „რკინის ჯვრის“ უღელტეხილის ახლოს უნდა მდებარეობდეს, რადგან ძნელი წარმოსადგენია, რომ ავტორს არ მოეხდინა ამ უღელტეხილის ფიქსაცია. ნ. ლომოურის აზრით, Ad mercurium აწინდელი აბასთუმნის რაიონზე უნდა მიუთითებდეს და შესაძლოა, ქ. ოძრხეს ან ქართული წყაროების „ციხის ჯვარს“ აღნიშნავდეს, რომლებიც, როგორც ეს „ისტორიანი და აზმანის“ ავტორის გადმოცემიდან ჩანს, ზეკარის გადაღმა უღელტეხილის უახლოესი პუნქტები იყო. ამასთან, ოძრხე, ლეონტის ცნობით, ქართლის ყველაზე უძველეს ქალაქთა რიცხვში ითვლებოდა³³⁵. ნ. ლომოურის აზრით, ძნელი წარმოსადგენია, რუკის შემდგენელს ის არ აღენიშნა იმ გზაზე, რომელიც, თუ უშუალოდ ოძრხეზე არა, მის სიახლოვეს მაინც გაივლიდა. ცხადია, ეს ძალზე ჰიპოტეტური მოსაზრებაა და შემდგომ დაკვირვებასა და შესწავლას მოითხოვს³³⁶.

Ad mercurium-იდან გზა, უკვე ზეკარზე გადავლით, დას. საქართველოში შედიოდა და მდ. მდ. კერშევეთასა და ხანის-წყლის ხეობით რიონამდე აღწევდა, როგორც ჩანს, ძველი როდოპილისის ანუ ვარდციხის ახლოს, სადაც უნდა ყოფილიყო სადგური Ad fonten felicem³³⁷. ამ უკანასკნელის მომდევნო პუნქტი უკვე სებასტოპოლისია.

ამთავითვე უნდა ითქვას, რომ მაგისტრალის ძირითადი მიმართულების შესახებ თითქმის თანხმობა არსებობს მკვლევართა შორის (ნ. ლომოური, ა. მანანდიანი, ს. ერემიანი), თუ მხედველობაში არ მივიღებთ აზრთა მცირე სხვაობებს გზის უმნიშვნელო მონაკვეთებზე. ასეთი მდგომარეობაა მაგისტრალის მიმართულებაზე არტაშატიდან ვარდციხემდე, უკანასკნელ ეტაპზე კი მეცნიერთა შეხედულებები არსებითად განსხვავდებიან ერთმეორისაგან: ასე მაგალითად, ჯერ კიდევ კონრად მილერი ფიქრობდა, რომ Ad fonten felicem-იდან 60 რომაულ მილზე (დაახლ. თანამედროვე 90 კმ) დაცილებული უკანას-

³³⁴ ნ. ლომოური. დასახ. ნაშრ. გვ. 108.

³³⁵ ისტორიანი და აზმანი შარავანდედთანი. აკად. კ. კეკელიძის რედაქციით. თბ., 1941. გვ. 437; ნ. ლომოური. იქვე; ქართლის ცხოვრება. გვ. 9 და 17.

³³⁶ ნ. ლომოური. ძველი საქართველოს სავაჭრო გზების საკითხისათვის, გვ. 108.

³³⁷ ი. მანანდიანი. დასახ. ნაშრ. გვ. 131; ს. ერემიანი. დასახ. ნაშრ. გვ. 92; ნ. ლომოური. იქვე.

კნელი პუნქტი სებასტოპოლისი-დიოსკურია-სებასტოპოლისი უნდა ყოფილიყო³³⁸.

ამ შეხედულებას არ იზიარებს აკად. ი. მანანდიანი, რომელმაც წამოაყენა მოსაზრება, რომ ამ შემთხვევაში სებასტოპოლის-დიოსკურია კი არ იგულისხმება, არამედ რიონის შესართავთან მდებარე, ანტიკურ სამყაროში საყოველთაოდ ცნობილი ქალაქი ფასისი³³⁹. ი. მანანდიანის ასეთი შეხედულების უმთავრესი საფუძველია Ad fontem felicium-ისა (ვარდციხე) და დიოსკურია-სებასტოპოლს შორის რეალურად არსებული მანძილი, რომელიც თითქმის ორჯერ აღემატება TP-ზე ნაჩვენებ მანძილს (60მ—90 კმ).

მოგვიანებით, ი. მანანდიანის აზრი საეცებით გაიზიარა პროფ. ს. ერემიანმა, რომელიც, პ. კიპერტზე დაყრდნობით, დასძენს, რომ ფასისი ტრაიანეს დროიდან (98—117 წწ.) სებასტოპოლისად იწოდებოდა³⁴⁰.

3. კიპერტს, მართლაც, მოეპოვება ასეთი ცნობა, მაგრამ რამდენადაც მის ნაშრომში სათანადო წყარო არ არის მითითებული, ნ. ლომოური ვარაუდობს, რომ იგი პტოლემეაიოსის ხსენებული ცნობის გავლენით უნდა იყოს შექმნილი³⁴¹. როგორც სწორად შენიშნავს ნ. ლომოური, კასტორიუსი კარგად იცნობს ქ. ფასისს და სებასტოპოლისს, ასხვავებს მათ ერთმანეთისაგან და, ამდენად, მათი აღრევა გამორიცხულია³⁴².

ნ. ლომოური, ისევე როგორც მილერი, ფიქრობს, რომ არტაშატიდან მომავალი გზა დიოსკურია-სებასტოპოლისში უნდა მთავრდებოდეს, მაგრამ ვარდციხედან ფასისისაკენ კი არ უნდა უხვევდეს, როგორც ამას ი. მანანდიანი და ს. ერემიანი ვარაუდობენ, არამედ ციხე-გოჯის გავლით ბორცეოვან ზოლს უნდა გაჰყვოდეს³⁴³.

ამდენად, ნ. ლომოურის აზრით, არტაშატ-სებასტოპოლის მაგისტრალის ეს მონაკვეთი უნდა ემთხვეოდეს ისტორიულად არსებულ გზას, რომელიც, ჯუანშერის ჩვენებით, განვლო მურვან ყრუმ: „და

³³⁸ Itineraria Romana. Römische Reise an der Hand der Tabula Peutingeriana, dargestellt von Konrad Miller. Stuttgart, 1916. 653—654.

³³⁹ Я. А. Манандян. О торговле и городах..., с. 134.

³⁴⁰ С. Еремян. Торговые пути Армении.... с. 90—97; N. Kieperl. Lehrbuch d. alten geographie. Berlin, 1878. s. 88.

³⁴¹ ნ. ლომოური. ძველი საქართველოს სავაჭრო გზები. გვ. 108—109.

³⁴² იქვე.

³⁴³ იქვე.

შემუსრნა ყოველნი ქალაქნი და სიმაგრენი ქუეყანისა ეგრისისანიცა და ციხე იგი სამზღლდე, რომელ არს ციხე გოჯი, შემუსრა და შევლო ზღლდე, საზღვარი კლისორისა..., რომელი მას ეამსჳ იყო საზღვარი საბერძნეთისა და საქართველოსა, და შემუსრა ქალაქი აფხაზეთისა და აფშლეთისა ცხუმში³⁴⁴. თავისთავად საყურადღებო ამ ვარაუდს რამდენიმე არსებითი ხასიათის წინაღობა გააჩნია, რაც საექვოს ხდის ვარდციხე-სოხუმის დაკავშირების შესაძლებლობას.

როგორც ზემოთ დავინახეთ, ერთ-ერთი ასეთი წინააღმდეგობა TP-ზე მოცემული (90 კმ.) და სოხუმსა და ვარდციხეს შორის რეალურად არსებული (160—170 კმ.) მანძილების შეუსაბამობა. მართალია, როგორც ნ. ლომოური შენიშნავს, მანძილების დარღვევის შემთხვევები სხვა პუნქტებს შორისაც შეინიშნება, მაგრამ სხვაობა აქ ისეთი მნიშვნელოვანი არ არის და, ამდენად, ეს უკანასკნელი ანგარიშგასაწევა.

გარდა ამისა, ნ. ლომოურის შემოთავაზებულ ვარიანტში მაგისტრალს ვარდციხიდან სოხუმისაკენ უნდა გაეწყო ციხე-გოჯზე, ანუ არქეოპოლის-ნოქალაქევეზე, რომელიც ამ დროისათვის ლაზიკა-ეგრისის სამეფოს დედაქალაქადაა მიჩნეული³⁴⁵ და IV საუკუნეში, ე. ი. ეგრის-ლაზიკის სამეფოს ძლიერების ხანაში, აყვავების ზენიტში უნდა ყოფილიყო³⁴⁶.

ამდენად, ძნელი წარმოსადგენია კასტორიუსს იგი გამორჩენოდა და არ მოეხსენებინა რაიმე სახელით (არქეოპოლისი) და არ აღენიშნა შესაბამისი პირობითი ნიშნით, როგორიც არის კარიბჭით შეერთებული ორი კოშკი (დედაქალაქი), ან უბრალოდ ორი კოშკი (ქალაქი). ნოქალაქევს გარდა, ამ გზაზე კიდევ არაერთი თანადროული ძეგლია დადასტურებული, გარკვეული შუალედური განლაგებით, მაგრამ, როგორც ვხედავთ, ვერც მათ პოვეს ასახვა ხსენებულ რუკაზე. ამ მიმართულებითაც, ვარდციხის შემდეგ, სებასტოპოლისი ერთადერთი და უკანასკნელი პუნქტია.

344 ქართლის ცხოვრება. გვ. 149.

345 ივ. ჭავჭავაძის შვილი. ქართველი ერის ისტორია. წ. I. 1951, გვ. 256; ს. ჯანაშია. შრომები. ტ. I. გვ. 57; ს. ყაუხჩიშვილი. ლექციები ბიზანტიის ისტორიიდან. წ. II. 1948, გვ. 189—190; ნ. ლომოური. ეგრისის სამეფოს ისტორია. თბ., 1968, გვ. 66—71.

346 ნ. ლომოური. ნოქალაქევი-არქეოპოლისი-ციხეგოჯი. — ნოქალაქევი-არქეოპოლისი. 1973—1977. თბ., 1981, გვ. 33—34, 41.

როგორც უკვე ითქვა. ი. მანანდიანის აზრით, სამდინარო თუ სახმელეთო გზა ზღვის სანაპიროზე ქ. ფასისთან უნდა გასულიყო, რაც ასევე გამოირიცხებოდა, რადგან ამ შემთხვევაშიც შეუძლებელია ქალაქისა თუ ციხე-სიმაგრის სახით რუკაზე ფასისი არ ყოფილიყო აღნიშნული.

არის კიდევ ერთი შესაძლო ვარიანტი, როდესაც საგზაო მაგისტრალს ფასისისა და არქეოპოლის-ნოქალაქევის გვერდის ავლით შეეძლო მიედწია დიოსკურია-სებასტოპოლისამდე, მაგრამ მას უცილობლად უნდა გაევიდა კუტაია-ქუთათის-ქუთაისი, ხონი და სოფ. ნოლასთან, ცხენისწყლის ფონზე გასვლის შემდეგ, სოფ. დიდღვებუნასთან დაკავშირებოდა ე. წ. „ზემო სამეგრელოს“ გზას.

ზემო სამეგრელოს გზა არის უმოკლესი მაგისტრალი, რომელიც მდ. ცხენისწყლის ხეობას მდ. ენგურის ხეობის შუა წელთან აკავშირებს.

ამ გზაზე მდებარეობენ ისტორიული სოფლები: დიდღვებუნა, ინჩხურა (სალხინო), გაჭედილი, დოშაყე, ტალერი, კურბუ, ნაფიჩხოუ, თაია, მუხური, ჯგალი, კუხეში, ღია და პალური, სადაც არაერთი ზრწყინვალე ისტორიული ძეგლია დადასტურებული: წარმართული სალოცავის, ქრისტიანული ეკლესიის, ციხე-სიმაგრის, ნახიდარის, ნაგზაურის მეტალურგიული სადნობ-სახელოსნოსა და სხვათა სახით.

ამჟამად კოლხეთში არც ერთი სხვა კუთხე არ გვევლება, სადაც ასე რელიეფურად იყოს გამოკვეთილი ძველი გზის ნაკვალევი. მარტო ის რად ღირს, რომ ყოველ სოფელში გვხვდება საოცარი კანონზომიერებით განლაგებული პანძირიანი ტოპონიმები, რაც გზაზე არსებული სასვენებისა და თავშესაფარი ფუნდუკების არსებობაზე მიგვანიშნებენ. მათ გვერდით კი არსებობენ ნაგზაური მონაკვეთები, მათი სიძველის აღმნიშვნელი საინტერესო სახელწოდებებით: „პომპეაშ შარა“ (პომპეუსის გზა), „ერასტოს შარა“ (იუსტინესა თუ იუსტინიანეს? გზა), „დადიაშ შარა“ (დადიანის გზა), „ჯვეში შარა“ (ძველი გზა), „გოლა შარა“ (მთის გზა) და ა. შ.³⁴⁷

ცხენისწყალსა და ენგურს შორის არსებული ძველი საგზაო მაგისტრალის მნიშვნელობას კიდევ უფრო ზრდის ის ფაქტი, რომ ამ

347 მთხრობელები პომპეას (პომპეუსს?) და ერასტოს (იუსტინიანეს) ბერძენების ქარის მთავარსარდლებად თვლიან, რომლებიც სამეგრელოს დასხმიან თავზე და ამ გზაზე გაუვლიათ. იხ. გ. ელიავა, გ. ფარულავა, გ. შენგელია; ჩხოროწყუს რაიონის ტოპონიმის კატალოგი. თბ., 1983, გვ. 59—106; გ. ელიავა. აბაშისა და გეგეკორის რაიონების ტოპონიმია. თბ., 1977, გვ. 59—146.

გზაზე, მის დასაწყისში, ცხენისწყლის მარჯვენა ნაპირზე, სოფ. დიდ-
ღვებუნასთან არსებობს მასშტაბური ციხის ნანგრევები, რომელსაც
მკვლევართა ერთი ნაწილი ადრებიზანტიური ხანის, დიდი სტრატეგი-
ული მნიშვნელობის მქონე ციხე-სიმაგრის, უქიმერიონის ნაშთად მი-
იჩნევს³⁴⁸.

ეს ციხე დგას ორი მთავარი საგზაო მაგისტრალის გადაკვეთის
წერტილში, რომელთაგან ერთ-ერთი ლაზიკეს ბარს სკვიმნია-სვანეთ-
თან აკავშირებდა³⁴⁹, ხოლო მეორეთი ქუთაის-მოხირისის ქვეყანას
შიდა ეგრისის აღმოსავლეთ კიდეზე გამავალი, ე. წ. „ზედა სამეგრე-
ლოს გზით“, აფშილეთსა და მისიმიანეთს უკავშირდებოდა³⁵⁰.

მდ. ენგურზე პალურ-ფახულანის ფონით გადასვლის შემდეგ,
ხსენებული საგზაო მაგისტრალი გაივლიდა ნოჯიხევს, ლუმურიშს,
ჩხორთოლს, ნოჯიხევს, ბედიას, სოფ. ნეასთან გაოაკვივთა კოდორს
და წიბოლა-წიბელდასთან უნდა შეერთებოდა მოაჯარ საგზაო მაგის-
ტრალს, რომელიც „საფხაზო გზის“ სახელით არის ნობილი და ზღვას
სანაპიროს მარუხის უღელტეხილით ჩრდილოეთ კავკასიასთან აკავში-
რებს³⁵¹.

ყოველივე ზემოთქმულიდან გამომდინარე, აშკარაა, თუ რა დიდი
მნიშვნელობა ჰქონდა ხსენებულ მაგისტრალს ადრებიზანტიურ ხანაში
და ალბათ, ბევრად უფრო ადრეც, რის გამოც საესებით ბუნებრივი
იქნებოდა TP რუკაზე ასახული სებასტოპოლისაკენ მიმავალი სახმე-
ლეთო გზის მონაკვეთი მას დამთხვეოდა. მაგრამ ეს რომ ასე არ უნ-
და იყოს, ამას, პირველ რიგში, ისევ ის მოწმობს, რომ მანძილი ვარდ-
ციხიდან სოხუმამდე 200 კმ-ს აღემატება, მეორე მხრივ, რუკაზე ასე-
ვე არ არის ასახული ქ. ქუთაისი, სადაც უკანასკნელ წლებში ჩატა-

348 ი. ს ი ხ ა რ უ ლ ი ძ ე. „უხიმიერიონის“ ადგილმდებარეობის საკითხისათვის, წულუკიძის მხარეთმცოდნეობის მუზეუმი. — თბილისის სახელმწიფო უნივერსი-
ტეტის 50 წლისთავისადმი მიძღვნილი სამეცნიერო სესიის მასალები. II. წულუკიძე,
1968; დ. მ უ ს ხ ე ლ ი შ ვ ი ლ ი. საქართველოს ისტორიული გეოგრაფიის ძირითადი
საკითხები. I. თბ., 1977, გვ. 116—117.

349 დ. მ უ ს ხ ე ლ ი შ ვ ი ლ ი. დასახ. ნაშრ. გვ. 117.

350 გ. გ რ ი გ ო ლ ი ა. ეგრის-ლაზიკის სამეფოს უმთავრესი საგზაო არტერიები.
თბ., 1984, გვ. 165.

351 ს. ჭ ა ნ ა შ ი ა. შრომები. VI. 1988, გვ. 283; დ. მ უ ს ხ ე ლ ი შ ვ ი ლ ი.
დასახ. ნაშრ. გვ. 118.

რებული ფართო მასშტაბის გათხრითი სამუშაოების საფუძველზე, ახ. წ. IV—VI სს. ქალაქის მონუმენტური ნაშთებია აღმოჩენილი³⁵².

ასევე, რუკაზე ადგილი ვერ მოენახა წებელდას, რომელიც, როგორც არქეოლოგიური გათხრების შედეგად მოპოვებული მასალები მოწმობენ, სწორედ, რუკის შექმნის თანადროული, მნიშვნელოვანი ეკონომიკური და პოლიტიკური ცენტრი უნდა ყოფილიყო³⁵³.

ყოველივე აქედან გამომდინარე, უდავოა, რომ კასტორიუსს რუკის შექმნისას არც ეს საგზაო მაგისტრალი უნდა ჰქონოდა მხედველობაში.

ამრიგად, გამორიცხვის მეთოდის გამოყენებით, ვარციხიდან გზოსული საგზაო მაგისტრალის დასადგენად გვრჩება ერთადერთი დასავლეთის მიმართულება, სადაც გურია-აჭარის ქედის ძირბაზე გამავალი გზა ციხისძირთან უნდა გასულიყო ზღვის სანაპიროზე და აქედან სამხრეთით ბიზანტიონის მიმართულებით უნდა აედო გეზი. ინტერესს არ არის მოკლებული, რომ სწორედ ამ მიმართულებით, ყოველ შემთხვევაში, მდ რიონ-ფასისის მარცხენა ნაპირზე, რამდენადმე სამხრეთით არქანჯელო ლამბერტი, ძველად, ქ. სებასტოპოლისის არსებობაზე მიუთითებს, რომელიც ფრანგული გამოცემის რუკაზეც ჰქონია დატანილი ფოთის ქვემოთ (სამხრეთით)³⁵⁴.

არქანჯელო ლამბერტის სიტყვით, ფასისის შესართავთან არსებობდა ქ. სებასტოპოლისი, რომელიც მის დროს წყლის ქვეშ ყოფილა მოქცეული³⁵⁵.

ს. ჯანაშიას აზრით, ეს სებასტოპოლისი არქანჯელო ლამბერტს მოქვისა და მარმარის სებასტოპოლისთან უნდა ჰქონდეს არეული³⁵⁶. ნ. ლომოურის ვარაუდით კი, არქანჯელო ლამბერტს სებასტოპოლისის

³⁵² ი. ლ ა ნ ჩ ა ვ ა. ქუთაისი წინაფეოდალურ ხანაში (ისტორიულ-არქეოლოგიური გამოკვლევა). თბ., 1975, გვ. 167 (ხელნაწერი).

³⁵³ Ю. В о р о н о в. Тайна Цебельдинской долины. М., 1975; Ю. В о р о н о в, О. Б г а ж б а. Материалы по археологии Цебельды (Итоги исследований Цибиллиума в 1978—1982 г. г.). Тбилисы, 1985; Ю. В о р о н о в, В. Ю ш и н. Новые памятники Цебельдинской культуры в Абхазии.—СА-1973, №1, с. 171—191

³⁵⁴ ს. ჯ ა ნ ა შ ი ა. შრომები. VI. თბ., 1988, გვ. 281.

³⁵⁵ ნ. ლ ო მ ო უ რ ი. კლავდიოს პტოლემეოსი. „გეოგრაფიული სახელმძღვანელო“. გვ. 51.

³⁵⁶ ს. ჯ ა ნ ა შ ი ა. დასახ. ნაშრ., გვ. 281—283.

ლოკალიზაციის ხსენებული ვარიანტი პტოლემეოსის გეოგრაფიული სახელმძღვანელოდან უნდა ჰქონდეს აღებული³⁵⁷.

ჩვენი აზრით, არქანჯელო ლამბერტის ხსენებული ცნობის ახსნა დაუმსახურებლად არის გამარტივებული და ფაქტიურად უარყოფილია.

განა რატომ უნდა გამოირიცხოს იმის შესაძლებლობა, რომ არქანჯელო ლამბერტის კოლხეთში მოღვაწეობის დროს ხალხის მეხსიერებაში ჭერ კიდევ იყო შემორჩენილი ცნობა, სადაღაც რიონის სამხრეთით ქ. სებასტოპოლისის არსებობის შესახებ, ისევე როგორც უნდა ეარსება და დღესაც არსებობს ლეგენდა დიდი ქალაქის (ფასისის) პალიასტომის ტბაში დაძირვის შესახებ³⁵⁸, რომელსაც სავსებით რეალური საფუძველი გააჩნია³⁵⁹.

საფიქრებელია, რომ სწორედ ასეთი რეალური საფუძველის მქონე ორი ლეგენდის შეერთების შედეგად უნდა იყოს მიღებული არქანჯელო ლამბერტის ცნობა რიონის სამხრეთით დაძირული ქალაქის არსებობის შესახებ.

უთუოდ საყურადღებოა ის ფაქტიც, რომ TP-ის რუკაზე ასახული საგზაო მარშრუტის ბოლო მონაკვეთი სწორედ, რიონის სამხრეთი რაიონებისაკენ მიემართება.

როგორც სწორად არის აღნიშნული, კასტორიუსის რუკის დანიშნულება იმთავითვე უნდა ყოფილიყო ვაკრებისა და მოგზაურთათვის გზების მიმართულებისა და ცალკეულ პუნქტებს შორის მანძილების ჩვენება³⁶⁰. როგორც წესი, ყოველგვარი გეოგრაფიული რუკისათვის და განსაკუთრებით, საგზაო რუკისათვის უპირველესი ამოცანაა ცალკეული ობიექტების ადგილმდებარეობის გარკვევა, ურთიერთმიმართების ჩვენება ქვეყნის მხარეების მიხედვით და შესაბამისად, საგზაო მაგისტრალების საერთო მიმართულების დადგენა კარტოგრაფიული ხერხებით.

357 ნ. ლ ო მ ო უ რ ი. ძველი საქართველოს სივარდო გზების საკითხისათვის. გვ. 108—109.

358 გ. გ რ ი გ ო ლ ი ა. ქალაქ ფასისის ლოკალიზაციისათვის. — სამეცნიერო სესია, მიძღვნილი ქალაქ ფასისის ლოკალიზაციის პრობლემებისათვის. თბ., 1973, გვ. 54—55.

359 ქ. ჭ ა ნ ე ლ ი ძ ე. ფასისის ლოკალიზაციის გეოგრაფიული ასპექტი. — სამეცნიერო სესია, მიძღვნილი ქ. ფასისის ლოკალიზაციის პრობლემისადმი. თბ., 1973, გვ. 5—16; გ. გ რ ი გ ო ლ ი ა. დასახ. ნაშრ., გვ. 36—45.

360 ნ. ლ ო მ ო უ რ ი. დასახ. ნაშრ. გვ. 100.

რა ხასიათისაც არ უნდა იყოს რუკა და როგორი ავტორიტეტიც არ უნდა სარგებლობდეს მისი ავტორი, არავითარ შემთხვევაში არ ეპატიება მას მიმართულებათა აღრევა და თუკი ასეთი რამ მოხდა, რუკა იქნება თუ სხვა დოკუმენტი, დაკარგავს თავის უპირველეს და უმთავრეს მნიშვნელობას.

მართალია, კასტორიუსის რუკა, პუნქტების სიგრძივად დატანის მეთოდით, გარეგნულად განსხვავდება იმ დროისათვის ცნობილი მსოფლიო რუკებისაგან (მაგალითად: ერატოსთენეს, პტოლემეოსის და სხვა რომაული რუკებისაგან), მაგრამ გზათა მიმართულება არსებითად, სწორად არის გადმოცემული და ამ მხრივ აქ საგანგაშო არაფერია³⁶¹.

როგორც უკვე ითქვა, კასტორიუსის რუკის მიხედვით, არტაშატ-სებასტოპოლისის მაგისტრალი არტაშატიდან მოკიდებული ჩრდილო-დასავლეთისაკენ მიემართება და მიაღწევს რა Ad fontem felicem-ს (ვარდციხეს), მკვეთრად იხრება დასავლეთისაკენ და რამდენადმე სამხრეთ-დასავლეთისაკენაც კი. ყოველ შემთხვევაში, გზა ჩრდილო-დასავლეთით აღარ გრძელდება, სადაც დიოსკურია-სებასტოპოლისი მდებარეობს. ამდენად, ესეც TP-ს რუკის სებასტოპოლისისა და დიოსკურია-სებასტოპოლის გაიგივების საწინააღმდეგოდ მეტყველი კიდევ ერთი ფაქტია.

კასტორიუსის რუკის ჩვენთვის საინტერესო მაგისტრალის უკანასკნელი მონაკვეთის მიმართულების გათვალისწინებით ქალაქი სებასტოპოლისი საძიებელია ვარდციხიდან დასავლეთით დაახლოებით 40 კმ მანძილზე, როგორც ეს რუკაზეა ნაჩვენები.

ვარდციხიდან დასავლეთით, ე. ი. ჩვენთვის ამჟამად საინტერესო მიმართულებით, არსებობს სამეცნიერო ლიტერატურაში პეტრას სახელით ცნობილი ციხისძირი (იხ. რუკა).

ციხისძირი ვარდციხიდან დასავლეთით მდებარეობს, მისგან დაახლოებით 90 კმ მანძილზეა დაშორებული და ამ მხრივ სავსებით აკმაყოფილებს არტაშატ-სებასტოპოლისის მაგისტრალის ბოლო მონაკვეთის ამ მოთხოვნასაც. თუ ხსენებული მარშრუტის ჩვენებული გაგება სწორია, მაშინ მისი უკანასკნელი პუნქტი სებასტოპოლისი ციხისძირი უნდა იყოს, რაც პტოლემეოსის რუკის მიხედვითაც ივარაუდება.

არტაშატ-სებასტოპოლისის მაგისტრალი სწორედ ციხისძირთან უნდა შეხვედროდა შავიზღვისპირეთის გასწვრივ გამავალ გზას, რო-

361 ნ. ლომოური. დასახ. ნაშრ. გვ. 100.

მელიც რომის აღმოსავლეთ პროვინციებს დასავლეთ საქართველოს-თან აკავშირებდა.

ამრიგად, ციხისძირი ძალზე მნიშვნელოვანი, ძველი გზების შესაყართან მდებარე პუნქტი ჩანს და მის ხელსაყრელ რელიეფურ მონაცემებთან ერთად, ეს უკანასკნელიც განმსაზღვრელი ფაქტორი უნდა ყოფილიყო ადრინდანვე მისი ეკონომიკური და პოლიტიკური აღზევებისა.

ახ. წ. IV—V სს. ციხისძირში ქალაქის არსებობის დამადასტურებელი მატერიალური კულტურის ნაშთები მრავლად არის გამოვლენილი არქეოლოგიური კვლევა-ძიების შედეგად³⁶², როგორც უშუალოდ ნაციხარის ტერიტორიაზე, ისე ზღვისპირა დაბლობში, ბობოყათის უბანში³⁶³, რაზეც ზემოთ უკვე გვქონდა საუბარი.

უშუალოდ ციხეზე გამოვლენილი ძეგლებიდან განსაკუთრებით საყურადღებოა სამხრეთ ბორცვზე, კოშკის ნანგრევებთან და კარიბჭის უბანში შესწავლილი IV—VI საუკუნეების კულტურული ფენები, ჩრდილო ბორცვის თხემზე გათხრილი, V საუკუნით დათარიღებული, თლილი ქვით ნაგები ხუთწახანაგა აფსიდიანი და სვეტებიანი სამნავიანი: ბაზილიკა, რომლის ქვეშ შედის კიდევ უფრო ადრინდელი ტაძრის კედლები³⁶⁴, ხუთგანყოფილებიანი აბანო³⁶⁵, ქარვასლის ნაშთი³⁶⁶, V ს. ამფორები და 1962 წ. სამნავიანი ბაზილიკის სამხრეთ კედელთან აღმოჩენილი იმპერატორ იუსტინესა თუ ანასტასის მონეტა³⁶⁷ და სხვ.

³⁶² ციხისძირის არქეოლოგიურ კვლევა-ძიებას სათავე დაუდო აკად. ს. ჯანაშიამ, რომელმაც მცირე გათხრითი სამუშაოები ჩაატარა ციხის ტერიტორიაზე (იხ. მისი შრომები. I. გვ. 44), 1962 წლიდან კი აქ სისტემატურ, ფართო მასშტაბის საძიებო სამუშაოებს აწარმოებს სამხრეთ-დასავლეთ საქართველოს არქეოლოგიურ ექსპედიცია, რომელსაც ადრე სათავეში ედგა აკად. ნ. ბერძენიშვილი, შემდეგ დოც. ა. ინაიშვილი და ამჟამად დიდის წარმატებით ხელმძღვანელობს აკად. წ/კ. დ. ხაბუთაიშვილი.

³⁶³ ა. ინაიშვილი. საქართველოს სსრ მეცნიერებათა აკადემიის ბათუმის სამეცნიერო-კვლევითი ინსტიტუტის მუშაობის შედეგები და პერსპექტივები. — სამხრეთ-დასავლეთ საქართველოს კულტურა და ყოფა. II. თბ., 1974, გვ. 8—9; მისივე. პეტრა-ციხისძირში 1962—1965 წწ. ჩატარებული გათხრების შედეგები. IV. თბ., 1974, გვ. 118—113.

³⁶⁴ ა. ინაიშვილი. პეტრა-ციხისძირში 1962—1965 წწ. ჩატარებული გათხრების შედეგები. გვ. 125—126, 129.

³⁶⁵ ა. ინაიშვილი. დასახ. ნაშრ. გვ. 132—133.

³⁶⁶ იქვე. გვ. 141.

³⁶⁷ იქვე. გვ. 128.

მთელი ეს საყურადღებო მასალა იმაზე მიგვანიშნებს, რომ თვით ბორცვებზეც კი ქალაქური ცხოვრების ფესვები წინ უსწრებს VI საუკუნეს, ანუ ე. წ. „პეტრა-ციხის“ დაარსების პერიოდს. უკანასკნელი წლების გათხრებმა კიდევ უფრო საგულისხმო მასალები გამოავლინა ბორცვების ძირბაზე, ბობოყვათ-სანერგეს უბანში. აქ, ჯერ კიდევ 1959 წელს, მიგნებული იქნა IV—V სს. წითელაკიანი კერამიკის შემცველი ფენა და სამნავიანი ბაზილიკა³⁶⁸, რომლის შესწავლის დროს (1966 წ.) მოპოვებული იქნა მარმარილოს სვეტის ნატეხი, კაპიტელი, მოზაიკის ფრაგმენტები, ქვა ბოლნური ჯვრის გამოსახულებით და სხვ.³⁶⁹ განსაკუთრებით ნაყოფიერი და მრავლისმთქმელი გამოდგა ნ. ბერძენიშვილის სახ. ბათუმის სამეცნიერო-კვლევითი ინსტიტუტის არქეოლოგიური ექსპედიციის მიერ (ხელმძღვ. დ. ხახუტაიშვილი) ქ. კიევის სანერგე მეურნეობის ტერიტორიაზე 1985—1988 წლებში წარმოებული ფართო მასშტაბის არქეოლოგიური სამუშაოები, რის შედეგადაც გამოვლინდა სხვადასხვა ასაკისა და ხანათის პირველხარისხოვანი ძეგლები, რომელთა ქრონოლოგიური დიაპაზონი მოქცეულია წინარე ანტიკური ხანისა და ადრე შუასაუკუნეების ჩარჩოებში³⁷⁰.

სანერგეს ტერიტორიაზე გამოვლენილი არქიტექტურული ძეგლებიდან განსაკუთრებით საყურადღებოა ორი აბანოს აღმოჩენის ფაქტი, რომლებიც, თანმხლები მონეტებისა და სხვა სახის არქეოლოგიური მასალის მიხედვით, ახ. წ. IV საუკუნით თარიღდებიან. დაახლოებით ასეთივე ასაკისაა სანერგის ცენტრალურ ნაწილში აღმოჩენილი დიდი ზომის (600 მ²) საზოგადოებრივი ნაგებობა (სასახლე), რომელიც სხვადასხვა ფუნქციის (აბანო, ეკლესია) შენობებს აერთიანებს³⁷¹.

ციხისძირის არქეოლოგიური მონაპოვრის უმეტეს ნაწილს შეადგენს კერამიკული მასალა, რომელშიც შედის სამეურნეო და სითხი-

³⁶⁸ ა. ი ნ ა ი შ ვ ი ლ ი. დასახ. ნაშრ. გვ, 149,

³⁶⁹ ი ქ ე ე, გვ. 120, 147—148.

³⁷⁰ ნ. ი ნ ა ი შ ვ ი ლ ი. სამხრეთ-დასავლეთ საქართველოს ძველი ქალაქები (ციხისძირი). ისტორიის მეცნიერებათა კანდიდატის სამეცნიერო ხარისხის მოსაპოვებელი დისერტაცია, თბ., 1990, გვ. 71—170 (ხელნაწერი); Н. А. И п а н ш в и л и. Петра-Цихидзирри?, Тбилиси, 1991. с. 1—15.

³⁷¹ ნ. ი ნ ა ი შ ვ ი ლ ი. ციხისძირის გვიანანტიკური ხანის აბანოები. — სამხრეთ-დასავლეთ საქართველოს ძეგლები. XVII. თბ., 1988, გვ. 118—146.

სათვის განკუთვნილი, სამზარეულო და სუფრის ჭურჭლის ფრაგმენტები.

როგორც მოპოვებული მასალის (კერამიკული ტარა ამფორების სახით, წითელლაკიანი კერამიკა) შესწავლის შედეგები მოწმობენ, ციხისძირის კულტურული ფენა, ზოგადად, ახ. წ. IV—VI სს. თარიღდება, მაგრამ აშკარად სჭარბობს IV—V სს. მასალები³⁷².

ციხისძირში მნიშვნელოვანი რაოდენობითაა მოპოვებული, აგრეთვე, სხვადასხვა სახის მინის ჭურჭლის ნატეხები (ნახევარსფერული ჯამები, ან ფიალები, ცილინდრული და წაკვეთილი კონუსის მოყვანილობის ტიქები, ფეხიანი სასმისები და სხვ.) და სარკმლის მინის ფრაგმენტები.

ციხისძირში წარმოდგენილი მინის ჭურჭლის დიდი ნაწილი ფორმებით, დამუშავების ხერხებით, შემკულობის მოტივებითა და სახეებით, ახ. წ. 256 წ. შემდგომი ხანის სირიულ-პალესტინურ პროდუქციასთან იჩენს მსგავსებას, რაც, სხვა მასალასთან ერთად, მიუთითებს მის მჭიდრო პოლიტიკურ, სავაჭრო-ეკონომიკურ და კულტურულ კავშირურთიერთობაზე აღმოსავლეთ რომის პროვინციებთან, გვიანრომულ ადრებიზანტიურ ხანაში³⁷³.

ციხისძირის ხსენებული სანერგეს ტერიტორიაზე წარმოებული ქვათხრების შედეგად (1983—1987 წწ.) გამოვლენილი და შესწავლილი იქნა 14 სამარხი (ორმოსამარხები და ამფორასამარხები). მრავალფეროვანი სამარხეული ინვენტარის — კერამიკული ჯამ-ჭურჭლის, მინის ნაკეთობათა, ტანსაცმელთან დაკავშირებული ნივთებისა და რკინის იარაღების (დანები, ცულები, შუბისპირები, სატევარი და სხვ.) — შესწავლის საფუძველზე ყველაზე ადრეული სამარხი ახ. წ. III ან IV ს. დასაწყისი ხანით თარიღდება, ხოლო გვიანდელი V ს. დასასრულითა და VI ს. I ნახევრით³⁷⁴. ამრიგად, ციხისძირში აღმოჩენილი სამარხების ასაკი, ზოგადად, ვრცელი ქრონოლოგიური პერიოდით განისაზღვრება (ახ. წ. III—VI სს.), თუმცა აღსანიშნავია, რომ მათი უმრავლესობა მაინც ახ. წ. IV—V სს. თარიღდება³⁷⁵.

ციხისძირის მონაპოვართა შორის განსაკუთრებული ადგილი უჭირავს მრავალრიცხოვან ნუმიზმატიკურ მასალას, რომელშიც შედის

372 ნ. ი ნ ა ი შ ვ ი ლ ი. სამხრეთ-დასავლეთ საქართველოს ძველი ქალაქები (ციხისძირი). გვ. 83—97.

273 ნ. ი ნ ა ი შ ვ ი ლ ი. დასახ. ნაშრ. გვ. 97—123.

374 ნ. ი ნ ა ი შ ვ ი ლ ი. დასახ. ნაშრ. გვ. 123—147.

375 იქვე.

ოქროს, ვერცხლისა და სპილენძის ნაწარმი. აღნიშნული მონეტების შესწავლა წარმოდგენას გვიქმნის ახ. წ. I—VI სს. სამონეტო მიმოქცევის ხასიათზე სამხრეთ-აღმოსავლეთ შავიზღვისპირეთში, რომელიც ამ თვალსაზრისით თეთრ ლაქას წარმოადგენდა. ნუმისმატიკური მონაცემები მეტ შუქს ჰყვანს გამოვლენილი ნამოსახლარის რაობასა და ქრონოლოგიის საკითხებს.

ციხისძირის ვერცხლის მონეტები ახ. წ. I—III სს. (დომიციაზე, ადრიანზე, ანტონინე პიუსი, სეპტიმიუს სევერი, კარაკალა, გორდიანე III) განეკუთვნება, ხოლო მათთან ერთად აღმოჩენილი სპილენძის მონეტები III—IV სს. თარიღდება³⁷⁶.

ციხისძირის სამონეტო მიმოქცევაში დიდი ადგილი უჭირავს კესარიულ მონეტებს. ნ. ინაიშვილის აზრით, ვერცხლის მონეტები, რომლებიც I—III სს. თარიღდებიან, აქ უფრო მოგვიანო ხანაში უნდა ყოფილიყვნენ მიმოქცევაში³⁷⁷.

საგულისხმოა, რომ სპილენძის მონეტებში, რომლებიც III ს. ბოლოსა და IV ს. განეკუთვნებიან, არ ჩანს ტრაპეზუნტის სპილენძის საქალაქო მონეტები, რომელთა ემისია III ს. შუა ხანებში შეწყდა³⁷⁸. როგორც ცნობილია, სპილენძის მონეტები, ძირითადად, კოლხეთის სანაპირო ქალაქებში და იმ პუნქტებში იყო გავრცელებული, სადაც რომაული გარნიზონები იდგა. ნუმისმატიკური და არქეოლოგიური მონაცემების შეჯერების საფუძველზე, ციხისძირის მიდამოებში რომელთა დასაყრდენი პუნქტის გაჩენა III ს. მიწურულსა და IV ს. დასაწყისშია სავარაუდებელი, რასაც, გარკვეულად, მხარს უბამს ციხისძირში აღმოჩენილი შტამპიანი აგურიც³⁷⁹.

როგორც გათხრების შედეგად გამოვლენილი არქიტექტურული ძეგლები მოწმობენ, რომაულ გარნიზონებს ციხისძირში ფართო სამშენებლო საქმიანობა ჩაუტარებიათ³⁸⁰.

IV ს. დასასრული ხანისა და V ს. მონეტები ციხისძირის მასალებში არ არის წარმოდგენილი, რაც, ნ. ინაიშვილის აზრით, რომის იმპერიაში მიმდინარე ფულის დევალვაციისა და ინფლაციის შედეგით

376. ინაიშვილი. დასახ. ნაშრ. გვ. 147—149; ნ. ინაიშვილი. ი. ი. ა. შვილი. I—VI სს. ნუმისმატიკური ძეგლები ციხისძირიდან. — სამხრეთ-დასავლეთ საქართველოს ძეგლები. XX. თბ., 1991.

377 ნ. ინაიშვილი. დასახ. ნაშრ. გვ. 149—150.

378 იქვე. გვ. 150.

379 იქვე.

380 იქვე.

უნდა აიხსნას, რის გამოც IV ს. დასასრულს ჯარისკაცებს შეუწყვიტეს ფულადი ანაზღაურება³⁸¹. რომის სპილენძის მონეტები, უმთავრესად, აღმოსავლეთის ზარაფხანებშია (ანტიოქია, ქიზიკი, თესალონიკა) მოჭრილი³⁸². IV ს. მეორე ნახევარსა და V ს. მონეტები ციხისძირში და საერთოდ, კოლხიდაში თითქმის არ შემოდიოდა, რაც, მკვლევართა აზრით, თვით რომის იმპერიაში არსებულ კრიზისით უნდა აიხსნას³⁸³. სიტუაცია მკვეთრად იცვლება VI საუკუნეში, რასაც მოწმობს კონსტანტინოპოლში მოჭრილი სპილენძის მონეტების მოზღვაება³⁸⁴.

ნუმიზმატიკური და სხვა არქეოლოგიური მონაცემების საფუძველზე მკვლევრები ასკვნიან, რომ ციხისძირის მიდამოებში რომაელთა გარნიზონები ფეხს იკიდებენ III ს. მიწურულს, ხოლო IV—V სს. მათ უკვე ძლიერი დასაყრდენი პუნქტი გააჩნიათ აქ, რომელიც დიდ როლს ასრულებს ეგრის-ბიზანტიის ურთიერთობაში VI საუკუნეშიც³⁸⁵.

როგორც ციხისძირში მოპოვებული უტყუარი არქეოლოგიური ფაქტებით დასტურდება, წინარე ანტიკური ხანიდან დაწინაურებული ეს პუნქტი და მისი შემოგარენი განსაკუთრებით აღმავლობას განიცდის ახ. წ. IV საუკუნეში, რაც იმ საგზაო მაგისტრალების ეკონომიკური და სტრატეგიული მნიშვნელობის გაძლიერებით უნდა აიხსნას, რომელთა შეხვედრის წერტილში მდებარეობს თანამედროვე ციხისძირი, ანუ, ჩვენი ვარაუდით, გვიანრომაული ხანის სებასტოპოლისი, სადაც, კასტორიუსის მიერ შედგენილი რუკის მიხედვით, მთავრდებოდა კაბადოკიის პროვინციაში შემავალი, სომხეთის დედაქალაქ არტაშატიდან წამოსული მნიშვნელოვანი საგზაო მაგისტრალი. ყოველ შემთხვევაში, TP-ს რუკის ხსენებული საგზაო მაგისტრალის მიმართულების გათვალისწინებითა და მანძილების ჩვენებით, შავიზღვისპირეთის აღმოსავლეთ სანაპიროზე ციხისძირ-სებასტოპოლისის იდენტიფიკაციისათვის უკეთესი ვარიანტი არ გვეგულება, რასაც სავსებით უბამს მხარს როგორც შემთხვევითი, ისე მიზანდასახული მეცნიერული კვლევა-ძიების შედეგად მოპოვებული მრავალფეროვანი, ბრწყინვალე არქეოლოგიური მასალებიც.

381 ნ. ი ნ ა ი შ ვ ი ლ ი. დასახ. ნაშრ. გვ. 151.

382 იქვე. გვ. 154.

383 იქვე. გვ. 155.

384 იქვე.

385 იქვე.

განხილული ფაქტის სახით იმ ბედნიერ შემთხვევასთან გვაქვს საქმე, როცა, ნ. ბერძენიშვილის სიტყვები რომ ვიხმართ, ესა თუ ის პუნქტი ჩნდება მნიშვნელოვან გზათა შესაყართან, ან ამ გზების გაღლენით წინაურდება, როგორც ეკონომიკური, პოლიტიკური და ადმინისტრაციული ცენტრი, რომელიც „არა მარტო გზის ყელზე იდგა, არამედ გზას თავისკენ ეწეოდა“³⁸⁶. საყურადღებოა, რომ ადგილობრივი მოსახლეობა ამ ადგილს დღესაც „ნაქალაქუარს“ უწოდებს³⁸⁷, სადაც სხვადასხვა მხარეებიდან და ქალაქებიდან ნაევებით მოდიოდა სავაჭრო საქონელი და აქედანაც გადიოდა გასაყიდად ბევრი რამ. „ამ ქალაქს თითქოს დუქნებიც გააჩნდა და რქ მეტწილად ვაჭრები ცხოვრობდნენ თავიანთი ცოლ-შვილით“³⁸⁸. აქ კიდევ ერთხელ უნდა გავიხსენოთ იმერეთის მეფის სარდალთუხუცესის ზ. წერეთლის მიერ 1884 წ. პოტიომკინისადმი მირთმეული წერილი, სადაც ეს ადგილი ძველ ნაქალაქარად და სავაჭრო ადგილად იხსენიება³⁸⁹.

ასეა თუ ისე, ერთი უდავოა, რომ II—V სს., და, ალბათ, მომდევნო პერიოდშიც, ციხისძირი მნიშვნელოვანი ქალაქური პუნქტი უნდა ყოფილიყო. რომელიც უმოკლესი გზით უკავშირდებოდა რომის ერთ-ერთი აღმოსავლეთი პროვინციის — სომხეთის — დედაქალაქ არტაშატს, რომელიც, თავის მხრივ, ე. წ. დიდ სამეფო გზასთან დაკავშირებული მნიშვნელოვანი საკვანძო პუნქტია³⁹⁰.

ისეთ სტრატეგიული მნიშვნელობის პუნქტში, როგორც ციხისძირი-სეზანსტაპოლისი უნდა ყოფილიყო, ციხე-სიმაგრის აგება და ჯარის ჩაყენება, რომის ხელისუფალთა მიერ გატარებული, შორს გამიზნული ადმინისტრაციულ-პოლიტიკური ღონისძიება ჩანს, რაზეც ქვემოთ გვექნება საუბარი.

როგორც ცნობილია, „პონტოს ლიმესის“ სისტემაში შემავალი ადრინდელი სიმაგრეების შესახებ სამი წერილობითი წყარო მოიპოვება. რომლებშიც მეტ-ნაკლები სისრულით ჩამოთვლილია ის პუნქტები, სადაც რომაული კასტელები თუ მათი ჯარის ბანაკები არსებობდა. ესენია: პლინიუსის „ბუნების ისტორია“, არიანეს „პერიპლუ-

386 ნ. ბერძენიშვილი. ძველი თბილისის ტოპონიმიებიდან (აგარანი). — მიმომხილველი. II. თბ., 1951, გვ. 41.

387 ალ. ქათამაძე. პეტრას ციხე-ქალაქის შესახებ. — საბჭოთა აკარა. № 178, 1963, 9 სექტემბერი.

388 ალ. ქათამაძე. იქვე; ა. ინაიშვილი. დასახ. ნაშრ. გვ. 79—81.

389 ს. ჯანაშია. შრომები. I. 1949, გვ. 42.

390 ნ. ლომოური. დასახ. ნაშრ. რუკა № 2.

სი“ და ე. წ. *Notitia dignitatum*, რომლის სრული სათაურია: „ნუსხა, ყველა თანამდებობისა და მმართველობისა, როგორც სამოქალაქო, ისე სამხედროსი, აღმოსავლეთისა და დასავლეთის მხარეებში“³⁹¹. პირველი ორი, როგორც ზემოთ დავინახეთ, ციხისძირის შესახებ არაფრის მთქმელია, რაც შეეხება მესამეს, მასში ჩვენთვის საინტერესო საკითხთან დაკავშირებით შეიძლება საგულისხმო ცნობები ამოიკრიფოს.

Notitia dignitatum V საუკუნის დასაწყისის ძეგლია, სადაც აღმოსავლეთის მმართველთა სიაში დასახელებულია არმენიის სარდალი, რომელსაც ექვემდებარება მთელი „პონტოს სასაზღვრო ხაზი“. არმენიის სარდალს ექვემდებარება, ერთი მხრივ, ის სამხედრო ერთეულები, რომლებიც შიდა არმენიაში დგას, ხოლო, მეორე მხრივ, პოლემონის პონტოში ჩაყენებული დანაყოფები. ამ უკანასკნელს ეკუთვნიან: ტრაპეზუნტი, რიზე, პითია, ვალენტია, ისულიმენი, კენე პარემბოლე, სებასტოპოლი, ზიგანე და მოხორა. ამ პუნქტებიდან ტრაპეზუნის, რიზეს, ისულიმენეს (სიურმენე) და კენე პარემბოლეს (ახალი ბანაკი) ადგილმდებარეობა მეტ-ნაკლებად გარკვეულია და მათი ლოკალიზაცია დავის საგანს არ წარმოადგენს³⁹². რაც შეეხება დანარჩენ ხუთ პუნქტს — პითიას, ვალენტიას, სებასტოპოლისს, ზიგანეს და მოხორას — მათ შესახებ მკვლევართა შორის აზრთა სხვადასხვაობა არსებობს.

მაგალითად, პითია, ნ. ხოშტარის ვარაუდით, ქობულეთ-ფიჭვნარ-ციხისძირის ძველი სახელწოდება უნდა იყოს³⁹³. ს. ყაუხჩიშვილის აზრით, ზიგანე გულდაყვა-ზიგანეა, პითია პიტეუს-ბიჭვინთაა, სებასტოპოლისი დიოსკურია-სებასტოპოლისია, ხოლო მოხორა ბიზანტიელი ისტორიკოსების (პროკოპი კესარიელი, აგათია) მუხურისი უნდა იყოს³⁹⁴. ამ პუნქტების ს. ყაუხჩიშვილისეული განსაზღვრა ყოველგვარი კრიტიკის გარეშე გაიზიარა ა. ლექვინაძემ „პონტოს ლიმესის“ შესწავლისას. მასვე ეკუთვნის ორიგინალური მოსაზრება ვალენტიას ლოკალიზაციის შესახებ. მისი ვარაუდით, ვალენტია უნდა იყოს აფსაროსის ახალი სახელწოდება, რომელიც უნდა შერქმეოდა მას რესტავრაციის შემდეგ, ვალენტის (364—375 წწ.) მმართველობის დროს.

³⁹¹ გეორგიკა. I. ტექსტი ქართული თარგმანიურთ გამოსცეს და განმარტებები დაურთეს ალ. გამყრელიძემ და სიმონ ყაუხჩიშვილმა. თბ., 1961, გვ. 168—170.

³⁹² გეორგიკა. I. გვ. 175.

³⁹³ ნ. ხოშტარია. ციხისძირი. თბ., 1962, გვ. 35—36:

³⁹⁴ გეორგიკა. IV. ნაკვეთი მეორე. თბ., 1952, გვ. 181—193; მისივე. გეორგიკა. I. თბ., 1961, გვ. 176—178.

Notitia-ს სამთავარსარდლოებისა და აღმოსავლეთ შავიზღვისპირეთის ზოგიერთი პუნქტის სახელწოდებათა შორის, მართლაც, დიდი გარეგნული მსგავსება, მაგრამ, მიუხედავად ამისა, მათ გაიგივებას ბევრი საწინააღმდეგო მხარე გააჩნია. ჯერ ერთი, სხვა შემთხვევებში წყაროები უმეტესად პიტიუნტსა და სებასტოპოლისს ერთმანეთის გვერდით ასახელებენ, აქ კი ჯერ პითიაა დასახელებული, შემდეგ ვალენტია, ისულიმენი, კენე პარემბოლე და შემდეგ სებასტოპოლისი. ეს ფაქტი, ვ. ლეჟინაძეს ვარაუდით, ისე უნდა გავიგოთ, თითქოს აქ. პუნქტები დასახელებულია მათი სამხედრო მნიშვნელობის მიხედვით, რაც ნაკლებ დამაჯერებელია³⁹⁵.

როგორც არქეოლოგიური მასალები მოწმობენ, IV ს. დასასრულსა და V ს. დასაწყისში ბიჰვინთა-პიტიუნტი აშკარად დაქვეითებულია და საგანგებოდ გამორჩეულ, განსაკუთრებულ სამხედრო-სტრატეგიული მნიშვნელობის პუნქტს აღარ უნდა წარმოადგენდეს. ამის მოწმობაა თუნდაც ის ფაქტი, რომ ბიჰვინთის ნაქალაქარზე, იქ, სადაც გარნიზონის მთავარი სადგომი ნაგებობაა გამოვლენილი, IV საუკუნის ბოლოს კერამიკული ქურა გაუმართავთ³⁹⁶. ასევე მევეთრად კლებულობს მონეტების რაოდენობა და სხვ.³⁹⁷.

ასეთი ფაქტიური მონაცემების საფუძველზე, გ. ლორთქიფანიძე საერთოდ გამორიცხავს V საუკუნეში აქ ბიზანტიური გარნიზონის ყოფნას³⁹⁸.

ასევე ნაკლებად დამაჯერებელია „მოხორას“ მუხირისში ლოკალიზაცია. როგორც ცნობილია, ბიზანტიური ხანის მუხურისი შიდალაზიკაში მდებარეობს, სადაც ქუთაისის ქვეყნის მახლობლად, რომელიც VI ს. სპარსელებს უჭირავთ. ჩვენ არავითარი ცნობა არ გავაჩნია, არც წერილობითი და არც მატერიალური, რომელიც IV—V სს.

³⁹⁵ В. А. Леквинадзе. Указ. соч., с. 82.

³⁹⁶ М. П. Инадзе. Причерноморские города древней Колхиды. 1968, გვ. 263—266; რ. ფუთურიძე. ბიჰვინთის შიდაციხის ცენტრალური ნაწილის არქეოლოგიური გათხრების შედეგები. — დიდი პიტიუნტი. I, თბ., 1975, გვ. 127—131.

³⁹⁷ გ. დუნდუა. ბიჰვინთა-პიტიუნტი ნუმიზმატიკური მასალების მიხედვით. — სამეცნიერო სესია, მიძღვნილი 1962 წ. ჩატარებული საეკლესიო-არქეოლოგიური კვლევებისადმი. თბ., 1963, გვ. 62; მისივე. სამონეტო მისმოკვევა და სავაჭრო-ეკონომიური ურთიერთობანი ბიჰვინტაში ნუმიზმატიკური მასალების მიხედვით. ძვ. წ. II-ახ. წ. IV სს. — დიდი პიტიუნტი. I, თბ., 1975, გვ. 410—412; ა. აფაქიძე, დიდი პიტიუნტი — არქეოლოგიური გათხრები ბიჰვინტაში, — დიდი პიტიუნტი. I, თბ., 1975, გვ. 123.

³⁹⁸ გ. ლორთქიფანიძე. ბიჰვინთის ნაქალაქარი. თბ., 1991, გვ. 172.

ლაზიკაში რომაული გარნიზონების ყოფნაზე მიგვანიშნებს. ეს არის ეგრის-ლაზიკის სამეფოს ძლიერების ხანა და ასეთი რამ პრაქტიკულად გამორიცხულია.

გარდა ამისა, Notitia dignitatum-ის კონტექსტის მიხედვით აშკარად იგრძნობა, რომ წყაროში საუბარია ტრაპეზუნტის მომიჯნავე პუნქტებზე და არა ექსინოს-პონტოს უეიდურეს ჩრდილო წერტილებზე, სადაც ჩვენი პიტიუსი, სებასტოპოლისი და ზილანეოსი მდებარეობს.

ამის თაობაზე სწორად შენიშნა ნ. აღონცმა, რომ Notitia-ს შედგენისას პიტიუნტი და სებასტოპოლისი არ ეკუთვნოდა რომაელებს და დუკას (მმართველის) უფლებები ასე შორს არ შეიძლება გავრცელებულიყო³⁹⁹. იგი აქვე უთითებს Böcking-ს, რომელიც ასევე წინააღმდეგია ლაზიკის პიტიუნტისა და სებასტოპოლისის გაიგივებისა Notitia-ს პითიასა და სებასტოპოლისთან⁴⁰⁰.

ჩვენი აზრით, სავსებით დამაჯერებლად გამოიყურება ნ. აღონცის მიერ შემოთავაზებული ვარიანტი ზიგანასა და მოხორას ლოკალიზაციასთან დაკავშირებით.

ნ. აღონცი ფიქრობს, რომ ნოტიციას ზიგანა უნდა იყოს ტრაპეზუნტიდან არდასაში მიმავალ გზაზე არსებული ზიგანას უღელტეხილის (6640 ფუტ.) სამხრეთ ძირობაზე მდებარე ზიგანა, რომელსაც დღესაც ასევე ეწოდება⁴⁰¹. ხოლო მოხორა ზიგანას აღმოსავლეთით მდებარე სოფელია დღესაც⁴⁰²; ე. ი. ორივე ეს პუნქტი ისტორიული ქანეთის ტერიტორიაზე თავსდება. ასევე დამაჯერებლად გამოიყურება პ. ინგოროყვას ვარაუდი პითიას ლოკალიზაციის შესახებ, რომელიც; პტოლემეოსის გეოგრაფიული სახელმძღვანელოს 1867 წლის პარიზის ფოტოტიპიურ გამოცემაზე დაყრდნობით, ამტკიცებს, რომ პტოლემეოსის მიერ ტრაპიზონსა და რიზეს შორის აღნიშნული პუნქტი Πιτιονα (პიტიუსი) და პითია ერთი და იგივე პუნქტია და იგი ოფის ნავსადგურს უნდა ემთხვეოდეს⁴⁰³.

ამ ვარაუდის სისწორეს, თითქოს, მხარს უბამს IV საუკუნის ავტორის ამიანე მარცელინეს ერთი ცნობა, რომლის მიხედვით, პონ-

³⁹⁹ Н. А д о н ц. Армения в эпоху Юстиниана. С., П., 1908, с. 100.

⁴⁰⁰ იქვე.

⁴⁰¹ Н. А д о н ц. указ. соч., с. 100.

⁴⁰² იქვე.

⁴⁰³ პ. ინგოროყვა. გორგი მერჩულე, თბ., 1954. გვ. 253:

ტოს ქალაქებს შორის ტრაპეზუნტის გვერდით არსებობს სახელოვანი ქ. პტიუნტი. „ბითინიის ნაწილს იქით პონტოსა და პაფლაგონიის მხარეებია გადაჭიმული, რომლებშიაც არის დიდრონი ქალაქები პერაკლეა, სინოპე, პოლემონიონი, ამისოსი, აგრეთვე ტიოსი და ამასტრისი, ყველა ბერძნების გულმოდგინე ღვაწლით დაფუძნებული, კიდევ არის კერასუნტი, საიდანაც ლუქუსმა ამ სახელის ხილი მოიტანა და ორი კუნძული, რომელზედაც არის მოთავსებული არა უსახელო ქალაქები ტრაპეზუნტი და პტიუნტი“⁴⁰⁴. მართალია, ამ შემთხვევაში ამიანე უბრალოდ პონტოს ქალაქებს ჩამოთვლის, მაგრამ რამდენადაც ყველა მის მიერ დასახელებული ქალაქი სამხრეთ შავი ზღვისპირეთის სანაპიროზე თავსდება, ბუნებრივია, პტიუნტის არსებობაც აქვე ვივარაუდოთ.

ამრიგად, არმენიის სამთავარსარდლოში ნოტიციის მიხედვით დასახელებული 11 პუნქტიდან ხუთი — ზიგანა, ხაძანა, სილუანა, მონორა და ავაძა — თავსდებათ ტრაპიზონის სამხრეთით, ტრაპიზონსა და სატალას შორის.

დანარჩენი ხუთი — ტრაპიზონი, ჰისის ნავსადგური (სურმენე), პითია (პტიუსი), კენე პარემბოლე (ახალი ბანაკი) და ვალენტია (აფსარიოსი) — კი განლაგებულია სამხრეთ შავი ზღვისპირეთის გასწვრივ, ტრაპიზონიდან ჩრდილოეთით (ნ. აღონცი, პ. ინგოროყვა, ვ. ლექვინაძე, ნ. ლომოური)⁴⁰⁵.

ამრიგად, ნოტიციის 11 პუნქტიდან ათის მდებარეობა მეტ-ნაკლებად გარკვეულია, ყოველ შემთხვევაში, მათ შესახებ მკვლევართა შორის გარკვეული აზრია ჩამოყალიბებული, რასაც ვერ ვიტყვით კიდევ ერთი მნიშვნელოვანი პუნქტის, სებასტოპოლისის, შესახებ.

როგორც ზემოთ დავინახეთ, მიუღებელია ნოტიციის სებასტოპოლისის აფხაზეთის დიოსკურიასთან გაიგივება, ისევე, როგორც გამოირიცხა პირველი არმენიის პროვინციაში, პოლემონის პონტოს საზღვარზე მდებარე სებასტოპოლისი, რომელიც დიდად არის დაშორებული ტრაპიზონის ზონას, სადაც ნოტიციას პუნქტებია დასახელებული.

404 გეორგიკა. I. გვ. 109.

405 В. А. Леквинадзе. Указ. соч., с. 81—82; პ. ინგოროყვა. ვიორგი მერჩულე. გვ. 253—254; ნ. ლომოური. საქართველოსა და ბიზანტიის ურთიერთობა V საუკუნეში. თბ., 1989, გვ. 68—71.

არსებულ სიტუაციაში უთუოდ გასათვალისწინებელია ჩვენი კვლევის შედეგებიც, რომლის მიხედვით, პტოლემეაიოსისა და TP რუკის სებასტოპოლისის არსებობას ციხისძირში ვვარაუდობთ.

თუ ჩვენი ჩანაფიქრი სწორია, ალბათ, სავსებით ბუნებრივი იქნებოდა დაგვეშვა ნოტიცისა და ციხისძირის სებასტოპოლის იგივეობა.

მართალია, ეს უკანასკნელი რამდენადმე დაცილებულია ტრაპიზონის ზონას (150 კმ.), მაგრამ რამდენადაც ციხისძირიც ზღვის სანაპირო პუნქტია, ტრაპიზონთან მისი დაკავშირება არ უნდა ყოფილიყო რთული.

გარდა ამისა, როგორც ზემოთ დავინახეთ, TP-ის მონაცემების მიხედვით, ციხისძირი უმოკლესი სახმელეთო გზით უკავშირდებოდა კაბადოკიის სომხეთის დედაქალაქ არტაშატს და სომხეთის სამთავარსარდლოს მესვეურს, ალბათ, ამ გზით შეეძლო თავისი უფლებრივი მოვალეობის განხორციელება ციხისძირ-სებასტოპოლისშიც.

საფიქრებელია, რომ აღმინისტრაციულ-პოლიტიკური ურთიერთობა კაბადოკია-ციხისძირს შორის ადრევე სომხეთის გზით ხორციელდებოდა, რაზეც უნდა მიგვანიშნებდეს ციხისძირში აღმოჩენილი ბაჯაღლო ოქროს აგრაფი, რომელშიც ჩასმულ ბროლის ქვაზე ამოკვეთილია რომის იმპერატორის ლუციუს ვერუსის გამოსახულება.

როგორც ცნობილია, რომის იმპერატორ მარკ ავრელიუსის თანამმართველმა, ლუციუს ვერუსმა თითქმის აღმოსავლეთში გაატარა თავისი ცხოვრება (162—168 წწ.) როგორც სარდალმა, რისთვისაც სენატისაგან მიიღო ტიტული — პატრიაკუსი, არმენიაკუსი⁴⁰⁶.

გამორიცხული არ არის, რომ ციხისძირში აღმოჩენილი აგრაფი, ბექდებთან ერთად, მარტო სამკაული კი არა, ინსიგნია იყოს, რომელსაც, თავის დროზე, ატარებდა რომის აღმოსავლეთ პროვინციების მმართველის, ამ შემთხვევაში, ლუციუს ვერუსის ციხისძირ-სებასტოპოლისში მჯდომი მოხელე.

ოქროს აგრაფთან ერთად, ციხისძირ-სებასტოპოლისა და კაბადოკიის პროვინციას შორის არსებულ მჭიდრო ეკონომიკურ და ალბათ, პოლიტიკურ ურთიერთობაზე მიუთითებს ის ფაქტიც, რომ ე. წ. ციხისძირის განძის მთელი მასალა, მხატვრულ-სტილისტური ნიშნებით რომის აღმოსავლეთი პროვინციების კულტურის წრეში ექცევა.

⁴⁰⁶ Т. М о м з е н. Римская история, Т. V. М., 1885, с. 396—397.

ამაზევე მეტყველებს აქ აღმოჩენილი დრაქმები, რომელსაც ცვლის, მეტწილად, აღმოსავლეთის ზარაფხანებში. ანტიოქიაში, ქიზიჯში და თესალონიკაში მოპოვებული სპილენძის მონეტები; აგრეთვე, სირიულ-პალესტინური მინის ნაწარმი და მცირეაზიური წთელაკიანი კერამიკა⁴⁰⁷.

ციხისძირში მოპოვებული მინის ჭურჭლის დიდი ნაწილი ფორმების დამუშავების ხერხებით, შემკულობის მოტივებითა და სახეებით, აგრეთვე, მინის ხარისხითა და ფერით, გვიანდელ (ახ. წ. 256 წ. შემდეგ), სირიულ-პალესტინურ პროლექციასთან იჩენს მსგავსებას, რაც, სხვა რიგის არქეოლოგიურ მასალებთან ერთად, აუცილებლად ადასტურებს ციხისძირ-სებასტოპოლისის მჭიდრო პოლიტიკურ, სავაჭრო-ეკონომიკურ და კულტურულ კავშირურთიერთობას აღმოსავლეთ რომის პროვინციებთან⁴⁰⁸.

ამ ფონზე, ალბათ, სავსებით ბუნებრივია, რომ ეჩმიაძინის მახლობლად აღმოჩენილ წარწერაში იხსენიება XII ლეგიონი ფულმინატიდან და XV აპოლინარისიდან⁴⁰⁹, ე. ი. ის ლეგიონები, რომელთა სამშენებლო საქმიანობაზე მიგვანიშნებს ციხისძირის აგური, რომლის დამლაზე ხსენებული ლეგიონების სახელებია დამოწმებული. აქვე არ უნდა დავივიწყოთ, რომ ეჩმიაძინი მდებარეობს არტაშატის მახლობლად, ე. ი. TP-ის რუკაზე აღნიშნული გზის დასაწყისში, ხოლო მისი დასასრული სებასტოპოლისშია, რომელიც, როგორც უკვე ითქვა, ციხისძირს უნდა ემთხვეოდეს.

ერთი სიტყვით, TP-ის რუკაზე დამოწმებული საგზაო მაგისტრალი ერთ-ერთი მნიშვნელოვანი, უძველესი არტერია ჩანს, რომელიც რომის აღმოსავლეთ პროვინციებს უმოკლესი გზით აკავშირებდა აღმოსავლეთ შავიზღვისპირეთთან.

ამ მარშრუტის არსებობის დოკუმენტური დადასტურებაა ვ. ჯაფარიძის მიერ მდ. ხანისწყლის ხეობაში, ადგილ წყალთაშუაში აღმოჩენილი ახ. წ. I საუკუნის სამარხი, კერამიკული მასალითა და, რაც მთავარია, პოლემონ II-ს მონეტით⁴¹⁰.

407 ნ. ი. ნ. ა. შვილიძე. ციხისძირის განძი. გვ. 144—145.

408 ნ. ი. ნ. ა. შვილიძე. სამხრეთ-დასავლეთ საქართველოს ძველი ქალაქები (ციხისძირი). გვ. 96—97, 103, 123, 169.

409 М. И. Ростовцев. Надпись из Эчмиадзина. — Изв. археологической комиссии, 33, СПб. 1909, с. 2.

410 ვ. ჯაფარიძე. ვარციხის ნაქალაქარი, თბ., 1989, გვ. 141.

ავტორის თქმით, „ეს არტაშატ-სებასტოპოლისის ცნობილი გზის ყველაზე ადრეული დამადასტურებელი არქეოლოგიური ფაქტია“⁴¹¹.

მომდევნო საუკუნეებში ხსენებული გზის მნიშვნელობა აშკარად იზრდება, რასაც მოწმობს ვარდციხის ნაქალაქარზე მოპოვებულ ქურ-კლებზე დამოწმებული ნიშანი № 11, რომლის უახლოესი ანალოგიე-ბი სომხეთის ქალაქ დვინში მოპოვებულ მასალებშია დამოწმებული.

ჩვენი აზრით, სწორედ ეს გზა უნდა იგულისხმებოდეს ახ. წ. V ს. ავტორის, პრისკე პანიონელის 25-ე ფრაგმენტში, რომელშიც ნათ-ქვამია: „მის შემდეგ, როდესაც რომაელები მივიდნენ კოლხიდაში და ომი აწარმოეს ლაზების წინააღმდეგ, რომელთა ჯარი თავის ქვე-ყანაში გამობრუნდა და კარისკაცები შეუდგნენ ახალი ომისათვის მზა-დებას; ისინი იმის ბჭობაში იყვნენ, თუ რა გზით ელაშქრათ: იმავე გზით თუ სპარსეთის მეზობელი ქვეყნის, არმენიის, გზით დაეწყით ომი...“⁴¹².

სავესებით ლოგიკურია, წყაროში ნახსენები არმენიის გზა რქმეო-და TP-ის რუკაზე ასახულ არტაშატ-სებასტოპოლისის მონაკვეთს.

ამ თვალსაზრისით, ასევე არანაკლებ საგულისხმოა პრისკე პანიო-ნელის შრომის 41-ე ფრაგმენტი, რომელიც ეხება ლაზიკის მეფის წი-ნააღმდეგ სვანების ბრძოლას. პრისკეს ფრაგმენტის თანახმად, ლაზთა მეფე თხოვნით მიმართავს ბიზანტიის კეისარს: „...გაეგზავნა მისთვის დამხმარე ჯარები იმ ჯარისკაცთაგან, რომლებიც რომაელთა ქვეშევრ-დომ არმენიელთა საზღვრებს იცავდნენ“⁴¹³.

სომხეთსა და ლაზიკას შორის უმოკლესი გზის არსებობის გარე-შე ასეთი თხოვნა უაზრობა იქნებოდა.

პრისკე პანიონელის ორივე ფრაგმენტის შინაარსში, ჩვენი აზრით, სწორედ ის მარჯვე და უმოკლესი გზა უნდა იგულისხმებო-დეს, რომელიც კასტორიუსის მიერ შედგენილ TP-ის რუკაზეა ასა-ხული და რომელიც, ჩვენი ვარაუდით, სომხეთის დედაქალაქ არტა-შატს ზეკარის უღელტეხილისა და ვარდციხის გავლით სებასტოპო-ლისთან ანუ თანამედროვე ციხისძირთან აკავშირებდა.

ამრიგად, ამ გზის სტრატეგიული მნიშვნელობა რომის აღმოსავ-ლეთ პროვინციებსა და ლაზიკის სამეფოს ურთიერთობაში, უდავოდ, თვალსაჩინოა ახ. წ. II საუკუნიდან (თუ უფრო ადრე არა) V ს ჩათვ-

411 იქვე.

412 გეორგიკა. I. თბ., 1961, გვ. 254.

413 იქვე. გვ. 261.

ლით, რასაც აშკარად მოწმობს როგორც არქეოლოგიური, ისე კარტოგრაფიული და წერილობითი წყაროები.

ს. ჭანაშიას აზრით, ახ. წ. VI საუკუნიდან ეს გზა უკვე სპარსელების კონტროლს უნდა დაქვემდებარებოდა და, ბუნებრივია, ბიზანტიას მასზე ხელი აღარ მიუწვდებოდა.

ჩვენი აზრით, ამ გზისადმი რომის ინტერესი უფრო ადრე უნდა შესუსტებულიყო, ყოველ შემთხვევაში, იმ მომენტიდან მაინც, როცა აღმოსავლეთ შავიზღვისპირა სიმაგრეებიდან გაყვანილი იქნა რომის გარნიზონები. თუ როდის იქნა გაყვანილი რომის გარნიზონები ლაზიკის საზღვრებიდან, ამის შესახებ მკვლევართა შორის აზრთა სხვადასხვაობა არსებობს. ერთნი ფიქრობენ, რომ ეს მოხდა V საუკუნეში⁴¹⁴, მეორენი ფიქრობენ, რომ, ქ. ფასისის გარდა, ამ პერიოდშიც ყველა სანაპირო სიმაგრეში რჩებიან რომაელები⁴¹⁵, ნაწილი კი ვარაუდობს, რომ გარნიზონები გადაინ მხოლოდ ეთნიკური ლაზიკის ფარგლებიდან და კვლავ რჩებიან აფხაზეთის ტერიტორიაზე, პიტუნტსა და სებასტოპოლისში⁴¹⁶. განხილულ სამივე მოსაზრებას საკმაო სოლიდური, სათანადო არგუმენტაცია გააჩნია და ცალკეული მათგანი, თავისთავად, საყურადღებოა, მაგრამ ჩვენ მიერ ჩატარებული კვლევის შედეგები რომელიმე მათგანის სრულად გაზიარების საშუალებას არ იძლევა.

როგორც ზემოთ დავინახეთ, ჩვენი კვლევის უმთავრესი საკითხი ემყარება დიდი გეოგრაფოსის კლავდიოს პტოლემეაიოსის გეოგრაფიული სახელმძღვანელოს მეხუთე წიგნის მეექვსე თავის ერთი საინტერესო ადგილის ჩვენებას, სადაც, ჩამოთვლილია რა კაბადოციის მნიშვნელოვანი ადგილები და ქალაქები, მდ. აფსაროსისა და მისი შენაკადი ლიკოსის (ნ. ლომოურის მიხედვით, ოლთუ-ჩაი ან თორთუმი) შემდეგ დასახელებულია სებასტოპოლისი. ამასთანავე, ამ ჩამონათვალში სებასტოპოლისი სულ ბოლო მომენტშია მითითებული, რაც იმის მოწმობაა, რომ იგი ამ ქვეყნის, კერძოდ, კაბადოციის უკი-

414 ნ. ლომოური. საქართველოსა და ბიზანტიის ურთიერთობა V საუკუნეში. თბ., 1989, გვ. 72—73; მისივე. ეგრისის სამეფოს ისტორია (წარმოქმნიდან ახ. წ. V საუკუნის ბოლომდე). თბ., 1968, გვ. 66; გ. ლორთქიფანიძე. ბიჭვინთის ნაქალაქარი. თბ., 1991, გვ. 172.

415 В. А. Леквинадзе. Понтийский лимес, с. 82; გეორგია, IV, ნაკ. II, 1952, გვ. 191—195; გეორგია, I, 1961, გვ. 175—178.

416 დ. მუხსელიშვილი. საქართველოს ისტორიული გეოგრაფიის ძირითადი საკითხები. თბ., 1977, გვ. 111—112.

დურესი ჩრდილო-აღმოსავლეთ ნაწილის სასაზღვრო პუნქტი უნდა ყოფილიყო⁴¹⁷.

კაბადოკიის პონტოს გეოგრაფიული საზღვრების აღწერისას პტოლემეოსი პროვინციის აღმოსავლეთ საზღვრებში ასახელებს მოსხურ მთებს და კაბადოკიას ჩრდილოეთიდან შემოფარგლავს: „...ექსინის პონტოს ნაწილით გალატიის ამისოდან ვიდრე ზღვარამდე, რომელიც მდებარეობს 72°20'—44°45' ქვეშ“⁴¹⁸. ზუსტად ამ განზომილებაში მდებარეობს ჩვენი საკვლევი ობიექტი, ქ. სებასტოპოლისი.

სასაზღვრო აღწერილობაში განსაკუთრებით საყურადღებო ის ფაქტია, რომ აქ მოხსენიებულია „მოსხური მთები“, რომელიც ადრე მხოლოდ ჭოროხის ქვემო წელიდან, ტრაპეზუნტ-ბაიბურდის ხაზამდე გადაჭიმულ, პონტოს მთაგრებილის ნაწილად იყო მიჩნეული⁴¹⁹.

უკანასკნელი წლების გამოკვლევების შედეგად, საკითხისადმი დიფერენცირებული მიდგომის საფუძველზე, ამგვარი შეხედულება რამდენაღმე შეიცვალა და დღეისათვის ახ. წ. პირველი საუკუნეების მოსხურ მთებში“ იგულისხმება დაღო-ფერსათის ანუ თანამედროვე გურია-აჭარის მთაგრებილები⁴²⁰. ეს ფაქტი კიდევ ერთხელ მიგვანიშნებს, რომ პტოლემეოსის გეოგრაფიის კაბადოკიის პონტოს ჩრდილო-აღმოსავლეთი მონაკვეთი, ისტორიულ სამცხესთან ერთად, მოიცავდა თანამედროვე აჭარა-გურიის შავიზღვისპირეთსაც.

გეოგრაფიულ სახელმძღვანელოში კაბადოკიის შემდეგ, მისგან ჩრდილოეთით, მდებარეობს კოლხეთის სამეფო, რომლის აღწერა იწყება დიოსკურია-სებასტოპოლისით და მთავრდება ქ. ფასისით. კოლხეთს „სამხრეთიდან აღნიშნული ხაზით ესაზღვრება კაბადოკიის პონტო და მისი მომდევნო დიდი არმენიის ნაწილი“⁴²¹. ამრიგად, პტოლემეოსის მიხედვით, კაბადოკიისა და კოლხეთის, ანუ ლაზიკის სამეფოს შორის პოლიტიკური სასაზღვრო ხაზი უნდა გასულიყო სადაც ქ. ფასისსა და სებასტოპოლ-ციხისძირს შუა მოქცეულ ტერიტო-

417 ნ. ლომოური. კლავდიოს პტოლემეოსის „გეოგრაფიული სახელმძღვანელო“... გვ. 51.

418 იქვე. გვ. 42.

419 ს. ჯანაშია. პარიადრი, სკიდისი, მოსხური მთები. — შრომები. 11. თბ., 1952, გვ. 261—270.

420 ნ. ხაჩარაძე. საქართველოს ძველი ისტორიის ეთნო-პოლიტიკური პრობლემები. თბ., 1984, გვ. 68—70, 71; დ. მუსხელიშვილი. საქართველოს ისტორიული გეოგრაფიის ძირითადი საკითხები. I. გვ. 59—60.

421 ნ. ლომოური. დასახ. ნაშრ. გვ. 45.

რიაზე, ალბათ, რაიმე მნიშვნელოვანი გეოგრაფიული ერთეულის გათვალისწინებით. სავარაუდოდ, სასაზღვრო ხაზი შეიძლება დამთხვევოდა ამ რეგიონის ისეთ მნიშვნელოვან სამდინარო არტერიებს, როგორც არის სუფსა ან ნატანები.

შესაძლოა, დიდი გეოგრაფოსი შემცდარიყო ამა თუ იმ პუნქტის ადგილმდებარეობის განსაზღვრაში, ან დამახინჯებით ჩაეწერა, ან არასწორად გადმოეწერა ადრინდელი წყაროებიდან მისი სახელწოდება, მაგრამ წარმოუდგენელია სერიოზული უზუსტობა დაეშვა თავისივე ქვეყნის, თუნდაც განაპირა პროვინციის, სასაზღვრო ხაზის დადგენაში, მით უფრო, რომ, როგორც სწორად არის შენიშნული, პტოლემეაიოსი ახსენებს კაბადოკიის პონტოს, რაც მოწმობს, რომ მას ახალი წყაროების გამოყენებით, ზოგ შემთხვევაში, მისი თანამედროვე სიტუაცია აქვს აღნიშნული⁴²². როგორც ცნობილია, კაბადოკიის პონტოს პროვინცია შეიქმნა იმპერატორ ტრაიანეს დროს, II ს. დასაწყისში, ხოლო პტოლემეაიოსმა შეაჯამა და ქალაქებზე გადაიტანა რომის ახალი მონაპოვარი⁴²³.

ამრიგად, სახელმძღვანელოს მიხედვით, დოკუმენტურად დასტურდება, რომ პტოლემეაიოსის ხანაში კაბადოკიის პონტოს ტერიტორია აღწევდა მდ. ფასისის მიდამოებამდე, თუმცა ფლავიუს არიანეს დროს ასეთი რამ ჯერ კიდევ არ შეინიშნება. ჩვენი აზრით, ეგრის-ლაზიკის სახელმწიფო საზღვრის გადატანა ქობულეთ-ციხისძირისა თუ ფასისის შემოგარენში უნდა მომხდარიყო ადრიანესა (117—138 წწ.) თუ მისი მემკვიდრის, ანტონინე პიუსის (138—147 წწ.) დროს და მიმართული უნდა ყოფილიყო, ერთი მხრივ, დამოუკიდებლობის გზაზე შემდგარი ლაზიკის სახელმწიფოს (თუნდაც ვასალური) მცდელობის წინააღმდეგ, ისტორიული კოლხეთის ჩარჩოებში აღედგინა თავისი ქვეყნის საზღვრები, ხოლო, მეორე მხრივ, ამ დროისათვის გაძლიერებული იბერიის სამეფოს მკვეთრად გამონატული ტერიტორიული პრეტენზიების საწინააღმდეგოდ გადადგმული ნაბიჯი ჩანს⁴²⁴.

როგორც ცნობილია, ახ. წ. II ს. I ნახევარში რომის იმპერია თანდათან სუსტდება, იბერია კი თავისი ძლიერების ზენიტს აღწევს

422 ნ. ლომოური. კლავდიოს პტოლემეაიოსი. „გეოგრაფიული სახელმძღვანელო“. გვ. 56, შენ. 12.

423 ნ. ლომოური. დასახ. ნაშრ. გვ. 39.

424 მ. ინაძე. ანტიკური ხანის საქართველოს ისტორიისათვის (ფლავიუს არიანე და მისი ცნობები საქართველოს შესახებ). საკანდიდატო დისერტაცია, თბ., 1953, გვ. 52.

და აღანთა ძალების მოშველიებით რომის წინააღმდეგ აქტიურ მოქმედებას იწყებს. ამ ვითარებაში რომი იძულებულია იბერიასთან ურთიერთობა მშვიდობიანი გზით მოაწესრიგოს, რისთვისაც იგი არ იშურებს უხვ საჩუქრებს (სპილო და 500 მეომარი) მმართველი ელიტისათვის და შეძლებისდაგვარად, აკმაყოფილებს ტერიტორიული გაფართოებისაკენ მიმართულ მათ სურვილებს არმენიის ხარჯზე⁴²⁵.

როგორც ბორისა და კლდეეთის არქეოლოგიური აღმოჩენები მოწმობენ, სწორედ დროის ამ მონაკვეთს ემთხვევა ფაქტი იბერიის საზღვრების გაფართოებისა დასავლეთ საქართველოს მიმართულებითაც, სადაც სასაზღვრო ხაზი შორაპან-სკანდას სექტორზე უნდა გასულიყო და სადაც უნდა მჭდარიყო ფარსმანის ერთ-ერთი მენაპირე პიტიახში ბერსუმა (?)⁴²⁷.

სწორედ ასეთი ტენდენციების შემაკავებელ ერთ-ერთ ღონისძიებად გვეჩვენება II ს. შუა ხანებში, თუ მის მეორე ნახევარში რომის მიერ ეგრის-ლაზიკის სამეფოს ისტორიული ტერიტორიის, სამხრეთ-დასავლეთ ნაწილის ანექსია და მისი აღმოსავლეთი პროვინციის, კაბადოკიის, პონტოს შემადგენლობაში შეყვანა. შესაძლოა, სწორედ ამ მოვლენას ასახავს გიორგი სინგლოზის ცნობის ის ადგილი, სადაც ნათქვამია: „სევერემ (193—211 წწ.) დაიმორჩილა კოლხიკე ე. ი. ლაზიკეო“⁴²⁸.

როგორც ზემოთ დავინახეთ, სტრატეგიული თვალსაზრისით ძალზე მოხერხებული ეს რეგიონი უმოკლესი სახმელეთო გზით (TR-ის რუკა) მარჯვედ უკავშირდებოდა სომხეთსა და აქედან კაბადოკიის ცენტრებს, რომლის წარმომადგენელი, ქვეყნის მენაპირე მმართველ-მეთვალყურეს სახით, უნდა მჭდარიყო ციხისძირში, რომლის კუთვნილებაც უნდა ყოფილიყო ე. წ. ციხისძირის განძში შემავალი ინვენტარი. ჩვენი აზრით, სწორედ ციხისძირი წარმომადგენდა კაბადოკიის პონტოს ჩრდილოეთ-აღმოსავლეთ საზღვარზე მდებარე გამორჩეულ პუნქტს, რომელიც კლავდიოს პტოლემეაოსის გეოგრაფიულ სახელ-

425 მ. ი. ნ. ძ. ე. იბერიისა და რომის ურთიერთობა II საუკუნის პირველ ნახევარში. — ისტ. ინსტ. შრომები. I. 1955, გვ. 325—327.

427 გ. ც. კ. ი. შ. ვ. ი. ლ. იბერიის საპიტიახზოს საკითხისათვის ლიხთიმერეთში. — ისტ. ინსტ. შრომები. I. გვ. 301—311; ს. ჯანაშია. იბერიის (ქართლის) სამეფოს პოლიტიკური გეოგრაფიისათვის უძველეს პერიოდში. — საქართველოს სსრ მეცნ. აკად. შრომებ. ტ. III. № 7. თბ., 1942, გვ. 726.

428 ს. ყ. ა. უ. ხ. ჩ. ი. შ. ვ. ი. ლ. გეორგიკა. IV. ნაკვ. I. — მასალები საქართველოსა და კავკასიის ისტორიისათვის. თბ., 1940, გვ. 68.

მძღვანელოში აისახა სებასტოპოლისის სახელით და სადაც, TP-ის მიხედვით, მთავრდება არტაშატიდან წამოსული საგზაო მაგისტრალი.

ამ პუნქტის ანუ ციხისძირ-სებასტოპოლისის განსაკუთრებულ სტრატეგიულ მნიშვნელობაზე ის ფაქტიც მიუთითებს, რომ II საუკუნის ბოლოსა თუ III საუკუნის დასაწყისში რომაელებს აქ აუგიათ ციხე-სიმაგრე (ციხისძირის დამლიანი აგური), რაც, თავის მხრივ, აქვე საჭარისო ნაწილების არსებობას გულისხმობს. ციხისძირში კასტელიუმის არსებობა განსაკუთრებით იმ მხრივ არის საგულისხმო, რომ, როგორც სწორად არის შენიშნული, იგი აგებულა კასტელიუმების შენების ძირითადი პრინციპების დარღვევით (აქ არ არის ნავსადგური და ახლოა აფსაროსთან) და ვერ თავსდება აღმოსავლეთ შავიზღვისპირეთის კასტელიუმების დისლოკაციის სისტემაში⁴²⁹.

აშკარაა, ციხისძირში კასტელიუმის აგება იქვე, ახლოს ქვეყნის ახალი პოლიტიკური საზღვრის არსებობით არის გაპირობებული, რაც დოკუმენტურად დასტურდება პტოლემეაოსის რუკის მიხედვით⁴³⁰.

პტოლემეაოსის რუკაზე დამოწმებული ფაქტის სისწორეს, თითქოს, ადასტურებს V ს. ისტორიკოსის ზოსიმეს ერთი ცნობა, რომელშიც ნათქვამია, რომ იმპერატორმა კონსტანტინე I (306—337 წწ.), მთელი იმპერია გაყო რა ოთხ საგამგებლოდ, ერთს „...მისცა მთელი ეგვიპტე ლიბიის პენტაპოლისამდე და აღმოსავლეთი ვიდრე მესოპოტამიამდე; გარდა ამისა, მას გადასცა კილიკიელნი და კაბადოკიელნი და არმენიელნი და მთელი ზღვისპირეთი პამფილიიდან ვიდრე ტრაპეზუნტამდე და ფაზისზე მდებარე სიმაგრეებამდე“⁴³¹.

როგორც ვხედავთ, აქაც ერთად არის მოხსენიებული სომხეთი, კაბადოკია და შავიზღვისპირეთი მდ. ფასისამდე, სადაც ამ ქვეყნების საზღვარი იგულისხმება. მართალია, ფასისთან დაკავშირებული ცნობა მოკლებულია კონკრეტულობას, მაგრამ კაბადოკიის ფარგლებში რომ მდ. ფასისის მარჯვენა სანაპირო არ იგულისხმება, აშკარაა.

ამრიგად, II საუკუნის შუა წლებში პტოლემეაოსის მიერ კარტოგრაფიულად დამოწმებული ლაზიკისა და კაბადოკიის საზღვრის არსებობა აღმოსავლეთ შავიზღვისპირეთში დასტურდება ზოსიმეს

⁴²⁹ В. А. Леквинадзе. Римский кирпич со штампом из Цихидздири, с. 798—800; Его же. Понтийский лимес, с. 87—88.

⁴³⁰ Б. Ломоносов. Дахა. ნაშ. გვ. 41—44.

⁴³¹ გეორგიკა. I. ბიზანტიელი მწერლების ცნობები საქართველოს შესახებ. გვ. 269.

ცნობითაც და იმავეზე უნდა მიგვანიშნებდეს, IV—V საუკუნეების ნოტიციების მიხედვით, აღმოსავლეთის მმართველთა სიაში არმენიის სარდლის გამგებლობაში არსებული ჯარის სადგომებს შორის სებასტოპოლისის მოხსენიება.

კიდევ ერთხელ უნდა გავიმეოროთ, რომ, ჩვენი დაკვირვებით, პტოლემეაიოსის რუკის სებასტოპოლისი, არტაშატიდან მომავალი გზის ბოლოში მდებარე სებასტოპოლისი და ნოტიციაში მოხსენიებული სებასტოპოლისი ერთი და იგივე პუნქტი უნდა იყოს და ყველა მონაცემი (არქეოლოგიური, კარტოგრაფიული, წერილობითი) არსებობს ქობულეთ-ციხისძირის ტერიტორიაზე მისი ლოკალიზაციისა.

როგორც *Notilia dignitatum*-ის მიხედვით ირკვევა, V საუკუნის დასაწყისში სებასტოპოლისი ჯერ კიდევ რომის ჯარების სადგომ პუნქტს წარმოადგენს, რაც სავსებით ბუნებრივი ჩანს, რადგან II ს. მოკიდებული V ს. I ნახევრის ჩათვლით იგი პოლიტიკურად რომის იმპერიის აღმოსავლეთ პროვინციის, კაბადოკიის პონტოს, ორგანული ნაწილი უნდა ყოფილიყო. ქართველ მეცნიერთა შორის დამკვიდრებული მოსაზრების მიხედვით, IV ს. ბოლოსათვის ლაზეთის (ეგრისის) სამეფო აერთიანებს უკვე მთელ დასავლეთ საქართველოს. მისი ტერიტორია სამხრეთით მდ. ჭოროხის შესართავის სექტორამდე ვრცელდებოდა, ხოლო ჩრდილოეთით მოიცავდა თანამედროვე აფხაზეთსა და მაღალმთიან სვანეთსაც⁴³².

IV საუკუნის ბოლო არის ლაზეთის სამეფოს განსაკუთრებული გაძლიერების ხანა⁴³³. სასანურ სპარსეთთან არაერთგზის განცდილმა მარცხმა, ირანის ამიერკავკასიის ქვეყნებში დამკვიდრებამ, გუთებისა და ჰუნების შემოსევებმა რომის მესვეურები აიძულა შერიგებოდა და ხელიც კი შეეწყო ლაზიკის სამეფოს დამოუკიდებლობისა, გაერთიანებისა და გაფართოების სწრაფვისათვის⁴³⁴.

ყოველივე ზემოთქმული ლაზიკის ძლიერების შესახებ ახლოა ქეშ-მარიტებასთან, მაგრამ, ჩვენი დაკვირვებით, IV ს. ლაზიკის მთლიანობის აღდგენა ჯერ კიდევ არ არის დასრულებული. კერძოდ, მისი სამხრეთი საზღვრის საკითხი არა ჩანს მოგვარებული და ისტორიული კოლხეთის საკმაოდ ვრცელი ტერიტორია, მდ. ფასისის მარცხენა სა-

432 ნ. ლომოური. ეგრისის სამეფოს ისტორია. თბ., 1968, გვ. 75.

433 იქვე. გვ. 72.

434 იქვე. გვ. 75.

ნაკიროდან ქორთხის აუზის ჩათვლით, რომის აღმოსავლეთი პროვინციის, კაბადოკიის პონტოს გამგებლობაში რჩება (იხ. რუკა).

როგორც წერილობითი წყაროები მოწმობენ, ერთი მხრივ, შედარებით შესუსტებული რომის იმპერიასა და, მეორე მხრივ, აღმავლობის გზაზე შემდგარ ეგრის-ლაზიკის სამეფოს შორის პოლიტიკური ურთიერთობები, მთელი V ს-ის მანძილზე, ამ ტერიტორიული საკითხების გარკვევის ფონზე მიმდინარეობს, რასაც ზოგ შემთხვევაში სერიოზული შეიარაღებული კონფლიქტიც კი გამოუწვევია.

როგორც ჩანს, გაძლიერებული ლაზიკის სამეფო ველარ ეგუებოდა ძველი კოლხეთის კუთვნილი ტერიტორიების დანაკარგებს და აქველა გზით იბრძოდა ისტორიული სამართლიანობის აღსადგენად. V საუკუნეში ლაზიკასა და რომს შორის წარმოქმნილი შეხლა-შემოხლისა და კონფლიქტური სიტუაციების მასშტაბების შესახებ საყურადღებო მასალები შემოგვინახა ამ მოვლენების თანამედროვე ისტორიკოსმა პრისკე პანიონელმა. პრისკეს კალამს ეკუთვნის საისტორიო თხზულება „გუთების ისტორია“, რომელიც ეხება 433—474 წლების ამბებს და რომლისგანაც მხოლოდ ფრაგმენტებია შემორჩენილი. ამ ფრაგმენტებიდან ჩვენთვის განსაკუთრებით საინტერესოა ის ნაწილები, სადაც მოთხრობილია ლაზთა მეფე გუბაზსა და ბიზანტიის იმპერატორს შორის მომხდარი კონფლიქტის შესახებ. „მის შემდეგ, როდესაც რომაელები მოვიდნენ კოლხიდაში და ომი აწარმოეს ლაზების წინააღმდეგ, რომაელთა ჯარი თავის ქვეყანაში გამობრუნდა და ჯარისკაცები შეუდგნენ ახალი ომისათვის მზადებას; ისინი იმის ბჭობაში იყვნენ, თუ რა გზით ელაშქრათ: იმავე გზით, თუ სპარსეთის მეზობელი ქვეყნის, არმენიის, გზით დაეწყოთ ომი და წინდაწინ პართელების მეფე მიემხროთ. ზღვით, მათი აზრით, შეუძლებელი იყო ცურვა ძნელსავალი ადგილების გასწვრივ, რადგან კოლხიდა უნავსადგურო იყო. გობაზმა ელჩები გაგზავნა პართელებთანაც და რომაელთა მეფესთანაც. მაგრამ პართელების მეფეს ომი ჰქონდა კიდარიტებად წოდებულ ჰუნებთან და ამიტომ უარი უთხრა მასთან მოსულ ელჩებს“⁴³⁵.

როგორც ამ ფრაგმენტიდან ჩანს, რომაელებს დიდი ომი უწარმოებიათ ლაზების წინააღმდეგ, მაგრამ წარმატებისათვის ვერ მიულწევიათ და ახალი ომისათვის ემზადებიან. ასევე, ემზადება ახალი ომი-

სათვის გუბაზ მეფეც და როგორც რომაელები, ისევე ლაზები ცდილობენ თავის მხარეზე გადაიბირონ პართელები⁴³⁶.

რომაელები მარშრუტის შერჩევასა უარს ამბობენ საზღვაო გზის გამოყენებაზე იმ მიზეზით, თითქოს კოლხეთის სანაპირო უნავსადგურო იყოს, რაც არ შეეფერება რეალურ ვითარებას. ჩვენ ჯერ კიდევ ფლავიუს არიანესაგან ვიცით, რომ კოლხეთს შესანიშნავი ნავსადგურები გააჩნია აფსაროსში და ფასისში, რომელშიც საკმაოდ მოზრდილი არმადით შეაფარა თავი არიანემ, თავისი საინსპექციო მოგზაურობის დროს კოლხეთში⁴³⁷. აშკარაა, აქ სხვა უნავსადგურო კოლხეთი, უფრო სწორად, კოლხეთის უნავსადგურო სანაპირო იგულისხმება. ასეთია ბათუმსა და ფასის შორის მოქცეული გურია-აჭარის ზღვისპირა მონაკვეთი, რომლის ცენტრში ციხისძირი მდებარეობს. ეს სანაპირო, მართლაც, უნავსადგუროა და ამიტომ იყო, რომ პეტრას ლოკალიზაციის მცდელობისას ს. ყაუხჩიშვილი და ნ. ლომოური პეტრას ნავსადგურის ძიებამ ბათუმში მიიყვანა.

პრისკეს მიერ ნახსენები მეორე სახმელეთო გზა, რომელსაც იგი არმენიისას უწოდებს, სხვა არა უნდა იყოს რა, თუ არა TP-ის საგზაო მაგისტრალი, რომელიც სომხეთის ანუ არმენიის დედაქალაქ არტაშატში იწყება და სებასტოპოლისში მთავრდება. როგორც ზემოთ დავინახეთ, ქ. სებასტოპოლისი ჩვენ ციხისძირში გვეგულება, სადაც დამაწმენდელია კასტელიუმის არსებობა და რომაული გარნიზონის ყოფნაც ივარაუდება. თუ არ ვცდებით, სწორედ აქ, სასაზღვრო ქ. სებასტოპოლისთან, უნდა მომხდარიყო პირველი საბრძოლო შეჯახება ლაზებსა და რომაელებს შორის და ხელმეორედ აქეთ წამოსასვლელად არჩევენ საზღვაო და სახმელეთო მარშრუტებს რომაელები. როგორც უკვე ითქვა, ეს ომი ლაზების წარმატებით უნდა დამთავრებულიყო, რადგან რომაელთა ჯარი იძულებული გამხდარა დაეტოვებინა კოლხეთი და ახალი ომისათვის მზადების თადარიგი დაეჭირა.

თუ რატომ მოხდა ომი, რა იყო ლაზებისა და რომაელების სამხედრო დაპირისპირების მიზეზი, პრისკეს განხილული ცნობა პასუხს არ იძლევა, მაგრამ, თუ როგორ დამთავრდა საერთოდ კონკლექტი, ამის შესახებ საყურადღებო მასალა მოიპოვება პრისკე პანიონელის 26-ე ფრაგმენტში: „გობაზმა ელჩები გაგზავნა რომაელებთან. რომა-

⁴³⁶ იქვე.

⁴³⁷ ფლავიუს არიანე. მოგზაურობა შავი ზღვის გარშემო. თბ., 1961, გვ. 35, 39.

მულებმა უპასუხეს გობაზის მოციქულებს, რომ შეწყვეტდნენ ომს, თუ
ან თვითონ გობაზი გადადგებოდა ტახტიდან, ან შვილს გადააყენებდა
მეფობიდან: ძველი კანონის თანახმად, არ არის კანონიერი, რომ ორი-
ვენი მეფობდეთო; ასე რომ, ერთ-ერთი უნდა იყოს კოლხიდის ტახტზე,
ან გობაზი ან მისი შვილი და მაშინ შეეწყვეტთ ომსო — ურჩევდა
ევფემიოსი, რომელსაც მაგისტროსის თანამდებობა ეჭირა. ევფემიოსი
სახელგანთქმული იყო ჭკუით და სიტყვა-პასუხითაც და მარკიანე მე-
ფის დროს ეზოსმოდღვარი იყო... ასეთი არჩევანი რომ მისცეს გო-
ბაზს, იმან აირჩია გადამდგარიყო სამეფო ტახტიდან შვილის სასარ-
გებლოდ და თავისი სამეფო ნიშნები გაიძრო (?) და მან რომაელთა
მპყრობელს მოციქულები გაუგზავნა თხოვნით, — უკვე ერთი კოლ-
ხი მეფობს და ნულარ ჭავრობ, იარაღი დაჰყარეო. რომაელთა მეფემ
წინადადება მისცა მას გადმოსულიყო რომაელთა ქვეყანაში და მო-
ეხსენებინა თავისი განზრახვების შესახებ. გობაზმა არ თქვა უარი
გამგზავრებაზე, ხოლო წინათ, თვით გობაზთან მომხდარ უთანხმოე-
ბათა გამო, კოლხიდაში გამოგზავნილ დიონისეს მოსთხოვა სიტყვა
მიეცა, რომ მას, გობაზს, უსიამოვნება არაფერი შეემთხვეოდა. ამი-
ტომ იქნა დიონისე გაგზავნილი კოლხიდაში და სადავო საკითხებშიც
შეთანხმდნენ⁴³⁸.

ამ ფრაგმენტში იმპერატორ მარკიანეს ხსენებამ საფუძველი მის-
ცა მკვლევარებს ეს მოვლენები სწორედ იმ იმპერატორის ზეობის
(450—457 წწ.) ხანით დაეთარილებინათ⁴³⁹.

ნაწყვეტში ლაპარაკია იმაზე, რომ გუბაზს თავისი ვაჟი თანამო-
საყდრედ გაუხდია, რაც რომაელებს მიუღებლად მიაჩნიათ. ძველი
კანონის თანახმად, ბიზანტიის კეისარი გუბაზ მეფეს ულტიმატუმს
უყენებს: ან მამა ან შვილი ტახტიდან უნდა გადადგეთო. როგორც
ჩანს, გუბაზს საჭიროდ მიუჩნევია ანგარიში გაეწია ამ ულტიმატუ-
მისათვის და ტახტიდან გადამდგარა შვილის სასარგებლოდ. როგორც
მოვლენების შემდგომი მსჯელობიდან ჩანს, ეს იყო მხოლოდ ეპიზო-
დი და არა მთავარი მიზეზი ბიზანტია-ლაზიკის ურთიერთობის გარ-
თულებისა, რადგან, გუბაზის გადადგომის მიუხედავად, კეისარი არ
კმაყოფილდება ამ ნაბიჯით და მოითხოვს მის გამოცხადებას ბიზან-
ტიაში.

438 გეორგიკა. I. გვ. 254—256.

439 ნ. ლ. მ. ო. უ. რ. ი. დასახ. ნაშრ. გვ. 77.

გუბაზი პრინციპულად თანხმდება, მაგრამ უვნებლობის გარანტიას თხოულობს, რომლის მიღების შემდეგ ამ მოთხოვნასაც აკმაყოფილებს. პრისკე პანიონელის 34-ე ფრაგმენტის მიხედვით, გუბაზი კონსტანტინოპოლში ჩასულა ლაზიკაში საომარი ოპერაციების ხელმძღვანელის, ბიზანტიის სამეფო კარზე საკმაოდ მაღალი ჩინის მქონე ვინმე დიონისეს (მაგისტროსი) თანხლებით, სპარსულ ტანსაცმელში გამოწყობილი და მეშუბეებით გარშემორტყმული. „კარისკაცებმა მიღებისთანავე ჯერ გაჰკიცხეს იგი რომაელთა წინააღმდეგ ამბოხებისათვის, ხოლო შემდეგ კეთილგანწყობილად მოეპყრნენ და ისე გაისტუმრეს უკან“⁴⁴⁰.

ამ ფრაგმენტიდან აშკარად ჩანს, რომ ეს არ იყო შემთხვევითი კონფლიქტი, არამედ ეს იყო ბიზანტიის წინააღმდეგ კარგად ჩაფიქრებული, დიდი საქვეყნო მიზნებისათვის გადადგმული ნაბიჯი, რაც, მოყვანილი ცნობის მიხედვით, ბიზანტიელების მიერ შეფასებული იქნა როგორც აჯანყება, ამბოხება, თუ გადატრიალება⁴⁴¹.

ჩვენ სავსებით ვიზიარებთ პრისკეს ფრაგმენტებში ბიზანტია-ლაზიკის კონფლიქტთან დაკავშირებული მოვლენების ღრმა ანალიზის საფუძველზე ნ. ლომოურის მიერ გაკეთებულ დასკვნას იმასთან დაკავშირებით, რომ გუბაზის განდგომა ბიზანტიისაგან სწორედ მარკიანეს იმპერატორობის დროს მოხდა და პირველი ეტაპიც ბიზანტიური ირანის კონფლიქტისა — ბიზანტიელთა მიერ ლაზიკაში ჯარის გაგზავნა და აქ ომის წარმოება — ამავე იმპერატორის ზეობაზე (450—457) მოდის. შემდგომი მოვლენები კი უკვე ლეონ I-ის დროს ხდება და მის დროსვე, 465 წელს სრულდება⁴⁴². ე. ი. ეს ძალზე სერიოზული კონფლიქტი, სულ ცოტა, ათი წელი მაინც უნდა გაგრძელებულიყო, რომელიც, ბოლოს და ბოლოს, შინაგანი და გარეგანი ობიექტური მიზეზების გამო, მშვიდობიანად დამთავრებულა.

ერთი სიტყვით, პრისკე პანიონელის ფრაგმენტების სახით ჩვენ მოგვეპოვება კარგად დათარიღებული, მრავალმხრივ საინტერესო ისტორიული დოკუმენტი, ეგრის-ლაზიკის სამეფოს ძლიერებისა და დამღუკიდებლობისათვის ბრძოლის ეპიზოდებს რომ შეიცავს, მაგრამ, სამწუხაროდ, მისი ფრაგმენტულობის გამო, ბოლომდე გაურკვევე-

440 გეორგიკა. I. გვ. 259.

441 ნ. ლომოური. დასახ. ნაშრ. გვ. 79.

442 იქვე. გვ. 77—79.

ღი რჩება მთავარი, თუ რა იყო ბიზანტიელების წინააღმდეგ ლაზების ბრძოლის კონკრეტული მიზეზი და მისი ამოცანები.

რა პრეტენზიებით მიდის გუბაზი ბიზანტიაში, რა თემაზე ესაუბრა იმპერატორს „მაღალ დონეზე“ და ასე რით მოხიბლა სამეფო კარი გუშინდელმა მემამბოხემ, რომ კმაყოფილი გაგზავნეს უკან. როგორც უკვე ითქვა, პრისკე პანიონელის ფრაგმენტების მიხედვით, ეს კითხვები უპასუხოდ რჩება და პასუხი სხვა მასალებში უნდა ვეძიოთ.

ამ თვალსაზრისით, ძალზე საყურადღებოა ამავე დროისა და ზუსტად იმავე მოვლენების დასკვნით ნაწილის ამსახველი კიდევ ერთი წერილობითი წყარო, რომელიც უშუალოდ ამ ამბების მონაწილის ცხოვრებას ასახავს და რომელიც, სამწუხაროდ, ლაზიკის ისტორიის ამ უმნიშვნელოვანესი მონაკვეთის გაშუქებისას, დღემდე სათანადოდ არ ყოფილა გამოყენებული.

ჩვენ მხედველობაში გვაქვს ერთი აგიოგრაფიული ნაშრომი, რომელშიც აღწერილია ერთ-ერთი ადრეული ხანის ქრისტიანი მოძღვრის, „დანიელ მესვეტეს ცხოვრება“ და მოღვაწეობა კონსტანტინოპოლში⁴⁴³, დაახლოებით 450—490 წწ. როგორც ამ ნაშრომიდან ირკვევა, დანიელს იმდენად დიდი გავლენა მოუპოვებია ბიზანტიის იმპერატორზე, ლეონ I-ზე (457—474 წწ.), რომ ეს უკანასკნელი თავიანთი სცემდა მას, როგორც წმინდანს⁴⁴⁴. ხსენებული წყაროს X საუკუნის ქართული თარგმანის ჩვენთვის საყურადღებო ფრაგმენტში შემდეგი იკითხება: „მათ დღეთა შინა (ხანძრის შემდეგ — გ. გ.) მოვიდა ლობაზიანოს, მეფე აფხაზთაჲ, ხილვად ნეტარისა ლეონ, მეფისა ბერძენთაისა და წარიყვანა იგი მეფემან და აღვიდა წმიდისა მის თანა. და იხილა რაჲ უცხოჲ იგი ხილვაჲ და მოქალაქეობაჲ ანგელოზებრივი, ლობაზიონოს დავარდა პირსა ზედა თვისსა და თქუა: გამდლობ შენ, მეუფეო ცათაო, რამეთუ ქვეყანისა მეფისა მიერ დიდთა საკვრველთჲ ხილვად ღირს მყავ მე, მონაჲ შენი. და მაჩუენე. რომელი არა სადა მენახა ქუეყანასა ზედა. ხოლო აქუნდა ორთავე ამათ მეფეთა საუბრავი რაჲმე ქუეყანათაჲ. დაწყნარებისათვის და ზღვათა განყოფისაჲ: სადამდის არს საბერძნეთისაჲ ანუ მეგრელთაჲ. აფხაზეთის სამეფოჲსაჲ: და უთხრეს წმიდასა და მონასა ღმრთისასა დანიელს. და იგი

⁴⁴³ კ. კეკელიძე. ეტიუდები ძველი ქართული ლიტერატურის ისტორიიდან. VII. თბ., 1961, გვ. 5—8.

⁴⁴⁴ იქვე. გვ. 5.

იქმნა შუამდგომელ მათდა. და დადევს საზღვრად ციხე ხუფათი: და აღუთქვეს ურთიერთას მშვილობაჲ და სიყვარული ამისითა სიტყვათა: და შთამოვიდა მეფე ქალაქად და განუტევა ლობაზიონ მამულსა თვისსა, ხოლო მი-რაჲ-იწია ქვეყნად თვსად ლობაზიონ, უთხრობდა ყოველთა მადლსა მას წმიდისასა: და რაჟამს მოციქულნი მისნი აღვიდოდიან კონსტანტინეპოლედ მეფისა, წიგნი მიუწერის ნეტარსა მისსა და ლოცვასა ითხოვნ მისგან: და ვიდრე აღსრულებამდე არ დასცხრებოდა ამისა ყობად“⁴⁴⁵.

როგორც ვხედავთ, ეს წყარო ყოველმხრივ საყურადღებო, შეიძლება ითქვას, უნიკალური ძეგლია, სადაც პირდაპირ არის მითითებული ჩვენთვის ამჟამად საყურადღებო საკითხის შესახებ. თუ რამ გამოიწვია V საუკუნის 50—60-იან წლებში ლაზიკასა და ბიზანტიას შორის საომარი კონფლიქტი და რა შედეგები მოჰყვა მას. აშკარაა, რომ ლაზიკა-ბიზანტიის შეჯახების მთავარი მიზეზი გამხდარა ლაზიკის ტერიტორიული პრეტენზიები ბიზანტიის მიმართ. როგორც ჩანს, აღმავლობის გზაზე მყოფი ლაზიკის სახელმწიფო ვეღარ ეგუებოდა ისტორიულ უსამართლობას, როდესაც მას ჩამოჭრილი უნდა ჰქონოდა, ალბათ, სამხრეთი ფრთა და იბრძვის ქვეყნის მთლიანობის აღდგენისათვის ძველი კოლხეთის სახელმწიფოს საზღვრებში.

ლაზიკის აჯანყება, ჩანს, აგრეთვე, დააჩქარა იმდროინდელი ბიზანტიის მძიმე საგარეო და საშინაო მდგომარეობამ, რაც გამოიხატა 30—50-იან წლებში ვანდალებისა და გუთების არაერთგზის თავდასხმებში, „მწვალელობის“, „ნესტორიანობის“ და „მონოფიზიტობის“ შიდა ომებმა და სხვ.⁴⁴⁶

ბიზანტიის ასეთი მძიმე მდგომარეობით, როგორც ჩანს, მოხერხებულად ისარგებლა გუბაზმა, რომელსაც იმედი ჰქონდა ბიზანტიის ძველი მოქიშპის, სასანური ირანის დახმარებისა და აჯანყდა ბიზანტიის წინააღმდეგ ქვეყნის მთლიანობის აღდგენის მიზნით.

ყოველ შემთხვევაში, დანიელ მესვეტეს ცნობის იმ ადგილის მიხედვით, სადაც საუბარია ქვეყნისა და ზღვათა განყოფის საურავზე, უდავოა, რომ ხსენებული ომის მიზეზი გუბაზის მიერ ბიზანტიისადმი წაყენებული ტერიტორიული პრეტენზიებია.

⁴⁴⁵ კ. ქვეკელი ძე. დასახ. ნაშრ., გვ. 5—6.

⁴⁴⁶ Ф. И. Успенский. История Византийской империи, т. I, с. 206; Б. Ломоносов. Вэргისის სამეფოს ისტორია. გვ. 85.

კ. კეკელიძის აზრით, კონსტანტინოპოლში ჩასულ გუბაზს გარკვეული დიპლომატიური ნაბიჯები გადაუდგამს იმ მხრივ, რომ საერთო ენა გამოუნახავს სამეფო კარზე და განსაკუთრებით დაახლოვებია იმპერატორზე დიდი გავლენის მქონე მამა დანიელს, რომელსაც, შესაძლოა, შეპირდა კიდევ, თუკი იგი მხარს დაუჭერდა, უკან დაბრუნების შემდეგ აქტიურად შეუწყობდა ხელს ეგრის-ლაზიკაში ქრისტიანობის გავრცელების საქმეს⁴⁴⁷.

წყაროს მიხედვით, დანიელს წარმატებით გაურთმევია თავი გუბაზსა და ლეონ I-ს შორის შუამავლის ნაკისრ ვალდებულებისათვის. აშკარაა, მისი მხარდაჭერის წყალობით, გუბაზისათვის დადებითად გადაჭრილა სადავო ტერიტორიის საკითხი და ლაზიკასა და ბიზანტიას შორის სახელმწიფო საზღვრად დაუდგენიათ ციხე ხუფათი ანუ დღევანდელი ხოფა. ამის სანაცვლოდ, უკან დაბრუნებული გუბაზიც მთელის მონდომებითა და სიყვარულით უწყვედა პროპაგანდას ლაზიკაში ქრისტიანულ სარწმუნოებას და მისი სულიერი მამის, წმინდა დანიელის სასწაულმოქმედების უნარს, მისი სიცოცხლის უკანასკნელ დღემდე.

პრისკე პანიონელის ცნობის მიხედვით, გონიერებითა და სიტყვაპასუხით ცნობილ ევფემიოსის რჩევით, იმპერატორს ისტორიკოსი პრისკე პანიონელიც მიუწვევია სახელმწიფოებრივ საქმეებში მონაწილეობის მისაღებად⁴⁴⁸. გამორიცხული არ არის, რომ პრისკეს, როგორც ისტორიკოსის, მიწვევის ერთ-ერთი მიზანი სწორედ გუბაზის მიერ წამოყენებული ტერიტორიული პრეტენზიების ისტორიული საფუძვლიანობის გარკვევა უნდა ყოფილიყო.

ამრიგად, როგორც დანიელის ცხოვრების ამსახველი დოკუმენტიდან ირკვევა, V საუკუნის სამოციან წლებში ლაზიკის სამხრეთ საზღვარი გავიდა ციხე ხუფათზე, რაც სხვა არაფერია, თუ არა თანამედროვე დაბა და ნავსადგური ხუფათი, რომელიც ამჟამად თურქეთის ტერიტორიაზე მდებარეობს (იხ. რუკა).

სამწუხაროდ, არც ეს უკანასკნელი დოკუმენტი იძლევა პასუხს, თუ საიდან იქნა გადმოტანილი საზღვარი ციხე ხუფათზე, ანუ, რაც იგივეა, თუ სად იყო ამ კონფლიქტამდე ლაზიკასა და ბიზანტიას შორის გამავალი სასაზღვრო ხაზი. ჩვენი აზრით, აქ უნდა იგულისხმე-

447 კ. კეკელიძე. დასახ. ნაშრ. გვ. 7.

448 კ. კეკელიძე. დასახ. ნაშრ. გვ. 6; ს. ყაუხჩიშვილი. გეორგია. I. გვ. 252.

ზოდეს II საუკუნის შუა ხანების ლაზიკისა და კაბადოკიის პონტოს პროვინციის გამყოფი ხაზი, რომელიც კარტოგრაფიულად ასახულია პტოლემეაიოსის „გეოგრაფიულ სახელმძღვანელოში“⁴⁴⁹.

როგორც ზემოთ დავინახეთ, II საუკუნეში დადგენილი ეს საზღვარი უცვლელი რჩება III—IV საუკუნეებშიც და აი, ბოლოს და ბოლოს, V საუკუნის 60-იან წლებში, მას შემდეგ, რაც მთელი შინაგანი ძალების მობილიზაციის შედეგად ლაზიკამ მიიღწია თავისი ძლიერების ზენიტს ხელსაყრელი საერთაშორისო ვითარების გამოყენებით ლაზიკის მეტე გუბაზს დიდი ბრძოლითა და დიპლომატიურ ღონისძიებათა ზოგი კომპლექსის გამოყენებით მოუხერხებია ეგრის-ლაზიკის სამეფოს მთლიანობის აღდგენა კოლხეთის სამეფოს ისტორიულ ჩარჩოებში, დიოსკურია-სებასტოპოლიდან მოკიდებული მდ. აფსაროს-ჰოროხის სექტორის ჩათვლით. (იხ. რუკა).

ეს არის ეგრის-ლაზიკის სამეფოს ძლიერების ყველაზე უფრო მნიშვნელოვანი პერიოდი და არა ლაზიკის მარცხისა და დაქვეითების დასაწყისი, როგორც ეს ივარაუდება ლაზიკიდან სვანეთის ნაწილობრივ გამოყოფის ფაქტზე დაყრდნობით⁴⁵⁰.

ჩვენი აზრით, კონფლიქტური ურთიერთობის წარმოშობა სვანეთსა და ლაზიკას შორის ლაზიკის სისუსტის მანიშნებელი კი არა, უფრო მეტად, მისი შემდგომი გაძლიერების შედეგზე უნდა მიუთითებდეს.

როგორც ჩანს, მარტივ ეკონომიკურ ურთიერთობაზე დამყარებული კავშირი (ტყავებისა და ფუტკრის ნაყოფის გაცვლა პურზე და მარილზე), რომელიც წინა ხანებში არსებობდა სვანეთსა და ლაზიკას შორის, აღარ აკმაყოფილებს აღმავლობის ზენიტში მყოფ, ფეოდალიზმის გზაზე შემდგარ ლაზიკის სამეფოს და იგი ცდილობს უფრო მტკიცე, ბარის ფეოდალური კანონების შესაბამისი ურთიერთობების დამკვიდრებას მაღალმთიან სვანეთში, რისთვისაც იპყრობს სვანეთის ციხეებს⁴⁵¹.

როგორც მოგვიანო ხანის ცნობები მოწმობენ, გუბაზის მეფობაში დადგენილი ლაზიკის სამეფოს საზღვარი ხუფთაი უცვლელი რჩება VI საუკუნეშიც, სადაც ბიზანტიელები ქ. პეტრას აშენებენ.

449 გეორგიკა. I. გვ. 255.

450 ნ. ლომოური. კლავდიოს პტოლემეაიოსი. გვ. 45.

451 ნ. ლომოური. ეგრისის სამეფოს ისტორია. გვ. 79—85; მისივე, საქართველოსა და ბიზანტიის ურთიერთობა. გვ. 81—85; დ. მუსხელიშვილი. საქართველოს ისტორიული გეოგრაფიის ძირითადი საკითხები. თბ., 1977, გვ. 208.

ასეთივეა იგი აფხაზეთის სამეფოს არსებობის პერიოდში⁴⁵² და განვითარებულ შუა საუკუნეებშიც⁴⁵³, ვიდრე ეგრის-ლაზიკის სამეფოს, ცივილიზებული და მაღალკულტურული ბიზანტიის ნაცვლად, „ბარბაროსული“ ოტომანთა იმპერია არ დაუმეზობლდა.

ამრიგად, როგორც ჩვენი კვლევის შედეგებმა ცხადყო, უთუოდ, ნდობით უნდა მოვეყიდოთ დიდი მეცნიერი-გეოგრაფოსის კლავდიოს პტოლემეაიოსის „გეოგრაფიული სახელმძღვანელოს“ იმ ადგილს, სადაც აღმოსავლეთ შავიზღვისპირეთის სამხრეთ ნაწილში, მდ. აფსაროსსა და მდ. ფასისს შორის მოქცეულ ტერიტორიაზე მითითებულია ქ. სებასტოპოლისი.

როგორც არქეოლოგიური კვლევა-ძიების საფუძველზე დასტურდება, პტოლემეაიოსის რუკის სებასტოპოლისის ქრონოლოგიურად და ხარისხობრივად შესატყვისი მდიდარი არქეოლოგიური მასალა გამოვლენილია თანამედროვე ციხისძირის (ქობულეთის რ-ნი) ტერიტორიაზე, გურია-აჭარის ზღვისპირა მიკრორაიონში. თავისი რანგით ციხისძირი პირველხარისხოვანი ძეგლია და მისი და პტოლემეაიოსის რუკის სებასტოპოლისის იდენტიფიკაციას ყოველგვარი რეალური საფუძველი გააჩნია.

არქეოლოგიური მონაპოვრების მიხედვით, ციხისძირ-სებასტოპოლისი განსაკუთრებით მომდევნო (III—V) საუკუნეებში წინაურდება, როდესაც აქ რომაული კასტელიუმიც აუგიათ (დამლიანი აგურარი). ამ პროცესის დოკუმენტური გაფორმების ბედნიერი შემთხვევის ფაქტთან გვაქვს საქმე კასტორიუსის ე. წ. TP-ის რუკის XI—XII სეგმენტის სახით. იქ დაფიქსირებულია ერთ-ერთი მნიშვნელოვანი საგზაო მაგისტრალი, რომელიც იწყება კაბადოკიის პონტოს შემადგენლობაში შემავალ, ახ. წ. IV ს. სომხეთის დედაქალაქ არტაშატში და მთავრდება ქ. სებასტოპოლისში. როგორც რუკაზე დატანილ პუნქტებს შორის არსებული მანძილის მაჩვენებლებით, ისე საგზაო მარშრუტის მიმართულებით, ამ საგზაო მაგისტრალის უკანასკნელი პუნქტი უნდა იყოს ციხისძირ-სებასტოპოლისი ანუ იგივე ქალაქი, რომელიც პტოლემეაიოსის რუკის მიხედვითაც აქვე იგულისხმებოდა.

⁴⁵² გ. გ რ ი გ ლ ი ა. ძველი კოლხეთის საქალაქო ცენტრების (პეტრა) ლოკალიზაციის საკითხები. — საქართველოს ისტორიული გეოგრაფიის კრებული. VII. თბ., 1989, გვ. 37—81.

⁴⁵³ ს. ჯ ა ნ ა შ ი ა. შრომები. VI. თბ., 1988, გვ. 257—258; ი. ჯ ა ვ ა ხ ი შ ვ ი ლ ი, ტომი. III, თბ., 1983, გვ. 149.

არ უნდა დავივიწყოთ, რომ; არქეოლოგიური მასალის მიხედვით, ციხისძირის, როგორც ძეგლის, აყვავების კულმინაციის პერიოდი სწორედ ახ. წ. IV საუკუნეზე მოდის. ასე რომ, როგორც პტოლემე-მაიოსის სებასტოპოლისის, ისევე კასტორიუსის ქ. სებასტოპოლისის ციხისძირთან იდენტიფიკაციის შესაძლებლობა ძალზე ახლოს დგას ჰუმბარტებთან. ალბათ, ნიშანდობლივია, რომ კასტორიუსის ქ. არტაშატი, საიდანაც ხსენებული საგზაო მაგისტრალი მოემართება, კაბადოკიის პონტოს პროვინციის ქალაქია, ისევე როგორც პტოლემე-მაიოსის სებასტოპოლისი; კაბადოკიის პონტოს ფარგლებში მისი ჩრდილო-აღმოსავლეთ საზღვრის კიდეზე მდებარე პუნქტია:

ჩვენი დაკვირვებით, იგივე სებასტოპოლისზე უნდა იყოს საუბარი V საუკუნის პირველი ნახევრით დათარიღებულ, ე. წ. „*Notitia dignitatum*“-ში, რომელშიც იმ სამხედრო ნაწილების სიაა მოცემული; რომელნიც პოლემონის პონტოში შემავალ არმენიის დუქსს ექვემდებარებიან. ესენია: პითია; ვალენტია; უსურბორტო; კენე პარემბოლე, სებასტოპოლისი, ზიგანა და მოხორა.

სავესებით ლოგიკური ჩანს ნოტიციის, სებასტოპოლისის, კასტორიუსის სებასტოპოლისის და პტოლემემაიოსის სებასტოპოლისის იდენტიფიკაციის დაშვება, მითუმეტეს, რომ ამ უკანასკნელში (ციხისძირში). I-II—IV საუკუნეებში რომაული კასტელიუმის არსებობა არქეოლოგიური მასალითაც დასტურდება:

პტოლემემაიოსის მიხედვით, სებასტოპოლისი პოლემონის პონტოს პროვინციის სასაზღვრო პუნქტია; რომელსაც ჩრდილოეთიდან კოლხეთი ანუ ლაზიკა ესაზღვრება. როგორც ჩანს, ახ. წ. II საუკუნის მეორე ნახევარში რომის იმპერიას ეგრის-ლაზიკის სამეფოს სამხრეთ-დასავლეთი ნაწილის ოკუპაცია მოუხდენია და იგი პოლიტიკურად პონტოს პროვინციისათვის მიუერთებია. ჩვენი აზრით, სწორედ ამ მოვლენას უნდა ასახავდეს გიორგი სინგელოზის ცნობის ის ადგილი, სადაც ნათქვამია: „სევერემ (193—211 წწ. — გ. გ.) დაიმორჩილა კოლხიკე, ე. ი. ლაზიკე“⁴⁵⁴.

ამ დროიდან, თუ ცოტა უფრო ადრე არა; ლაზიკის ხსენებული მონაკვეთი უნდა გამხდარიყო რომის დასაყრდენი პუნქტი ჩრდილოეთიდან და, განსაკუთრებით, ამიერკავკასიიდან მიმავალი გზების მაკონტროლებელი პუნქტი და აგრეთვე, საომარ მოქმედებათა შემთხვევაში, სამხედრო რესურსების მწარმოებელ ბაზად უნდა ქცეულიყო.

⁴⁵⁴ ს. ყაუხჩიშვილი. გეორგია. IV, ნაკვ. I. თბ., 1940; გვ. 68.

როგორც წერილობითი წყაროები (კასტორიუსი, ზოსიმე, Notitia dignitatum, პრისკე პანიონელი, დანიელ მესეცეტე) მოწმობენ, ლაზიკის ისტორიული გეოგრაფიის არსებული სურათი უცვლელი დარჩენილა 465 წლამდე, ვიდრე თავისი სახელმწიფოებრივი ძლიერების წინაშე მყოფი ეგრის-ლაზიკის სამეფოს მეფე გუბაზმა და მისმა შვილიმა წათემ, დიდი ბრძოლითა და დიპლომატიური ხერხების (ტახტიდან გადადგომა, დანიელ მესეცეტესთან დაახლოვება, ბიზანტიონში ჩასვლა) მთელი კომპლექსის გამოყენებით არ აიძულეს ბიზანტიის იმპერატორები, ჯერ მარკიანე (450—457 წწ.) და შემდეგ კი ლეონ I (457—474 წწ.), ლაზიკის სამხრეთ-დასავლეთ საზღვარი ხოფა-ხუფათთან გადაეტანა: ე. ი. მონერხდა ეგრის-ლაზიკის მთლიანობის აღდგენა ძველი კოლხეთის სამეფოს ისტორიულ ჩარჩოებში, დიოსკურია-სებასტოპოლისიდან მოკიდებული მდ. აფსაროს-ქოროხის სექტორის ჩათვლით (იხ. რუკა).

დასასრულს, კიდევ ერთხელ უნდა გავიმეოროთ, რომ პტოლემე-მაიოსის სებასტოპოლისი, კასტორიუსის სებასტოპოლისი და ნოტაციის სებასტოპოლისი ერთი და იგივე ობიექტი ჩანს. თავი რომ დავანებოთ არქანჯელო ლამბერტის მიერ ხალხის მეხსიერებაში შემორჩენილ ინფორმაციას, ქ. ფასისის სამხრეთით წყალში ჩაძირული სებასტოპოლისის არსებობის შესახებ, პტოლემემაიოსის ცნობა საქართველოს შავიზღვისპირეთის სამხრეთ-დასავლეთ ნაწილში სებასტოპოლისის არსებობის შესახებ არ შეიძლება ჩაითვალოს როგორც „მარტო მდგომი“. პირიქით, ჩვენ გვჯერა, რომ ცნობები ციხისძირის სებასტოპოლისზე საკმაოდაა გაბნეული ბიზანტიურ-რომაულ წყაროებში, მაგრამ, რადგან პტოლემემაიოსის სებასტოპოლისის არსებობა იურიდიულად არ იყო აღიარებული, ყოველგვარ დოკუმენტში ხსენებული სებასტოპოლისის ასოცირება ხდებოდა დიოსკურია-სებასტოპოლისთან. ამ ხასიათის მოგვიანო (VI—VII სს.) წყაროებიდან შეიძლება დავასახელოთ მოციქულების — დოროთესა და ეპიფანე კვიპრიელის — კატალოგები ანდრიას შესახებ, სადაც დიდი სებასტოპოლისის (იგულისხმება აფხაზეთის სებასტოპოლისი — ს. ჯანაშია) გეოგრაფიული მდებარეობა განსაზღვრულია სიმაგრე აფსაროსისა და მდ. ფასიდის (ფაზისის) საშუალებით⁴⁵⁵. კონტექსტის მიხედვით, ასევე უთუოდ, აჭარის სებასტოპოლისზეა საუბარი (Chronicon Paschale-

455 ს. ჯ ა ნ ა შ ი ა. შრომები. VI. გვ. 256.

ში დაცული ცნობის ერთ-ერთ ფრაგმენტში, სადაც სამხრეთიდან ჩრდილოეთისაკენ თანმიმდევრულადაა ჩამოთვლილი „...სიმაგრე აფსარე და სებასტოპოლისი და ისეს ნავსადგური და მდ. ფასიდი“⁴⁵⁶.

ექვე არ გვეპარება, რომ ანალოგიური ცნობები სულ უფრო მეტი და მეტი გამოვლინდება მას შემდეგ, რაც სათანადო საკითხებით დაინტერესებული მეცნიერული საზოგადოება გაიზიარებს ჩვენი კვლევის შედეგებს: აღმოსავლეთ შავი ზღვისპირეთის სამხრეთ-დასავლეთ ნაწილში კლავდიოს პტოლემეაიოსის რუკის სებასტოპოლისის რეალურად არსებობის აღიარებისა და მისი ციხისძირთან იდენტიფიკაციის შესახებ.

აქედან გამომდინარე, ბუნებრივია, ახლებურად უნდა შეფასდეს ეგრის-ლაზიკის სამეფოს პოლიტიკური და საისტორიო გეოგრაფიის საკითხები, სახელმწიფო საზღვრის გადანაცვლება მდ. ფასისის სამხრეთ სანაპიროდან ქ. ხოფას სექტორში, ეგრის-ლაზიკის სამეფოსა და ბიზანტია-რომის იმპერიას შორის II—VI საუკუნეებში არსებული სამშვიდობო და საომარი ურთიერთობები, მათი გამომწვევი მიზეზები და სამხედრო-პოლიტიკურ ურთიერთობათა მთელი პერიპეტეები.

⁴⁵⁶ ს, ქ ა ნ ა შ ი ა. დასახ. ნაშრ. გვ. 257.

G. K. GRIGOLIA

PROBLEME DER HISTORISCHEN GEOGRAPHIE DES KÖNIGTUMS VON EGRIS-LASIKA

Z u s a m m e n f a s s u n g

Die Stadt-Festung Petra, als Stadtzentrum des Königiums von Egris-Lasika im VI. Jh. hat eine sehr kurze Existenzgeschichte, obwohl sie eine wichtige Rolle im politischen, wirtschaftlichen und religiösen Leben des frühbyzantinischen Lasika und in der Geschichte der politischen Verhältnisse zwischen Byzanz und sasanidischen Iran erfüllt hatte. Insofern ist die Geschichte dieser Länder und Lasika in bestimmten Zeiten eng miteinander verknüpft.

Danach ist gut zu verstehen, daß es in wissenschaftlichen Kreisen großes Interesse über die Herkunft Petra, über sein weiteres Schicksal und über seine Lage gibt. Besonders wichtig ist in diesem Zusammenhang die Frage der Lokalisierung von Petra, Seit zwei bis drei Jahrhunderten diskutiert man darüber.

Unter den Fachleuten, die sich für diese Frage interessieren, gibt es Meinungsunterschiede, aber die meisten Forscher (K. Koch, D. Bakradze, S. Dshanaschia, S. Kauchtschischwili, N. Berdenischwili u. a.) nehmen an, daß Petra sich am Strand von Adsharien (eine Republik in Georgien) zwischen den Städten Kobuleti und Batumi befindet, wo beim Kurort Zichisiri auf einem hohen Hügel die Festungsrüinen erhalten geblieben sind.

Nach der Erforschung der eindrucksvollen architektonischen Reste und auf Grund der in den letzten Jahren durchgeführten archäologischen Untersuchungen ist ohne weiteres zu bestätigen, daß an dieser Stelle in der spätrömischen und frühbyzantinischen Zeit

zweifelsfrei irgendeine Stadt oder eine große Stadtähnliche Siedlung existierte.

Dennoch ist die allgemein angenommene Frage der Identifizierung von Petra und Zichisziri in ein Widerspruchsnetz geraten und die Beweisführungen scheint es wenig überzeugend.

Die archäologischen Forschungen, die wir in den letzten Jahren in Kolchis durchgeführt haben, und die kritischen neuartigen Analysen der schriftlichen Quellen: (Justinian. Novela, Prokopios von Caesarea, Agathias, u. a.) beweisen, daß der bei Prokopios von Caesarea in Zusammenhang mit Petra angeführte Hauptorientierungspunkt,—der Fluß Βοας—Phasis oder Boas—Adsham phasis, nicht der Hauptfluß von Kolchis Rion—Phasis gewesen war, wie bis heute angenommen wurde.

In der ersten Etappe der 20-jährigen Kriege (541—551) zwischen Byzanz und Iran für Lasika hat Prokopios von Caesarea den Fluß Phasis immer noch für den Fluß Tschorochi (Aphsaros—Akamphsis) gehalten:

Die Bergabzweigungen aus dem Berggrat von Lasika-Ponto, die sich südlich vom Fluß Tschorochi in 25—30 km d. h. ein Tagesmarsch befinden, stechen deutlich aus dem Felsenrelief hervor und knüpfen unmittelbar an den Strand an. Hier an dieser Stelle, auf dem Territorium der heutigen Türkei, liegt die kleine Stadt Chopä, deren Topographie, strategische Angaben und auch ihre physikal-geographische Bedingungen sehr genau der Beschreibung von Petra von Prokopios von Caesarea, entsprechen. Deshalb wurde es Petra oder Kldeeti („Klde“ auf deutsch heißt Fels) genannt. s. Karte

Die bei den Gebirgsabzweigungen von Lasika bei Chopä querschließenden Strandstreifen bildeten die physikal-geographische Grenze des historischen Georgiens, die mit der früheren politischen Grenze zusammenfällt. So war es auch im Mittelalter und hier mußte vermutlich der Verteilungsstreifen zwischen den Königtümern von Rom und Lasika in V.—VI, Jh. laufen.

Chopä liegt auf der besonderen Verbindungsstelle der See—und Landwege, wo alle wichtige Fernverkehrsstraßen aus dem Norden (Lasika), dem Süden (römisches Kaiserreich), dem Osten (Iberia) und

dem Südosten (Armenia, Persarmenia) zusammenließen. Es hat eine guten Hafen und kontrollierte auch den Seeweg. Wegen all diesen Zeichen ist Chopa der bedeutende wirtschaftliche, politische und strategische Knotenpunkt, der offenbar vom Anfang an bei den Römern das Interesse geweckt hatte hier auf einem Felshügel am Meeresufer eine Stadt-Festung zu erbauen. Auf diesem Hügel gibt es ein Kirchengebäude, welches Vermutlich die Reste der Bischofsresidenz von Petra gewesen war, und welches der Eparchie von Lasika gehörte.

Bei Chopa, im Strandviertel, wurden folgende Toponime festgestellt. Dshicha (Ziche—„Festung“), Kala-Dibi (Zichisziri—„Fuß oder Festung“) und ein sehr bedeutendes Hydronim: Petrogali (Petras Zkali—„Wasser von Petra“) oder Kldis-zkali („Felswasser“). Das Letzte ist zusammen mit anderen Angaben ein zuverlässiger Grund für die Behauptung der Identifizierung der Stadt Petra bei Chopa.

Wenn wir diese Frage so stellen klären sich alle Widerstände und Mißverständnisse, die es angeblich im ersten Teil des Werkes Prokopios von Caesarea gab, als man die Feststellung der Lage von Petra, die Grenzzone des Königiums von Lasika, das Areal des Bischofszentrums von Petra und die Erforschung anderer Fragen im Zusammenhang mit dem Fluß-Phasis-Rioni betrachtet hatte.

Nach der Identifizierung des Flusses Boas—Phasis als Tschorochi und nach der Lokalisierung der Stadt Petra als Chopa nach der Quelle Prokopios von Caesarea, scheint es ganz logisch, die Anfänge des Flusses Phasis in den Bergen von Tschaneth-Armenia zu suchen und die Beweisführung für die unregelmäßigen Siedlungen an den Flußufern, die Hauptstädte von Lasika und die Grenzrichtungen von Iberia u. a. nach den Angaben Prokopios von Caesarea durchzuführen.

In dieser Variante werden fast alle angezweifelte Abschnitte des Werkes von Prokopios von Caesarea klar und man sollte ihm mehr vertrauen, da es sich um die zuverlässigste Quelle der Königiumsgeschichte von Egris-Lasika in der frühbyzantinischen Zeit handelt.

Ausgehend von der neuen Lokalisierung von Petra stellt man selbstverständlich eine logische Frage, was stellte sich das als früheres

Petra angenommenes großartiges Denkmal von Zichisziri heraus? Nach archäologischen Forschungen wurde dort besonders in den letzten Jahren wunderschönes Material aus der spätromische und frühbyzantinischen Zeit freigelegt.

Gerade dem Versuch der Klärung dieser Probleme ist der nächste Teil dieser Arbeit gewidmet, welcher mit den Fragen der Lokalisierung der Stadt Sebastopolis verbunden ist.

In diesem Teil der Arbeit ist das Forschungshauptfach ein Abschnitt des „Lehrbuch für Geographie“ des großen Geographen Claudios Ptolemeios, in dem bei der Beschreibung der Provinz von Kabadokien eine Stelle erwähnt wurde, die zwischen den Flüssen Aphsaros und Phasis lag und im Schwarzmeergebiet als Sebastopolis bekannt war.

Wie auf Grund der archäologischen Forschungen bestätigt wurde gibt es zeitgenössische Denkmäler, die Sebastopolis nach der Karte (11. Jh.) von Ptolemeios chronologisch und qualitätsmäßig entsprechen. Sie befinden sich auf dem Territorium des heutigen Zichisziri (Kreis von Kobuleti). In dieser Hinsicht wird die Identifizierung von Zichisziri und Sebastopolis nach Ptolemeios in allen Punkten bestätigt.

Nach der archäologischen Gegenständen stand Zichisziri-Sebastopolis besonders in den nächsten Jahrhunderten (III. —V.) hoch als hier ein römisches Kastellum gebaut wurde (Ziegel mit Stempel). Wir haben es mit dem glücklichen Umstand zu tun, da dieser Prozess mit einem Segment des XI.—XII. Jh., mit der sog. Karte von Castorius dokumentiert wurde. Auf der Karte ist eine von den wichtigsten Fernverkehrsstraßen bezeichnet, die in der Hauptstadt von Armenien in IV. Jh. n. Chr. in Artaschat ihren Ursprung nahm (es gehörte damals zu Ponto von Kabadokien) und in Sebastopolis beendet wurde. Der letzte Punkt dieser Fernverkehrsstraße mußte nach den zwischenörtlichen Entfernungen und nach den Marschrichtungen, die auf der Karte angegeben sind, Zichisziri-Sebastopolis sein oder jene Stadt, die nach der Karte von Ptolemeios hier an dieser Stelle angenommen wurde.

Wir müssen nicht vergessen, daß die Blütezeit von Zichisziri nach den archäologischen Materialien mit IV. Jh. n. Chr. zusammen-

fällt. Also, die Möglichkeit der Identifizierung von Sebastopolis nach Ptolemeios, wie auch von Sebastopolis nach Castorius mit Zichisziri liegt sehr Nah an der Wahrheit. Bemerkenswert ist, daß die Stadt Artaschat eine Provinzstadt von Pontokapadokien ist, von der die obenerwähnte Verkehrsstraße ausgeht. So gehört auch Sebastopolis nach Ptolemeios zu Ponto-Kapadokien und liegt an seiner Nord — Ostgrenze.

Nach unserer Beobachtung handelt es sich um dieselbe Stadt Sebastopolis im sog. „Notitia dignitatum“, die in der I. Hälfte des V. Jh. datiert ist und in dem die Liste der Militärtruppen angegeben ist, die dem Herrscher von Armenia untergeordnet waren, welches zum Pontos Polemonos gehörte. Das sind Phithia, Valenzia, Usuriporto, kene Parembolo. Sebastopolis, Sigana und Mochora.

Ganz logisch scheint die Annahme der Identifizierung von Sebastopolis nach „Notitia dignitatum“, nach Castorius und Ptolemeios, um so mehr, als in Letzterem (in Zichisziri) nach den archäologischen Materialien ein römisches Kastellum aus III.—IV. Jh. gefunden wurde. (s. Karte).

Nach der Meinung von Ptolemeios ist Sebastopolis ein Grenzpunkt der Provinz von Pontos Polemonos, den an den Norden Kolchis d. h. Lasika angrenzt. Vermutlich hat das Römische Kaiserreich in der II. Hälfte des II. Jh. n. Chr. das Königtum von Egris-Lasika okkupiert und es politisch der Provinz von Ponto angeschlossen. Unserer Meinung nach wiederpiegelt gerade dieses Ereignis ein Abschnitt aus der Mitteilung von Georg Singelos: „Severius (193 — 211) hat Kolchike d. h. Lasike unterworfen“.

Seit dieser Zeit, wenn nicht schon früher, wurde der obenerwähnte Teil von Lasika ein Standpunkt für Rom, kontrollierende r Ort für die Straßen, die aus dem Norden und besonders aus Transkaukasien kamen, und verwandelte sich während des Krieges in eine Waffenherstellungsbasis.

Wie es die schriftlichen Überlieferungen (Castorius, Zosim, „Notitia dignitatum“, Priske aus Panion u. a.) bezeugen blieb das existierende historisch-geographische Bild von Lasika bis 465 unverändert, bis der König des Königums Egris-Lasika, Gubas und

sein Sohn Zathe (damals befand sich Lasika auf der Höhe seiner politischen Macht) die byzantinischen Kaiser Markiane (450—457) und dann Leon I (457—474) durch Kämpfe und mit politischen Mitteln gezwungen haben die süd—westliche Grenze von Lasika nach Choph-Churha zu verlegen. So gelang die Wiederherstellung der Unversehrtheit des alten kolchischen Königiums in seinem historischen Rahmen von Dioskuria-Sebastopolis bis Aphasaros-Tschorochigebiet.

Zum Schluß müssen wir noch einmal wiederholen, daß Sebastopolis nach Ptolemeios, Sebastopolis nach Castorius und Sebastopolis nach „Notilia dignitatum“ ein und dasselbe Objekt sein mußte, sogar dann, wenn wir die volkscundlich überlieferte Information von Arkan-dshelo Lambert ausser Acht lassen, daß südlich der Stadt Phasis ein im Wasser gesunkene Stadt Sebastopolis existierte. Trotzdem müssen wir die Angabe von Ptolemeios über die Existenz von Sebastopolis im süd-westlichen Teil des Schwarzmeergebietes nicht als „aleinstehende Theorie“ betrachten. Im Gegenteil, wir hoffen, daß es genügend Angaben über Sebastopolis von Zichisziri in den byzantinisch-römischen Quellen gibt, aber fast in allen Urkunden wurde dieses Sebastopolis mit Dioskuria—Sebastopolis assoziiert, weil Sebastopolis nach Ptolemeios nicht „juristisch“ erklärt wurde. Aus späteren Quellen dieser Art sind die Kataloge der Aposteln von Dorotheos und Epiphanos aus Zypern über Andreas zu erwähnen, in denen „die geographische Lage des großen Sebastopolis (hier ist Sebastopolis von Abchasien gemeint, S. Dshanaschia) durch die Festung Aphasaros und Fluß Phasidi (Phasis) lokalisiert ist“.

Nach dem Inhalt handelt es sich in einem Fragment der Mitteilung, die in Chronikon Paschale aufbewahrt ist, und in der der Reihe nach aufgezählt sind „... Festung Aphasaros und Sebastopolis, Hafen von Isis und Fluß Phasidi“, zweifellos um Sebastopolis von Adsharien.

Es unterliegt keinem Zweifel, daß die analogen Fakten mehr und mehr zum Vorschein kommen werden, nachdem die Wissenschaftler, die sich für die entsprechenden Fragen interessieren, unsere Forschungsergebnisse über die reale Existenz von Sebastopolis nach der Karte von Ptolemeios im süd-westlichen Teil des Ostschwarz-

meergebietes und über seine Identifizierung als Zichisziri teilen werden.

Ausgehend davon muß man folgendes neu bewerten: die politische, historisch-geographische Lage des Königiums von Egris-Lasika, die Verlegung der Staatsgrenze vom Südufer des Flusses Phasis in den Kreisabschnitt der Stadt Чоца, die friedlichen und kriegerischen Verhältnisse zwischen dem Königium von Egris-Lasika und den Kaiserreichen von Rom und Byzanz in II.—IV. Jh., die Kriegsursachen und alle Peripetien der militär-politischen Verhältnisse.

შ ი ნ ა ა რ ს ი

შესავალი	3
ეგრის-ლაზიკის ციხე-ქალაქი პეტრა	11
ციხისძირი-სეზასტაოლისი	78
რეზიუმე (გერმანულ ენაზე)	145

Гурам Константинович Григолиа

ПРОБЛЕМЫ ИСТОРИЧЕСКОЙ ГЕОГРАФИИ ЭГРИС-ЛАЗИКСКОГО ЦАРСТВА

(на грузинском языке)

ТБИЛИСИ

«МЕЦНИЕРЕБА»

1994

დაიბეჭდა საქართველოს მეცნიერებათა აკადემიის
სამეცნიერო-საგამომცემლო საბჭოს დადგენილებით

სბ 6032

გამომცემლობის რედაქტორი ლ. ჭვებენაძე
ტექნიკური ნ. ბოკერიია
კორექტორი ა. გოგეშვილი

გადაეცა წარმოებას 3.2.1994; ხელმოწერილია დასაბეჭდად 20.6.1994;
ქალაქის ზომა 60×84¹/₁₆; ქალაქი № 2; ბეჭედა მაღალი;
გარნიტურა ვენური; პირბითი საბეჭდი თაბახი 8.84;
სააღრიცხვო-საგამომცემლო თაბახი 8.03;

ტირაჟი 250;

შეკვეთა № 83;

ფასი სახელშეკრულებო

გამომცემლობა „მეცნიერება“, თბილისი, 380060, დ. გამრეკელი, ქ. 19

Издательство «Мецниереба», Тбилиси, 380060, ул. Д. Гамрекели, 19

საქართველოს მეც. აკადემიის სტამბა, თბილისი 380060, დ. გამრეკელის ქ. 19

Типография АН Грузии, Тбилиси, 380060, ул. Д. Гамрекели, 19